

दीक्षानन्द याच

मानसिक

उपनिषद्

মাল্যবান

জীবনানন্দ দাশ

নিউ স্ক্রিপ্ট

এ(পি)-১৪, কলেজ স্ট্রিট মার্কেট, বর্ধপরিচয়, কোলকাতা-৭০০ ০০৭

১৭২/৩, রাসবিহারী অ্যাভিনিউ, কোলকাতা-৭০০ ০২৯

রচনাকাল : জুন, ১৯৪৮

প্রথম প্রকাশ : ভাদ্র ১৩৭৭ (সেপ্টেম্বর ১৯৭০)

দ্বিতীয় নিউ স্ক্রিপ্ট সংস্করণ : মাঘ ১৪২০ (জানুয়ারী ২০১৪)

প্রকাশক :

অমিতানন্দ দাশ

৯৮৩৬২-৫০৮২৯

নিউস্ক্রিপ্ট

(১) এ-১৪, কলেজ স্ট্রিট মার্কেট

(“বর্ণপরিচয়” মার্কেট)

কোলকাতা-৭০০ ০০৭

(২) ১৭২/৩, রাসবিহারী অ্যাভিনিউ

কোলকাতা-৭০০ ০২৯

amit.mensa@gmail.com

প্রচ্ছদ : সত্যজিৎ রায়

অক্ষর বিন্যাস :

হিন্দুকো

১১বি, নবীন কুণ্ডু লেন

কলকাতা-৭০০০০৯

মুদ্রণ:

লক্ষ্মী কম্পিউটার প্রেস

টি / ২ এ / ১ গুরুদাস দত্ত গার্ডেন লেন, কলকাতা - ৬৭.

স্বত্বাধিকারী : অমিতানন্দ দাশ

দাম : ১২০ টাকা মাত্র

প্রথম সংস্করণের প্রকাশকের নিবেদন

খুব অল্প সময়ের মধ্যে লেখা এই উপন্যাসটি পাণ্ডুলিপি অবস্থায় রক্ষিত ছিল। জীবনানন্দের অভ্যাস ছিল—প্রথম লিখবার পর কিছুদিন ফেলে রাখতেন, আরও সুষ্ঠু ও পরিচ্ছন্নভাবে প্রকাশ করা যায় কিনা পরীক্ষা করবার জন্য। কিন্তু, মৃত্যুর পূর্বে পরিমার্জনা করা সম্ভব হয়নি।

ছোট ছোট অঙ্করে দ্রুত লিখনের জন্য পাঠোদ্ধার করা সহজসাধ্য ছিল না। শত কাজের ভিতরেও সমস্ত উপন্যাসটি অনুলিখন (কপি) করে দিয়েছেন পি. জি. হাসপাতালের তরুণ ডাক্তার শ্রীমান ভুমেন্দ্র গুহ রায়, এম. ডি। তাঁর স্বগ্ন অপরিশোধ্য।

অশোকানন্দ দাশ

নিউ স্ক্রিপ্ট প্রকাশিত জীবনানন্দের অন্যান্য বই

- ❖ ঝরা পালক
- ❖ ধূসর পাণ্ডুলিপি
- ❖ রূপসী বাংলা
- ❖ বনলতা সেন
- ❖ মহাপৃথিবী
- ❖ সাতটি তারার তিমির
- ❖ আলো পৃথিবী
- ❖ শ্রেষ্ঠ কবিতা
- ❖ কবিতা সমগ্র প্রথম খণ্ড
- ❖ কবিতা সমগ্র দ্বিতীয় খণ্ড
- ❖ কবিতার কথা

প্রথম সংস্করণের ভূমিকা

কয়েক বছর পূর্বে ‘মাল্যবান’ উপন্যাসটি পাণ্ডুলিপিখানা পড়বার সুযোগ পেয়েছিলাম শ্রী অশোকানন্দ দাশ মহাশয়ের সৌজন্যে এবং তখন আমার নির্দিষ্ট মত প্রকাশ করেছিলাম যে বইখানা মুদ্রিত হওয়া বাঞ্ছনীয়। জীবনানন্দের আকস্মিক মৃত্যুর পরে তাঁর কাগজপত্র ঘেঁটে তাঁর জীবৎকালে অপ্রকাশিত যে সব রচনা পাওয়া গেছে, তার মধ্যে কিছু সম্পূর্ণ ও অসম্পূর্ণ কবিতা বাদে, অন্তর্গত ছিল তিনটি গল্প এবং কয়েকটি উপন্যাস। গল্প কয়েকটি ‘অনুজ্ঞ’ পত্রিকায় প্রকাশিত হয়েছিল সতেরো আঠারো বৎসর পূর্বে তারপরে ১৩৭৯ সালের আষাঢ়ে গল্প তিনটি সংগৃহীত হয়েছিল সুকুমার ঘোষ ও সুবিনয় মুস্তাফীর সম্পাদনায়। এখন প্রকাশিত হল ‘মাল্যবান’ উপন্যাসটি। কবি জীবনানন্দকে আমরা এখন গল্পকার ও উপন্যাস রচয়িতা হিসাবেও জানছি। মনে হয় না যে এই গল্প ও উপন্যাস পাঠের ভিত্তিতে কোনো সাহিত্যপ্রেমী এমন দাবী করবেন যে জীবনানন্দ গল্পকার ও উপন্যাস রচয়িতা হিসাবে ততই মহৎ ও অবিস্মরণীয় যতটা কবি হিসাবে। তবুও মনে হয় যে জীবনানন্দের কাব্যপাঠে যাঁদের চিত্ত অনুরণিত হয়েছে—এমন পাঠক উভয় বাঙলায় হাজার হাজার—তাঁরা এই গল্প ও উপন্যাসকে, জীবনানন্দের কথা সাহিত্যকে, তাঁর সম্পূর্ণ অমেয় সৃজনী কর্মের অচ্ছেদ্য অংশ বলেই গণ্য করবেন।

প্রশ্ন উঠেছে, জীবনানন্দ কেন গল্প উপন্যাস লিখতে গেলেন, কেন কবির কর্মেই নিজেকে স্ফূর্ত্ত করলেন না?—প্রশ্নের সদুত্তর অবশ্য দিতে পারতেন কবি স্বয়ং। আমাদের ব্যাখ্যা অনুমান নির্ভর। কিন্তু যেখানে বিধাতার নির্মম বিধানে সদুত্তরটি আমাদের আয়ত্তসাধ্য হইলনি, সেখানে প্রিয় কবির সম্পূর্ণ শিল্পীসত্তা সম্বন্ধে আমাদের ওৎসুক্য চলবে নিরবধি-কাল, আমরা নিজ নিজ সীমিত অনুমান শক্তির প্রয়োগে ব্যাখ্যা রচনার চেষ্টায় থাকব।

আধুনিক বিশ্বসাহিত্যের বহু লক্ষণের মধ্যে একটি লক্ষণ দেখতে পাই যে, একই শিল্পের কর্মে একাধিক শিল্পমাধ্যমের সমাবেশ হয়ে থাকতে পারে। যিনি কবি তিনি কথাসাহিত্যকও, নাট্যকারও। উপরন্তু এ-ও দেখা যায় যে যিনি বাক্শিল্পী তিনি আবার সঙ্গীতশিল্পী বা চিত্রশিল্পী। বিভিন্ন শিল্প মাধ্যমে পারঙ্গমতার শ্রেষ্ঠ দৃষ্টান্ত অবশ্য রবীন্দ্রনাথ, কিন্তু পারঙ্গমতা না হলেও অন্তত সায়ুজ্য এবং সামর্থ্য অনেক শিল্পীতেই লক্ষ্যসাধ্য। জীবনানন্দের সমকালীন অথবা উত্তরকালীন অনেক বাঙালী লেখকই একই কালে কথা সাহিত্যিক ও কবি। বহুধা-বিভক্ত আধুনিক চিন্তের জটিলতা এতই অচ্ছেদ্য এতই দুর্জয় যে মাত্র একটি শিল্পমাধ্যমে আত্মপ্রকাশ করে শিল্পী সন্তোষ বোধ করেন না, তাঁকে ছুটে যেতে হয় নূতন নূতন শিল্পকর্মে, তাঁকে নিরত থাকতে হয় নূতন নূতন শিল্পমাধ্যমের নিরীক্ষায়। জীবনানন্দের মতো তীক্ষ্ণবিবেকী কবি যে-কোনও ভাষায়ই বিরল। আমরা যারা পাঠক মাত্র, আমরা নিঃসন্দেহে তাঁর কবিতার পরিপূর্ণ তৃপ্তিলাভ করি, তবুও মনে হয় তিনি স্বয়ং হয়তো কোথাও সাধ ও সাধ্যের ব্যবধান বোধ করেছিলেন, এবং বোধ করেছিলেন বলেই কবিতা ছাড়াও কথাসাহিত্য রচনায় কিছুটা আত্মনিয়োগ করেছিলেন। হয়তো কখনও (‘হয়তো’ বলতে হচ্ছে কেন না এ-আলোচনায় অনুমান ছাড়া অন্য কোনো ভিত্তি আমাদের আয়ত্তে নেই) তাঁর মনে হয়েছিল, মনে হয়েছিল তাঁর কবিজীবনের সেই সুকঠিন শেষ পর্যায়ে যখন শকুন্তলাস্তিত্রি কলরোলে তিনি আলোকের পাথির ও শুভ্র মানবিকতার ভোরের সন্ধান

করছেন, হয়তো মনে হয়েছিল যে কবিতাতে বুদ্ধি বা তাঁর তিমিরবিনাশী শিল্পদৃষ্টির পূর্ণ মাধ্যম মিলবে না, হয়তো মাধ্যম বদলালে তাঁর ইঙ্গিত শিল্পসৃষ্টির অনাবিষ্কৃত কয়েকটি তির্যকরেখা পরিস্ফুট হবে। তাঁর কবিজীবনের এই শেষ পর্যায়েই জীবনানন্দ ধূসর স্বপ্নের দেশ ছেড়ে চলেছিলেন দিনের উজ্জ্বল পথে, আর সেই পথে চলাতে গিয়ে আপন আবেগ জড়ানো নিভৃত চিশুর বাইরে যে অগণিত নরনারীর বাত্যাহত ব্যক্তিত্ব; গণিকা দালাল রেন্ট শত্রুর যে সনির্বন্ধতা; অপর পক্ষে বুদ্ধ সোক্রাতেস্ কনফুচ লেনিন গ্যাঁটে হ্যোন্ডেরলিন রবীন্দ্রের যে আলোকিত রোল তার সঙ্গে একাত্মতা অর্জন করেছিলেন, হয়তো তিনি অনুভব করেছিলেন যে সেই বস্তুনিষ্ঠ সময়চেতন বহির্জগতের অস্তুত আংশিক প্রকাশ কথাসাহিত্যে সম্ভব এবং সেজন্যই তাঁর অভিজ্ঞতা ও চেতনা থেকে উৎসারিত নরনারীর কাহিনী রচনায় হাত দিয়েছিলেন। জীবনানন্দের কয়েকটি প্রবন্ধে (যথা ‘কবিতার আত্মা ও শরীর’, ‘বাংলা কবিতার ভবিষ্যৎ’) দেখতে পাই তিনি নতুন যুগের ‘ভাব ও চিন্তা প্রতিভা’ ব্যক্ত করার কথা ভাবছেন, ভাবছেন ‘আজকের অব্যবস্থিত বাংলার নাটককে মহা কবিতার প্রাণস্বরূপে উদ্ভীর্ণ করে দেবার’ কথা। ভাবছেন যে বাংলা কবিতার ভবিষ্যৎকালে ‘মহা কবিতা আনতে পারে এবং কবিতায় নাট্য’। ভাবছেন ‘কেবলই খণ্ড কবিতার সিদ্ধি নিয়ে দূরতর ভবিষ্যৎ তুণ্ড হয়ে থাকবে বলে মনে হয় না।’

সেই দূরতর ভবিষ্যতের কথা ভেবেই কি এই অনন্য কবি খণ্ড কবিতায় তাঁর অবিস্মরণীয় সিদ্ধির মাধুর্য ছেড়ে নূতন রাস্তায় পা বাড়িয়েছিলেন? কিন্তু নূতন পথে অগ্রসর যদি হলেনই, আরো অগ্রসর কেন হলেন না, কেনই বা এসব রচনা নিজেই প্রকাশ করেননি? অগ্রসর হওয়ার সময় তাঁকে দেয়নি কালসুত্র। রচনাগুলি তিনি প্রকাশ করেননি হয়তো সেই কারণেই যে কারণে অনেক কবিতাও তিনি ফেলে রাখতেন, প্রথম রচনার অনেক পরে সেগুলি মার্জনা করতেন। এমন অনুমান দায়িত্বহীন হবে না যে এই নূতন শিল্পরূপায়ণের প্রথম প্রচেষ্টাটিকে তিনি চেয়েছিলেন দূরান্তরিত সময়ের পরিপ্রেক্ষিতে দেখতে।

কিন্তু অনুমানের নির্বল সূত্র ত্যাগ করে আমাদের উচিত প্রত্যক্ষ সাহিত্য কর্মটিতে প্রবেশ করা। জীবনানন্দের এই উপন্যাসটিকে শেষ পর্যন্ত আমরা সবাই তাঁর কাব্যশিল্পের সূত্রে সমন্বিত করতে চাইব। তেমনটি যখন চাইব তখন এই কথাসাহিত্যে তাঁর কবিতার অসংখ্য আভ্যন্তরীণ আভাস পাব। সে-আভাস যেমন শব্দপ্রয়োগে, তেমন বাক্যবিধিতে, বর্ণনায়, সার্বিক দৃষ্টিভঙ্গীতে। সে আভাস মূলতঃ কবিত্বের আভাস, একটি সুপরিচিত কবিত্বশক্তির আভাস, এমন ভাষায়, এমন দৃষ্টিতে, এমন অনুভূতিতে একজন বিশেষ বাঙালী কবিরই সৃজনীশক্তির মোহর আঁকা। কিন্তু কুশলী পাঠক এই উপন্যাসটিকে নেহাৎই কাব্যের দৌবারিক ভাববেন না। এমন নয় যে এই উপন্যাসটির মূল্য কেবলমাত্র লেখকের কাব্যশক্তির পরিচায়ক হিসাবে। বস্তুত, উপন্যাস হিসাবে ‘মাল্যবান’ প্রচুর সম্ভাবনাময় এবং কখনো কখনো কৃতিত্বে উজ্জ্বল। ইদানীং বিশ্বসাহিত্যের অনেক খ্যাতনামা উপন্যাসের মতো ‘মূল্যবান’ মহাকাব্যের বিশাল বিস্তৃতির পথে না গিয়ে সংহত জীবনচক্র অঙ্কিত করেছে এবং এই সীমিত চিত্রের মধ্যে আশ্চর্য শিল্পশক্তির প্রমাণ রেখেছে, চরিত্রায়নে, কথোপকথনে, কাহিনীর গতিতে। চরিত্রের মনস্তাত্ত্বিক প্রবাহ এই উপন্যাসের প্রধান আঙ্গিক কৃতিত্ব, এবং এই কৃতিত্ব পরিচ্ছন্ন রচনাশৈলীর সঙ্গে সংযুক্ত হয়ে উপন্যাসটিকে তার স্বাধীন নিজস্ব মূল্য দিয়েছে।

দ্বিতীয় নিউ স্ক্রিপ্ট সংস্করণের ভূমিকা

জীবনানন্দ রচনা করেছেন প্রায় ১৬০০ কবিতা, এক ডজন উপন্যাস, প্রায় পঞ্চাশটি গল্প ও বহু প্রবন্ধ। তিরিশের দশক থেকে মৃত্যুবধি তিনি গল্প-উপন্যাস রচনা করে গিয়েছেন, কিন্তু সেগুলির একটিও তাঁর জীবদ্দশায় প্রকাশিত হয়নি। তাঁর কবিতারও এক ক্ষুদ্র ভগ্নাংশ গ্রন্থিত হয় তাঁর জীবদ্দশায়, যদিও আরও কয়েকশো কবিতা বিভিন্ন পত্রিকায় প্রকাশিত হয়—অধিকাংশই বিভিন্ন লিটল ম্যাগাজিনে।

“মাল্যবান” তাঁর লেখা প্রথম উপন্যাস যা গ্রন্থিত হয় ১৯৭০ সালে। বাস্তবিকই, তাঁর অকালমৃত্যুর পরে কারুর ধারণাই ছিল না যে তাঁর পাণ্ডুলিপির ট্রাক্টের ভিতর এতগুলি অপ্রকাশিত গল্প ও উপন্যাস রয়েছে।

জীবনানন্দ মনে করতেন যে সমাজ ও অর্থনীতির সমস্যায় বহু মানুষের জীবন চিরকাল চক্রে ঘুরে চলেছে। এই সব পরিস্থিতি নিয়ে তিনি যে উপন্যাস লিখেছেন তার কাঠামো সাধারণ উপন্যাসের থেকে আলাদা—এই উপন্যাসের শুরুও নেই, শেষও নেই। তাঁর দু-একজন সাহিত্যিক বন্ধু দু-একটি উপন্যাস পড়ে বলেন যে এই উপন্যাস লেখার ব্যাকরণ মানছে না, তাই এগুলি চলবে না। তাই জীবনানন্দ নিজে এগুলিকে ঘষা-মাজা করে প্রকাশ করার চেষ্টা করেননি।

তাঁর নিজের কিন্তু বিশ্বাস ছিল যে মানুষের আসল সমস্যাকে পাঠকের কাছে তুলে ধরতে এরকম উপন্যাসের প্রয়োজন আছে—তাই বিশ বছরের বেশি সময়ে কয়েক ডজন খাতা ভর্তি করে এতো গল্প-উপন্যাস লিখেছেন তিনি। তিনি এও জানতেন যে ইউরোপের কিছু নামী লেখক এই ধরনের উপন্যাস লিখেছেন—যদিও জীবনানন্দের সব উপন্যাসই একান্তভাবে বাঙালীর জীবনসংকট নিয়ে।

আশা করি পাঠকেরা এই বইটি পড়ে উপভোগ করবেন।

অমিতানন্দ দাশ

প্রকাশক

৯৮৩৬২ ৫০৮২৯

সারাদিন মাল্যবানের মনেও ছিল না; কিন্তু রাতের বেলা বিছানায় শুয়ে অনেক কথার মধ্যে মনে হল বেয়াল্লিশ বছর আগে ঠিক এই দিনেই সে জন্মেছিল—বিশে অম্মাণ আজ।

জীবনের বেয়াল্লিশটি বছর তাহলে চলে গেল।

রাত প্রায় একটা। কলকাতার শহরে বেশ শীত, খেয়ে-দেয়ে কপালের নীচে গিয়েছে সে প্রায় গোটা দশেকের সময়; এতক্ষণ ঘুম আসা উচিত ছিল; কিন্তু এল না; মাঝে মাঝে কিছুতেই চোখে ঘুম আসে না। কলেজ স্ট্রিটের বড়ো রাস্তার পাশেই মাল্যবানের এই দোতলা ভাড়াটে বাড়িটুকু; বাড়িটা দেখতে মন্দ নয়—কিন্তু খুব বড়ো-সড়ো নয়, পরিসর নেহাৎ কমও নয়। ওপরে চারটে ঘর আছে—তিনটে ঘরেই অন্য ভাড়াটে পরিবার থাকে—চিক দিয়ে ঘেরাও করে নিজেদের জন্য তারা একটা আলাদা ব্লক তৈরি করে নিয়েছে—নিজেদের নিয়েই তারা স্বয়ংতুষ্টি—এ-দিককার খবর বড়ো একটা রাখতে যায় না।

ওপরের বাকি ঘরটি মাল্যবানদের; স্ত্রী উৎপলা ঘরটিকে গুছিয়ে এমন সুন্দর করে রেখেছে যে দেখলে ভালো লাগে। ধবধবে দেয়ালের গোটা কয়েক ছবি টাঙানো; একটা ব্রোমাইড এনলার্জমেন্ট: প্রৌঢ়ের, উৎপলার বাবার হয়তো, তার মা'র একটা অয়েল-পেন্টিং, মাল্যবানের স্বশুর পরিবারের আরো কয়েকটি লোকের ফটোগ্রাফ—কয়েকটা হাতে-আঁকা ছবি (কে ঐকেছে?)—ঘরের ভেতর একটা পালিশ মেহগনি কাঠের খাট, খাটের পুরুর গদির ওপর তোশকে বকপালকের মতো সাদা বিছানার চাদর সব সময়ে ছড়িয়ে আছে। দু'জন মানুষ এই বিছানায় শোয় : উৎপলা (তাকে 'পলা' ডাকে তার সমবয়সীরা আর বড়রা প্রায় সকলেই) আর তার মেয়ে মনু। মেয়েটির বয়স প্রায় নয় বছর। মাল্যবান ও উৎপলার এই বারো বছরের দাম্পত্য জীবনের মধ্যে এই একটি মেয়েই হয়েছে। কোনো দিন আর-কিছু হবে না যে তাও

ঠিক। দোতলার এই ঘরটি বেশ বড়ো, মেঝে সব সময়েই ঝকঝকে, এক টুকরো কাগজ, ফিতে, সেফটি-পিন, পাউডারের গুঁড়ি পড়ে থাকে না কখনো; ঘরের ভেতর টেবিল চেয়ার সোফা কৌচ রয়েছে কতকগুলো। সবি বেশ পরিপাটি নয়, ছিঁড়ে গেছে, ময়লা হয়ে গেছে, কিন্তু উৎপলার যত্নের গুণে খারাপ দেখাচ্ছে না। এক কোণে একটা অর্গ্যান রয়েছে; তারি পাশে একটা সেতার আর একটা এসাজ; উৎপলার আলোর জিনিস; গাইতে ভালোবাসে, বাজাবারও সাধ খুব, প্রায়ই গুনগুন করে সব সর্কর্মতার ভেতর কোনো-না কোনো একটা সুর ভাঁজছে, মাঝে মাঝে কীর্তনের সুরও; এক-এক সময় বিশেষত বাথরুম ধারাদানের সময়, বেশ জোরে গান গায় পলা। গান-টান মাল্যবান কিছুই জানে না, কিন্তু অনেকক্ষণ পর্যন্ত খুব সহিষ্ণুভাবে স্ত্রীর ষড়জ ঝষভ গান্কার টান্কার সহ্য করে যাওয়াই তার অভ্যাস, না হলে তা হয়ে উঠবে দুষ্ট সরস্বতী, তখন রক্ষা থাকবে না আর। কিন্তু তবুও বড়ো একঘেয়ে লাগে তার, স্ত্রীর গান বলেই নয়, পৃথিবীর সমস্ত গান বাজনার ওপর অত্যন্ত হতশ্রদ্ধ হয়ে পড়ে তার মন; কী করবে যে সে কিছুই ঠিক পায় না। মুখ চূণ করবে, সঙ্গে সঙ্গেই কান ঝাঁঝী করবে চোখ জ্বলে উঠবে উৎপলার তাকে থামতে বললে, গান থামতে বললে। এম্মিতেই বৌয়ের বিশেষ স্নেহশ্রদ্ধার মানুষ নিজেকে সে ক'রে তুলতে পারেনি। মাল্যবানের স্বভাব ফটফটে ফটকিরির মত। সে নিজের মনে থাকা মানুষ ; মানুষকে ক্ষমা ক'রে যাওয়া অভ্যাস, অথথা হৈ রে হিংসার ছেব ভালো লাগে না তার। শাস্তি ভালোবাসে; নিজের সুখ-সুবিধে অনেকখানি ছেড়ে দিয়েও। গানের সম্পর্কে সে স্ত্রীকে কোনোদিন কিছু বলে না বড়ো-একটা; বেশি ঝালাপালা বোধ করলে অবিশ্যি 'গান খুব ভালো করে শিখতে হয়', 'অনেকে খুব মন খুলে গায়, ভালো লাগে; মন খুলেছে ব'লে ভালো লাগে—' এরকম এক-আধটা ইশারায় অনুযোগ জানায় মাল্যবান। এ-ধরনের ইঙ্গিতের জন্য স্ত্রীর কাছ থেকে সে সত্যিই শাস্তি পায়; কাজেই পারতপক্ষে স্ত্রীকে কিছুই বড়ো একটা বলতে যায় না। নিজে মাল্যবান গানমুজরো না ভালোবাসে তা নয়। যখন সে কলকাতার চাকরিতে বাঁধা পড়েনি, পাড়াগাঁয়ে ছিল, সেই ছোটবেলায় এক-এক দিন শীতের শেষরাতে বাউলের গান শুনতে তার খুব ভালো লাগত; কোনো দূর হিজলবনের ওপার থেকে অন্ধকারের মধ্যে সে সুর ভেসে এসে তার কিশোর আঁতে ব্যথা দিয়ে যেত। কত দিন—যখন দিন শেষ হয়—দাণ্ডাগুলি খেলে যখন সে কাঁচা-কাঁচা কালিজিরা ধানশালি রূপশালির ক্ষেতের আলপথ দিয়ে বাড়ি ফিরছে, ভাটিয়াল গান শুনে মনটা তার কেমন করে উঠত যেন। সারা দিনের সমস্ত কথা কাজ অবসন্ন শোল বোয়ালের মতো দীঘির অতলে তলিয়ে যেত যেন, ঝির-ঝির ফটিক-ফটিক ঝিক-ঝিক ঝর-ঝর করে উঠত ওপরের জল : যে জল গানের মতো,

যে-গান জলের মতো চারদিককার খেজুরছড়ি, নারকোলঝিরঝিরি ঝাউয়ের শনশনানি ছায়া অঙ্ককার একটি তারার ভেতর; এক কিনারে চুপ করে বসে থাকত সে। বাপ-মাকে ফাঁকি দিয়ে কত রাত সে যাত্রা শুনতে গেছে—তারপর সেই সব গানের সুর এমন পেয়ে বসেছে তাকে যে পরীক্ষার পড়া মুখস্থ করতে করতে এক-একবার টেবিলের ওপর মাথা রেখে অনেক-ক্ষণ নিব্ব্বুম হয়ে পড়ে থাকত; কোথাও মেঘ নেই, বৈশাখ আকাশের বিদ্যুৎচমকানির মতো ভঁরে যেত মন এ-কাণার থেকে সে-কাণায়; বালিশে মুখ গুঁজে ফুঁপিয়ে উঠবার পূর্বাভাসের মতো; কিন্তু তার আগেই সে মাথা খাড়া করে অন্য পৃথিবীতে চলে যেতে চেষ্টা করত, ফোঁপাতে যেত না। মণিভূপকণ্ঠ চক্রবর্তী বলে একজন ভদ্রলোক ছিলেন—সত্যিই কি তাঁর নাম মণিভূপকণ্ঠ?—কী মানে এই নামের?—কিন্তু তবুও সকলেই তো তাঁকে এই নামে ডাকত; মণিভূপের গানের কথা মনে পড়ে; শমনহরা বোস—বুনু—বুন বোস-চৌধুরাণী নামেই বেশি খ্যাত—তার গান; সে সব দিন কোথায় গেছে যে আজ! পাড়ায়-পাড়ায় গানের বৈঠকের লোভে পড়াশুনো ফেলে যেম্নি সে আসরের এক কিনারে গিয়ে বসেছে, ওম্নি কাকা তাকে কানে টেনে-হিঁচড়ে বাসায় নিয়ে গেছেন; তবুও তার মায়ের সঙ্গে ষাট করে ফের আবার পালিয়ে যেতে ইতস্তত করেনি সে।

পলাকে এ-সব কথা কোনো দিন বলেনি মাল্যবান।

ওপরের ঘরটায় পলা (উৎপলা) আর মনু শোয়। একতলার ঘরে মাল্যবানের বিছানা বৈঠক—সমস্ত। এইখানেই সে থাকে, কথা বলে, কাজ করে, বই পড়ে, লেখে, ঘুমোয়। নিজে ইচ্ছা করে স্ত্রীর কাছ থেকে এ-রকম ভাবে বিচ্ছিন্ন হয়নি সে। দোতলায় ঐ একটা ঘরেই পলার ভালো করে কুলিয়ে ওঠে তেমন : কাজেই সে স্বামীকে নীচের ঘরে গিয়ে শোবার ব্যবস্থা করতে বলেছে। অথচ দোতলার ঘরটা একতলার ঘরের চেয়ে ঢের বড়ো—আলো বাতাস রৌদ্র নীল আকাশের আনাচ-কানাচ-কিনারা, মূল আকাশেরো বড়ো নীলিমার বেশ মুখোমুখি প্রকৃতির সঙ্গে, মানুষের সঙ্গে; একতলার পাশেই প্রকাণ্ড ছাদের একটা আশ্চর্য প্রসূতি রয়েছে, সিঁড়িটার দু-পাশ মাত্র নেমে গেলেই একতলার সমস্ত ছাদটা আকাশ রোদ কলকাতার শহরটাই তোমার; যদি ভেবে নিতে পার তাহলে পৃথিবীর নগরনাগরের ইতিহাস বারানবত বেবিলনও তোমার চোখে ফুটে উঠছে।

দুটি প্রাণী—ওপরে নিচে এই দুটি ঘরে আলাদা রয়েছে। মাল্যবানের বিয়ে হয়েছে প্রায় বারো বছর হল। বিয়ের পর দুতিন বছর পলা ঘুরে ফিরে বাপের বাড়িতেই প্রায়ই থাকত; তারপর স্বশুরবাড়িতে বছরখানেক থাকে, মনু হয়, মনুর ছ-মাস বায়েসের সময়েই বাপের বাড়ি চলে যায় আবার, সেখানে বাবার মৃত্যু পর্যন্ত বছর-দুই আরো কাটিয়ে এই বছর-সাতেক ধরে কলকাতায় স্বামীর কাছেই রয়েছে।

রাত একটা। ডান কাৎ ফিরে মাল্যবান একটু ঘুমুতে চেষ্টা করল; নানারকম কথা মনে হয়—ঘুম দূরে সরে থাকে। তারপর আস্তে আস্তে বাঁ কাৎ ফিরে মনে হল এইবারে ঘুম এলে বেশ ভালো লাগবে। কিন্তু ঘড়িতে দেড়টা বাজল, তারপরে দুটো, ঘুম এলো না; এক-একটা রাত এ-রকম হয়।

কম্বলটা ঠোঁট অঙ্গি টেনে নিয়ে চোখ বুজে আবার পাশ ফেরা গেল। কলকাতার রাস্তায় নানারকম শব্দ কানে আসে; রাত তো দুটো, শীতও খুব হুজুতে, কিন্তু কাদের

ফিটন যেন রাস্তার ওপর দিয়ে খটখট করে চলেছে: গাড়ির ভেতর মেয়েদের হাসি, বুড়ো মানুষের মোটা গলা, ছোটোদের চোঁচামেচি। মাল্যবান কব্জলের নীচে ফলিকাৎ হয়ে থাকতে-থাকতে ভাবছিল: তাই-তো, কোথায় যাচ্ছ তোমরা মুনশীরা, ফিরছ কোথেকে? ঘোড়ার খুরের আওয়াজ অনেক দূর অন্ধি স্পষ্ট শোনা যাচ্ছিল, এমন সময় এঞ্জিনের বিকট তড়পানিতে চারদিকের সমস্ত শব্দ গিলে খেল, এল, চ'লে গেল একটা লরি। মাল্যবানের মনে হল লরির এই লবেজান আওয়াজেরও একঝা সার্থকতা আছে: যেমন বালির থেকে তেল বার করতে খারা যায়, সে রকম; একে যদি চাকা-টায়ারের শব্দ না মনে করে বাদলরাতের বমবম আওয়াজ ভেবে নেওয়া যায় তবে বেশ লাগে লরির—খানিকটা চূণবালি খসে পড়ল চাতালের থেকে মাল্যবানের নাকে মুখে; বাড়িটার ভিত্তি কাঁপিয়ে দিয়ে বাপরে, একেবারে নিশ্বনের টাইডাল ওয়েভের মতো ছুটে গেছে লরিটা: নাকমুখ থেকে চূণকাম ঝেড়ে ফেলতে ফেলতে মাল্যবান ভাবছিল। রাস্তা দিয়ে কাহার-মাহাতোরা একটা মড়া নিয়ে যাচ্ছে। কার যেন প্রাইভেট মোটর মাল্যবানদের বাড়ির কাছেই এসে থামল—গাড়িটা কী রকম বিগড়ে গেছে যেন; দু'চারজন মিলি সেটা মেরামতের চেষ্টায় আছে; মবিল-অয়েলের গন্ধ মাল্যবানের নাকে ঢুকল, মন্দ লাগল না তার; একটা ঝাঁড় ফুটপাথ দিয়ে যেতে-যেতে ঝঁগ-ঝড়ম করে উঠল একবার; সামনেই কাদের যেন দোতলার থেকে একটা বড়ো, অস্পষ্ট কান্না ও ঝগড়ার শব্দ শোনা যাচ্ছে; মাল্যবানের ঘরের পাশেই ড্রেনের কাছে একটা নেড়ি কুকুর ঘুর-ঘুর করে রাবিশের ভেতর থাবা নখ চালিয়ে বালি ঘড়ির বাজনা বাজিয়ে চলেছে যেন অনেক-ক্ষণ থেকে; কী চায় সে? কী পাবে? খানিকটা দূরে একটা বাড়ির ভেতর মহলে—হয়তো কলতলায়, ভাঁড়ার ঘরে, গুদোমে দুটো বেড়াল মরিয়া হয়ে ঝগড়া করছে অনেক-ক্ষণ ধরে; তাদের একটি নর ও একটি মাদী নিশ্চয়ই; এই শীত রাতে এই আশ্চর্য শীতে নিদারুণ কপট ঝগড়ার আড়ালে হলো আর মেনির এই অত্যন্ত রঞ্জনচ্ছাস কাম নিয়ে জীবনের যৌনস্বতুর; যৌন আশ্বনের এই প্রাণান্তকর দৌরাশ্ব্যে—মাল্যবান দাঁত ফাঁক করে ভাবছিল, বেড়ালের লুটোপুটি ঝুটোপুটি কান্নাকাটি করে; বেশি বয়সে বিয়ে করেছিল, একজন সাদা দাড়িঅলা বুড়ো প্রফেসরকে ঠিক এই রকমই করতে দেখেছিল মাল্যবান প্রায় বছর-সাতেক আগে—সন্ধ্যারাতেই; —গলাখাকারি না দিয়ে প্রফেসরমশাইর ঘরে রবারসোল জুতো পায়ে ঢুকে পড়েছিল মাল্যবান: কিন্তু এ-রকম মইমারণ হইমারণ ব্যাপার যে হতে তা তো ধারণা করতে পারেনি সে; কিন্তু সেই থেকে উপলব্ধি করেছে মাল্যবান যে সমস্ত ইতর প্রাণীকে বিশ্লেষণ করে যে মহৎ সংশ্লেষে উপস্থিত হওয়া যায় তারি আশ্চর্য সন্তাপ উচ্ছাস ও পুঙ্খানুপুঙ্খ ইতরতাকে ভাঙিয়ে চারিয়ে জ্বালিয়ে নাচিয়েই মানুষ তো হয়েছে মানুষ।

ভাবতে ভাবতে অবসন্ন হয়ে মাল্যবান কাৎ হয়ে শুয়ে পড়ল আবার। ঘড়িতে বাজল আড়াইটে, কিন্তু ঘুম তো এল না।

আজ ছিল তার জন্মদিনের তারিখ। বেয়াল্লিশ বছর আগে—এন্নি অস্বাণ মাসের বিশ তারিখে কলকাতার থেকে প্রায় দেড়শো মাইল দূরে বাংলাদেশের একটা পাড়াগাঁয়ে সে জন্মেছিল। সেখানে খেজুরের জঙ্গল বেশি, তালের বন কম, শুপুরীর গন্ধ হয়তো সবচেয়ে বেশি। এন্নি শীতে খেজুরগাছের মাথা চেঁছে একটা নল বসিয়ে গলায় হাঁড়ি বেঁধে দেওয়া হয়, সমস্ত শীতের রাতে ফোঁটা ফোঁটা রস বরতে থাকে, মাছি-মৌমাছি ছোটো ছোটো রেতো প্রজাপতি, বড়োগুলোও সেই হাঁড়ির রসে সাঁতার কাটছে, পাখনা নাড়ছে, ম'রে আছে; কুয়াশা নির্জন ঠাণ্ডা নিবিড় শেষ রাতে দেখা যায় এই সব। এন্নি শীতের রাতে ধানের ক্ষেত শূন্য হয়ে পড়ে আছে—হলদে নাড়ার গ্যাজে সমস্ত মাঠ রয়েছে ছেয়ে, শীত পেয়ে দু-একটা বাঘ নেমে আসে; এন্নি উদাস রাতে ফেউগুলো অন্তত খুব হাঁকড়ায়; শ্মশানে 'হরিবোল' যেন কোন দূর কুয়াশাপুরুদের রলরোল বলে মনে হয়; লক্ষ্মীপেঁচা ডাকতে থাকে, ঘুম ভেঙে বাইরে গিয়ে দাঁড়ালে দেখা যায় শীতের কুয়াশার সে কোন অস্তিম পোচড়ের ফাঁকে-ফাঁকে বৃহস্পতি কালপুরুষ অভিজিৎ সিরিয়াস যেন লঠন হাতে করে এখান থেকে সেখানে, সেখান থেকে এখানে কোন সুদূরযানের পথে চলেছে, কেমন একটা আশ্চর্য দূর পরলোকের নিক্ণ শোনা যায় কেন?। কোনোদিন কুয়াশা কম—সাদা মেঘ আছে—একফালি গড়ানে মেঘের পাশে—নিজের কেমন যেন একটা বৃহৎ আলোর শরীর নিয়ে থেমে আছে চাঁদ। পঁচিশ সাতাশ বছর বয়স পর্যন্ত পাড়াগাঁয় সে ফিরে ফিরে যেত, এই সব তার দেখবার শোনবার জিনিস ছিল, কিন্তু তার পর পনোরোটা বছর কেটে গেল এই শহরই হল তার আস্তানা, একটা কাঁচপোকা মৌমাছি শামকল মৌচুম্বকি জোনাকির কথা মনেও পড়ে না তার, আকাশের নক্ষত্রগুঁড়িগুলোর দিকে ফিরেও তাকায় না সে।

ভাবতে ভাবতে আকাশের রূপালি সবুজালি আশুনগুঁড়িগুলোর কথা ভুলে গেল সে। পনোরো বছর চাকরির পর গত মাসে আড়াইশো টাকা মাইনে হয়েছে, এর আগে মাইনে ছিল একশো পাঁচানব্বই; প্রায় পাঁচ বছর ধরে একশো পাঁচানব্বই টাকাই মাইনে ছিল; তার আগে মাইনের ব্যাপারে বড়ো গরমিল ছিল। সাহেবদের অফিস বটে, কিন্তু এক সময় অফিসের অবস্থা এত খারাপ ছিল যে, যে নামমাত্র মাইনেয় মাল্যবান ঢুকেছিল অনেক বছর পর্যন্ত তার দুর্ভোগ তাকে সহ্য করতে হয়েছে। এই সময় কোনো কোনো কেরানী অফিস ছেড়ে চলে গিয়েছিল, কিন্তু মাল্যবান যায়নি, বরং যত্ন করে এই অফিসেই খেটেছে সে; আজ রাতে তার মনে হয় তার অনেক দিনের খিদমদগারির পুরস্কার সে পেয়েছে।

খিদমদগারি? কী আর বলবে সে। পূর্বপুরুষেরা তাকে যেমন শক্তি সুযোগ দিয়েছেন তাতে দেশের, মানুষের, আইনের, চিকিৎসাবিজ্ঞানের জন্য, এমন কি পড়াশোনায়ও নিজেকে উৎসর্গ করবার কোনো পথ আর নেই। সে সব পথে যদি যেত কেউই তাকে মানত না; মানত কি? লক্ষ্য উঁচু রাখলেও যে নিচে পড়ে ল্যাংচায় কে মানে তাকে? কাজেই এই পনেরোটি বছর বসে ধীরে ধীরে বটমলি বিগল্যাণ্ড ব্রাদার্সের অফিসের জন্য খেটেছে; কী করবে সে আর কী করতে পারে?

বি.এ. পাশ করে আইন পড়েছিল, কিন্তু তখনই এই অফিসের চাকরিটা পায়; চাকরিটা নিল সে।

মাঝে-মাঝে মনটা বুঝুর দিয়ে ওঠে বটে : উকিল হলে মন্দ হত না হয়তো, বেশ স্বাধীন ভাবে থাকতে পারত, কারু তক্কাই রাখতে হত না, ব্যবসায় উন্নতি করতে পারলে মানুষের কাছ থেকে ঢের মর্যাদাও পাওয়া যেত। মনে হয় এক-এক সময়ে এই সব। কিন্তু মফস্বলের বার-লাইব্রেরীগুলোর দিকে তাকিয়ে....কলকাতার বড়ো-বড়ো এম.এল, ডি. এল. কী করে টাকা রোজগারের বাপারে জেলা শহরের কমিটি পাশ পি. এল-এর কাছে হেরে যাচ্ছে কোথাও-কোথাও—দেখে-শুনে মনে-মনে মাঝে-মাঝে হাসে—অহঙ্কারে নয়, আত্মসৌকর্যে নয়, কিন্তু নিজের ক্ষমতার খর্বতা হাড়ে-হাড়ে অনুভব করে। মাল্যবান বুঝতে পেরেছে যে-কাজ সে করছে এর চেয়ে খুব বেশি ভালো-কিছু কোনোদিনই সে করতে পারত না; হয়তো নিমকির দারোগা হত কিংবা সুপারিনটেন্ডেন্ট, গভর্নমেন্টের চাকরির ছকে পড়ে গেলে একেবারে সবচেয়ে বড়ো কেরানীসাহেবও যে সে হতে পারত তা নয়; টাকার দিক দিয়ে খানিকটা লাভ হত বটে, টাকা সে চায়ও, খুবই চায়, কিন্তু আরো অনেক জিনিস চেয়েছিল সে: বিদ্যা সবচেয়ে আগে: অনেক দূর পর্যন্ত লেখাপড়া করবার সাধ ছিল, অনেক জিনিস শিখতে ইচ্ছা, বুঝতে ইচ্ছা; নিজের মনটা যে নেহাৎ কেরানীর ডেস্কে-আঁটা নিখেট, নিরেস কিছু নয়, মানুষকে সেটা বোঝাবার ইচ্ছা। নানা রকম ইচ্ছা—মনে অনেক রকম ভালো সুশৃঙ্খল কাটকাঠামের কথা জেগে ওঠে যে তার, মানুষকে সে তা জানাতে চায়; এক-এক সময় মনে হয় অফিসের কাজ ছেড়ে নিজের জীবনটাকে সে কোনো মহৎ কাজের ফেনশীর্ষে—ধরো কোনো উন্মত্তজনাময় কর্মসংঘের মধ্যে নিয়ে ফেলুক; জীবনটাকে এ-রকম অফিসে চেপে সাপটে মেরে লাভ কী? টাকা— পারিবারিক সচ্ছলতা—এগুলোকে এমন ঘাসের বিচি, ধুন্দুলের বিচি, রামকাপাসের আঁটা ব'লে মনে হয় এক-এক সময়! স্টিক হাতে নিয়ে গোল দীঘিতে ঘুরতে ঘুরতে মনে হয় একটা বড়ো বাজপেয়ে সভায় বেশ মার্জিত ভঙ্গিতে আবেগের বিরাট অকুলপাথারে নিজেকে আশ্চর্যভাবে নিয়ন্ত্রিত করে বক্তৃতা দেবার অদ্ভুত ক্ষমতা আছে তার:

পোলিটিক্‌সে বাঙালীরা আজকাল গুজরাট মারাঠি ইউ-পিওলাদের কাছে পদেপদে ভুড়ু খেয়ে ফিরছে—ভাবতে ভাবতে রক্ত কেমন যেন হয়ে ওঠে তার, বাঙালীর মান সম্মান ফিরিয়ে আনবার জন্য বড়ো নয়াল আণ্ডনের মতো দাউদাউ করে উঠতে ইচ্ছা করে তার—বিপ্লবের থেকে বিপ্লবে—ফ্রান্স রুশ স্পেন চীন সমস্ত বিপ্লবের—ইয়ে—সুনাগ্রুড়ায় নতুন দুন্ধের উল্লাসে নবীন পৃথিবীর জন্যে। ভাবতে ভাবতে বাঙালীর কথা ভুলে যায় সে। অনেক-ক্ষণ পরে মাল্যবানের মাথা ঠাণ্ডা হয়; গোলদীঘির একটা বেঞ্চিতে ধীরে-ধীরে চুপ ক’রে গিয়ে বসে সে তখন; একটা বিড়ি জ্বালায়। ক্ষিধে পেয়ে ওঠে, বাড়ির দিকে রওনা হয়।

একটা কথা ঠিক : মাটি নিচে গেঁড় আর কন্দ খাওয়া শূয়োরের মতো (আপার গ্রেডের) অফিসগিরিই তার সব নয়; এক জোড়া রেশমী স্টকিঙ, বার্গিশকরা নিউকোট, তসরের কোট, পরিপাটি টেরি, সিগারেটকেস ও ফুটবলগ্রাউণ্ডের বেঞ্চি দিয়ে নিজেকে চোখঠার দিতে সে ভালোবাসে না। এই সবের চেয়ে সে আলাদা।

খবরের কাগজ সে রোজই পড়ে; কিন্তু স্পোর্টস রেস রাহাজানির দিকে একটু বেশি ঝুঁকে পক্ষে নয়; কোথাকার অন্তঃপুরে, আদালত কী রকম হাঁড়ি ভাঙল, বায়োস্কোপে কি থিয়েটারে কী আছে—এসব সম্বন্ধে কোনো আগ্রহ বা আস্থাদ এ বেয়াল্লিশ বছরে মধ্যে এখনও সে তৈরি করে নিতে পারেনি। খবরের কাগজে তবুও সে আশাতীত প্রয়োজনীয় নানা জিনিস খুঁজে পায়। অফিসের থেকে ফিরে চুকট জ্বালিয়ে অনেক-ক্ষণ সে খবরের কাগজ নিয়ে ব’সে থাকে; একে একে মনের ভেতর নানা রকম সাধ-সংকল্প খেলা করে যায়; ভেঙে চুরমার হয়। তারপর অবসন্ন হয়ে পেপারটা সে রেখে দেয়; মনে থাকে না বিশেষ কিছু : কোনো কিছু সত্যিই শিখেছে বলে উপলব্ধি করতে পারে না। বিছানায় শুয়েশুয়ে ভাবে নিজে সে অবিশ্বি পার্নেল বা চিত্তরঞ্জন হতে পারবে না—কোনোদিনও না—কোনো প্রক্রিয়ায়ও না—কিন্তু পার্নেল বা চিত্তরঞ্জন বাঙালীর মধ্যে আজকালই যদি না জন্মায় তাহলে এ-জাতের ভরসা খুব কম। উনিশ-শো-উনত্রিশ সালের একটা রাত্তির শুয়েশুয়ে এই সব কথা ভাবছিল যখন মাল্যবান; সেই জন্মই সে এই রকম ভাবছিল।

ঘড়িতে প্রায় সাড়ে তিনটে বাজল মাল্যবান দেখল বিছানায় চিৎ কাৎ হয়ে ভেবেই চলেছে ক্রমাগত; এত ভাবায় হৃদয় শুকিয়ে যায় শুধু, কোনো তীরতট পাওয়া যায় না, আসে না চোখে এক পলক ঘুম। আন্তে আন্তে সে উঠে বসল; বিছানায় ছারপোকা আছে—কিন্তু ঘুমের ব্যাঘাত ছারপোকাকার জন্য নয়; এর চেয়ে ঢের বেশি আরশোলা হুঁদুর মশা পিসুর ঘাঁটিতে লম্বা নির্বিবাদ টোকশ ঘুমে কত রাত কাটিয়ে দিয়েছে। রাস্তার একটা গ্যাস ল্যাম্পের আলো ঘরে ছিটকে পড়েছিল খানিকটা; স্লিপার

খুঁজে নেওয়া গেল, পায়ে দিয়ে লাল-নীল-চেককাটা কস্বলে সমস্ত শরীরটা মুড়ে সে ধীরে ধীরে সিঁড়ি বেয়ে দোতলায় গিয়ে উঠল—নিঃশব্দে খানিকটা এগিয়ে মুঞ্চ হয়ে তাকিয়ে দেখল নেটের মশারীর ভেতর মনু ও পলা কেমন নিশ্চিন্ত ভাবে ঘুমুচ্ছে—কেমন শান্ত প্রীত নিঃশ্বাস তাদের। একটা ভারি নিঃশ্বাস প্রাণের ভেতর প্রচুর চুষনে টেনে নিল সে; সমস্ত শরীরকে আত্মদম্বন্ধ করে আস্তে আস্তে নিঃশ্বাস ছাড়তে লাগল সে; ভালো লাগল তার। ভালোই লাগল তার ঘুমন্তদের দিকে তাকিয়ে : স্ত্রী সন্তানকে সচ্ছলতায় রাখা, তাদের জীবনে খানিকটা সুখ সুবিধে শান্তির ব্যবস্থা করা—মাঝারি জীবনের এ উদ্দেশ্য এ শীত রাত মাল্যবান সিদ্ধ দেখছে ব'লে। নিজের ঘুম হচ্ছিল না তার—এরাই বা এই শীতের মধ্যে কী করছে ঘুমিয়ে? জেগে? দেখবার জন্যই সে ওপরে এসেছিল। দেখা হল। মাল্যবান সুস্বাদ পেল, কেমন স্নিগ্ধ শারীরিক মনে হল তার রাত্রিটাকে, রাত্রির এই নিব্বোর সময়টাকে। এখন নীচের ঘরে যেতে হয়। কিন্তু তবুও মাল্যবান গেল না সহসা। মশারীর খুঁট তুলে এদের খাটের পাশে প্যাঁড়াগাঁর পউষরাতের নিশ্চুপ ডানার পাখির মতো এসে স্নিগ্ধ নৈঃশব্দে—এদের জাগিয়ে?—ব'সে থাকতে চায়। কিংবা বসবেও না মনুর কপালে আলতো হাত বুলিয়ে দেবে—কস্বলটা স্ত্রীর বুক থেকে সরে গেছে, তুলে গুছিয়ে দেবে আলতো। তারপর নিজের ঘরে চ'লে যাবে সে।

কিন্তু নেটের মশারী তুলতেই ব্যাপারটা হল অন্যরকম। উৎপলা জেগে উঠে প্রথম খব খানিকটা ভয় খেলে; তারপর বিছানার ওপর উঠে বসে তার সমস্ত সুন্দর মুখের বিপর্যয়ে—মুহূর্তেই সে ভাবটা কাটিয়ে উঠে মরা নদীর বালির চেয়েও বেশি বিরসতায় বললে, 'তুমি!'

‘এসেছিলাম।’

‘এ সময় তোমাকে কে আসতে বললে।’

‘দেখতে এলাম, তোমরা কী করছ।’

‘যাও, তোমার মেয়ে নিয়ে যাও, কাল থেকে এ আমার সঙ্গে আর শোবে না। মেয়েটার দাবনা ঘেঁষে, বাপ রে, একটা ডান যেন।’

‘কে আমি?’ মাল্যবান দাঁড়িয়ে থেকে বললে। খাটে বসল না, একটা কৌচে ব'সে বললে, ‘না, মেয়েটিকে শুধু দেখতে আসিনি, আমি—’

‘আ, গেল যা! বসলে! রাত দুপুরে ন্যাকড়া করতে এল গায়ন। হাত পা পেটে সোঁথিয়ে কস্বল জড়িয়ে এ কোন ঢঙের বলির কুমড়ো সেজে বসেছে দেখ। ও মা! ও মা!— বেরোও! বেরোও বলছি!’

‘তুমি ঘুমুচ্ছিলে—তোমার ঘুম ভাঙাতে আসিনি তো আমি—’

‘বলি, বলির কুমড়ো, দু’ফাঁক হবে, না এখানে থাকবে?’

‘ঘুমোচ্ছিলে, ঘুমোও।’

‘ঘুমোচ্ছিলে, ঘুমোও! আর, গৌসাইয়ের কুমড়ো—’

‘কেন, কুমড়ো-কুমড়ো করছ, উৎপলা—’

‘এখানে বসে থাকা চলবে না এখন।’

‘আমি একটু ব’সে আছি, —তোমার ঘুমের ব্যাঘাত হবে না। আমি এই কৌচে বসে আছি; মনু ঘুমুচ্ছে; ঘুমিয়ে পড়।’

উৎপলা গলাটা পরিষ্কার করে নিল; একটানা ছ’ঘণ্টা ঘুমিয়ে বেশ সজীব সুস্বাদ হয়েছে শরীর; সরস কঠিন গলায় বললে, ‘দরমুজ নিয়ে ইঁদুর মেরে ফেলেছি সব আমার ঘরের। তবুও যদি এক-আধটা থাকে জার্মান কল পেতে রেখেছি। ও-সব চালাকি চলবে না। ঘুম বড়ো বালাই আমার। ভালো চাও তো নিচে চ’লে যাও।’

মাল্যবান চুপ ক’রে বসেছিল। সে চ’লে গেছে না কৌচে বসে আছে সে-দিকে না তাকিয়ে অন্ধকারে কিছু না বুঝতে পেরে উৎপলা বললে, ‘ইশ, একেবারে ঘুম ভাঙতেই চেয়ে দেখি মস্ত বড়ো একটা ড্যাকরা মিনসে কশ্বল জড়িয়ে খাটের পাশে দাঁড়িয়ে রয়েছে। সমস্ত বুকের রক্ত বিম বিম ঝাকর-ঝিম ক’রে উঠল আমার।

‘কিন্তু দেখলে তো, আমি দাঁড়িয়ে আছি।’

‘এ-রকম ভাবে ফের যদি আমাকে ভয় দেখাতে আস—’

‘ভয় দেখাতে তো আমি আসিনি, উৎ—’

‘না, এসেছেন রূপ দেখাতে। ফের আমার ঘরের ভেতর ঢুকেছ কি রাত বিরেতে—’ দাঁতের ওপর দাঁত চেপে কেমন একটা অদ্ভুত নিরেট নিগ্রহময়তায় বললে উৎপলা।

মাল্যবান শীতের রাতে নিঃশব্দতা ও অতিদীর্ঘতা, যে-দীর্ঘতা নিঃশব্দতা, যে নিঃশব্দতা স্নিগ্ধতা (হতে পারত; কতবার পাড়াগাঁর রাতে হয়েছিল) সে-সব সুর কেটে যাচ্ছে উপলব্ধি ক’রে, উৎপলা যে গুমোটের সৃষ্টি করেছে সেটাকে হাঙ্কা ক’রে দেবার জন্য সরু গৌফে তা দিয়ে একটু হেসে বললে, ‘রাত বিরেতে ওপরে চ’লে এলে উচ্চিৎড়ের কাবাব বানিয়ে দেবে নাকি আমাকে, পলা!’ ব’লে নিজেই হাসল মাল্যবান; হাসিটা এক বগগা টের পেয়ে থেমে গেল; খানিক-ক্ষণ চুপ ক’রে থেকে শেষে বললে, ‘আমি আজ এসেছিলাম—আমার আজ কেমন ঘুম চ’টে গেল—আমার আজ ঘুম হচ্ছিল না কিনা—’

‘ঘুম হচ্ছে না ব’লে পরের ঘুমের নিকুচি করতে হবে?’

‘তা নয়।’

‘তবে আবার কী!’

‘আমি এসেছিলাম—’ মাল্যবান মাথা হেঁট করে খতিয়ে কী বলবে অনায়াসে সেটা স্থির করতে না পেরে কিছু বলতে গেল না আর।

উৎপলা বললে, ‘এই যে আমার ঘুমটুকু নষ্ট ক’রে গেলে এর বাক্বি পোয়াতে আমি বেলা আটটা-ন’টার আগে উঠতে পারব না!’

‘তা উঠো। যখন ঘুম পোষাবে তখন উঠবে, এর আর কি কথা!’

‘কাল সমস্তটা দিন মাথা ধ’রে থাকবে।’

‘সকালে উঠে গরম-গরম চা খেয়ো।’

‘চা খেলেই ধরা সেরে যায়? এমন বেকুব!’

‘তোমার তো স্মেলিং সল্ট আর মনেথল রয়েছে—’

‘তাইতেই মাথা ধরা সারে! হুঁ! ঘনিগাছে ঘুরতে ঘুরতে মুখ ফাঁক করে বলেছে বুঝি জয়নাথের বলদটা?’

উৎপলার গায়ের ঝালে মশারীর ভেতরটা বেশ গরম হয়ে আছে, খড়ের উমের ভেতর যেন শুয়ে আছে মনু আর পলা; মানুষ না হয়ে সে যদি সারস হত তাহলে কৌচে না বসে কোন যুগে ওদের ঐ নীড়ে জাপটে বসে থাকত সে; ভাবছিল মাল্যবান।

‘এক-আধটা এ্যাসপিরিন খেয়ো; কিন্তু ওগুলো বিষ ভালো জিনিস নয়, না খেলেই ভালো।’

‘এই যে ঠাণ্ডা লাগল আমার তরাসে যাতে জেগে উঠে, কতগুলো ন্যাকড়া ছিঁড়ে ছোটো ছোটো সলভের মতো পাকিয়ে নাকের ভেতর সৈঁধিয়ে হাঁচতে হবে; কাল সমস্তটা দিন এই আমার কাজ; ভাবতে গেলেও মনটা খিঁচড়ে যায়; ছোঃ!’

মাল্যবান কৌচের থেকে উঠে এসে খাটের পাশে ভাঙা হাতলের হাঙ্কা চেয়ারটা টেনে চুপ করে বসল গিয়ে।

অ্যাসপিরিনের কৌচের থেকে উঠে এসে খাটের পাশে ভাঙা হাতলের হাঙ্কা চেয়ারটা টেনে চুপ করে বসল গিয়ে।

‘অ্যাসপিরিনের শিশিটাও তো ফুরিয়ে গেছে, একটা পিলও যদি থাকে—’

‘কাল এক ফাইল কিনে আনতে হবে।’

‘কাল সকালে চা আমাকে ক’রে দিতে হবে।’

‘করে দেব।’

‘তিন চার কাপ চা লাগবে আমার।’

‘গরম গরম চা সর্দি মাথাধরার বেশ কাজ করে।’

‘হ্যাঁ, সর্দি জমেই তো এই মাথাধরা।’

‘এখনই ধরল?’

‘না, তত ধরেনি; তবে ভোরের বেলা হবে, খোয়া পাথরের ওপর হাতুড়ি পেটাচ্ছে যেন ঝগড়ুর বৌ—সেই কালো হয়ে লম্বা হয়ে সোমথ মাগীটা। বাবা রে!’ আড়ামোড়া ভাঙতে ভাঙতে আশ্চর্য আরাম বোধ করে আশ্বেপে চেষ্টিয়ে-মেচিয়ে উঠে উৎপলা বললে, ‘হাতুড়ি পেযাবে মাথার ভেতর, এই হয়ে এল আর কী। আমি বিছানার থেকে উঠতে পারব না। তুমি চা এনে আমার খাটের পাশে রেখে দিয়ো তো বাপু।’

‘মনু কি ঘুমিয়ে আছে?’

‘ঘুমিয়ে আছে ওর ঠাকুরের থানে।’

‘তার মানে?’

‘ঠাকুরের থানে দশায় প’ড়ে আছে।’

‘জেগে আছে?’ মাল্যবান বললে, ‘ভাকব মনুকে?’ কিন্তু মনুকে ডেকে দেখবার কোনো চেষ্টা না ক’রে মাল্যবান বললে, ‘আজ সারারাত ঘুমের টিপই এল না আমার চোখে; কেমন যেন হয়ে গেল; এক ফোঁটা ঘুম হল না।’

‘কাল তোমার কটার সময় অফিস?’

‘সাড়ে দশটায়।’

‘আমি তো উঠব খুব দেরি করে : হয়তো আটটা-নটা; তখন আমাকে চা করে দিতে পারবে?’

‘ঠাকুর দেবে। আমি দেব না হয়।’

‘উৎপলা সমস্ত শরীরে লেপ মুড়ি দিয়ে বালিশে মাথা পেতে বললে, ‘নাও, মশারীটা গুঁজে দাও তো মনুর পায়ের দিকে।’

‘মশা তো নেই, মশারী টাঙাবার এক বাতিক তোমার।’

‘মশা নেই, ইঁদুর আছে, মশারী না গুঁজলে পা কেটে খেয়ে যাবে।’

মশারী ঠিক ক’রে দিয়ে মাল্যবান চেয়ার থেকে উঠে দূরে একটা ময়লা তেলচিটে সোফায় গিয়ে বসল। উৎপলা বালিশে মাথা গুঁজে হাত পা খিঁচিয়ে আলসেমি ঝেড়ে হাই তুলল, তুড়ি দিল, লেপটা ভালো ক’রে জড়িয়ে নিল সর্বাঙ্গে। তারপর মাল্যবানের দিকে আন্দাজি নজরে একবার তাকিয়ে নিয়ে বললে, ‘বসলে? বসলে যে বড়ো?’

‘কী করব?’

‘যাও—নীচে যাও।’

‘সেখানে গিয়ে কী হবে?’

‘এরকম কতক্ষণ বঁসে থাকবে শুনি—’

‘তোমার সঙ্গে কথাবার্তা বলব—’

‘দাঁতে ঠেকে যাবে জিভ বেশি কথা বলতে গেলে। দাঁতকপাটি হয়ে যাবে। দাঁতে চামচ ঢুকিয়ে চাড়া দিয়ে—টেকির পাড়া দিয়েও খুলতে পারা যাবে না আর—নাও, সুঁড় সুঁড় করে সঁরে পড় দিকিনি—উৎপলা পাশ ফিরে শুল।

মাল্যবান বঁসে রইল কনকনে ভিজে শীতে কেমন ন্যাতাজোবরার মতো। কাজ নেই, কথা নেই, চোখ বোজা নেই, নড়াচড়া নেই; কোনো কথা সে ভাবছিল বঁলে মনেও হচ্ছিল না।

‘কী রকম মানুষ তুমি!’

‘বঁসে তো রয়েছে শুধু।’

‘এতে আমার ঢের অস্বস্তি।’

‘কী করতে হবে তাহলে?’

‘চলে যাও।’

‘ঘুমোবে এখন?’

‘মুখে নুড়ো ঠেলে দেব আমি বেহায়া মড়াদের! ঘুমোবে? ঘুমোবে? রাত তিনটের সময়—’কেঁদে ফেলল হয়তো উৎপলা। কিন্তু তবুও সে তো বালিকা বধু নয়—প্রায় তিরিশ পেরিয়ে গেছে। মাল্যবান একটা দমে যাওয়া নিঃশ্বাস ফেলে বললে, ‘যা—ই।’

একটু পরে ফিরে তাকিয়ে চড় খেয়ে সেঁটে চড়িয়ে দেবার মতো গলায় উৎপলা বললে, ‘তবুও বঁসে রইলে!’

‘কৈ, তোমার চোখেও তো ঘুম নেই আর।’

‘তোমার জিভে আছে; নিচে নেমে যাও শীগগির; যাও—নামো—’

‘যাচ্ছি, কিন্তু রাত তো ফুরিয়ে গিয়েছিল প্রায়।’

উৎপলা বিছানার ওপর উঠে বসল। এবার সে কথা বলবে না আর, একটা বিষম-কিছু করে বসবে মনে হল। কিন্তু মাল্যবান নিজের ভেতরে ঢুকে পড়েছিল; উত্তরপক্ষ কী করছে না করছে দেখল না সে, চোখেই পড়ল না তার কিছু। বললে মাল্যবান, ‘কাল বিশেষ অঘ্রাণ গেল; ঠিক এই অঘ্রাণ মাসের বিশ তারিখে আমার জন্ম হয়েছিল। তোমাকে হয়তো এক-আধবার বলেছি—মনে আছে তোমার? নিজেরি বলি কিছু মনে থাকে না। এই দিনটায় ঢের ভাববার কথা ছিল; বেয়াল্লিশটা বছর চলে গেল জীবনে। সুবাতাস আর কুবাতাসের কত কাটাকাটি হল। কাটাকাটি এখনও চলছে—চলবে যে-পর্যন্ত না মাটিতে মাথা রাখি। কিন্তু লালকমল নীলকমল কালোবাতাস সাদাবাতাস মনপবন আর চাঁদের বুড়ি মিলে কেমন যেন অপার্থিব করে

তুলেছে জীবনটাকে। আমি মাটির মানুষ তো—মাটি ছাড়া টাল সামলতে পারব না—হাওয়ার চেয়ে সোনার শরীর ভালো, তার চেয়ে মাটির শরীর; চলে গুড়ে, নারকোলের ঝাঁঝে, কপ্পুরে ফোঁপড়ায় নবান্নের গন্ধে নবান্নের মতো। তুমি আর আমি; তোমার কাছে এসেছি তাই। বসেছি তাই। দাও, দেবে না?

একেবারেই দিতে যে না পারে উৎপলা তাও নয়, দিয়েছে মাঝে মাঝে, গোড়ার দিকে খুব মন মজিয়েও দিয়েছে বটে, কিন্তু তারপরে টান ক'মে গেছে, খুব বেশি কমে গেছে—দু'দিক থেকে সমান অনুপাতে যদিও নয়;—উৎপলা জানে সব; মাল্যবানও জানে দাম্পত্যজীবনের অনেকগুলো দিক না হলেও চলে আজ উৎপলার, শাড়ি গয়না খাওয়া-দাওয়া আরাম-বিরাম ফেলা-ছড়া বিলাস-স্বাধীনতা হলেই হল তার, মাল্যবানের কিন্তু কোনো কোনো বিশেষ দিক এখনও চাই-ই যেন, অনেক দিনের ভেতরে এক-আধ দিন অস্তুত চাই, মাটির দিকটাই চাই, সোনার দিকটাও নয়, মাটিই চাই, কিন্তু নিজের সোনার ঝিলিক মাঝে-মাঝে মাল্যবানকে দেখালেও গত পাঁচ ছয় বছর ধরে মাটির সঙ্গে কোনো যোগ নেই উৎপলার—সে তো আকাশের মেঘ জলভরানত নীল মেঘ নয়—সাদা কড়কড়ে মেঘ-দূরতম আকাশের।

উৎপলা চুলের সিঁথি অন্ধি লেপ টেনে শুয়ে পড়ল। মাথায় রক্ত উঠেছিল তার, কিন্তু মাথাটা ঠাণ্ডা রাখতে হবে—ঘুমোতে হবে। নায়েব গোমস্তা চাকর বাকর রাক্ষস খোক্ষস লালকমল নীলকমল ভ্যাক-ভ্যাক করেছে—তার ভেতর সে ঘুমিয়ে পড়েছে—এরকম ব্যাপার কতবার তো ঘটেছে তার জীবনে। আজো ঘুমোতে হবে।

‘আজ বিশেষ অঘ্নাণ,’ মাল্যবান বললে, ‘পিতৃলোক মাতৃগণ মিলে জন্ম তো দিলেন; টের ভালো ব্যবহার হতে তো পারে জীবনের; তা হয়েছে? হয়নি? হবে? বোঝা কঠিন; মাঝে-মাঝে তুচ্ছ বেনে-বৌ পাখির চেয়েও বেশি বনেতি ব'লে মনে হয় সব; খাচ্ছি দাচ্ছি সংসারের বেনেগিরি করছি। আছে অনেক ফাঁক, আলো, নানা রকম বড়ো আকাশ ঘাস ও-সব পাখিদেরও; কিন্তু সালতামামি আর সালপাহলির গোলকধাঁধা ছাড়া কিছু কি আছে মানুষের?’এই সব, আরো অনেক সব বলতে চাইল মাল্যবান; কিন্তু বলাটা তার না হল সাহিত্যের ভাষা না হল নিজেদের মুখের ভাষা; মানুষের জল রক্ত অশ্রু ঘামের মধুসুধার ভাষা তো এরকম নয়। মাল্যবান টের পেল। এবারে সে না সাজিয়ে গুছিয়ে একেবারে রক্ত ঘাম সুধা স্বাভাবিক প্রাণের ভাষায় কথা বলবে। কিছুক্ষণ দাঁতো কথা ছেঁদো কথার পর সত্যিই যখন বারোয়ারী, বাজার বাসরঘরের কথা মুখে এল তার, নাক ডাকার শব্দ শুনে মাল্যবান টের পেল উৎপলাকে নিয়ে তার চলবে না কিছুতেই, তবুও চালাতে হবে মৃত্যু পর্যন্তই। বাংলাদেশের শতকরা নব্বই জন স্বামী-স্ত্রীর জীবনেই এই নিষ্ফলতা, কিন্তু অনেক ক্ষেত্রেই স্বামী-স্ত্রীরাই সেটা ঠিক

মাল্যবানের মতো উপলব্ধি করতে পারে না; যেসব স্ত্রী-স্বামীরা সেটা করে, একটা ভাঙা গেলাসের কাচগুলোকে জড়ো করে জোড়াতাড়া দিয়ে প্রত্যেকবারই জল খেতে হয় তাদের : নারী-পুরুষের সম্বন্ধ স্বামী-স্ত্রী ব্যাপার বিয়ে জিনিসটা শ্রেষ্ঠ কারিগরের কাচের গেলাসের মতো সহজ ও কঠিন; ভাঙবেই; জল খেতে হবেই; একটার বেশি গেলাস কাউকে দেওয়া হবে না; সে যদি তা জোর করে বা চুরি করে নেয় সেটা অসামাজিকতা হল। দর্শনী বিজ্ঞানীরা মাথা ঘামিয়ে বিয়ে রদ, বিয়ে খণ্ডন করে আবার বিয়ে, যদৃচ্ছা বিয়ে করবার কথা পেড়ে যাচ্ছেন বটে, কিন্তু টাকাওয়ালা জাতিগুলোর টাকাওয়ালা মানুষদের সম্পর্কে এ-সব সমাধানের কিছু কিছু মানে থাকলেও বেশি কোনো মানে নেই, মাল্যবানদের মতো গরীবজাতির গরীবদের পক্ষে কোনো মানেই নেই কেবলি বিয়ে-খণ্ডন ও যদৃচ্ছা বিয়ের। গরীব জাতিদের সমাজগুলো মজস্তালি সরকারের মতো হেসে পেট ফাটিয়েই মরে যাবে কেবলি বিয়ে খসিয়ে নতুন বিয়ে-সম্পর্কের ভেতর মানুষকে ঢুকে পড়তে দেখলে, কিংবা বিবাহসম্পর্ক তুলে দিয়ে মেয়েপুরুষের স্বাধীন সেয়ানা মেলামেশায় রাষ্ট্রকে হিতার্থী বিজ্ঞানধর্মী পরিচালক হিসেবে ঘুরে বেড়াতে দেখলে। সেয়ানা স্বাধীন মেলমেশার অন্ত খুঁজে পাবে কিং বিজ্ঞান—আকাশের তারা পাতালের বালি যদিও গুণে ঠিক করেছে বিজ্ঞান। সেয়ানা স্বাধীন মেলামেশার কল্যাণের অন্ত খুঁজে পাবে হিতার্থী বিজ্ঞানী রাষ্ট্র? কোনোদিনও না। কিন্তু সেরকম হিতার্থী বিজ্ঞানী রাষ্ট্রই বা আসছে কোথায়? কোনো দিকেই না। খুব একটা গরীব জাতের গরীব মানুষ মাল্যবান। তার চেয়ে ঢের দুঃস্থ নিষ্পেষিত মানুষ আছে; তাদের অবস্থা আরো ঢের খারাপ—কিন্তু তাদের পেটের সমস্যা এ-সব সমস্যাকে অনেকটা চেপে রেখেছে; এ-সব সমস্যার সমাধানেও তাদের বেপরোয়া বা মরিয়া বা সাহসিক স্বচ্ছলতা আছে—যেমন অন্য এক হিসেবে উঁচু শ্রেণীর ভেতরে আছে। কিন্তু মুস্কিল হচ্ছে মাল্যবানের মতো মধ্যশ্রেণীর মানুষদের নিয়ে। মাল্যবান কি নিম্নমধ্যশ্রেণীর—না, মধ্যমধ্যশ্রেণীর? খুব সম্ভব নিম্নমধ্য বিভাগের লোক সে। কিন্তু সমস্যাটা সমস্ত মধ্য শ্রেণীতে কেমন দুর্বিসহভাবে পরিব্যাপ্ত হয়ে রয়েছে, অথচ বাঙালী মধ্যশ্রেণীরা অন্তত ভাতকাপড় পেলে কেমন সুখে শান্তিতে ঘরকন্না করতে পারে দেখবার জিনিস। স্বামী-স্ত্রীর সম্বন্ধ তো দূরের কথা—স্ত্রী-পুরুষের সম্বন্ধ সম্পর্কেও সৃষ্টির কারণকরণশালিকার ভেতর কোনো সুখশান্তির নির্দেশ নেই তো। কিন্তু বাঙালী স্বামী-স্ত্রীদের প্রেম ও যৌন জীবনে সুখ আছে, শান্তি আছে শতকরা একশো জনেরই তো : ভাবছিল মাল্যবান একটু বিষণ্ণ শ্লেষে হেসে উঠে। উৎপলা শীত রাতের কী এক পরমত্বের ভেতর ডুবে গিয়ে নাক ডাকাচ্ছে—মাল্যবানকে কেমন

সহজ দিব্যতায় বিদায় দিয়ে, অথচ মাল্যবানকে নিজের ইচ্ছার বিরুদ্ধে, রুচির বিরুদ্ধে, অশ্রমে, কামনার টানে, বেশি লালসায় রিরংসায় উৎপলার মতন একজন ভালো বংশের সুন্দর শরীরের নিচু কাণ্ডজ্ঞানের নিরেস মেয়েমানুষের কাছে ঘুরে-ফিরে আসতে হবে নিজের মৃত্যু পর্যন্ত কী নিদারুণ ভাবে, কেমন অধর্মের মতো, কেমন হাতে পায়ে ধরে মেয়েটির কখনো-বা ঘরের শাস্তি কখনো-বা বাইরের সুনাম রক্ষা করবার জন্যে, কখনো-বা লালসা অতিকিচিৎ প্রণয় এসে উৎপলার দিকে মাল্যবানকে হিঁচড়ে টানছে বলে।

আকাশে অনেক তারা, বাইরে অনেক শীত, ঘরের ভেতর প্রচুর নিঃশব্দতা, সময়ের কালো শেরওয়ানীর গন্ধের মতো অন্ধকার; বাইরে শিশির পড়ার শব্দ, না কি সময় বয়ে যাচ্ছে; কোথাও বালুঘড়ি নেই, সেই বালুঘড়ির ঝিরিঝিরি শিরি-শিরি ঝিরি-ঝিরি শব্দ : উৎপলার ঠাণ্ডা সমুদ্রশব্দের মতো কান থেকে ঠিকরে—মালবানের অন্তরাহ্নায়।

দোতলার ঘরটার লাগাও বাথরুম ছিল। বাথরুমটার থেকে বেরিয়ে বেশ খানিকটা ছাদ পাওয়া যায়। সমস্ত ছাদটা বড়ো মন্দ নয়। কিন্তু অন্য ভাড়াটে পরিবারটি ছাদের বেশির ভাগটাই প্রায় নিজেদের জন্য আলাদা করে রেখে দেওয়া দরকার মনে করেছে। কয়েকটা বেশ সুন্দর সবুজ তাপুলিন টাঙিয়ে চমৎকার একটা পার্টিশন করা হয়েছে। পার্টিশনের ওদিকে থাকে ওরা; এদিকে একটা ডেকচেয়ার, গোটা-দুই বেতের চেয়ার, তেপয়, জলচকি, সেলাইয়ের কল, মনুর পড়াশুনার বই। কোনো তিন বা একটা হারমোনিয়ম বা সেতার নিয়ে সমস্ত সকালবেলাটা গড়িমসি করে কাটিয়ে দিল উৎপলা।

এ-জায়গাটা তার খুব ভালো লাগে।

দুপুরবেলা রোদ খুব চড়চড় করে ওঠে বলে খানিকটা সময় বাধ্য হয়ে তাকে ঘেঁ ভেতর থাকতে হয়। কিন্তু সূর্যটা যেই একটু হেলে পড়তে থাকে তাপুলিনের ছায়ায় ডেকচেয়ারটা টেনে নিয়ে বসে গিয়ে উৎপলা: গুন গুন করে, অথবা সেলাই; পড়ে নভেল, মনুকে পড়ায়, এস্রাজ বাজায়।

মাল্যবান সঙ্কের সময় মাঝেমাঝে ছাদে আসে; একটা চেয়ারে এসে অনেক-ক্ষণ চুপ করে বসে থাকে। মাঝেমাঝে মনুকে ডেকে ইতিহাস ভূগোল পৃথিবীর কথা ধর্মের কথা মনুষ্যত্ব মানুষের জীবনের মানে—প্রথম মানে—মাঝারি মানে—বিশেষ করে অস্তিম্ব অর্থ সম্পর্কে অনেক জিনিস একে একে শেখাতে যায় সে। মেয়েটির সব সময়ই সে-সব ভালো লাগে না—মেয়েটিও ভালো লাগে না মাল্যবানের; কিন্তু অনেক সময়ই মেয়েটি খুব নিরিবিলা শোনে; ভাসা ভরা চোখ তুলে কীভাবে কেউ কি তা বলতে পারে। উৎপলা বলে : মেয়েটা একেবারে বাপের গৌঁ পেয়েছে। শুনে ভালো লাগে মনুর। কিন্তু নিজে মাল্যবান মেয়েকে যে মাত্রাতিরিক্ত ভালোবাসে তা নয়; স্ত্রীর জন্যও প্রমাণ শ্রদ্ধা ভালোবাসা রয়েছে তার। কিন্তু এদের জন্যই সে প্রাণে বেঁচে ফিট

সার্থক হয়ে রয়েছে; সে কথা ভাবা হয়তো ভুল। মনটা তার অনেক সময়ই একটা মুনিয়ার বা মেঠো হুঁদুরের মতো আকাশে আকাশে ফসলে ফসলে ভেসে যেতে চায়। বেশি-ক্ষণ এ-ছাদে বসে না সে; ধুতি চাদর পরে বেরিয়ে যায়—ময়দানে গেলেই ভালো হত; কিন্তু গোলদীঘিতেই যায়; ছড়ি হাতে করে অনেক রাত অন্ধি পাক খায় সে—অনেক কথা ভাবে—কেরানীর ডেস্ক ও উৎপলার স্বামীত্ব থেকে নিজেকে ঘুটিয়ে—(কিন্তু কোনোটাই খুব নির্বিশেষে দানা বাঁধা নয়)—সে অনেক রকম আলতো জীবন যাপন করে। তারপর অবসন্ন হয়ে একটা বেঞ্চিতে গিয়ে, একটা চুরুট জ্বালায়; ক্ষিদে পায়; বাড়িতে ফিরে আসে।

দোতলার বাথরুমে মাল্যবানকে চান করতে দেয় না উৎপলা।

‘অফিসে যাবার সময় সাত-তাড়াতাড়ি চান করে তুমি জল ময়লা করে ফেল—তুমি বাপু নিচের চৌবাচ্চায়ই নাইবে—’

‘কিন্তু যে-দিন অফিস নেই?’

‘হ্যাঁ, সে-দিনও।’

অতএব নিচেই চান করে মাল্যবান। এক-একদিন তবু গামছা কাপড় নিয়ে দোতলার স্নানের ঘরের দিকে যায়।

‘এক টব আন্দাজ জল ধরে রেখেছি—ও-সব ফুরিয়ে যাবে—’

‘এখনও তো কলে জল আছে।’ বলে মাল্যবান।

‘এই তো এখুনি মনু চান করতে যাবে।’

‘আচ্ছা, বেশ, সে তৈরি হয়ে নিক, ওর মধ্যেই আমার হয়ে যাবে।’

‘নিচের চৌবাচ্চার কী হল?’

‘কেন, পাশের ভাড়াটেরাও তো সেখানে চান করে না, দোতলায় তাদের একটা বাথরুম আছে, সেখানেই তো তাদের সকলের কুলিয়ে যায়।’

‘আরে বাবা, টেকির সঙ্গে তর্ক। তাদের তো পুকুরের মতো বাথরুম। তাদের আর আমাদের।’

‘লোকও তো তাদের অনেক; কিন্তু নিচের চৌবাচ্চায় তবুও তো কেউ চান করতে যায় না।’

‘ওদের বাড়িতে পুরুষ মানুষ আছে যে যাবে? যে-কটি আছে, তাও তো মেয়েদের পাশে-পাশে ফেরে। না হলে মেয়েমানুষের গোসলখানায় কখনো মিনসেরা ঢোকে?’

মাল্যবান একটু উইটুই করে নিচের চৌবাচ্চায় চলে গেল।

একদিন আবার স্নানের সময় উৎপলাকে বললে, ‘দেখ, নিচের জল বড়ো ঠাণ্ডা।’

এত শীতে জল গরম পাবে কোথায় তুমি। বললে উৎপলা, ‘ঠাকুরই তো রয়েছে, তাকে দিয়ে এক কেটলি জল গরম করিয়ে নিতে পার না?’

‘তা পারি বটে,’ মাল্যবাণ অবসর মতো একটু ভেবে নিয়ে বললে, ‘কিন্তু ও-রকমভাবে গরম জলে চান করলে বড্ড বদ অভ্যেস হয়ে যায়। শরীর ও খারাপ হয়।

‘কী চাও তাহলে।’

‘তোমাদের টবের জল আমি একটুও ছেঁব না, ট্যাপের নিচে একটু বসব।’

‘দিক কোরো না বাপু, মনু এই চানে যাচ্ছে—’

‘তা আসুক না, আমার সঙ্গেই আসুক।’

‘তোমার সঙ্গে আসবে!’ উৎপলার চোখ দুটো পাক খেয়ে ঠিকরে উঠল, ‘বুড়ো বাড়ির দেইজিপনা দেখ। না, না, ও-সব হবে না;। নিচে যাও—নিচে যাও তুমি?’

‘এই কথা বলো তুমি?’

মাল্যবান একটু চুপ করে দাঁড়িয়ে নিচে চলে গেল। অফিস যাওয়া পর্যন্ত স্ত্রীর সঙ্গে একটা কথা বলতে গেল না—অফিস থেকে ফিরে এসেও না। কিন্তু দেখা গেল তাতে কারুরই কিছু এসে যায় না। কাজেই বাধ্য হয়ে তাকে আড়ি ভাঙতে হল। আড়ি ভাঙতে গিয়েও দেখে স্ত্রীর মানই বেশি। কাজেই আড় ভাঙবারও প্রয়োজন হয়ে পড়ল।

মাল্যবানের তবুও পথ কাটা হয় না।

ছুটির দিন একদিন বললে, ‘নাঃ, নিচে আমি আর চান করতে পারব না।’

উৎপলা সে-কথায় কানও দিতে গেল না।

‘পঁচিশ দিনের মধ্যে একদিনও যদি জল বদলানো হয় নিচের চৌবাচ্চার। পচা জলে চান করে অসুখ করবে আমার।’

‘শলগ্রামের কথা শোনো,’ উৎপলা বললে, ‘কানে ধরে কাজ করিয়ে না নিলে পচা জল বেনো জল সাত ঘাটের জল এসে খায় মানুষকে। চোখ কান বুজে ঠাকুর-চাকরের ঘাড়ে চান করা চলে কি? ফাঁকি দেওয়ার অভ্যেস তো ওদের আঁতুরের থেকে। জল কেন বদলাবে, কী দায় ওদের!’

‘আমি নিজে তবে বাসি জল খালাস করে চৌবাচ্চায় ঝাড়ু লাগাব রোজ? নতুন জল রাখব?’

‘চাকরকে নাই দিলে তাই করতে হয়। এটা তো কোনো অপমানের কাজ নয়—’

উৎপলা সেলাই করতে করতে বললে, ‘তোমার নিজেরই তো সুবিধে।’

‘কিন্তু এ-দু’-বাড়ির এত চাকর-ঝির সামনে চৌবাচ্চার বাসি জল নিকেশ করব

আমি চৌবাচ্চার ছাঁদার ন্যাতা খসিয়ে?’ মাল্যবান পায়চারি করতে করতে থেমে দাঁড়িয়ে একটু বিলোড়িত হতে উঠে বললে।

‘খসাবে তো।’

‘ঝিগুলো দাঁড়িয়ে-দাঁড়িয়ে হাসবে?’

‘কেন, বলো তো? এরকম হ্যাংলা ঝি কোথায় দেখলে তুমি!’

‘আমি দেখেছি। তুমি দেখবে কী করে! সংসারের তুমি বড়ো জান কি না। কত রকম জীব আছে! কী দেখেছ তুমি!’

‘থাক, ও-সব জেনে আমার কী দরকার!’

মাল্যবান বললে, ‘তাই বুঝি? সংসারের বার তুমি?’

উৎপলা শেমিজ টাকতে-টাকতে কোনো উত্তর দিল না।

এই যে আমি নিচে চান করি, মাল্যবান আবার পায়চারি করতে করতে বললে, ‘তুমি মনে কর এতে তোমার খুব নামডাক?’

উৎপলা ঠোঁটের ভেতর সূঁচ গুঁজে শেমিজটা নেড়ে-চেড়ে দেখছিল; বললে, ‘বড্ড ছিঁচকে তুমি।’

‘আমি?’

‘একটা কথা নিয়ে এত বাড়াতে পার—’

‘ওপরে কল রয়েছে, বাথরুম রয়েছে, অথচ আমি চৌবাচ্চায় চাকর-বাকরদের মতো নিদের পর দিন চান করি—ও-দিকের ভাড়াটেরাই বা কী মনে করে।’

উৎপলা ঠোঁটের থেকে সূঁচ নামিয়ে একটা নিঃশ্বাস ফেলে বললে, ‘এ সব ন্যাকড়া তারা দেখতেও যায় না। বড়ো মন নিয়ে পৃথিবীতে জন্মেছে। একটা ঢ্যাঙা মিনসেকে চৌবাচ্চায় সামনে দাঁড়াতে দেখলেই তারা হেসে শুয়ে ফড়বে? নিজের বাপকে দেখে চোখ ওল্টাবে?’

মাল্যবান পায়চারি করতে করতে এক জায়গায় থেমে দাঁড়িয়ে বললে, ‘সে-দিন শুনলাম মেজগিনি বলছেন, চাকরবাকরদের চৌবাচ্চায় কেরাণীবাবুটি চান করেন, জল না-কি কলকাতায় সোনার-দরে বিকোয় নাকি মেজদি—এই সব, এই সব, ছ্যাং, শুনে চান ক’রে উঠে মাথার লোম খাড়া হয়ে পড়ে—’

‘কে বলছিল এই কথা?’

‘মেজোঠাকরণ।’

‘তা সংগুপ্তির মেয়ে তো এই রকমই বলবে।’

‘ঠিকই তো বলেছিল।’

‘ঠিকই যদি বলেছিল, তুমি মুখে কৌঁচা গুঁজে চোরের মত চ’লে এলে যে!’

‘আমি কী করতে পারি। পরের বাড়ির বি-বৌদের সঙ্গে ঝগড়া করতে যাব? কী বল তুমি, উৎপলা?’

উৎপলা সেলাই করে চলেছিল, সূঁচটা আবার ঠোটে-দাঁতে আটকে নিয়েছে, বললে, ‘পরের বাড়ির বৌ তো বললে, কিন্তু পরের বাড়ির ভাতার-ভাসুরদের গুনিয়ে যারা এই রকম কথা বলে—’

মুখের কথা না শেষ করে থেমে গেল উৎপলা।

মাল্যবান এক জায়গায় দাঁড়িয়ে পড়েছিল, একটা ছেঁড়া তেলময়লায় ঘামনো-চোবানো কৌচে বসল সে, আশ্বে আশ্বে বললে, ‘যাক। আসল কথা হচ্ছে এক গা লোম নিয়ে খোলা জায়গায় দাঁড়িয়ে বৌ-বিদের আনাগোনা চোখমারা মুখটেপার ভেতর চান করতে জুং লাগছে না আমার। এক-একটা বৌ ওপরে রেলিঙে ভর দিয়ে ঠায় দাঁড়িয়ে আমার চান দেখে ; যেন শিবলিঙ্গের কাকস্নান হচ্ছে—সমুদ্রস্নান হচ্ছে।’

উৎপলা কল চালাতে চালাতে বললে, ‘তাহলে কি বলতে চাও, দরজা-জানালা বন্ধ করে এক হাত ঘোমটা টেনে তুমি ওপরের বাথরুম গিয়ে ঢুকবে আর মেয়েমানুষ হয়ে আমি নিচের চৌবাচ্চায় যাব—ওপরের বারান্দায় ভিড় জমিয়ে দিয়ে ওদের মিনসেগুলোকে কামিখে দেখিয়ে দিতে?’

‘না, তা কেন? ছেঁড়া সেটির ছারপোকাকীর কামড় খেতে খেতে একটা বেশি কামড়ে যেন অস্বস্তি বোধ করে মাল্যবান বললে।

‘হ্যাঁ, হ্যাঁ সেই রকম হলেই তো ভালো হত।’

‘আমার কথাটা তুমি বুঝলে না।’

‘আরে বাবা, সব বুঝি আমি। দেখেছি অনেক জমিদারের ছেলেদের আমি, আঘন পোষের শীতে একটা পুকুর-ডোবা পেলেই ঝাঁপিয়ে জাপটে চান করছে। চোখ জুড়িয়ে গেছে দেখে। এক ফোঁটা জলের জন্য মেয়েমানুষের কাছে এসে হামলা।

মাল্যবান উশখুশ করে উঠে গেল।

ছুটির দিন ছিল। চৌবাচ্চা ছাড়া আরো অনেক কথা বলবার ছিল। কিন্তু বলবে কাকে? শোনবার লোক কই? অনুভূতির সমতা নেই, সরসতা নেই; ছাদে খানিক-ক্ষণ চুইমুই চুইমুই করে হেঁটে থেমে—বসে থেকে মাল্যবান ঘরের ভেতর ঢুকল। একটা চেয়ারে বসে বললে, ‘জীবনের সাতাশ-আটাশ বছর আমিও তো পুকুরে চান করেছি।’

‘বেশ করেছ।’

‘জমিদারের ছেলেদের কথা বললে কিনা। কিন্তু কলকাতায় পুকুর পাব কোথায় বলো তো দেখি।’

‘চৌবাচ্চাই কলকাতার পুকুর।’

‘বলেছ। কিন্তু গামছা পরে চান করতে হয়—চারদিকে মেয়েরা থাকে—’

‘হাঁচতে কাশতে রূপও বেরিয়ে পড়ে রূপলালবাবুর। মেয়েরা হেঁসেলের ছাঁচড়া পুড়িয়ে আড়ি পেতে থাকে রূপলালবাবুকে দেখবার জন্য। হেঁসেলে দুধ ধরে যায়—গায়ে গায়ে ঠাসঠাসি মাছপাতরি হয়ে রূপই দেখে মেয়েরা রূপসাগরের—’

মাল্যবান আশ্বে আশ্বে নিচে নেমে গেল। বিছানায় শুয়ে শুয়ে ভাবল: আজ অফিস ছুটি ছিল, কথা বলবার ছিল ঢের, কিন্তু উৎপলা মনে করবে, বুড়ি খুলে বসেছি—পুরুষমানুষ হয়ে। মেয়েমানুষ—পুরুষমানুষের অন্তঃসার ও ইতিকর্তব্য সম্বন্ধে ধারণাও বটে এই মেয়েটির! কোথায় পেল সে এ ধারণা? কে শিক্ষা দিয়েছে তাকে? অপ্রেম—হয়তো অপ্রেমই শিখিয়েছে উৎপলাকে।

একটা চুরুট জ্বালিয়ে মাল্যবান ভাবল, ‘পুরুষমানুষ’ হয়ে এসব মেয়েদের কাছে জীবনের বড়ো বড়ো হডামদডাম কথা ছাড়া কোনো মিহি কথা বলতে যাওয়া ভুল। কোনোদিন যদি তারা সেধে শুনতে আসে সেই অপেক্ষায় থাকতে হয়। সেটা সুফলা জিনিস হয়। হয়? চুরুটে কয়েকবার টান দিয়েই মাল্যবান ভাবল : কিন্তু সেরকম ভাবে উৎপলা আসবে না কোনোদিন। বারোটা বছর তো দেখা গেল। এই স্ত্রীলোকটি মিষ্টি হোক, বিষ হোক, ঠাণ্ডা হোক, আমার জীবনের রাখা ঢাকা সবুজ বনে আতার স্কীরের মতো কথাগুলো অতার স্কীরের মতো কথাগুলো শুনতে আসবে সে-পাখি ও নয়। ওর চেহারা যদি কালো, খারাপ হত, তাহলে তো চামারের মেয়েরও অযোগ্য হত। একটা মোদ্দাফরাসকে নিয়ে ঘর করছি আতাবনের পাখির মতো—নেই সেই পাখিনীকে চেয়ে আমি—

কিন্তু নিজের চিন্তাধারণা ও উপমার কেমন একটা আলঙ্কারিক অসহজতায়—অস্বাভাবিকতায়ও বিরক্ত বীতশ্রদ্ধ হয়ে উঠল মাল্যবানের মন। জিনিসটা ঠিক এই রকম নয়—অন্য একরকম। কিন্তু কী রকম? যে রকমই হোক, কোনো সহজ স্বাদ নেই জীবনে—খাওয়া দাওয়া শোয়া ঘুমোনের স্থূল স্বাদগুলোকে সূক্ষ্ম হতে চেয়ে গোলমাল করে ফেলল।

‘তোমার মাইনে তো আড়াই শো টাকা হল—এখন একটা কেলেঙ্কারি ঘোচাও তো।’

‘কী করতে হবে?’

‘ছাদে পাথর্পাঁড়ি পেতে খাওয়ার পক্ষপাতী আমি নই। উৎপলা বললে।’

‘দিব্যি তো গায়ে বাতাস লাগিয়ে আলোয় আলোয় মাছের কাঁটা বেছে খাওয়া হয়’, মাল্যবান যেন নাকের আগায় চশমা ঝুলছে তার, এম্মিভাবে, একদৃষ্টে, সনির্বন্ধতায় উৎপলার দিকে তাকিয়ে বললে, ‘আম্বি যুপসির থেকে বাঁচোয়া না ছাদের আলোয়? ছাদে খাওয়াটা তো বেশ। আমার তো বেশ ভালো লাগে।’

‘ছাদটা একটা আস্তাকুঁড় হয়ে থাকে’

‘সে আর কতক্ষণ?’

নিজে তো অফিসের মুখে দিব্যি চাকলা গিয়ে ছুট করে গাছের মাথায় চড় গিয়ে কিনা—কী দিয়ে কী হয়—ঝামেলা হামলা আমি একা বসে পোয়াই আর কী।

‘এঁটো গড়াতে থাকে অনেকক্ষণ?’

‘ঠাকুরের সঙ্গে ঝি পীরিত করবে, ঝির হাতে ঠাকুর খইনি টিপবে— তারপরে তো এঁটোর কথা মনে পড়ে—’

‘এই রকম?’ মাল্যবান মুখে দু-একটা কাল্‌মেঘ ঘনিয়ে এনে বললে, ‘কতক্ষণ ফেলে রাখবে? দু-তিনঘণ্টা?’ একটু চুপ থেকে মাল্যবান বললে ‘বড়ো বেয়াদব তা হলে—’ আবার খানিক-ক্ষণ তাকিয়ে থেকে কথা ভেবে ঠিক করে নিয়ে মাল্যবান বললে, ‘এ-বিটাকে উঠিয়ে দিলে হয়।’

‘না, সে সবের কোনো দরকার নেই।’

‘এই না বললে ঠাকুরের সাথে পীরিত করে?’

‘তা করুক, আমাদের তাতে ক্ষতি কী?’

‘কিন্তু সে সব ভাল নয় তো!’

‘আমাদের কাজ নিয়ে কথা; ওদের অন্তর্জালীর ভেতর নাক ঢোকাতে যাব কেন?’

‘কিন্তু ভাদুরানীর স্বামী রয়েছে—তবুও ঠাকুরের সঙ্গে এই রকম।’

‘তুমি তো আচ্ছা বেকুব দেখছি।’

‘কেন?’

‘ছোটো জাতের ভেতর কত রকম কাণ্ড হয়।’

‘ছোটো জাত? ভাদুরানী তো বামুনের মেয়ে।’

‘তা হবে। বেশ তো—ঠাকুরও তো বামুন—’

ঠাকুরও বামুন মাল্যবানের কাছে ব্যাপারটা এক মুহূর্তের জন্য চীনে প্রবাদের মতো সরল অথচ কঠিন, কঠিন অথচ সরল বলে মনে হল। কী যে এই সহজ ব্যাপারটা—কী এর মানে কিছুই ঠাহর করে উঠতে পারল না। তামাকের ধোঁয়ায় নোংরা দাঁতগুলো বের করে—সেই দাঁতগুলোর মতো আকাট অবর্ণনীয়তায় উৎপলার দিকে তাকিয়ে রইল সে।

‘ছাদে না খেয়ে এখন থেকে ছাদের উত্তরদিকের ঘরটায় খেলে হয়— বেশ ফটফটে বরবারে ঘরটা—’

‘কিন্তু ওটা তো ও-ভাড়াটেদের—’

‘না গো, ওরা ও-ঘরটা ছেড়ে দিয়েছে।’

‘কবে ছেড়ে দিল?’

‘কাল।’

‘মাল্যবান একটু ভেবে বললে, ‘ওটার ভাড়া তো কম হবে না—’

‘পঁচিশ টাকা চায়—আমি ব’লে-ক’য়ে কুড়ি টাকা করতে পারব।’ বলে একটু ঝিকমিক করে হেসে মাল্যবানের দিকে তাকাল।

মাল্যবান ভুরু উঁচকে বললে, ‘কুড়ি টাকা অতিরিক্ত খরচ আবার।’

‘কিন্তু তোমার মাইনেও তো বেড়েছে।’

‘কিন্তু দশ রকম খরচও তো বেড়েছে। এটা আবার কেন?’

‘কিন্তু ছাদে খাওয়া অসম্ভব—’

মাল্যবান ভাবছিল; নাকের আগায় যেন তার চশমা ঝুলে পড়েছে, এরকম কেমন এক অর্থহীন শূন্যতার ভেতর থেকে নিশ্চূপ একনিষ্ঠতায় ও সনির্বন্ধতায় উৎপলার দিকে তাকিয়ে।

খেয়ে উঠতে না-উঠতেই কাক চড়াই এসে সমস্ত ঐঁটো চারদিকে ছড়াবে, ছাদে যে কাপড়গুলো শুকোতে দিই তার ওপর মাছের কাঁটা, আলু মশলার হলুদের ছোপ,

পাখির বিষ্ঠা; রাখার কলঙ্কের চেয়ে কেস্তোর কলঙ্ক বেশি: কাঁকড়ার গাঁধি চিংড়ির দাঁড়া ছিবড়ে পিঁপড়ে মাছি সমস্ত ছাদে মই-মই করছে রে বাবা।

‘রান্না ঘরে গিয়ে খেলে হয় না?’

উৎপলা ডান হাতের চাঁটি মেরে বাঁ গালের জুলপির ভেতরে একটা মশা না কী পিষে ফেলে বললে, ‘কুঁড়ি টাকা ভাড়া যাচ্ছে, বনাৎ করে টাকাটা ফেলে দেবে, না কি ফড়ের মতো কথা বলছ তুমি। রান্নাঘর হয়ে এসেছে কোনো দিন?’

‘না, কী আছে ওখানে?’

‘আমার বাজু আছে আর তোমার পায়ের মল।’

এক সারি নোংরা দাঁত কেলিয়েই মুখ বুজে ফেলল তৎক্ষণাৎ মাল্যবান; হাসল এক বিলিক, না, নাক সিঁটকাল বুঝতে পারা গেল না।

ছাদের উত্তরের দিকের ঘরটা ভাড়া করা গেল। চুণকাম করা খবখবে সুন্দর দেয়াল, নতুন সবুজ রঙ মাখানো জানালা দরজা—দিব্য।

‘তোমার মেজোশালার তো কলকাতায় আসবার কথা; যদি আসে, তাহলে এই ঘরটায় আমি আর মনু থাকতে পারি—বড়ো ঘরটা তাদের ছেড়ে দিতে পারি—’

মাল্যবান ঠোঁটের ওপর ছাঁটা গ্যাঁজে আঙুল বুলিয়ে কথা ভেবে নিচ্ছিল কোনো উত্তর দিল না।

আপাতত একটা লম্বা টেবিল এই ঘরটার মাঝখানে এনে রাখা হল— চারদিকে তিন-চারটে চেয়ার। সকালের চায়ের থেকে শুরু করে রাতের খাওয়া অর্ধি সবই এই টেবিলে চলছিল।

উৎপলা একদিন একটা চিলতি চিঠি পড়েতে পড়তে বললে, ‘মেজদা আসবেন।’

‘কবে?’

‘আসতে অবিশ্যি দেরি আছে।’

‘এ-মাসে?’

‘চিরকুটটা রেখে দিয়ে উৎপলা বললে, ‘মাস-দেড়েকের মধ্যেই; পরিবার নিয়ে।’

‘মেজোশালার ছেলেমেয়ে কটি না?’

‘তিনটি।’

‘তিনটিই তো বেশ বড়ো-বড়ো।’

‘হ্যাঁ।’

‘তাহলে জায়গার টানাটানি হবে তো।’

‘ঐ খাবার ঘরটায় গিয়ে আমরা থাকব।’

‘তুমি আর মনু?’

‘আমরা দুজন তো বটেই’, উৎপলা সমীচীন কচ্ছপের চাড়ার মতো কঠিন একটা ভাব দেখিয়ে তবুও বললে ‘তুমিও আসতে পার দেখি কী হয়।’

মাল্যবান খুব অগ্রহে একটা কথা পাড়তে গিয়ে নিজেকে শুধরে নিয়ে অন্য কথা পেড়ে বললে, ‘অতটুকু ঘরে তিনজন কী করে আঁটবে?’

‘তা আমি বন্দোবস্ত করে দেব। দু’টো খাট পড়লেই তো আমাদের তিনটি প্রাণীর হয়ে যায়। আমাদের একটা সেলের মতো ঘর হলেই হয়ে যায়। দেখেছ তো দমদম জেলে।’

সত্যাপ্রহের আসামী মনে করে একটা বিশৃঙ্খলা ভিড়ের ভেতর থেকে অন্য অনেকের সঙ্গে মাল্যবান ও উৎপলাকে গ্রেপ্তার করে জেলে আটকে রাখা হয়েছিল—দিন দুই—মাস ছয়েক আগে।

‘দেে ছি তো,’ মাল্যবান বললে। কিন্তু দোতলার বড়ো ঘরটায় এতদিন মাল্যবানকে কী—একটা ক্যাম্পখাট অদ্দি পাতেতে দেওয়া হয়নি কেন? না হোক, উৎপলার অত বড়ো খাট মাল্যবানকে শুতে দেওয়া হয়নি কেন?

মাল্যবান নিজের দাম্পত্যজীবনের আকাশ প্রমার ব্যর্থতাকে তিল প্রমাণের ভেতর মজিয়ে এনে তিলের ভেতরে তবুও ব্রহ্মাণ্ড দেখতে দেখতে একটু বিষণ্ণ ভাবে হেসে ভাবছিল, কাঁকড়েস্বরী পরমেশ্বরী, জেলে তো কাঁকড়ার গর্তেও আমাদের এঁটে গেছে, তোমরা মেজদা এলে খাবারের ঘরটায়ই হয়ে যাবে, কিন্তু তুমি আর আমি শুধু থাকি যখন এ-বাড়িতে, দোতলার এই বড়ো ঘরটায় আমার জায়গা হয় না কেন? নিচের ঘরে বকনাবাহুর রামছাগলের কান টানে, কান-টানে না, প্রাণ-টানের খুঁটে আমাকে না বেঁধে রাখলে তোমার রাখালী ঘুমটা পাকে না বুঝি ওপেরর তলায়?

ঠিক হয়ে গেল ছাদের উত্তর দিকের খাবারের ঘরে এরা তিনজনে থাকবে, বাকি দুটো বড়ো-বড়ো ঘরই মেজদা আর তার পরিবারকে ছেড়ে দেবে।

‘মেজদাবৌঠান মানুষ মন্দ নয়,’ উৎপলা বললে, ‘কিন্তু আমি ভাবি মেজদার জন্য। মেজদা একটু সুখী মানুষ কিনা—’

‘পদ্মার ইলিশের মতো সুখী বটে তোমার মেজদা।’

‘কী রকম?’

‘সূর্যের একটা ঝিলিক দেখলেই লাট খেয়ে পড়ে মাছ—’

‘আচ্ছা, আচ্ছা, হয়েছে’ উৎপলা বললে, ‘আমি যা বলছিলাম, একটা আড়ে-দীঘে প্রমাণ ঘর নিজের জন্য না পেলে মেজদার চলবে না।’

মাল্যবান বললে, ‘ঐ দোতলার বড়ো ঘরটায় তিনি একাই থাকবেন বুঝি? ঘরটা বেশ বড়ো—আলো-হাওয়াও খুব। থাকুন।’

‘ঐ ঘরটাই দেব দাদাকে—’

‘তোমার বৌঠান থাকবেন কোথায়?’

‘তিনিও ঐ ঘরেই।’

‘তোমার দাদার সঙ্গেই?’

‘শোন কথা, রামকানাইয়ের সঙ্গে তবে?’

‘মেজদি তো নিচের ঘরে থাকলেও—’

‘বৌঠান নিচের ঘরে থাকবেন? কেন? তোমার খচখচ করছে কোথায়?’

মাল্যবান বললে, ‘যে-রকম সুখী মানুষ তোমার দাদা তাঁকে একটা ঘর ছেড়ে দিয়ে ছেলেমেয়েদের নিয়ে অন্য এক ঘরে শোবার ব্যবস্থা যদি করেন বৌঠান, তাহলে সারাটা দিন দাদা তো তাঁর কাছে গিয়ে থাকতে পারেন, কিংবা তিনি দাদার কাছে এসে বসতে পারেন। এতে তো কোনো অসুবিধে হয় না কারু—’

‘কিন্তু রাতের বেলা?’

‘তখন অবিশ্যি যে যাঁর ঘরে গিয়ে শোবেন।’

‘তা হয় না।’

‘কেন?’

‘বৌঠান কাছে না থাকলে মেজদার ঘুম হয় না। এ নিয়ে মেজদার শ্বশুরবাড়ির লোকেরা তাকে ঠাট্টা করে।’

‘ঠাট্টা চলে বটে।’

‘কী রকম?’ বললে উৎপলা। তার মুখের আত্মতুষ্টির ঝিলিক নিভে গেল।

‘কোনো অসুখ আছে মেজদার?’

‘কিছু নেই।’

‘সুস্থ মানুষ?’

‘মেজদা-মেজদি দু’জনেই। ওরা এক জোড়! প্রথম থেকেই হয়ে এসেছে। তুমি এখন ভাঙবে?’

‘খুব ভালো শাঁখার ব্যবসায়ী ছিলাম আমি,’ মাল্যবান একটু হেসে বললে, ‘তোমার হাতও ননীর মতো নরম ছিল, কিন্তু কোনো শাঁখাই পরাতে পারলাম না কেন?’

মাল্যবানের কথা উৎপলার কানে অপ্রাসঙ্গিক চরিত্রের স্বগতোক্তির মতো শোনাল। ও-রকম গোপনীয়তার ছায়া মাড়াতে চাইল না যে। শোনেনি যেন মাল্যবানকে, নিজেরি কথার জের টেনে উৎপলা বললে, এক চিলতি চিঠি এসেছে তো মেজদির কাছ থেকে পশ্চিমেরী থেকে। দেড়মাস পরে পশ্চিমারী থেকে আসবেন মেজদা-মেজদি; ছেলেমেয়েরা পশ্চিমারী নেই—কাছেই আছে—সেখান থেকে তাদের

কুড়িয়ে নিয়ে আসবেন। আমাদের বাড়িঘর চুনকাম করিয়ে নিলে কেমন হয়।’

মাল্যবান চুপ করে ছিল; তার খুব তাজা কথাটার কোনো উত্তরই দিল না উৎপলা; কথাটা শুনেছে বলেও স্বীকার করল না।

‘জানালা দরজা সব আগে থাকতেই বেশ রঙ করিয়ে নিলে ঠিক হবে।’ উৎপলা বললে।

‘আমাদের নিজেদের খরচে?’

তবে আবার কার খরচে? বাড়িওয়ালার?

না, না, সে তো তাকিয়ে-তাকিয়ে দেখবে আর হাসবে!

‘হাসবে?’

‘জামাই-এর শালা আসছে বলে শালার বোনাই গরাদে স্বয়ং মাখছে। হাসবে না?’

চুনকাম রং করিয়ে নিতে খরচের ঠালা আছে। ওসব জিনিসের দরকারও নেই এখন। দেয়ালগুলো বেশ পরিষ্কার, দরজা-কপাটএ খারাপ নয়। এসব জিনিস নিয়ে মাথা খারাপ করবার মতো বেশি টাকার রস মাল্যবানের নেই এখন; কিন্তু উৎপলাকে কিছু বলতে গেল না সে। বললে বুঝবে না। মেজদা এলে তাঁকে দিয়ে বললে বুঝবে বটে কিংবা মেজদিকে দিয়ে; তাঁদের মাথা ঠাণ্ডা আছে; প্লাগটাগও বেশ ভালোই কাজ করছে তাদের অন্তরেন্দ্রিয়ের এঞ্জিনের। বেশ চমৎকার দাম্পত্য জীবনই জমিয়ে বসেছে বটো মাল্যবানেরা; কুয়াশার ভেতর থেকে কুয়াশার দিকে তাকিয়ে যেন উৎপলার দিকে তাকিয়ে রইল মাল্যবান।

‘তাহলে এরা দুজনেই এই বড়ো ঘরে থাকবে শোবে?’

‘হ্যাঁ।’

‘আর ছেলেমেয়েরা?’

‘নিচে শোবে।’

‘একা-একা নিচে থাকবে?’

‘দরজা-জানালা বন্ধ করে দিলে ভয় নেই কিছু।’

মাল্যবান কুয়াশার দিকে তাকিয়ে বললে, ‘আমি গিয়ে সেখানে শুতে পারি না?’

‘ছেলেপুলেদের মধ্যে?’

‘হ্যাঁ।’

উৎপলার মুখের অসাধ দেখা দিল সময়ের শূন্যতার ভেতর একটা ছাঁদার মতো যেন।

‘না, অত আটবে কী করে? অত ঘুজিঘুজিতে ওদের কষ্ট হবে।’

‘তাহলে তুমি তো পার শুতে ওদের সঙ্গে।’ মাল্যবান বললে।

‘অম্মি অবিশ্যি শুতে পারি গিয়ে। তাই করতে হবে হয়তো। বোঁঠান তো রাত হলে ওপরের থেকে আর নামতে পরবেন না।’

একটা কীর্তনের সুর গাসতে গাইতে উৎপলা ছাদের দিকে চলে গেল। মাল্যবান খানিকটা হতচকিত, আড়ষ্ট, তারপরে অরহিত হয়ে অনেক-ক্ষণ ঘরের ভেতর বসে রইল। দুটো কীর্তন সাজ্জ হল; তারপরে মাল্যবানের বাঁশ বনে ডোম কানা ভাবটা কেটে গেল অনেকখানি। কীর্তন শুনে অবিশ্যি নয়। এম্মিই।

একটা ভারি নিঃশ্বাস ফেলে সে গোলদীঘির দিকে চলে গেল।

দীঘির চারপাশে পাক খেতে খেতে সে অনেক কথা ভাবল, তারপর বেশি কথা ভাবতে ভাবতে চারদিকের নটেগাছগুলোকে ঠুঁটো হয়ে মুড়োতে দেখে একটা বেধিতে এসে চুরুট জ্বালাল।

দু-তিন দিন পর মাল্যবান বললে, 'তোমার মেজদারা তো থাকবেন অনেক দিন।'

'হ্যাঁ,

'বছর খানেক?'

'না, মাস দুয়েক।'

'একটা কথা আমার মনে হয়', মাল্যবান বললে, 'এ-বাড়িটা ছেড়ে দিয়ে একটা নতুন বাড়ি দেখলে মন্দ হয় না। দোতলা কিংবা তেতলায় বড়ো বড়ো কয়েকখানা ঘর থাকবে।'

শুনে উৎপলা নাকে-চোখে খুব খুশি হয়ে বললে, 'তাহলে তো খুব ভালো হয়।' গুনগুন করে গাইতে গাইতে বললে, 'তুমি সে রকম বাড়ি দেখেছ কোথাও?'

'না।'

'পাওয়া বড় শক্ত।'

'আমি খুঁজছি।'

'পঞ্চাশ টাকা ভাড়ার মধ্যে পেতে হবে তো?'

'ধরো, গোটা দশেক বেশিই না হয় দিলাম।'

কয়েকদিন পরে মাল্যবান এসে বললে, 'একটা বাড়ির খোঁজ পেয়েছি।'

'কোথা?'

'পাথুরেঘাটার দিকে।'

'বাবা, অদূরে গেলে?'

'কিন্তু বাড়িটা বেশ।'

'কটা ঘর আছে?'

'পাঁচটা। দোতলার চারটে, তিনতলার একটা।'

'বেশ বড়ো?'

‘হ্যাঁ।’

‘কত চায়?’

‘পঞ্চাশ।’

‘তা পঞ্চাশ টাকা বড্ড বেশি।’

‘কিন্তু পাঁচটা ঘর।’

‘তা বুঝলাম—’

ঠোটে পানের রং শুকিয়ে ভারি সুন্দর দেখাচ্ছিল উৎপলার ঠোঁট। ঠোঁট নেড়ে সে বললে, ‘কিন্তু মেজদার কাছ থেকে কিছু তো চাওয়া যায় না।’

‘তা আমি জানি।’

‘এমন-কি সেধেও যদি কিছু দেন, তাহলেও তা নিতে পারি না আমরা।’

সে বিষয়ে মাল্যবানের খানিকটা মতভেদ ছিল।

একটা হাই তুলে মাল্যবান বললে, ‘তাই তো, আড়াই শো টাকায় চলে কী করে পঞ্চাশ টাকাই যদি বাড়ি ভাড়া দিয়ে ফেলি—’

উৎপলা চাপা গলায় ভরসা দিয়ে বললে, ‘চালাতে পারি আমি অবিশ্যি—’

‘নাঃ, সে আর তুমি কী করে পার! লোকও তো কম নয়—’

‘তোমার সোনার ঘড়িটা যদি বিক্রি করে ফেল, তাহলে টেনে মেনে এক রকম চলে—’

‘আমার সোনার ঘড়িটা বিক্রি করে ফেলব!’ মাল্যবান দম ছাড়বার আগে দম ছাড়তেই পারবে না যেন সে আর এন্নি ভাবে নিশ্চল হয়ে দাঁড়িয়ে রইল।

‘ঐ বিয়ের সময় যেটা পেয়েছিলে—’ মাল্যবানের মুখের দিকে তাকিয়ে বলতে উৎপলা।

কিন্তু মাল্যবানের আরেক রকম—কেমন যেন পাট ভেঙে গেছে, এই ছিল এই এখুনি ইস্ত্রি লাট হয়ে গেছে— এরকম মুখের দিকে তাকিয়ে বিস্ত্রী লাগল উৎপলার—বিরক্তি বোধ করল সে।

‘বাবা তিন শো টাকা দিয়ে তোমাকে ওটা কিনে দিয়েছিলেন। সেই বাপের জন্য আমি তোমাকে বিক্রি করতে বলছি আমার ভাইয়ের সুবিধের জন্য। এ না করে এ-ঘড়ি দিয়ে কাঁচাপাকা টিপ পরবে তুমি!’

‘আয় রোদ্দুর হেনে ছাগল দেব মেনে’-র মতো বিলোড়িত মস্তে যেন উৎপলার চোখ রৌদ্রের মতো হেনে পড়ল মাল্যবানের চোখে; কথা বলতে বলতে এগোতে এগোতে মাল্যবানের মুখের ওপর প্রায় পড়ল গিয়ে উৎপলা।

আস্তে আস্তে নিচে নেমে গেল, পুরোটা চা খাবার জন্যও ওপরে ফিরে এল না আর মাল্যবান।

খানিকক্ষণ পরে মনু নিচের থেকে ফিরে এসে বললে, ‘বাবা বেরিয়ে গেছেন, মা।’
‘চা না খেয়েই গেল যে।’ বলে চায়ের বাটিটা একটু কাৎ করে চাটুকু ছাদের এক
কিনারে ঢেলে দিল।

মনুকে বললে, ‘পরোটা খাবি?’

এতটুকু বয়সেই তোদের অম্বল হয় শুনলেও হাসি পায়। পরোটা দুটো ছাদের
ওপরে গোটা তিনেক কাকের উদ্দেশ্যে ছুঁড়ে ফেলে দিল উৎপলা। মনুর দিকে ফিরে
তাকিয়ে বললে ‘অম্বল! কথাটা শেখানো কে তোকে—’

‘বুক জ্বলে যে।’

‘তাকে অম্বল বলে তা ঠিক। কিন্তু কার কাছে শুনলে?’

‘কেন, তোমরাই তো অনেক সময় বলো।’

‘আমি বলেছি?’

মনুর দিকে চোখ শানিয়ে তাকিয়ে উৎপাল বললে, ‘আমার বাপের বাড়ি কার
কোনো দিন অম্বল হয়েছে যে বলব।’

মনু চুপ করে রইল।

‘ঠিক করে বল তো কোথায় শুনেছিস কথাটা?’

‘খেবৎ, আমার অত মনে নেই—’

‘মনে নেই! এলি গেলি বাপের বিদ্যেয় বর্তালি, মনে নেই। যেমন দেখতে, তেমন
লিখতে, কী যে বাপের গৌঁই পেয়েছ, বাছা।’

মাল্যবান যতই অভিমান করুক না কেন, যাতে খাবার সময় ঠিক হাজির হল।
উৎপলা তিন জনের ভাত সাজাতে সাজাতে বললে, ‘তোমার বড্ড ক্ষুদে
মন—ক্ষুদিরামের মতন—ফাঁসির ক্ষুদিরাম নয়—ভারি নছাড় মন তোমার—’

‘আমার?’

‘চা না খেয়ে বেরিয়ে গেলে যে বড়ো?’

‘ওঃ—চা—’ মাল্যবানের নাকের ভেতর দিয়ে খানিকটা হাসল—যেন কিছুই হয়
নি; চায়ের কথাটা কিছুই মনে ছিল না যেন তার।

‘চা পরোটা পড়ে রইল—শেষে কুকুর-বেড়ালে খায়, গতর খায় গতরখেকোর
রাগ।’

‘না, না, রাগ নয়—খাবারের ওপর মানুষে আবার রাগ করে না-কি—অত
আহাস্মক আমি নই?’ বলে মাল্যবান বুদ্ধিমান নীরাগীর মত ভাব দেখিয়ে পাঞ্জাবীর
আস্তিন খানিকটা গুটিয়ে বললে, ‘দেখি ভাতের থালাটা—’

উৎপলা ছুরি দিয়ে একটা লেবু কাটতে কাটতে বললে, ‘অহাস্মক হবার বাকিও রাখনি কিছু—’

মনুর মাথায় একটা চাঁটি মেরে উৎপলা বললে, ‘ঢালার মতো এই খাবারের জিনিসগুলোর কাছে খুঁড়ি খেয়ে পড়ে আছিস যে! হাভাতে মেয়ে, বোস গিয়ে—ট্যাক-ট্যাক ক’রে তাকিয়ে আছে। গুপ্তির খাঁই এখন থেকেই দমকে দমকে চাড় দিয়ে উঠছে পেটে।’

মাল্যবানের ইচ্ছা হচ্ছিল এবারও সে উঠে যায়। কিন্তু তাতে কারু শিক্ষা হবে না। যে যা হবে না, তাকে তা করা যাবে না। মাঝখান থেকে না খেয়ে উঠে গেলে ক্ষিধের পেটে নিজেরও কোনো লাভ হবে না। মাল্যবানের সঙ্গে উৎপলা যদি টিকে থাকে মাল্যবানের মৃত্যু পর্যন্ত—এই রকম ভাবেই টিকে থাকবে; কোনো সংশোধনী বিজ্ঞানী বিদ্যে নেই এসব স্ত্রীলোকদের শোধরাবে—আমেরিকা বা রাশিয়ার হাতেও; কোনো লক্ষ কোটি অব্যয় কাল নেই ব্যক্তি মানুষের হাতে কয়লাকে যা হীরে করে দিতে পারে।

মনু চেয়ারে এসে বসল বাপের মুখোমুখি। মাল্যবান তাকে সাস্ত্রনা দেবার কোনো ভরসা পাচ্ছিল না। মেয়েটির দিকে তাকাতে গেল না সে। মেয়েটির পাশে ব’সে আছে—কেমন কানাভাঙা খোনা খেমটা উত্তেজের অবসাদে মাল্যবানের মন ভারী হয়ে উঠতে লাগল। নিজে সে বাপ হয়েছিল—বিয়ে করেছিল—হীন কুৎসিৎ উচ্চুণ্ডে জীবনবীজ ছড়িয়েছিল ভাবতে ভাবতে মন তার চড় চড় করে উঠল। একটা পাখি সৃষ্টি করে তাকে যদি হাঁদারার অন্ধকারে ফেলে দেওয়া হয়—কেমন ছটফট করে উঠ লাগল মাল্যবানের ভেতরটা। মাল্যবান ভাবছিল উচিত ছিল তার একা থাকা, স্ববরের কাগজ পড়ত, অফিসে যেত, গোলদীঘিতে বেড়াত, সভা সমিতিতে সামনের বেঞ্চে গিয়ে বসত, বেশি করে যেত থিওজফির সভায়, ফ্রীম্যাসনও হত, রাত জেগে ডিটেকটিভ উপন্যাসের থেকে কলকাতা ইউনিভার্সিটির মিনিট, নানা রকম কমিশনের রিপোর্ট, ব্লু বুক হাতের কাছে যা-কিছু আসত, তাই পড়ত, ভাবত, উপলব্ধি করত—কেমন চমৎকার হত জীবন তাহলে।

জীবনের সঙ্গে একজন স্ত্রীলোককে জড়িয়ে নিয়ে—এ-জড়িয়ে-নেওয়ার সমস্ত নিহিতার্থের ছোব পোচড় গায়ে মেখে দখিতে কাদায় মূর্খতায় ওগরানো অম্বলে আঙুনে অতৃপ্তিতে মগ্নিত হয়ে কী হল সে।

খানিকক্ষণ থালায় বাটিতে চুপচাপ ভাত ডাল তরকারী সাজিয়ে উৎপলা পরে বললে, ‘ছোটবেলায় বাপ-মা তোমাকে শিক্ষাদীক্ষা দিয়েছিল বেশ—’

‘কেন, কী হয়েছে, কী দেখলে তুমি?’

‘না হলে এ-রকম হ্যাংলামো কেউ করে?’

‘হ্যাংলামো?’ ভাতের থালাটা উৎপলার গায়ে ছুঁড়ে মারতে গিয়ে কোন্ বৈষ্ণবী শক্তির জোরে যে বিরত হল মাল্যবান দু’-এক মিনিট খুন চাপা রক্ত চড়া মাথায় কিছুই বুঝতে পারল না সে।

আস্তে আস্তে ঠাণ্ডা হচ্ছিল তার মন।

‘তা নয়তো কী’—উৎপলা বললে।

‘কী করেছি আমি?’

‘খুব যে আস্তিন টেনে ভাতের থালা কিলিয়ে পাকাচ্ছিলে—দেখছিলেই তো ভাত ডাল তরকারি মাছের বাটি তখনো তৈরি হয়নি। ঘাড়ের রৌঁ সাদাটে মেরে গেল, এখনও ন্যালা কুকুরের মতো খুব যে গুঁই গাঁই—খুব যে গুঁই গাঁই।’

মাল্যবানের এক রাশি কথা বলবার ইচ্ছে ছিল। কিন্তু খুব অল্পে সেরে দিয়ে সে বললে, ‘আমার ক্ষিধে পেয়েছিল, থালাটা চেয়েছিলাম তাই।’

‘ক্ষিধে তো ঘোড়ারও পায়; তাই বলে মানুষের টেবিলটাকে আস্তাবল করে তুলতে হবে।’ ভাতের থালাটা মাল্যবানের দিকে ঠেলে দিয়ে উৎপলা বললে, ‘কুড়ি-পঁচিশ পেরিয়ে গেলেই সব কাপ্তেনী ফুরিয়ে যায়—ব্যাটাচ্ছেলেরা দিব্যি পুরুষ মানুষ হয়ে ওঠে—দিব্যি। সতেরো আঠারো বছর বয়সেই মেয়েরা স্ত্রীলোক হয়—কিন্তু বেয়াল্লিশ বছর বয়সেও ডেস্কেলে কী থাকবে আর টেকি ছাড়া।’

মাল্যবান ঘাড় বুঁকিয়ে খানিকটা দক্ষিণায়নে রেখে যাচ্ছিল।

উৎপলা এক গেরাস মুখে তুলে বললে, ‘কপালে যদি হবার নয় লেখা থাকে তাহলে সে-লেখা কপালের ঘামে মুছে যাবার নয় তো ও-সব লেখা ঘামে রক্তে মোছে না।’

মনু বুঝছিল না বিশেষ কিছু; মাল্যবান বলছিল না কথা কিছু; খাবার ঘরে নিশ্চরতা খানিকক্ষণ; যে যার মনে নুন মাখিয়ে, লেবু টিপে, জলের গেলাস মুখে তুলে, তরকারীর বাটি কাৎ করে খেয়ে যাচ্ছিল।

‘কিন্তু অফিস থেকে এসে কী হয়েছিল শুনি?’ বললে উৎপলা; গায়ের ঝালটা কিছুতেই মরছিল না যেন তার।

মাল্যবান খাওয়ার ধরণ-ধারণ খানিকটা বদলে ফেলে একটু ভদ্রভাবে খেতে খেতে বললে, ‘কিছু হয়নি।’

‘ঝপ করে ওন্নি মিথ্যে কথা।’

‘কী হবে আবার।’

‘চা না খেয়ে চলে যাওয়া হয়েছিল যে।’

‘চা আমি বাইরে খেয়েছিলাম।’

‘কোথায়?’

‘দোকানে।’

‘কে খাওয়াল?’

‘কে খাওয়াবে আবার—’

‘গাঁটের পয়সা ভেঙে খেলে তো?’

‘সেই রকম খেতেই আমি ভালোবাসি—’

‘তোমার বন্ধুদেরও আশান হয়। কে আবার ট্যাকের পয়সা খরচ করে ডিমের বড়া খাওয়াবে ধরা গণেশকে।’ উৎপলা বললে, ‘পয়সা খরচ করে তারা—খুব খরচ করে—কিন্তু মানুষ বুঝে—মুখের দিকে ভালো ক’রে তাকিয়ে দেখে—’

উৎপলা কঠিন নিঃশব্দ দৃষ্টিতে মাল্যবানের আপদমস্তক কিছুক্ষণ প্রদক্ষিণ করে দেখল।

এক পেয়ালা চা নিয়ে সাথে না; কেন, ঘরের বাইরে জলচল নেই তোমার?

‘চা নিয়ে সাথে না বাবাকে,’ মনু বললে, ‘দই মিষ্টি?’

মাল্যবান নিঃশব্দে একটা আলু টিপছিল।

‘আহুান যা আসে তাও স্বশুরবাড়ির থেকে। লোচনা ডোমেরও জামাইঘণ্টী হয়—সেইরকম আর কি। বেয়াল্লিশটা বছর ব’সে এত বড়ো পৃথিবীর ভেতরে থেকে মানুষসমাজে মানুষটা কানা—একবারে ছুঁচো চামচিকের পারা—’ উৎপলা খানিকটা জলে গলা ভিজিয়ে নিল, বললে, ‘কোথাও ডাক নেই, কেউ পৌঁছে না, হৈ-হল্লা নেই, ঘরে আড্ডা-মজলিশ নেই—খোল করতাল কেস্তন মুজরোর বালাই নেই—কোনো মানুষই আসে না—ডাকলেও আসে না। কিন্তু বয়ড়াকে কানে শোনাবে কে? ড্যাবড়াকে ডান হাত দেখিয়ে দিলে লাভ আছে।’

মাল্যবান খাচ্ছিল। মনু শুনছিল, হাসছিল, ভুলে যাচ্ছিল, মানে বুঝছিল না, ফেলাছড়া করে অরুচি মুখে মাঝে মাঝে আদা খুঁটছিল খাচ্ছিল—

‘সেই বিয়ের পর থেকেই দেখছি কেরানীবাবুর নিচের তলার ঘরটিতে দুটো চেয়ার; একটাতে তিনি নিজে বসেন, আর একটাতেও তিনি নিজে বসেন। হাফ অখড়াই কে যেন আসতে মাঝে মাঝে—ওঃ, অভিরাম সারখেল; হামলা হচ্ছে বলে তাকে ভাড়িয়ে দেওয়া হল।’

একটা ঘোলা নিশ্বাস ফেলল উৎপলা। কিন্তু ব্যথাটা লাগল মাল্যবানের বুকে গিয়ে বেশি—বন্ধুবান্ধব নেই ব’লে নয়—মাল্যবানের জীবনের নিঃশব্দতার খানিকটা যে সূক্ষ্ম মানে আছে, তার ওপর এরকম খিঁচুনি খোঁচা এসে পড়ল বলে। অথচ উৎপলা

মেজাজে থাকে না যখন আর, স্থির হয়—তখন আজীবন যেসব বিচিত্র বেচাল কথা বকে গেছে সে সবে বেকুবী তাকে নিঃশব্দ ক'রে রাখে—এমনই নিঃশব্দ, মনে হয় যেন সমুদ্রের ওপারে পৃথিবীর পারে সকলের নাগালের বাইরে অন্তহীন 'হচ্ছি' 'হব' পেরিয়ে কেমন শাশ্বত 'হয়েছি'র নিবিড়তার ভেতর বসে আছে সে। কিন্তু এখন অন্যরকম উৎপলার : দুঃখের বিষয়, এইটেই তার আটপৌরে রকম।

একটা কাচের রেকাবী থেকে এক টুকরো লেবু নিয়ে ডালের সঙ্গে টিপতে টিপতে অসাধ অসফলতার বাহনের মতো কেমন একটা নিঃশ্বাস ফেলল উৎপলা; নিঃশ্বাসটা নিজের নিয়মে ঠিক—এত নিরাভরণ ভাবে ঠিক, যে মনে হয় অনেক অতল থেকে উঠে এসে নিজেকে মোটা ব্যবহারে খরচ করবার আগেই মিলিয়ে যায় সে; শুনলে মানুষের প্রাণ কেঁপে ওঠে।

পাতের কিনারে কাঁচালক্কটা ফেঁড়ে ঘষে ডালের স্বাদ বাড়াবার চেষ্টা করতে গেল না মাল্যবান আর। খাওয়া এখন অপ্রাসঙ্গিক। এই নারীটিকে নিয়ে কী সে করবে! উৎপলার এই সব ফাঁড়ন শূন্যতা দীর্ঘ নিঃশ্বাস, আড়াআড়ি মাল্যবানের নিষ্ফলতা ও অব্যয় নিঃশ্বাস (মাল্যবানেরটা মারাত্মক কফের মতো বুকের ভেতর বসে গেছে, বাইরে তার প্রকাশ নেই, উৎপলা কোনো সময়ও টের পায় না) ঘরদোরের নিশ্চূপ বাতাসে ঘাই মেরে ফিরছে। কী হবে এই বাতাস ঘরদোর দিয়ে। এই নারী নিয়ে কী করবে সে।

'যে-দু'-চার জন লোক তোমার কাছে আসে, তাদের মুখের দিকে তাকাতে পারা যায় না।'

'কেন?'

'দেখতে তারা খুব খারাপ নয়, কিন্তু চুনো গন্ধ আসে রক্তের ভেতর থেকে। কোনো বিহিত-টিহিত নেই?'

'জানি না।'

'আমি তাদের সঙ্গে কথা বলি না তাই।'

'মানকচুর পাতার আড়ালে বসে আমার সঙ্গে কথা বলে ওরা। তোমাকে কোনো দিন দেখেছে বলে মনে হয় না।'

উৎপলা বললে, 'মানকচুর পাতার আড়ালেই বর্ষাকালটা তোমার জমে বেশ দু-চারটে ক্যাকড়া চড়িয়ে। ওদেরি মত তুমি। নিজের স্ত্রী ছাড়া অন্য কোনো মেয়ের সঙ্গে তোমার আলাপন আছে?'

'কী হবে আলাপ করে?'

'আমি তা জানতাম। তোমার বন্ধুদের সম্পর্কে আমি যা ভাবি, পরের স্ত্রীরাও

হয়তো তোমার সম্বন্ধে সেই কথাই ভাবে। বলে উৎপলা এঁটো হাত দিয়ে জলের গেলাসটা ঘাঁটতে-ঘাঁটতে বললে, ‘ছি, কী ঘেন্না!’

‘না, এমন ঘেন্নার কিছু নয়—আমাদের দু-জনের জীবন দুই রকম, এই যা।’

‘এত বড়ো পৃথিবীতে একজন মেয়েলোকও তোমার সঙ্গে খাতির করা দরকার মনে করল না, না ভালোবাসা, না স্নেহশ্রদ্ধা, না মমতা-সহানুভূমি—কোনো কিছু কেরানীবাবুটিকে দেবার মতো নেই কারু। ওঃ, আমার একারই বুকি দিতে হবে সব। লক্ষ্মীর ঝাঁপি উৎপলা বলে’; বলতে বলতে বলার মাথায় উৎপলা গলা চড়িয়ে দিয়ে বললে, ‘একজন বেশ্যার সঙ্গেও যদি সমাভাগে তোমার সম্পর্কে আমার দায়িত্ব ভাগ করে নিতে পারতাম, তাহলে এতটা দম আটকে আসত না আমার—’

শুনে মাল্যবান চমকে উঠল না, হেসেও উঠল না; ক্ষিধে ছিল; মাল্যবানকে খেতে না দিতে চায় না উৎপলা; কিন্তু অবস্থা তো এইরকম। টেবিলে যা জিনিস আছে, তাকে চার-পাঁচটি জনে খেতে পারে, কিন্তু মনু নিজেরটুকুই খেয়ে উঠতে পারছে না; আর দু-জনের তো খাওয়া বন্ধ; চমৎকার কবিয়ালী লড়াই শুরু করেছে সময় বুঝে তারা।

টেবিলে মাথা রেখে মনু ঘুমিয়ে পড়ছিল। মাল্যবান একটা লেবুর খোসা নিয়ে আঁক কাটছিল খালার ওপর চুপচাপ।

‘আমি হিন্দুঘরের মেয়ে, বাধ্য হয়ে অনেক কথা আমাকে বিশ্বাস করতে হয়—’

মাল্যবান লেবুর খোসা দিয়ে খালার ওপর স্বস্তিকা আঁকছিল—একটা—দুটো—তিনটে—কোনো কথা বললে না।

‘বিশ্বাস-অবিশ্বাসের ব্যাপার সব মানুষই স্বাধীন—কিন্তু এমন পাকা ঘরে জন্মে বেটপকা ঘরে পড়েছি যে সে স্বাধীনতা হারিয়ে ফেলেছি—’

‘বাধ্য হয়ে কী বিশ্বাস করতে হয় তোমাকে?’

‘এ বিয়ে আমার হত, কিছুতেই ঠেকাতে পারতাম না, এই বিশ্বাস—’

‘ওঃ এই বিশ্বাস—’ খালার স্বস্তিকাগুলো মুছে ফেলে জেঙ্গিস খাঁর নিশানের বারোটা পুচ্ছ—ইয়াকের উদ্যত পুচ্ছ আঁকবার চেষ্টা করেছিল মাল্যবান।

‘কিন্তু এটা সংস্কার,’ উৎপলা বললে, ‘সত্য নয়। কিছুতেই সত্য নয়।’

যেন গ্যালিলিও বলছে, আমি কিছুতেই বিশ্বাস করি না পৃথিবীটা টোকো, আমি কিছুতেই বিশ্বাস করি না পৃথিবীটা স্থির হয়ে দাঁড়িয়ে আছে। জেঙ্গিসের ইয়াকের লেজ আঁকতে আঁকতে একবার মুখ তুলে অনবনমিত গ্যালিলিওর দিকে তাকিয়ে চমৎকৃত লাগল মাল্যবানের—কেমন-একটা আভা যেন উৎপলাকে ঘিরে—বিজ্ঞানের পরা সত্যের জন্য তপস্যা করছে সে—সংগ্রাম করছে।

‘তোমাকে আমি না বিয়ে ক’রেও পারতাম। সেইটেই সত্য।’ উৎপলা বললে।

‘আমারও তো তাই মনে হয়।’ পাখিটাকে ফাঁদে ফেলে সেই ফাঁদটাকে সত্য বলে নির্দেশ দেবার কোনো অর্থ হয় না। আকাশ সত্য নীড় সত্য পাখির কাছে—

উৎপলা এবার ভাত-তরকারীর দিকে মন দিয়ে বললে, ‘আমি তাই বলছিলাম—’

দু’-এক গ্রাস খেয়ে সে বললে, ‘অনুপম মহলানবীশকে তো বিয়ে করতে পারতাম আমি—’

লেবুর ধোসা দিয়ে নখ দিয়ে জেঙ্গিসের ইয়াক-লাঙ্গুল-লাঞ্জিত নিশান ঐঁকে ফেলেছে মাল্যবান—বারোটা লেজই ঐঁকেছে—থালার ওপর; চোখ তুলে তাকিয়ে বললে, ‘কে অনুপম মহলানবীশ?’

‘ঐ রকম একজন লোককেই বিয়ে করার কথা আমার। সেইটেই সত্য হত। কিন্তু পৃথিবীতে সত্যের মুখ দেখতে পাওয়া কঠিন।’

থালার ওপর জেঙ্গিসের লাঙ্গুলের দিকে তাকিয়ে মাল্যবান বললে, ‘ও’, হ্যাঁ, অনুপম মহলানবীশ; মহানবীশের কথা শুনেছি আমি। অনুপম মহলানবীশ, ধীরেন ঘোষাল, নসু চৌধুরী—যেন বালেস্বর যুদ্ধের, মেছোবাজার বোমার, কাকোরি মামলার, চটগাঁ আরমারি রেডের শহীদ সব; কিন্তু তা নয়, এরা অন্য লোক, বিষয়ী লোক—এদের কথা আমাকে অনেক বার বলেছ তুমি। এদের কারুর সঙ্গে তোমার বিয়ে হলে ঠিক হত, দাঁড়িয়ে যেত। কিন্তু তা হয়নি। কিন্তু তাই বলে, তুমি হিন্দুঘরের মেয়ে বলে যা হল না সেটা সংস্কার, যা হয়েছে সেটা সত্য—এটা তুমি না মেনে পারছ না বলছ।’

খাবার থালার থেকে মুখ তুলে উৎপলার দিকে তাকিয়ে মাল্যবান বললে, ‘না মেনে পারছ না বলছ। কিন্তু সত্যিই মানছ না। তোমার রক্তের ব্যাধিবীজাণুগুলো হয়তো মানছে, কিন্তু শ্বেতকণিকাগুলো না, তোমার আত্মা মানছে না।’

উৎপলা একটা ভালো নিঃশ্বাস ছেড়ে বলতে বলতে গিয়ে বললে না কিছু। মাল্যবান পার্শে মাছের ঝোল দিয়ে ভাত চটকে লেবুর রস নিংড়ে নিচ্ছিল, লেবুর খোসাটা ফেলে দিয়ে বললে, ‘হিন্দু বৌদের বোঝাবে কে যে এর চেয়ে স্থির বৈজ্ঞানিক সত্য নেই কিছু আর। এক হাজার বছর কেটে গেলেও বুঝবে কি তারা?’

মীমাংসাটা ভালো লাগল উৎপলার, বললে, ‘টেররিস্ট বলত সবাই অনুপম মহলানবীশকে। ডাকগাড়ি রেলগাড়ি লুট, ব্যাঙ্ক লুট, আর্মারি লুট, কত কী করেছে অনুপম—কত জেলে পচেছে দেশকে স্বাধীন করতে; একবার ফাঁসির ছকুম হয়ে গিয়েছিল অনুপমের, কিন্তু কী করে তা বাতিল হল টেররিস্টদের দলে থেকে আমিও তা টের পেলাম না।’

জেঙ্গিস খুব বড়ো খাঁ ছিল, ভাবছিল মাল্যবান, দুর্দান্ত লোক ছিল মঙ্গোলগুলো, কিন্তু কারণকর্দমের ভেতর মৃগালের মতো ছিল কুবলাই খাঁ।

‘কৈ, কখনো বলোনি তো আমাকে তুমি সন্ত্রাসঘড়যন্ত্রের ভেতরে ছিলে।’

‘বলে কী হবে,’ উৎপলা বললে, ‘এখন তো আর নেই। ছিলাম অনেক আগে।’

‘ফাঁসি বাতিল হয়ে গেল অনুপমবাবুর? আন্দামান হল?’

‘না।’

‘তাও হল না? তা কী করে হয়?’

‘তা ইণ্ডিয়া-সেক্রেটারি বলতে পারেন। জেলও তো হল না।’

‘জেলও হল না?’ খালার ওপর থেকে সমস্ত লাঞ্জনা মুছে ফেলে পার্শে মাছের ঝোল ভাত খেয়ে খেয়ে শেষ করে এনেছিল প্রায় মাল্যবান; খালাটা আবার পরিষ্কার হয়ে এসেছে প্রায়; আবার ছবি আঁকা যাবে—আর একজন বড়ো খাঁর ছবি আঁকবে সে—কুবলাইয়ের ছবি।

‘আমি জানি না।’

‘জেলও হলো না, অ্যাপ্রভার হয়েছিল বোধহয় অনুপমবাবু?’

‘আমি জানি না’—

‘কিন্তু অ্যাপ্রভার হয়েছিল বলে তার জন্য টান কমেনি তোমার?’

উৎপলা ঘাড় বাঁকিয়ে ছুরি দিয়ে একটা লেবু কাটতে-কাটতে বললে, ‘টেরিস্টরা বলেছে অনুপম স্পাই ছিল। হয়তো ছিল। হয়তো ফাঁসি হল না বলে ঐ কথা বলেছে।’

‘স্পাই?’ মাল্যবান একটু বিলোড়িত হয়ে বললে, ‘সে তো অ্যাপ্রভারের চেয়েও খারাপ। না কি অ্যাপ্রভার স্পাইয়ে চেয়ে খারাপ। ‘স্পাই?’

‘অনুপম স্বদেশী করছে, না স্বদেশীতের লাটের কিস্তিতে চড়াচ্ছে, সে সব ভেবে তাকে ভালোবাসিনি আমি। সে স্পাই বুঝি?’ উৎপলা নিজের দৃষ্টির ভেতর থেকে কুয়াশা সরিয়ে নিয়ে পরিষ্কার চোখে মাল্যবানের দিকে তাকিয়েই চোখ ফিরিয়ে নিয়ে একটু ঠাট্টা, বিষণ্ণতা ছিটিয়ে হেসে বললে, ‘হবে স্পাই। অ্যাপ্রভার হলে হবে। আমার তাতে কিছু এসে যায় না। মানুষের সঙ্গে সম্বন্ধ পাতানোর নিয়ম আমার আর এক রকম। জল নিয়ে কথা নয়, পুকুর নদী সাগরে ঢাউস জল তো আছে; কিন্তু সেই জল কি আছে—ফটিক জল?’

‘না, তা নেই। অনুপম অ্যাপ্রভার বলে নয়, অনুপম বলেই মেঘজল।’ মাল্যবান মাথার ওপরে খুব বেশি পাওয়ারের আলোটোর দিকে একবার তাকিয়ে চোখ ঝাঁপিয়ে

ভাবছিল, বাঙালী হিন্দু পরিবারে উৎপলা আর সে রয়েছে বলে; দু-জনের এই দাম্পত্য সম্পর্ক টিকল বারো বছর। এই বরোটা বছর উৎপলার অনিচ্ছা অরুচির বঁইচি-কাঁটা চাঁদা-কাঁটা বেত-কাঁটার ঠ্যাসবুনোনো জঙ্গলে নিজের কাজকামনাকে অন্ধ পাখির মতো নাকে দমে উড়িয়েছে মাল্যবান। কত যে সজারুর খাষ্টামো, কাকাতুয়ার নষ্টামি, ভৌদরের কাতরতা, বেড়ালের ভেংচি, কেউটের ছোবল আর বাঘিনীর নখ এই নারীটির। কিন্তু সে খাবার সামনে হরিণ বা বনগোরু না হয়ে রায়বাঘের মতো রুখে দাঁড়ালে ময়ূরীর মতো উড়ে যায় ডাল থেকে ডালে অদৃশ্যলোকের ঘনপাতার ভেতর কোন এক জাদুর জঙ্গলে এই মেয়েটি; না হলে ময়নার মতো পায়ের কাছে মরে পড়ে থাকে—হলুদ ঠ্যাং দুটো আকাশের দিকে। জীবনটা আমার যা চেয়েছিলাম তা হল না, যা ভয় করেছিলাম তার চেয়ে বেশি ভয়ে, বেশি শোকে গড়িয়ে পড়ল—ভাবছিল মাল্যবান। কিন্তু আমি—ভেবে-চিন্তে—আমি পুরুষমানুষ একটা পথ কেটে নিতে পারি, কিন্তু একটা দার্শনিক প্রস্থানে আমি পৌঁছতে পারি বলেই নয়—এমিই, উৎপলার জীবনের বিতিকিছিরি নিষ্ফলতা, ব্যথা আমি পাইনি।

মনু ও উৎপলা খেয়ে মুখ ধুয়ে টেবিল পরিষ্কার করে চলে গেল। মাল্যবান একটা চুরুট জ্বালাল। খাবার ঘর ছেড়ে হাঁটতে হাঁটতে-ছাদের ওপর দু-মুহূর্ত দাঁড়িয়ে শীত রাতের আকাশের আগ্নেয় গুঁড়িগুলোকে এক নজরে একটা সুপরিসর চিলদৃষ্টির ভেতর কবলিত ক'রে—উৎপলার ঘরে গিয়ে ঢুকল। টানতে টানতে চুরুটটা যখন বেশ জ্বলে উঠেছে, খুব ধোঁয়া উড়ছে, রাশি রাশি ধোঁয়া বেরুচ্ছে মাল্যাবানের নাকমুখের ভেতর থেকে—মাল্যাবানের মন কোথায় যেন চ'লে গিয়েছিল, এখন আবার অবহিত হয়ে উঠল। দেখল স্ত্রীর ঘরের বাতি নিভে গেছে—চারদিক অন্ধকার; মশারী টাঙিয়ে উৎপলা শুয়ে পড়েছে, ঘুমিয়ে পড়েছেও হয়ত। উৎপলার মশারীর ভেতর লেপের ভেতর শুয়ে পড়তে ইচ্ছা করছিল মাল্যাবানের। কিন্তু এ-ঘরের চমৎকার শীত ও অন্ধকার ছেড়ে নিচেই যেতে হবে তাকে;

চুরুটের মুখে ছাই জমেছে, টোকা দিয়ে ঝেড়ে নিচে নেমে গেল।

পরদিন সকালে টেবিলে চা খাওয়ার সময় উৎপলা মাল্যবানকে বললে, 'কাল চায়ের দোকানে কী খেলে?'

'চা আর বিস্কুট।'

'আর কিছু না?'

'না।'

'বাবা যে সোনার ঘড়িটা তোমাকে দিয়েছিলেন, তার দাম তিন শো নয়—চার শো

টাকা, আমার নোটবুকে লেখা ছিল দামটা, দেখছিলাম। আজকাল সোনার দাম বেড়ে গেছে—হয়তো দু'শো টাকায় বিকোবে। টাকাগুলো হাতে থাকলে—মেজদাদারা আসছেন—সুবিধে হত তাদেরও, আমাদেরও। কিন্তু তবুও তুমি তো নিজের টেঁকি ছাড়া পাড় দেবে না।’

উৎপলা এতক্ষণ চায় চুমুক দেয়নি। এবার চার-পাঁচটা চুমুকে আধ পেয়ালা চা শেষ করে পেয়ালাটা একটু সরিয়ে রেখে বললে, ‘শুধু কি তাই, ঘড়িটা তোমাকে বেচে দিতে বলেছিলাম, তাই রাগ করে চায়ের দোকানে গিয়ে খেলে। এ আবার কী রকম—হিগলে পিগলে—হিগলে পিগলে—মেয়েমানুষের মতো নোলা ছব ছব করছে ঘড়িটা বিক্রি করার কথা পেড়েছিলাম বলে—এ আবার পুরুষ? কী রকম পুরুষ তাহলে। এসব পুরুষমানুষের ভরার মেয়ে মেয়ে বিয়ে করা উচিত।’

ঠাণ্ডা শাস্ত করণ ভাবে কথা বলছিল উৎপলা। একটা চাপা ঝাঁঝ যে না ছিল তা নয়। মাল্যবানের চোখে ভাব এল ; উৎপলার হৃদয়টা বাস্তবিকই বেশ, ভাইয়ের জন্য এই সুচিন্তাটুকু আগাগোড়াই সং; আমার বদলে অন্য কোনো মানুষকে—উৎপলার সাদা রঞ্জকণিকা যাকে চায়, তাকে যদি পেত সে তাহলে নারীটির মনের প্রাণের স্পষ্ট প্রবণতাগুলো শত পথে খুলে যেত যেন—সফতলায়, সফলতায়—

ভাবতে ভাবতে মাল্যবান চোখ বুজে কেমন একথা শামকল পাখির মতো মুখে নিগূঢ় হয়ে বসে রইল অনেক মন্ত্রশুষ্টি রয়েছে যার, সোনার ঘড়িটা কিছুতেই হাতছাড়া করবে না সে। নিজেকে যে এই রকম দেখাচ্ছে, তাও টের পেল মাল্যবান।

‘আমার সোনার নেকলেসটাই বিক্রি করতে হবে। বাপের বাড়ির মানুষদের আমাদের রকম এই যে, দশ জনের কাজে লাগলে কোনো জিনিসকেই পুঁজি করে রাখি না আমরা : ছড়িয়ে দিই চারিয়ে দিই। কিন্তু অন্য রকম হয়ে যাচ্ছি। বারো বছর বাপের ঘর ছাড়া। গোরুর মূত লেগেছে দুধে—কেন কাটবে না?’

মাল্যবানের ভাবপ্রাধান্য—যা তাকে আবেশ দিয়েছিল—সময় মতো ভাটার টানে সেটা প’ড়ে যাচ্ছিল আবার; উৎপলা যা বলছিল, কিছু তার কানে ঢুকছিল শব্দ তরঙ্গের মতো; মন উৎকর্ণ হয়েছিল—উৎপলা নয়, মাল্যবান নিজেও নয়,—কিন্তু মাল্যবানের মনের অবচেতনা নির্বৃমের দিকে : কী বলছে সে? ঘড়িটা বিক্রি করো না, ঘড়িটা বিক্রি করো, কোরো না বিক্রি, ক’রে দাও। কোরো না, ক’রে দাও ক’রে দাও। ঘড়িটা কি আজ বিক্রি করেছে সে? প্রায় তিন বছর আগে উৎপলারই একটা টাকার খাঁই মেটাবার জন্য বিক্রি করতে হয়েছিল ঘড়িটাকে। উৎপলা খুব ভালো করেই জানে তা। কিন্তু তবুও না জানবার ভান করে—সোনার দর বাড়লেই সেই সোনার ঘড়িটাকে

বিক্রি করবার জন্য তোলপাড় করে তোলে, অন্য কোনো মানিকজোড়ের থেকে বিচ্ছিন্ন পাখিনীর মতো এমনই বিজোড় এই মেয়েমানুষটি মাল্যবানের জীবনে।

হাতে আর-একটা ঘড়ি আছে বটে মাল্যবানের, সেটা সোনার নয়। সেটা বিক্রি করতে হবে? না, তা ঠিক নয়। শ্বশুর যে সোনার ঘড়ি দিয়েছিল জামাইকে, সেইটাই বারবার বিক্রি করে শ্বশুরের ছেলে পরিবারকে একটু তরিবতে রাখতে হবে মাল্যবানের বাড়িতে, শ্বশুরের মেয়ের বাপের টাকাতেই যে সব হচ্ছে, সে উপলব্ধি নির্বিশেষে ভোগ করতে দিতে হবে শ্বশুরের মেয়েকে।

ব্যাপারটা এই রকম তো? একে কী বলে? পিতৃগ্রস্থি? না কি জোড়ভাঙা পাখি কুল পাচ্ছে না অর্থই শূন্যের ভেতর, তাই সামাজিক সাক্ষীগোপালটির চেয়ে ভাইকে নিকট মনে হয়—পিতৃগ্রস্থি সক্রিয় হয়ে ওঠে? না : তা ঠিক নয়, মাল্যবান ভাবছিল; কোনো বিজ্ঞানের ছকে ধরা যায় না, উৎপলা বিজ্ঞানাতীত।

পাথুরেঘাটার বাড়িটা উৎপলা নিজেই একদিন মাল্যবানের সঙ্গে গাড়িতে চড়ে দেখতে গেল। দেখে পছন্দ হল না তার। অন্য কোনো বাড়িও সুবিধেমতো পাওয়া যাচ্ছিল না। কাজেই ঠিক হল, মেজদার পরিবার এলে মাল্যবান নিজে কিছু কাল মেসে গিয়ে থাকবে।

মাল্যবান তার হাতের অবশিষ্ট ঘড়িটা, ককতগুলো সোনার বোতাম (লুকিয়ে রেখেছিল বাক্সের ভেতর) বিক্রি করে শ-চারেক টাকা উৎপলাকে দিল। সোনার নেকলেসটা তাই আর বিক্রি করতে হল না।

এই সব নানা ব্যাপারে উৎপলার মনটা খুশি হয়েছিল। এক দিন রবিবার সে মাল্যবানকে বললে, ‘মনু অনেক দিন থেকেই বলছে চিড়িয়াখানা দেখতে খুব ইচ্ছে করে তার। আমিও তো শীগগির যাইনি। চলো-না আজ যাই।’

তিন জনে ট্রামে উঠল। খিদিরপুরের ব্রিজের কাছে এসে মাল্যবান তার পরিবার নিয়ে ট্রাম থেকে নামল।

‘বাঃ, আলিপুর বা কোথায়, তুমি পথের মাঝখানে নেমে পড়লে যে—’

‘এই বাজারটুকুর ভেতর দিয়ে যেতে হবে, মিনিট তিনেকের পথ।’

খিদিরপুর-বাজারের পথ দিয়ে হাঁটতে-হাঁটতে উৎপলা নাক সিঁটকে বললে, ‘ছি, মূর্গি খাসী বাজারের ভেতর দিয়ে। কলকাতা শহরে কি আর পথ ছিল না!’

মনু বললে, ‘রামছাগলের বাঁটকা গন্ধ বেরুচ্ছে, বাবা। ইস, কী পেছাপের গন্ধ, হ্যাঃ! ঐ দ্যাখ একসা ছাগল কাটছে—’

‘ও-দিকে তাকিয়ো না মনু—’

‘আমাদের যদি একটা ছোটো অস্টিন গাড়িও থাকত, তাহলে এই নালা নর্দমা পচা কাদা আর মূতের গন্ধ কি আমাদের নাগাল পেত, মনু?’

‘আমি বড় হলে বাবা গাড়ি কিনবে।’ মনু বলল।

‘একেবারে চিড়িয়াখানার গেটের কাছে গিয়ে গাড়ি দাঁড়াত,’ উৎপলা বলল, ‘সেই-
খানে নামতাম।’ উৎপলা একটা নিঃশ্বাস ফেলল, কিন্তু এ নিঃশ্বাসটা চিংড়ি মাছ
ঠোকরালে ফাতনা যেরকম করে নড়ে, তেন্নি হালকা আলতো উদ্দেশ্যহীন।
চিড়িয়াখানার ভেতর ঢুকে উৎপলা বললে, ‘এমন ঠাণ্ডা কেন গো, একেবারে
হাড়গোড় কেঁপে ওঠে যেন।’

‘শালের ভাঁজ খুলে ভালো করে জড়িয়ে নাও, পলা।’

‘না, এ পাট-করা শালটা হাতেই থাক। শাল গায়ে দেবার মতো শীত দুপুরবেলা
কলকাতায় কোথাও পড়ে না।’ হাঁটতে হাঁটতে বললে, এসব জিনিসের বাজে খরচ
করতে হয় না। কেনই বা এনেছিলাম, হারিয়ে যায় যদি!

‘আমার হাতে দাও।’

‘না, থাক আমার কাছে।’

মনুর দিকে ফিরে উৎপলা বললে, ‘বাঁদর দেখবি, মনু—’

ঝাকড়া মাথাটা নেচে উঠল, ‘হ্যাঁ, দেখব।’

‘তুই নিজেই তো একটা বাঁদর। তোকে এবার খাঁচার আটকে রাখতে হবে। মনু,
তুই আমার মেয়ে হয়ে জন্মালি রে।’

মাল্যবানকে বললে, ‘চলো, বাঁদরের ঘরে যাই।’

গেল সকলে মিলে সেখানে।

মনু বললে, ‘দেখেছ মা, কলার জন্য হাত পাতছে; মা, কিনে দাও।’

‘কলা দেবে না হাতি। যা খাচ্ছে, তাই হজম করে নিক।’

‘কেন হজম করতে পারে না? অস্বল হয়?’

উৎপলা মাল্যবানকে বললে, ‘এ জানোয়ারগুলোর মুখ তো নড়ছেই—নড়ছেই,
পেটে আলসার-টালসার হয় না?’

‘কি জানি!’

মনু খুব অনুভাবাক্রান্ত হয়ে বাঁদরের খাঁচাগুলোর দিকে তাকিয়ে ছিল; হঠাৎ
উৎপলা মেয়েটার চুলের ঝুঁটি ধরে টান মেরে বললে, ‘তোকে এর মধ্যে পুরে দিলে
বেশ ভালো হয়।’

আর একবার একটা হাঁচকা টান দিয়ে বললে, ‘মানুষের পেটে জন্মেছিলি কেন বল
তো দেখি।’

মাল্যবানের দিকে ফিরে উৎপলা বললে, ‘চলো, বাঘ দেখতে যাই।’

কিন্তু দুর্গন্ধে বাঘের খাঁচার থেকে অনেক পিছিয়ে রইল সে। বাঘগুলোর দিকে

তাকাতেও গেল না। নাড়ি উল্টে বমি আসছিল উৎপলার। বললে, ‘চিড়িয়াখানর ঢের হয়েছে। চলো, এখন বেরিয়ে যাই।’

মনু বললে, ‘বাঘ আমার মোটেই দেখা হল না। বাঘ দেখতেই তো এসেছিলাম চিড়িয়াখানায়।’

কিন্তু, তার কথা কেউই গ্রাহ্য করল না।

মাল্যবান স্ত্রীকে বললে, ‘এই তো এলে চিড়িয়াখানায়; এখনি বেরিয়ে যাবে? চলো, পাখি দেখে আসি।’

‘পাখি আবার একটা দেখে নাকি। ও তো দিনরাত দেখছি।’

‘না, না সে রকম পাখি নয়—’

‘পাখি আমি সব দেখে ফেলেছি। ও আমার দেখবার পিবিত্তি নেই।’

‘কলকাতায় তো দ্যাখ কাক আর চড়াই : সরাল তিতির কাকাতুয়া মাকুও, কতো রকম হাঁস, বক, ফ্ল্যামিঙ্গো, ধনেশ, শামকল—দেখবে এসো—দেখবে এসো—’

‘যে ধনেশ দ্যাখাচ্ছ তুমি দিনরাত।’

‘আমি?’

‘আরশোলা যেরকম কাঁচপোকা হয়, তেন্নি শামকল হয়ে যচ্ছে তো ধনেশটা—’
ব’লে ফির-ফির ফুর-ফুর ফিঃ-ফিঃ ফুঃ-ফুঃ করে হেসে উঠল উৎপলা।

তিনজনে মিলে সিঙ্কুঘোটক দেখতে গেল।

মনু অত্যন্ত কাতর হয়ে বললে, ‘সিংহ দেখা হল না আমার।’ বার-বার মরিয়া হয়ে বাপ-মাকে সে তার আবেদন জানাতে লাগল, ‘সিংহ দেখব। সিংহ কোথায়? ঐ যে সিঙ্গি ডাকছে!’

কিন্তু কেউ তার কথা কানেও তুলতে গেল না।

সিন্দুঘোটকগুলো রয়েছে একটা পুকুরের মধ্যে—ঢের নিচে। চারদিকে দেয়াল। একজন সাহেব ছুঁড়ে-ছুঁড়ে হেরিং মাছ, না, কী দিচ্ছিল তাদের। উৎপলা চৈঁচিয়ে বললে, ‘উঃ, কতো মাছ খাচ্ছে।’

‘তা খাবে না—হাতির মতো গতর।’

‘গা কেমন কেমন করে ওঠে যেন।’

‘কেন?’

‘এ যে বালতি-বালতি মাছ খেয়ে ফেলল।’

‘তা খাবে বৈকি।’

‘ডিসপেপসিয়া হবে না?’

মাল্যবান ঠোঁট চুমড়ে একটু হেসে বললে, ‘হ্যাঁ, ডিসপেপসিয়া।’

মনুর মাথা দেয়ালের নিচে পড়ে থাকে; সে কিছু দেখতে পাচ্ছিল না। বার বার নাকি সুরে বাবা-মা-কে ডেকে বলছিল, ‘কৈ, মাছ কোথায়? কী রকম করে মাছ খায়? কুমীরের মত নাকি সিন্ধুঘোটক? কৈ, সিন্ধুঘোটক কোথায়?’

কিন্তু, রাজঘোটকে যাতে বিয়ে হয়েছিল, সেই বাপ-মা এই মেয়েটির কোনো কথা খেয়ালের ভেতর আনল না।

উৎপলার কপালে গালে এমন সব খাঁজ ফুটে উঠল যে, কুৎসিং দেখাতে লাগল তার সুন্দর মুখটাকে; বোঝা গেল, তার বয়েস হয়েছে; অবসাদে বললে ‘এই তোমার চিড়িয়াখানা!’

‘কেন, মন্দ কী?’

‘নাঃ, এখানে আর কোনোদিনও আসা হবে না।’

‘আমার তো বেশ লাগে।’

দেখবার ভেতর দেখতে চেয়েছিলাম তো বাঘ আর সিংহ। তাও, বাবা, কী ভক-ভক করে গন্ধ আসে—কে এগোতে পারে!

‘বাঘ কেন, দেখতে হয় পাখি।’

‘তোমার রুচি তো আমার নয়। শামকল পাখির চোখ দিয়ে পৃথিবীকে দেখব আমি? তাহলে তো পাখিই সবচেয়ে ভালো মনে হত—সবচেয়ে ভালো লাগত শামকল পাখি—’

‘তাহলে মন্দ হত কি?’ প্রতীক পৃথিবীর সে-এক আলাদা নিগূঢ়তার ভেতররে যেন দাঁড়িয়ে বললে মাল্যবান বস্তুপৃথিবীর নারীকে।

‘হল না তো।’

‘আসছে জন্মে হবে।’

‘আসছে জন্মে আবার শামকল! ওরে বাবা!’ উৎপলা ধড়-ফড় করে কেঁপে উঠে বললে, ‘না রে বাবা, তার চেয়ে কোনো জন্ম না পাওয়াও ভালো। জন্ম নিলে ময়ূর হয়ে উড়ে যাব আমি সেই গোরক্ষপুরের দিকে জঙ্গলে—’

‘সেখানে সরবতী দই বিক্রি করছেন বুঝি মহলানবীশ-মশাই। বেশ, বেশ, যেয়ো। চলো, চন্দনা তিতির দেখে আসি—’

মনু বললে, ‘তিতির কী বাবা?’

মাল্যবান কোনো উত্তর দিল না, উৎপলার দিকে তাকিয়ে বললে, ‘চলো, দাঁড়িয়ে যে, চলো। ডাকপাখি, বাজ, শিকরে বাজ, খানদানী শামকল দেখে আসি সব—দেখে আসি সব।’

কিন্তু একেবারেই কোনো তাড়া ছিল না উৎপলার। মাল্যবানের দিকেও তাকাতে

গেল না সে। ‘আমার একটু জিরোতে হবে রে বাবা। পা দুটো ধরে গেছে—মাজা ভেঙে গেছে—বাপরে!’

তিনজনে একটা গাছের নিচে ঘাসের চাবড়ার ওপর বসল।

বসতেই উঠে দাঁড়িয়ে বললে, ‘ঘাসের ওপর যে বড় বসলে সবাইকে নিয়ে; ঐ তো বেঞ্চি ছিল।’

‘বেঞ্চির চেয়ে ঘাসে বসতেই ভালো লাগে আমার।’

‘ঘাসে আমার কুটকুট করে,’ উৎপলা বললে;—বেঞ্চিতে গিয়ে একাই বসলে সে। বসে বললে, ‘কত লোক তো বেঞ্চিতে বসে আছে; বসতে ভালো লাগে ব’লেই তো।’ উৎপলা নিজের মনেই তারপর বললে, ‘এত সব লোক চারদিকে; তাদের সঙ্গে বেশ তো খাপ খায় আমার, অথচ ঘরের মানুষদের সঙ্গেই ষাঁড়াষাঁড়ির কোটাল। ঘাসে গা ছড়ে যায়, আমার শাড়ি নোংরা হয়, মুচি-মোচলমানের চন্নামুতে গড়াগড়ি খেতে হয়—অথচ ঘেসুড়ে সেজে বসেছেন সব গুঁরা—ঘাস!—ঘাস না হলে হবে না। আঁটি আঁটি ঘাস বাঁধবে না-কি তোমরা বাপ-বেটিতে মিলে—’ কথা ব’লে যেতে লাগল উৎপলা—

মাল্যবানের থেকে উৎপলা হাত দশেক দূরে একটা বেঞ্চিতে বসেছিল, কিন্তু প্রতি মুহূর্তেই মাল্যবানের মনে হতে লাগল: এইটুকু ব্যবধান ঘোচাতে হলে—সত্যিই যদি ঘোচাতে পারা যায়—উৎপলার তরফ থেকে আহ্বান আসবে না কোনো দিন। তা ছাড়া, বেঞ্চিতে তো ঘাসের ভেতরে ঘাস নয় : মনু আর আমি ঘাস—ঘাসের চেউয়ে; বেঞ্চিটা ঘাসগাছের কাঠেও তৈরি নয়—ধানগাছের কাঠেও নয়; সে রকম কাঠ নেই কোথাও; কেঠো কাঠ আছে; এত ঘাস থাকতে কী ভীষণ কেঠো কাঠের বেঞ্চি চার দিকে সব।

উপলা বললে, ‘চলো, এই বেলা বেরিয়ে পড়ি; প্রকাশবাবুর আজ সন্ধ্যের সময়ে আসার কথা ছিল।’

‘পাখি দেখবে না?’

‘আমি সিংহ না দেখে যাব না।’ মনু বললে।

‘আচ্ছা, ঐ যে একটা টেবিলের চারদিকে বসে কয়েকটি লক্সা মেয়ে চা খাচ্ছে, ওরা কারা?’

‘চিনি না তো, দেখিনি কোনো দিন। মেয়েদের দিকে না তাকিয়েই মাল্যবান বললে।’

‘কেমন এক বিঘৎ পেট বার করে শাড়ি পরেছে; কেমন কানের পাশে জুলপি ঝোলাবার কায়দাটুকু। নিশ্চয়ই আইবুড়ো এরা সব। বাস্তবিক, যার বিয়ে করেনি, তাদেরই রগড়—’ ব’লে উৎপলা মুখ ফিরিয়ে চোখ দিয়ে গিলতে লাগল যেন মেয়ে কটিকে।

মাল্যবানের ভালো লাগল না। ‘ওদের দিকে চোখ দিয়ো না, বাপু। ওরা চা আর স্কোন খাচ্ছে। কেন চোখ লাগাচ্ছ পলা।’

মাল্যবান কিছুক্ষণ নিস্তব্ধ হয়ে ঘাসের শিষের সাদার দিকে তাকিয়ে রইল; কিছুক্ষণ মনুর কৌকড়া চুল নিয়ে খেলা করল; তারপর উৎপলার দিকে ফিরে তাকিয়ে দেখল, তেম্নি ক’রেই মেয়ে, কটির দিকে গোথ্রাসে চেয়ে আছে সে।

‘এখানে এসে বোসো তুমি—এই নরম ঘাসে।’

‘চলো, এখন উঠি।’

‘কোথায় যাবে?’

‘এখানে বসে কী আর লাভ।’

‘তোমার পা ব্যথা করছে, বলছিলে—চা খাবে?’

‘না। ব্যথা ক’মে গেছে।’

‘চলো-না, ঐ মেয়েদের পাশে আর-একটা টেবিল খালি আছে—’

‘না, তুমি আমাকে আর এক দিকে নিয়ে চলো।’

মেয়ে কটির দিকে পিছন ফিরে হাঁটতে-হাঁটতে উৎপলা বললে, ‘ভেবেছিলাম, আজ কপালে সিঁদুর-টিপ পরে আসব না—’

‘কেন?’

‘সব সময়ই এ-সবের কী দরকার।’

‘হ্যাঁঃ, রেওয়াজ উঠে গেছে,’ মাল্যবান বললে, ‘ওসব টিপ-টাপ ফেঁদে কী হবে।’

‘যদি না সিঁদুর ধেবড়ে আসতাম, তাহলে এই মেয়েরা কী মনে করত, বলো তো দেখি—’

মাল্যবান এ-কথা সে-কথা ভাবছিল, বললে, ‘মনে করত একটা কিছু। মনে করার বালাই নিয়ে মরি আমি।’

‘তোমাকে হয়তো মনে করত আমার মেন্সো কিংবা মামাশ্বশুর—’

‘আমাকে যদি ওরা তোমাদের বাড়ির খাজাঞ্চি কিংবা সরকার মনে করতে পারত, তাহলে হয়তো খানিকটা লাভ ছিল—’

মাল্যবান হাঁটতে হাঁটতে একটা চোরকাঁটা ছিঁড়ে খড়কে বানিয়ে বললে, ‘সেই যে বিলেতে গিয়ে মাখন তোলা শিখে এসেছে—সব সময়ে সাহেবি পোশাকে থাকে, সাহেবি করে বেড়ায় সেই যে মাখন তোলার সাহেব আমাদের মতীন চৌধুরী গো—তাকে যদি সঙ্গে করে আনতে পারতে, তাহলে তোমাকে ওরা ছো-ছো করে চিলের চোখ দিয়ে দেখে নিত বটে। ওদের ঐ রকমই তো স্বভাব। আমার মত ধনকৃষ্ণের সঙ্গে চিড়িয়াখানা রৌদ দিতে এসেছ—এ আবার একটা দেখবার কী। চোখ তুলে তাকিয়ে দেখবে কে!’

‘মতীন চৌধুরী কে?’

‘আহা, বললাম যে বিলেত থেকে মাখন তুলতে শিখে এসেছে।’

‘দুধের থেকে মাখন তুলতে?’

‘হ্যাঁ, হ্যাঁ, মাখন তোলা’র সাহেব—’

‘তার সঙ্গে আমি চিড়িয়াখানায় আসতাম—মানে?’

‘এন্নি বলছি—কথার কথা—’

‘তুমি বড্ড বেকুব।’

‘আমি একটা দৃষ্টান্ত দিচ্ছিলাম—’

কোনো উদ্দেশ্য নিয়ে চলছিল না তারা কোন দিকে যাচ্ছিল খেয়াল ছিল না, এন্নি শীতের বিকেলে ঘুরে বেড়াচ্ছিল চিড়িয়াখানার চিলতি-চিলতি মাঠ ঘাসের ভেতর—রাস্তায়-বেরাস্তায়।

তোমার মাইনে তো আড়াই শো হল। রিটার করবার আগে কতো হবে?

‘দু’ শো পঁচাত্তর—তিন শো—’

‘এর বেশি না?’

‘না।’

উৎপলা ভাবছিল। চিন্তার মাঝপথে থেমে বললে, ‘আড়াই শো টাকা মাইনেতে কি গলাবন্ধ কোট ছাড়া আর কিছু পরা যায় না?’

‘কেন যাবে না? ধুতি-পাঞ্জাবি পরা যায়। আজকাল অনেকেই তো তা পরছে।’

তা নয়, আমি বলছিলাম হ্যাট-টাইয়ের কথা। কেন পর না তুমি? পরলে মানায় না বটে তোমাকে। কেমন যেন খাপছাড়া দ্যাখায়। এরকম হল কেন?

‘কেন হল?’ মাল্যবান তার হাতের ঘাসের শিষটা দাঁত দিয়ে কাটতে-কাটতে বললে, ‘চিনি মিষ্টি, আর নুন নোনতা কিনা উৎপলা—সেই জন্য হল।’

খানিকটা দূর নিঃশব্দে এগোল তারা। মনুর কথায় কেউ কান দেয় না, নালিশ কেউ শোনে না, সেই জন্য সে অনেকক্ষণ থেকেই চূপ মেরে গিয়েছিল।

উৎপলা বললে, ‘খোঁচা-খোঁচা দাড়ি—কেমন দ্যাখাচ্ছে তোমাকে—চেষ্টে এলে না কেন?’

‘হঠাৎ তোমরা সকলে বললে, চিড়িয়াখানা দেখবে—সময় পেলাম কোথায়?’

‘তাই তো! কী দিয়ে চাঁচবে—জিনিস পাবে কোথায়!’

‘দাড়ি যারা সত্যিই চাঁচে, প্রথম পক্ষের মাগীকে শ্মশানে পোড়াতে পোড়াতে গালে হাত বুলিয়ে নেয়—’

‘তাই নেয় বুঝি।’

‘দাড়িটা কামানো হল কি না দেখে নেয়।’

চিড়িয়াখানার থেকে বেরুচ্ছে না—কিছু দেখছে না—বসছে না কোথাও—পায়চারি করার মতো আশ্বে-আশ্বে হাঁটছে—ঘাসের ওপর দিয়েই বেশি। কোথায় চলছে—কেন চলেছে—খেই-খেয়াল না হারালেও শুধোচ্ছে না কেউ কাউকে। মনু কোনো কথা বলছিল না। তার পা টাটাছিল বুক ধড়ফড় করছিল, জিভ শুকিয়ে আছে অনেকক্ষণ। কিন্তু তার কোনো কথায়ই কেউ সাড়া দেয় না, সায় দেয় না বলে কাউকেই সে কিছু বলতে পারছিল না। মনু খানিকটা পিছে পড়ে গিয়েছিল; তার জন্য দুজনে খানিকক্ষণ থেমে দাঁড়াল। মনু এল।

মাল্যবান ঠিক উৎপলার মনের মতো ঠাঁটে পা ফেলে হাঁটতে পারছিল না। পা দুটো কিছুতেই আড় ভাঙতে চায় না যেন, উৎপলা যা চায় মাল্যবানের পায়ে—পদক্ষেপে সে সৌন্দর্য, মাত্রা, দৃঢ়তা কিছুতেই ধরা পড়ে না। হাঁটতে হাঁটতে তারা বাঘের ঘরের কাছে এসে পড়ল আবার। খাঁচার ওপর থেকে থপাস-থপাস ক’রে ছুঁড়ে কাঁচা মাংস দেওয়া হচ্ছিল জানোয়ারগুলোকে—

‘কী রকম ক’রে এরা মাংস খায়, দেখবো এসো।’

উৎপলা মাথা নেড়ে বললে, ‘এখন বেরিয়ে যাব।’

হাঁটতে হাঁটতে নিজেকে সাস্থনা দিয়ে উৎপলা বললে, ‘আমার দাদা মেজদা ছোড়দা এ-রকম নয়। কখনো ন্যাং ন্যাং করে হাঁটে না তারা।’

সামনে তাকিয়ে দেখল দু’টো মস্ত হাতি দাঁড়িয়ে রয়েছে—আশে পাশে অনেক ডাল পালা কেটে রাখা হয়েছে, হাতিগুলো ক্রমাগত শুঁড় দিয়ে সেগুলো টেনে টেনে খাচ্ছে। মনু বললে, ‘দেখলে বাবা, কী রকম শুঁড় দিয়ে কলা টেনে নিয়ে মুখের মধ্যে ফেলে দ্যায়।’

একটি মুসলমান ছেলে কলা দিচ্ছিল—পাঁচ-ছ-টা হাতি, কিন্তু কলা মাত্র দশ-বারোটা; কিন্তু হাতিগুলোর হায়া আছে, নিয়ম মেনে চলাটা দেখবার মতো; পাশাপাশি ক’টাতে দাঁড়িয়ে আছে, কিন্তু কেউ কারু ভাগ নিয়ে কাড়াকাড়ি করছে না, যার কপালে যেটুকু প্রসাদ পড়ছে, তাই নিয়েই তৃপ্ত; তারপর ডালপালার দিকে মন।

মাল্যবান বিমুগ্ধ হয়ে দেখছিল; বললে, ‘মানুষের চেয়ে জীবনটাকে এরা বেশি বোঝে। জীবনের কষ্ট ও একঘেষেমি সহ্য করার ক্ষমতাও এদের চীনের বা ভারতের জ্ঞানবিষুদের মতো। বাস্তবিক, হাজার দু’হাজার বছর আগে এরা ভারতে চীনে সমাজের বড়-বড় জায়গায় দাঁড়িয়ে দেখেছে শুনেছে রক্ষা করেছে—ধর্ম কর্মের বিধান দিয়েছে ব’লে মনে হয়।’

শুনে উৎপলা কোনো সাস্থনা পেল না। হাতির কুলোর মতো কান ও বুড়ো

দিদিমার মতো মুখ দেখে কেমন যেন কৌতুক, অসাধ, নিরেস অস্বস্তি বোধ করছিল সে। বললে, ‘থাক, অনেক হয়েছে; এখন চলো।’

হাঁটতে হাঁটতে মাল্যবান বললে, ‘একবার বেরিয়ে গেলে ঢুকতে পারবে না কিন্তু আর।’

‘আমি ঢুকতে চাইও না আর। এ-জায়গায় কোনো দিনও আর আসা হবে বলে মনে হয় না।’

‘চলো, ছোলা কিনে নিয়ে কাকাতুয়ার ঘরে যাই; দানা খাবে আর পড়বে কা-কা-তু-য়া।’

‘এক-আধটা পাখি বেশ পড়ে। সবগুলোই পারে?’

‘পড়ালেই পারে। চলো।’

‘থাক।’

‘নানা রঙের কাকাতুয়া আছে, বেশ পশমের মতো পালক; ডানার দিকে তাকিয়ে মনে হয় যেন আঙনের থেকেই উৎপত্তি হয়েছে ওদের সব—আঙনের ভেতর খেলা করছে সব—আঙনে আঙনে খেলা করে একদিন আকাশে নীলিমায় মিলিয়ে যাবে—চলো—চলো—’

উৎপলা দাঁড়িয়ে রইল; আঙুল দিয়ে দেখিয়ে দিয়ে বললে, ‘ঐ তো টেবিলটা, সেই মেয়ে চারটি ওখানেই বসেছিল? ওখানে?’

মাল্যবান কিছু বলবার আগে উৎপলা বললে, ‘কোথায় গেল তারা?’

‘চলে গেছে।’

‘চিড়িয়াখানার ভেতরে কোথাও তো তাদের দেখলাম না।’

‘এত তাড়াতাড়ি বেরুল যে?’

‘চুকেছিল আমাদের ঢের আগে। দেখাশোনা মজা-মারা হয়ে গেল—বসে থাকবে কেন। বেশ্যের ছেলের অন্তপ্রাশন কি সারাদিন বসে খাবে?’

মাল্যবানের অন্তপ্রাশনের কথাটা কোনো কথা নয়; একবার দাঁত দিয়ে চিবিয়ে চোয়াল শক্ত করে কথাটা তারপর বেড়ে ফেলে দিল উৎপলা; বললে, ‘দেখলাম, মেয়ে কটির প্যাঁচে প্যাঁচে বেশ জিলিপির রস। হাত তুলে ফুর্তি করছে। আগা-পান্তলা মিঠিয়ে ঝিকিয়ে কী ফুর্তির তোড়—সারাটা সময়; টেঁসে যাচ্ছে না তো—আমার ও-রকম হয় না তো।’

‘বেঁচে যেতে বুঝি ওদের মতো ফুর্তি করতে পারলে?’

‘হলে কেমন হত?’ একটা বীতকাম নিঃশ্বাস ছেড়ে উৎপলা বললে।

‘ফুর্তি মানে আমোদ—’

• ‘আমোদ বলছ তুমি—’

‘সত্যিকারের আমোদ—’

‘মানে, আনন্দ?’

মাল্যবান ঘাসের ওপর পিচ্ কেটে বললে, ‘ওঃ, ঐ সব মেয়ে! ওরা তো ছেনাল—আনন্দ-আমোদের ইস্টকুটুম আমার সব। ওদের কথা ভাবে মানুষে! ওদের খাঁটিয়ে আবার কথা বলো!’ মাল্যবান দাঁত-মুখ খিঁচিয়ে পিচ্ কটল ঘাসের ওপর আবার।

‘তবে কী; ছাগল দিয়ে ধান মাড়িয়ে দশ মুখ ক’রে সেই ছাগলের কথা বলে বুঝি?’

চলতে-চলতে মাল্যবান থেমে গেল। ‘কোথায় যেতে চাচ্ছ তুমি?’

‘এবারে চিড়িয়াখানা থেকে বেরিয়ে যাব।’ উৎপলা বলল।

‘আমি তা বলছি না। তুমি রাখালী ক’রে ধান খেতে চাচ্ছ তো! ছাগলকে সরিয়ে দিয়ে। ঐ মেয়েগুলোর মতো পাটে এসে বসতে চাচ্ছ তো—’

‘কে না চায় পেতে বসবার পাট। কিন্তু দেবার ভার তো শামকলের ওপর নয়। মনু, এদিকে আয়। কেউ কারু ওপর বরাত দিতে পারে না। ধনেশ পাখি ঠোঁট কেলিয়ে ব’সে থাকবে—মাড়োয়ারী কবে তার তেল নিতে আসবে, সেই জন্যে—চন্দনা নিজের পাটে উড়ে যাবে। মনু!’

মাল্যবান চিড়িয়াখানার থেকে বেরিয়ে যাবার গেট এড়িয়ে অন্য পথ ধ’রে চলতে লাগল। উৎপলা বুঝতে পারল না। অনেক-ক্ষণ হোঁটে বললে, ‘কৈ, এ-গোলক ধাঁধা ফুরোয় না দেখছি—’

‘বেরুতে চাও?’

‘মনু কোথায় গেল—’

‘চলো ঘুরি।’

‘ঘোরো তুমি।’

‘তুমি কী করবে?’

‘একা তো বেরিয়ে যেতে পারবে না।’ কাছে একটা বেঞ্চিতে গিয়ে চোখ বুজে বসল উৎপলা।

‘পা টাটাচ্ছে?’

একটা খালি বেঞ্চি—আলাগোছে তার এক কিনারে ব’সে পড়েছে উৎপলা—একটা হাত তার বুকে—আর একটা কোলের ওপর ভাটার টানে সমুদ্র স’রে গেলে ভিজে বিনুক, পরগাছার ঠাণ্ডার মতো করুণ হয়ে প’ড়ে আছে। খানিকক্ষণ এদিক সেদিক উঁচু উঁচু গাছের মাথায় আকাশের মেঘ আলোর দিকে তাকিয়ে কী যেন কেমন একটা অস্তিমপ্রতিম অর্থ অবধান ক’রে তারি কাছে শান্ত নিশ্চর হয়ে নিজেকে নির্বিশেষে ছেড়ে দিল উৎপলা; একটু কাৎ হয়ে ডান হাতের ওপর মাথা পাতল; চোখ বুজে এল।

মনুও ঘাসের ওপর ঘুমিয়ে পড়েছে।

পরদিন উৎপলা আগ বাড়িয়ে বললে, ‘সিনেমায় চল।’

অফিস ছুটি ছিল সে-দিনও তিনটের শো-তে গেল তারা। ট্রাম থেকে নেমে উৎপলা বললে, ‘বস্কে বসবে তো?’

‘না, সে চের খরচ।’

‘তাহলে কোথায় যাবে আবার। ছবিতে বস্কে না বসলে ভালো লাগে না।’

‘কেন, নিচের গদিতে ব’সেও তো বেশ আরাম।’

‘আরামের জন্যে বলছি না আমি—’

‘তবে?’

‘বস্কে বসলে নিচের লোকেরা হাঁস-হাঁসিনের মতো ঘাড় বাঁকিয়ে আমাদের দিকে তাকায়, দেখতে বেশ লাগে।’

মাল্যবান হেসে বললে, ‘ওঃ সেই কথা; দু’তিন ঘণ্টার জন্যে তো শুধু, তারপর সিনেমা ভেঙে গেলে কেউ কি আর বস্কের মানুষদের কথা মনে রাখে।’

‘তা রাখে বৈ কি। যদি কোনো চেনা মানুষ নিচের থেকে আমাদের দেখতে চায়, তাহলে জনে-জনে ব’লে বেড়াবে কথাটা। আচ্ছা রগড়ই হবে! খুব কি খারাপ জিনিস হবে কথাটা চার হাত-পায়ে চতুর্দিকে ছুটে বেড়াবে—’

কেমন যেন নির্দোষ শয়তান মেয়ের মতো হাসি—ডেঁপো ইশকুলের উৎপলার পাউডার -ক্রিম মাখানো চমৎকার মুখখানাকে আঁকড়ে ধরল। হি-হি ক’রে হাসতে লাগল সে।

মাল্যবান আড়চোখে একবার উৎপলার দিকে তাকিয়ে বললে, ‘না, তা নয়—তবে এতে আমাদের কী আর লাভ।’

‘বেশ রগড় হয়।’

‘এ-রকম রগড়ের কী আর মূল্য আছে।’

‘মূল্য নেই? তুমি বললেই হল নেই? নিশ্চয়ই আছে। না থেকে পারে না।’

হাঁটতে—হাঁটতে উৎপলা বললে, ‘সে দিন তো সোনার ঘড়ি বেচে তিন শো পঁচাত্তর টাকা পেলে—বস্ত্রের টিকিট কিনতে তোমার এত ভয়—’

‘মিছেমিছি পয়সাবাজি ক’রে কী লাভ।’

‘মিছিমিছি হল?’

‘চেনা মানুষ কে এমন থাকবে নিচে যে, বস্ত্র আমাদের দেশে ঈর্ষায় রাতে ঘুমোতে পারবে না আর।’ ব’লেই মালবান একটু দাঁত বার ক’রে হাসল।

উৎপলা বললে, ‘ঝপ ক’রে মিথ্যে কথা ব’লে ফেললে।’

‘কেন, মিছে কথা কী হল?’

‘ঈর্ষ্যার কথা বলেছিলাম আমি?’

‘বেশ মজা হবে, বেশ পায়তড়া কষা হবে, বলেছিলে তুমি। তা তো হবে, কিন্তু অন্যেরা ঈর্ষ্যায় না পুড়লে রগড় ফলাও হয় কী ক’রে?’

‘বেশ তো, পুড়ুক হিংসায়।’

‘বেশ। পুড়ুক।’ মাল্যবান টিকিট-ঘরের দিকে এগিয়ে গেল।

মাল্যবান অরিশি সেকেন্ড ক্লাসের টিকিট কাটল—ম্যাটিনির সময়ে আর্দেক দামে পেলে—তিন-চার টাকাও খরচ হল না তার।

‘যাক, আমি বাড়ি ফিরে যাই—’ উৎপলা প্লাগ ঢোকাতে গিয়ে বিদ্যুতের ঘা খেয়ে যেন বললে।

‘কেন?’

‘দেখব না সিনেমা।’

‘তুমিই তো সকাল থেকে তাড়া দিলে সিনেমায় আসবার জন্যে।’

‘ঢের হয়েছে, আর কোনোদিন আসতে চাইব না।’

‘কিন্তু এখন তো চলো।’

‘তুমি আর মনু যাও।’

‘আর তুমি?’

‘ঠিক আছে। যাও তোমরা।’

‘হুশ, এ-রকম ছেলেমানুষি করে নাকি, পলা।’

‘কী টিকিট কিনেছ, দেখেছি আমি,’ ঝামটা মেরে উৎপলা বললে, ‘ছেলেমানুষি? আমার? নাম ডোবালে তুমি। ধনবান খোয়ালে টিকিট কিনে। ওমা, থার্ড ক্লাসের টিকিট।’

‘কে বললে তোমাকে?’ টিকিটগুলো উৎপলার চোখের সামনে ধ’রে মাল্যবান বললে, ‘সেকেন্ড ক্লাস—’

‘তবে দেড় টাকা নিয়ে কেন—সেকেন্ড ক্লাসে তো তিন টাকা দু’আনা নেবার কথা—’

‘ম্যাটিনিতে অনেক দিন পরে এলাম, তাই ভুলে গ্যাছ দর-দস্তুর সব। এটা ম্যাটিনি—আদ্বেক দাম—’

উৎপলা দু’এক পা হেঁটে মুখিয়ে এসে বললে, ‘তাহলে ফার্স্ট ক্লাস করলেই পারতে।’

‘ভেবেছিলাম, কিন্তু তাতে সীট বড় পেছনে প’ড়ে যেত।’

‘আ ম’ল! সিনেমায় পেছনে বসেই তো ভালো দেখা যায়—’

‘কিন্তু, তুমি চোখে তো কম দ্যাখ—’

‘কে, আমি?’ উৎপলা মাল্যবানের দিকে সাঁ ক’রে তার গালে চড় মারবার মতো চোখ তুলে তাকাল, ‘আমি চোখে কম না দেখলে সেকেন্ড ক্লাসের টিকিট কেনার ওজোর টেকে না? না-কি?’

‘তাই বুঝি তাই? গত বার যখন তোমাকে ফার্স্ট ক্লাসে নিয়ে গেলাম, তুমি সমস্তটা সময় আমাকে বললে, কিছু দেখছ না, ঝাপসা দেখছ—তুমি তো সামনে এগিয়ে বসতে চাইছিলে সেদিন।’— বলতে বলতে মাল্যবান উৎপলার দিকে সোজাসুজি মুখ ফিরিয়ে তাকিয়ে বললে, ‘দাঁড়িয়ে রইলে যে—’

‘আমি বড় রাস্তার মোড়ে গিয়ে একটা বাস ধ’রে চলে যাব।’

‘ছবি দেখবে না?’

উৎপলা মুখ ফিরিয়ে রইল।

মাল্যবান বললে, ‘বেশ, বাড়ি চलो তাহলে—’

‘এ-টিকিটগুলো পাল্টে টাকা নিয়ে এসো।’

‘এখন ফেরৎ নেবে কেন?’

‘তাহলে বিক্রি ক’রে দাও কারু কাছে।’

‘কে কিনবে?’

‘গলাবন্ধ ছিট, খোঁচা দাড়ি দেখলে কেউ কিনবে না বটে?’

আজ অবিশ্যি মাল্যবান একটা তসরের পাঞ্জাবী গায়ে দিয়ে এসেছিল—দাড়িও কামিয়ে ছিল।

একটু কাঠ মেরে গিয়ে, হেসে, হাসিমাখা দাঁতে কুঠায় সঙ্কোচে মাল্যবান ইতস্তত তাকাতে লাগল কার কাছে টিকিট বিক্রি করা যায়। দু’চার জায়গা ঘুরে সুবিধে হল

না। তারপর একজন ভদ্রলোক টিকিট নেড়ে-চেড়ে বললেন, ‘আজকের তারিখ তো? কলকাতা শহরে নানা রকম চোট্টা থাকে; যাক, তারিখটা আজকেরই; হ্যাঁ, এই সেন্টারের সীটই আমি চেয়েছিলাম আমি আর আমার দুই মেয়ে। তা বেশ, টিকিটের মাথায় চেয়েছিলাম—আমি আর আমার দুই মেয়ে। তা বেশ, টিকিটের মাথায় দু’আনা দু’আনা কম নেবেন,—একুনে ছ’ গুণা পয়সা কমিয়ে দিতে হবে। আপনার তো সবই ভাগাড়ে গড়াছিল—’

পকেট থেকে ব্যাগ বার ক’রে ভদ্রলোক বললেন, ‘আট আনার টিকিট ফুরিয়ে গেছে কিনা সব। এসেছিও সেই চেংলার থেকে কলকাতায় ছবি দেখতে। ফিরে যেতে তো আর পারি না; নইলে আমি ও হাতির শুঁড় ব্যাণ্ডের লেজ সব অফিস থেকেই কিনি। তা এই একটা টাকা নিন, টিকিট তিনটে দিয়ে দিন আর-কি।’

উৎপলা মাল্যবানের পাঞ্জাবীর বুল ধ’রে এক টান মেরে বললে, ‘কৈ, ভেতরে তো ঘণ্টা প’ড়ে গেছে। দাঁড়িয়ে-দাঁড়িয়ে পা ব্যথা হয়ে গেল, তবুও তোমার ন্যাকড়া ফুরোয় না দেখি।’

শুনে মাল্যবানেরা পা চালাতেই ভদ্রলোকটি বললেন, ‘ও মশাই, ও মশাই, শুনছেন দেড় টাকাই দিচ্ছি, নিন, আসুন, নিন। ও মশাই, ও দাদা!’

আর ও দাদা! তিন জনে ভেতরে ঢুকল। মনু মাঝখানে, দু’পাশে দু’জন; গদি-আঁটা চেয়ারে অঙ্ককারের মধ্যে বেশ লাগছিল মনুর—মাল্যবানেরও। ‘বই’ আরম্ভ হয়ে গেছে।

উৎপলা পর্দাটাকে অগ্রাহ্য ক’রে ওপরের দিকে তাকাতে লাগল বেশি। বক্সে কে কোথায় বসেছে ঠাহর করতে পারা যায় কি-না, কোনো চেনা মুখ চোখে পড়ে কি-না; ফার্স্ট-ক্লাসের সীটের বা কারা; এই সব নিয়ে অনেক ক’টা মুহূর্ত কেটে গেল তার। কিন্তু অঙ্ককারের মধ্যে বিশেষ কিছু বুঝল না সে। তারপর নিঃশ্বাস ফেলে অবসন্ন হয়ে ছবির দিকে তাকাল। একজন অ্যাংলো-ইণ্ডিয়ান পুরুষ উৎপলার পাশের সীটে ব’সে সিগারেট টানছিল; মন তার বিচ্ছিরি লাগছিল তাতে।

মাল্যবানকে বললে, ‘তুমি এখানে এসো, আমি তোমার চেয়ারে গিয়ে বসি।’

সীট বদলে যখন বসেছে, উৎপলা দেখল তার পাশে একটি অ্যাংলো ইণ্ডিয়ান মেয়ে চকোলেট খাচ্ছে আর কাশছে—

অনবরত কাশছে—

ব্যতিব্যস্ত বোধ করল উৎপলা, পর-পর চার-পাঁচটি ফিরিস্টি মেয়ে ব’সে গেছে। উৎপলা মাল্যবানকে বললে, ‘এ পাঁচ জন কি বি.এন.আর.-এর মেয়ে নাকি টেলিফোনের—’

‘আস্তে।’

মেয়ে ক’টি নিজেদের বাড়ির খবর হাঁড়ির খবর, মাঝে-মাঝে ছবির তাৎপর্য নিয়ে গলা ছেড়ে হাঁকড়াবার জন্যেই হাজির হয়েছিল। যখনই ঘরোয়া কথা বলবার তাগিদ জুড়িয়ে যাচ্ছিল, হেসে, হল্লা ক’রে চিৎকার পেড়ে, পর্দার ছবিটাকে তারাই তো জীইয়ে রাখছিল—

‘কিছু জানে না, বোঝে না, কলির সন্ধ্যায় কী করবে আর, চ্যাঁচাচ্ছে—’ একটু ন’ড়ে-চ’ড়ে ব’সে কৌতুকে ও বিমর্ষতায় বিমিশ্র একটা নিঃশ্বাস ফেলে উৎপলা বললে।

‘কাদের কথা বলছ?’

‘ফিরিঙ্গি মেমদের : গুল ছাড়ছে শুনছ না?’

‘কেন যাঁটাচ্ছ ওদের?’ মাল্যবান উৎপলার কাঁধের ওপর এক বার হাত রেখে হাত সরিয়ে নিয়ে বললে।

কিন্তু, তবুও, কথা বলবার দরকার আছে ঢের উৎপলার। চাপা গলায় বললে, ‘ছবি তো আমরাও দেখছি, বাপু, তোমরাও দেখছ। ছবি তো চিত্তির: তা তো দেখছিই! কিন্তু তাই ব’লে দিক-বিদিকে নয়! আশু ছুঁড়ে একেবারে ঝোল বের ক’রে দেবে না-কি? পর্দায় এক জনে একটা ছেঁড়া ট্রাউজার প’রে এসেছে—ওম্নি হি-হি ক’রে হাসি; একটা গাধা দৌড়ে গেল—ওম্নি হ-হ-হ-হ; পকেটের থেকে একজনে এক জোড়া নকল গোঁফ বের করল—ওম্নি ফ্যা-ফ্যা; বাস্কেটের থেকে একটা হাঁদুর লাফিয়ে পড়ল তো আমাদের মাথায়ও চাতাল ফাটল। হাতিবাগানে আশুন লেগেছে, না-কি দমকল ছুটেছে, না-কি শোভাবাজারের দামোদর বাবুরা সব খুন হয়ে গেল—এ কী-সব মাগীদের কোলে ক’রে বসেছি আমি!’

মাল্যবান ঘাড় কাৎ ক’রে একটা সিগারেট জ্বলে নিল। উৎপলা বা অ্যাংলো-ইণ্ডিয়ান মেয়েদের দিকে সে ফিরে তাকাল না। ছবিটা তাকে আকৃষ্ট করেনি। মাল্যবান ছবি দেখতে-দেখতে নিজের সস্তার ভেতরের অঙ্গারশিল্প ও কাঠখোদাইয়ের আবছায়া-মতন অনুপম ছবিগুলো দেখে নিচ্ছিল—চোখ বুজে। বাস্তবিকই চোখ বুজে ছিল সে।...ঘুমোচ্ছিল না, কথা ভাবছিল; কারা যেন কোথায়—অনেক দূরে সঙ্গত করছে। এক-মনে শুনছিল সে।

মাল্যবানকে একটা ধাক্কা দিয়ে উৎপলা বললে, ‘রেলী ব্রাদার্সের, না, পোর্ট কমিশনের বিয়ে করেছে, না রাঁড়ি?’

মাল্যবান যেন অপারেশন টেবিলের ক্লোরোফর্মের ঘোর আস্তে আস্তে কাষিয়ে উঠতে উঠতে চোখ মেলতে মেলতে বললে, ‘কে?’

‘এই যে মেমসাহেব ক’টি : আমার পাশে যারা ব’সে আছে?’

‘ওরা?’ মাল্যবান অনেকখানি জেগে উঠে আরো জেগে উঠতে চেয়ে, তারপরে বললে, ‘ওদের দিয়ে তুমি কী করবে?’

‘আমাকে ছবিটা দেখতেই দিচ্ছে না।’

‘ওদের মনে ওরা থাক। ছবি দেখতে দিচ্ছে না বলছ। দ্যাখ ছবি; দেখলেই তো দেখা হল।’

‘ব’লে দিল কথা! আর বাপু, কী রকম গুল মারছে শুনছ না। হাড়হদ ঘাঁটিয়ে বার করছে।’

‘কীসের?’

‘না কীসের?’

‘ওদের কথায় কান দিয়ে না।’

‘কান টেনে মাথা টেনে নিয়ে যায় যে—’

‘বাপ রে,’ উৎপলা ধড়ফড় চন মন ক’রে উঠল, ‘আমাকে চেপে বসেছে। ধরছে—উঃ!’

‘দ্যাখ-না, ছবিটা দ্যাখ—’

‘এই জন্যেই আমি বলেছিলাম বজ্জের কথা। উঃ! ধরধর—হাতিমুখো গণেশ এসে আমার কোল ঠেসে বসেছে রে বাবা—গেল—গেল—হয়ে গেল—হয়ে গেল আমার—’

‘ছবিটা দ্যাখ, ছবিটা দ্যাখ—’ মাল্যবানের সীটে এসে বসল উৎপলা। মাল্যবানকে যেতে হল তার স্ত্রীর চেয়ারে। সেই অ্যাংলো-ইন্ডিয়ান পুরুষটি রইল উৎপলার পাশে। কিন্তু লোকটা চুপচাপ, উৎপলার কোনো অসুবিধে হবার কথা নয়।

খানিক-ক্ষণ স্ত্রিনের দিকে তাকিয়ে উৎপলা বললে, ‘খুব, হিজিবিজি বই, না?’

‘ছবিটা ভালো মনে হচ্ছে না।’

‘খারাপও লাগছে না তোমার। আড়ি পেতে তাকিয়ে আছ তো বাপু।’

‘কী করব, আট গণ্ডা পয়সা দিয়েছি—’

মনু ঘুমোচ্ছিল।

উৎপলা তার মাথায় একটা গাঁট্টা মেরে বললে, ‘দ্যাখ, ছবি দ্যাখ—তোর জন্যেই তো গচ্চা গেল দেড় টাকা। খা-খা—গঙ্গার ইলিশ খা—না খাবি তো সুটকি মাছ খা। চার দিকে সব বকনা বাছুর হা ক’রে তাকিয়ে আছে। তাদের কানে ডাঁশ উড়ছে। কী খাবি খা—কী খাবি খা—’ ব’লে গাঁট্টা মারতে—মারতে মনুকে জাগিয়ে দিল উৎপলা।

মনু চোখ কচলাতে-কচলাতে এ-দিক সে-দিক ভাকিয়ে অবশেষে ছবির দিকে ফিরে চুম্বক পাহাড়ের দিকেই ফিরল যেন;—এমনই লেপটে রইল ছবির গায়ে যে, কিছুই দেখল না আর। দেখে-শুনে তবুও গাঁট্রা মারতে গেল না আর মনুর মাথায় উৎপলা। সময়ের ভিতরে নয়—নিঃসময়ে নয়, নিজের প্রাণে অথবা হৃদয়েও নয়—অথচ এই সবেই পরিচিত-আখোপরিচিত কেমন একটা আপতিত নিরবচ্ছিন্নতার ভেতর ঘাড় হেঁট করে ডুবে যেতে লাগল উৎপলা অনুপম অপর দেশের অপর জীবন অন্ধকার মৃত্যু নির্দায়ের ভেতর।

চার-পাঁচ দিন পরে উৎপলা পিণ্ডনের হাত থেকে একটা কার্ড নিয়ে পড়তে-পড়তে উৎফুল্ল হয়ে বললে, ‘বড় বৌঠানের সংবাদ লিখেছে।’

মাল্যবান সর্ষের তেল গায়ে মাখছিল, ‘এই বয়েসে আবার সংবাদ—’ ব’লে নিরেস চোখে—মুখে তেল মাখতে লাগল আবার।

‘তা হবে তো। কেন হবে না?’

‘বড় বৌঠানের বয়স না কত?’

‘চুয়ান্ন।’

‘এ-রকম বুড়ো গিন্নিদের যে ছেলেপুলে হয়, তা আমি জানতাম না।’

উৎপলা কার্ডটা ব্লাউজের ভেঁতর গলিয়ে দিয়ে বললে, ‘তুমি কি বলতে চাও ভেঙে বলো তো দিকি—’

‘তা নয়, আমি বলছিলাম—’ মাল্যবান চুপচাপ তেল মাখতে লাগল।

‘না বললেও বুঝেছি আমি, পেটে-পেটে তুমি কী বলতে চাও—’

‘না, না আমি ভাবছিলাম—’ মাল্যবান থেমে গিয়ে হঠাৎ এক ফাঁকে ঝপ ক’রে ব’লে ফেলল, ‘আবার এই বয়েসে ছেলেপুলে—’

‘সে কি বাবা, ছেলেটা না আসতেই মারমুখো হয়ে আটকে দাঁড়াবে না-কি?’

‘আমি দাঁড়ালেই—শোনে কে—’ দাঁতে কেটে-কেটে হাসতে হাসতে মাল্যবান বললে।

উৎপলা গুন-গুন ক’রে গাইতে-গাইতে ছাদের দিকে গেল—বড় বৌঠানের সন্তান হবে ব’লে ছায়ানট—ছায়ানটের পরে ভীমপলাশী—তারপরে বাগেশ্রী—কিন্তু প্রত্যেকটা গানেরই এক-আধ লাইন মাত্র। পিঠে তেল মাখতে-মাখতে মাল্যবান ভাবছিল : নিজের বেলা তো উৎপলা এই বারো বছর ধ’রে ষষ্ঠীকে # দেখিয়ে গেল, একটি সন্তান যা হল, তাও মেয়ে; এই প্রথম, এই-ই শেষ; বংশে ছেলে না হলে না-ই

বা হল—এই তো ভাবে উৎপলা। কিন্তু পরের বেলা যে তেরোটির পর চৌদ্দটিকে দ্যাখ কেমন বেহাগ ভৈরবী কীর্তনের সুরে ফলাও করে ফলাচ্ছে ছাদে-ছাদে। এটা কী কাজ করছে উৎপলা, ঠিক কাজ করছে? ঠিক নয় অবিশ্যি। মোটেই ঠিক নয়। কিন্তু, তবুও, এইটেই ঠিক।

পায়ে তেল মাখতে-মাখতে মাল্যবানের মনে হল : কি জানি, আমার বদলে অন্য কোনো দশাসই পুরুষের স্ত্রী হলে এত দিনে উৎপলাও আট-দশটি সন্তানের মা না হয়ে ছাড়ত না হয়তো।

মাথায় তেল মাখতে-মাখতে কড়া রোদের আকাশটার দিকে তাকিয়ে ভাবছিল মাল্যবান : আমার প্রতি যে যতখানি বিমুখ, অন্য কোনো পুরুষ-মানুষের জন্যে ঠিক ততখানি আগ্রহ তার থাকতে তো পারত; তাহলে কী হত? বেশ ঝরঝরে নদীর পাশে তরতাজা সবুজে-সবুজে ফন-ফন করে উছলে উঠত পানের বন, তাহলে উৎপলার ধানের বন নীল কালো সাপশিষের মতো রোদে বাতাসে—হাওয়া বৃষ্টির নিঝোর বলসানির ভেতর।

উৎপলা কীর্তন গাইতে-গাইতে ছাদের থেকে ফিরে এল—

‘তোমার দাদার বয়েস কতো হল এবারে?’

‘চৌষট্টি।’

‘চৌষট্টি!’

‘তা তিনি কি আজকে জন্মেছেন—’

‘খুব বুড়ো হয়ে গেছেন তো তাহলে,—’

‘আজকের মানুষ তো নয়—’

‘তাই তো, খুব বুড়ো তো—’

‘বুড়ো-বুড়ো করে মুখে গ্যাঁজলা উঠল যে বুড়ো খোকার আমার। ঢং।’ উৎপলা বললে, ‘নাও, এখন বড় বৌঠানের জন্যে কী জিনিস পাঠাবে বলো।’

মাল্যবান গায়ে তেল পায়ে তেল মাথায় তেল মেখে ভরা রোদে একটা বিচিত্র সরীসৃপের মতো চিকচিক করছিল। ছাদের রোদের দিকে তাকিয়ে তাকিয়ে খাঁধিয়ে উঠছিল উৎপলার চোখ; সরীসৃপকে সে একবার দেখছিল ঝিকমিক আঁশ নিয়ে দাঁড়িয়ে আছে, নুয়ে পড়ছে, হাত নাড়ছে, চোখ পাঁজলাচ্ছে, আর একবার মিলিয়ে যাচ্ছিল সব—অফুরন্ত রৌদ্রের অনন্ত অন্ধকারের ভেতর কাউইে কিছুকেই আর দেখছিল না উৎপলা।

মাল্যবানকে যথেষ্ট হিংস্র, অথচ আপাতদৃষ্টিতে তেমন কিছুই না, বরং বেশ চকচকে মনে হচ্ছিল হয়তো উৎপলার; ঠিক বুঝতে পারছিল না। কিন্তু তার মানে

হয়তো এই নয় যে, উৎপলার বেশ কাতর হয়ে পড়ছিল; এবং মাল্যবান বেশ প্রখর হয়ে উঠছিল। হলে হয়তো ভালো হত না।

‘আমার মনে হয়, যদি কিছু দিতে যাও, তাহলে তাঁরা লজ্জা পাবেন।’

‘কেন?’

‘এ-রকম ব্যাপার যে হচ্ছে, এতে এখনি লজ্জা পাচ্ছেন—’

‘তুমি যখন তোমার মায়ের পেটে ছিলে, লজ্জায় আড়ষ্ট হয়ে পড়েছিলেন তিনি! না কি? ম্যাডা মাদার ঠেলে বেরুল তো তবু লজ্জাবতীর ঝাড় থেকে। বেরুল তো! কী হল তাতে? হুঁদরের গর্তে ঢুকে পড়ল পৃথিবীর জনমনিষ্যি সব! লজ্জা! লজ্জা! লজ্জা!’

মনের বিষ বেড়ে কথা ব’লে ছাদে এক চক্কর ঘুরে এসে উৎপলা বললে, ‘তেমন হোক-না-হোক, একটা বেনারসী শাড়ি অন্তত কিনে দিতে হবে পঞ্চাশ-ষাট টাকার মধ্যে। আর রুপোর সিঁদুরকৌটো একটা। আমার ইচ্ছে ছিল সোনার কৌটো দিই একটা। চল্লিশ বছর স্বামীর সঙ্গে ঘর করল তো পয়মস্ত এয়োতি—এই চুয়ান্নতেও তো ফল দিচ্ছে—’

‘তোতাপুরি আমের গাছটা?’ মাল্যবান খঁয়াক ক’রে একটু হেসে, বেশি হাসির চাড়া সামলে নিয়ে একটু স’রে দাঁড়িয়ে বললে, ‘বড় বৌঠানকে চিনি আমি—’

‘কেমন, বেনারসীতে তাঁকে মানাবে না।’

‘তা আমি বলছি না’ মাল্যবান তেলের বাটিটার কাছে ফিরে এসে বাটিটার দিকে এক নগর তাকিয়ে বললে, ‘এ-রকম একটা ব্যাপার নিয়ে কেউ যে ঘট করে, সে-ইচ্ছে তাঁর একটুও আছে ব’লে মনে হয় না।’

দূরের রৌদ্রে সরীসৃপটা চিকচিক ক’রে জ্ব’লে উঠেছে। উৎপলা পুডিঙের কামড়ে কঠিন কংক্রিটের মতো হয়ে গিয়ে তাকিয়ে দেখল একবার। মিলিয়ে গেল ছবিটা; রোদে বিহুলতায় চোখ ছটফট ক’রে উঠেছে উৎপলার; অন্তশক্ষু উপড়ে পড়ছে যেন অন্য রকম আঙনে—রৌদ্রে।

‘আসল কথা হচ্ছে, কিছু খসাতে চাও না তুমি; আপন লোককে পর মনে করো। শাক দিয়ে মাছ ঢাকবার ভাঁড়ামো, চিনি নে আমি তোমাকে! তেলের বাটিটা উৎপলা ছাদের ওপর ছুঁড়ে ভাঙল।’

‘তেল পড়েছে, টাকা আসবে, মাল্যবান হেসে বললে, ‘যাই চান করি গে।’

অফিস থেকে ফিরে এসে সে বললে, ‘চলো, বেরোই।’

‘কোথায়?’

‘কী কিনতে কাটতে হবে, চলো দেখি গিয়ে—’

উৎপলার মনের থেকে কিছুটা ধোঁয়া কেটে গেল, ‘তা তো বলেছিই বেনারসী—’
‘কিন্তু আমি ও-সব জিনিস একা কিনতে ভরসা পাই না। এসো, আমার সঙ্গে—’
‘ষাট সপ্তরের কমে হবে না শাড়ি; যে তিন শো পঁচাত্তর টাকা মেজদার বাবদ
আমার কাছে আছে, তার থেকে কিছু তো খরচ করতে পারি নে—’

‘তার দরকার নেই—’ মাল্যবান রুমালে মুখ মুছে বললে।

‘তবে কোথায় পাবে টাকা?’

‘প্রভিডেন্ট ফাণ্ড থেকে তুলে এনেছি।’

‘কতো?’

‘পঁচাত্তর—’

নাক-মুখের চেকনাইয়ে চনমন ক’রে—হেসে উঠে উৎপলা বললে, ‘বাঃ, বেশ
গুড বয় তো তুমি। সত্যিই এমন না হলে—। আ গেল, তুমি তো চাও খেলে না।’

চায়ের প্রতীক্ষায় মাল্যবান চেয়ারে বসল গিয়ে। খানিক-ক্ষণ পরে উৎপলা ফিরে
এল পরোটা ও চা নিয়ে নয়, মার্কেট যাবার জন্যে পোশাক-আশাকে তৈরি হয়ে।

মাল্যবান একটু হতচকিত হয়ে বললে, ‘চা খেয়ে গেলে হত না।’

‘ঠাকুরটা আজ বড় দেরি ক’রে এসেছে,’ উৎপলা মাল্যবানের ছাড়া চেয়ারে ডান
পা’টা চড়িয়ে দিয়ে জুতোর পালিশে যে কিউটিকিউরা ট্যালকামের গুঁড়ি প’ড়ে ছিল,
রুমাল দিয়ে তা ঝেড়ে ফেলতে-ফেলতে বললে, ‘আমিই ভাত চড়িয়ে দিতে বললাম
তাই। সকালবেলার সেই পরোটাগুলো ঠাণ্ডা মেরে গেছে—লোনার মা’কে দিয়ে
দিলাম; ওর ছেলের কুষ্ঠ হয়েছে, কিছু খেতে চায় না।’

উৎপলার সেলাইয়ের কলটা অনেক দিন ধ'রে প'ড়ে ছিল—অবিশ্যি অযত্নে নয়—জিনিসের যত্ন করে সে—কিন্তু অব্যবহারে। কলটার ঢাকনি সাফ করা, ঢাকনি খুলে ঝেড়েপুছে ঝকঝক ক'রে রাখা—হাতে কাজ না থাকলে এটা তার খুবই সোহাগের কাজ।

এক দিন সকালবেলা পাশের ভাড়াটেদের একটি ছোট্ট মেয়ে এসে বললে, 'পলা মাসিমা, আপনার সেলাইয়ের কল আছে?'

'আমি যে তোমার মাসিমা, তা তোমাকে কে বললে?'

মেয়েটি উৎপলার দিকে টলটল ক'রে তাকিয়ে রইল—কোনো কথা বললে না।

মাল্যবান বললে, 'আঃ, ওকে আর ও-রকম শুখোচ্ছ কেন?'

'কোনো দিন এদের গাঁজও দ্যাখ্যা যায় না,' উৎপলা বললে, 'আজ কল নেবার সময় পলা মাসিমা! আচ্ছা!'

মেয়েটি ঘাড় ঘুরিয়ে-ফিরিয়ে ফ্রকের কাপড় তুলে চিবোতে লাগল।

'তুমি কার মেয়ে গা?'

মেয়েটি তার বাবার নাম বললে।

'ও, সেজোগিন্নির মেয়ে তুমি বুঝি?'

মেয়েটি চিবোনো কাপড়ের এক কিনার থেকে দাঁত বের ক'রে বললে, 'হ্যাঁ।'

উৎপলা মাল্যবানের দিকে তাকিয়ে বললে, 'সব জল ভ'রে গড়ায় কি-না। ওপরওয়ালার কল এন্নিই নড়ে। এই সেজো গিন্নিই তো এক দিন বলেছিলেন, কলকাতার জল সোনার দরে বিকোয় না-কি। খুব মনে আছে আমার। সে-কথা আমি ভুলব কোনো দিন।'

'কী লাভ ও-সব মনে রেখে!'

‘না, না, তুমি কেন মনে রাখতে যাবে। তোমার দরদে তো মলম ঘষা হচ্ছিল সেজো বৌয়েয় সে-দিন আমাকে তাঁবায় চড়িয়ে—’

‘তাঁবায় চড়ালেই কি ফোঁসকা পড়ে?’

‘তা আমাদের পড়ে! এই রকম কথা শুনলে গায়ে জলবিছুটির জ্বালা হয়। ইশ!’

মেয়েটির দিকে তাকিয়ে উৎপলা বললে, ‘তোমরা কে হে বাপু, পাশের ভাড়াটে ঘরে থাকো; তোমাদের আমরা খাই না পরি, তোমাদের তেউড়ি খেসারির খেত মাড়াই, না, বকের বিষ্ঠা দিয়ে বড়ি-খেসারি মেখে দিয়ে ভোগা দিই—তোমার মা যে—’

মাল্যবান উৎপলাকে মাঝপথে থামিয়ে দিয়ে ছোট্ট মেয়েটির পিঠে-ঘাড়ে গোটা দুই চাপড় মেরে স্ত্রীর দিকে তাকিয়ে বললে, ‘তুমিও পারো বাপু! ও কী জানে। ওকে নিয়ে ঘাঁটানো—কী হবে।’

‘কিন্তু কল আমি দেব না।’

‘সে হল আলাদা কথা।’

‘আর ঐ সেজো গিল্লি বড্ডঅপয়া। পর-পর চারটি মেয়ে বিয়োল। পর-পর চারটি মেয়ে বিয়োল—’

ছোট্ট মেয়েটি ফ্রক কামড়াচ্ছিল; আরো জড়োসড়ো হয়ে কামড়াতে লাগল।

‘সে-দিন তোমার একটি বোন হয়েছে, না খুকি?’

‘হ্যাঁ।’

‘তা আমি জানি। সাথে আমাদের বললে না। অথচ দশ মাইল দূর থেকে লোক ডেকে খাইয়েছে। মানুষ যে কী রকম বোকা শয়তান হতে পারে—’

উৎপলা কথা শেষ করতে-না করতেই মাল্যবান বললে, ‘খুকি তো দাঁড়িয়ে রইল, ওকে যা দেবার দাও। নাহলে ব’লে দাও—’

‘অথচ এক ফালি বাড়ির ভেতর পাশাপাশি দু’পরিবার থাকি—তবুও এটুকু গোয়ালার আক্কেল নেই।’

‘তুমিও কি ওদের ডাকো-টাকো না-কি কোনো কাজ-কন্মে?’

‘কেন ডাকব? ওরা বিনুক ভ’রে মধু নিয়ে সুর ক’রে ডাকছে দিনরাত—’

‘এক পক্ষকে প্রথমে শুরু করতে হবে তো—’

‘আমি একা মানুষ, গুপ্তি ডেকে খাওয়াব? ওদেরই তো বরং উচিত আমাদের তিনটিকে ডেকে একটু মিষ্টিমুখ করানো অস্তুত। এই মনুকেও তো একদিন ডেকে জিবেগজা শোনপাড়াই যা-হোক একটা-কিছু হাতে তুলে দিতে পারত। আমরা তো দিই ওদের ছেলেমেয়েদের, ওরা একটা পিপারমিষ্ট লজেনচুসও দিতে পারে না?’

‘যাক গে, মরুক গে, তুমি এখন—’

‘অথচ কতো বড় পরিবার; জমজম করছে; কাকে খাচ্ছে, যুনে খাচ্ছে, ফোঁপড়ায় খাচ্ছে; চোট্টা শয়তান ওপর পড়া হয়ে খাঁটি মেরে উজোড় ক’রে দিচ্ছে সব।’

‘কলটা দেবে না-কি দিয়ে দাও।’

‘কিন্তু মনটা ওদের লাউয়ের মাচায় কেলে হাঁড়ির মতো। সে হাঁড়িতে তো ভাত ফোটে না, বালি তাতে; জনপ্রাণী পাখপাখালী পালিয়ে যায় সে-হাঁড়ি দেখলে। ভালো কেলে হাঁড়ি পেতে বসেছে বটে সেজো বৌরা—’

‘এই মেয়েটির সামনে তুমি অনেক কথাই তো বললে—’

‘শুনিয়েই বললাম, যাতে ওদের আঁতে লাগে!’

মেয়েটি তখনও দাঁড়িয়ে ছিল।

মাল্যবান বললে, ‘খুকি, তুমি ফ্রক চিবিয়ে না আর।’

ফ্রকটা সে মুখের থেকে ফেলে দিল। দেখা গেল, দাঁত দিয়ে রক্ত বেরুচ্ছে।

মনু বললে, ‘পানসে দাঁত।’

‘তোমার পানসে দাঁত,’ উৎপলা বললে, ‘তোমার বাপ-মা ডাক্তার দেখিয়েছেন?’

‘না।’ মেয়েটি (উৎপলার কেন যেন মনে হল) শামকলের বাচ্চার মতো মাথা নেড়ে বললে।

‘না?’ উৎপলা মাল্যবানের দিকে তাকিয়ে বললে, ‘কেমন ফ্রক চিবুচ্ছে দেখছ, শোখ হয়েছে এই মেয়েটার, শরীরের চুগখড়ি নেই; অথচ বছর-বছর না বিয়ালেও চলবে না। ওদের বারো মাসই কার্তিক মাস, বাবা!’

মেয়েটি নিজের অজান্তেই আবার ফ্রক চিবুকে শুরু করেছিল; উৎপলা ফ্রকে একটা হাঁচকা টান মেরে বললে, ‘দু’ ধুমসি, খাসির রক্তে মাখিয়েছিস—মেড়েছিস—দু’—দু’—’

মেয়েটি আন্তে-আন্তে হেঁটে চ’লে যাচ্ছিল।

‘শোন খুকি,’ ডাক দিল উৎপলা।

এসে দাঁড়াল মেয়েটি।

‘সর্বের তেল আর নুন দিয়ে দাঁত ভালো ক’রে ঘ’ষে-ঘষে মেজো দিকিন রোজ। মাজবে?’

শামকলের বাচ্চার মতন তুড়বুড় মাথা নেড়ে মেয়েটি বললে, ‘হ্যাঁ।’

‘তোমাদের তিনটি বোনকেই তো দেখি আমি, একেবারে লিকপিক করছে; বাঁশপাতা মাছের মতন; চেহারাও তেন্নি বিচ্ছিরি। তোমাদের ছোট বোন কেমন হল দেখতে?’

‘বেশ সুন্দর।’

‘রং কেমন?’

‘খুব ফর্সা।’

‘কালো ফর্সা তো কথা নয়,’ বড় শামকলটার দিকে তাকিয়ে ঠোঁট দিয়ে লাল লঙ্কা কেটে খেতে খেতে বললে যেন চন্দনা, ‘মগরাহাটার কুচো চিংড়ির মতো হল তো দেখতে। মনে হয় যেন গলার নলি শুকিয়ে থোড়ের আঁশের মতো হয়ে রয়েছে। বড্ড দুঃখ করে। বাস্তবিক মানুষের পেটে এ কী টোনা টেংড়ি বলো তো দিকি—’

মনু একটু ফিক ক’রে হেসে উঠল।

‘যে-ফর্সা রং বলছ খুকি, ও তোমার বোনের গায়ে রক্ত নেই ব’লে। দুধে-আলতায় রং—সে আরেক রকম।’

আবার শামকলের ছা মাথা নাড়ল, ‘না, আমার বোনের রক্ত আছে।’

‘আছে? তবুও শাদা?’

‘খুব শাদা।’

‘তাহলে ন্যাবা হয়েছে।’

‘না, ন্যাবা হয় নি; ফর্সা রং! কেমন সুন্দর দেখতে! ইশু, ন্যাবা হবে আমার বোনের।’

উৎপলা বললে, ‘কই, দ্যাখালেও না তো তোমার বোনকে।’

‘আসুন-না, দেখে যান।’

‘এখন দেখতে যাব কেন। খাইয়েছিল? সাধে? যে-দিন হয়েছিল সে-দিন খবর পাঠিয়েছিল?’

মাল্যবান একটু জ্ব’লে উঠে বললে, ‘আ ম’ল যা! ভালো বিপদেই পড়া গেছে দেখছি। সোমন্ত গাইগোরুর মতো একটা বাছুরের ঘাড় মটকাবার জন্যে চাঁট মারছ সেই থেকে! কী হল তোমার!’

মেয়েটির চোখের ভেতরে যেন তলিয়ে গিয়ে তাকিয়ে থেকে উৎপলা বললে, ‘কিন্তু, সেলায়ের কল নেবার সময়ে ঠিক মতন হাজির হয়েছ তো—শামকলের বাছা।’

শুনে সচকিত হয়ে কেমন চমকে উঠে তাকাল মেয়েটির দিকে উৎপলার দিকে মাল্যবান।

‘তোমার বোন যে-দিন হল, সেদিন চারটে উলু দিলে কেন?’

‘আমি তো দিইনি উলু।’

‘উলুর যা ঘটা! ভাবলাম, এবার বুঝি রাজপুত্র এসেছেন।’

মেয়েটি শুকনো রৌদ্র ডাঙায় পাখির বাচ্চার মতো এক-আধ ফোঁটা মেঘের জল পেয়ে তিড়বিড় ক'রে উঠল উৎপলার কথা শুনে।

‘তোমার মা কল চেয়েছেন কার কাছে?’

‘আপনার কাছে।’

‘কী ব’লে দিয়েছেন?’

‘বলেছেন, তোর পলা মাসির কাছ থেকে সেলায়ের কলটা চেয়ে নিয়ে আয় তো—’

উৎপলার খানিকটা ভালো লাগল, জ্যেষ্ঠের মাটিতে কিছু আষাঢ়ের মেঘের রস এসেছে যেন, এন্নি ভাবে মেয়েটির কোঁকড়া চুল নিয়ে নাড়া-চাড়া করতে করতে বললে, ‘মাসি হলাম কোন সুবাদে?’

‘মা ব’লে দিলেন তো।’

‘তোমার চুলের ভেতর ঢের উকুন, খুকি।’

‘হ্যাঁ, দিদির মাথার থেকে এসেছে।’

‘কেউ বাছে না তোমার মাথার উকুন?’

‘না।’

উৎপলা বুড়ো আঙুলের নখে একটার পর একটা উকুন টিপে মারতে মারতে বললে, ‘এই যে মাথা বেছে দিচ্ছি তোমার, বেশ আরাম পাচ্ছ, না?’

মেয়েটি উৎপলার কোলে মাথা ছেড়ে দিয়ে চোখ বুজে রইল।

‘তোমার মা কল দিয়ে কী করবেন?’

‘জামা সেলাই।’

‘কার জন্যে?’

‘ছোড়দি, আমি, বোন—তিন জনের জামা।’

‘তা, তোমার মা এখনও তো আঁতুর ঘরে।’

‘না, বেরিয়েছেন।’

‘কবে?’

‘এই তিন চার দিন হল—’

‘নাড় তো এখনও বড্ড ফাঁচা, সেলাই করবেন কী ক’রে? নাড়ি টনটন ক’রে উঠবে যো।’

‘চাইলেন তো।’

‘লক্ষ্মীকান্তপুর থেকে ক্ষীর এসেছে—খাবে খুকি?’

মেয়েটি মাথা নেড়ে বললে, ‘খাব।’ শামকল শাবকের মাথা কেমন তুড়বুড় করছে, চাঁদির ওপর জলের ফোঁটা রোদে শুকিয়ে গেছে যেন।

উৎপলা হাত ধুয়ে এসে মেয়েটিকে খানিকটা ক্ষীর দিল। তারপর কলটা ভালো ক’রে দেখে মুছে মনুকে বললে, ‘যা মনু, কলটা সেজো মাসিকে দিয়ে আয়। তোমার ক্ষীর খাওয়া হয়েছে, খুকি?’

‘হ্যাঁ।’

‘কেমন লাগল?’

‘বেশ—’

‘তোমার নাম কী?’

‘নোরা। নোড়া, ভেঙে দেব দাঁতের গোড়া।’

‘কী পড়?’

‘আমি এখনও—ক অক্ষর—’

বলে ঐঁটো হাত জামায় মুছতে মুছতে মেয়েটি দৌড় দিল।

পাশের বাড়ির ছোট্ট মেয়েটি আঁতুড়েই মারা গেল।

‘আমি তো তখনই বলেছিলাম, এই রকম হবে—’

দু’তিন দিন উৎপলা কেমন একটা শোকগ্রাহিতায় আচ্ছন্ন (না, বিমুগ্ধ?) হয়ে কাটাল।

বললে, ‘আমি একটু দেখতেও পারলাম না, আমাকে একটু ডেকে দেখালও না।’

‘কী করতে তুমি দেখে?’

‘এই তো পাশাপাশি বাড়ি—মানুষ জন্মায়—ম’রে যায়—যেন ঘড়ির কাটা ঘুরে চলে, মরবার সময়ে একবার ডাকলেও তো পারত। পরশু রাত তিনটের সময়ে মারা গেছে বললে?’

‘হ্যাঁ।’

‘কী করছিলাম তখন আমি?’

‘ঘুমুচ্ছিলে।’

মাল্যবান বললে, ‘কতো শিশুরাই তো ম’রে যাচ্ছে।’

‘খুব কেঁদেছিলেন সেজো গিন্নি?’ উৎপলা দাঁড়িয়ে দাঁড়িয়ে দেয়ালে ঠেস দিয়ে হাত-পা নিব্বুম ক’রে ছাদের এ-পারে ও-পারে পরপারে শূন্যতার বড় একটা রৌদ্রচাঙাডের দিকে তাকিয়ে রইল।

‘বড় বৌকে শাড়ি পাঠালে—কোনো খবর-টবর দিল না তো।’ মাল্যবান বললে।

‘খবর দেবার সময় হয়েছে কি?’

‘বাঃ, দশ-পনেরো দিন হয়ে গেল।’

‘দাদা নিশ্চয় জবাব দিয়েছিলেন,’ উৎপলা বললে, ‘কিন্তু পথে চিঠি মারা গেছে।’

‘তা নয়’, মাল্যবান একটু কাঁধ নাচিয়ে বললে, ‘পোস্ট অফিসের চিঠি ওঝার বাটির

মতো চলে। তিন পয়সার একটা পোস্টকার্ড বেড়ে দিলে যে-মল্লুকে পাঠাও, ঠিক গিয়ে পৌঁছুবে।’

বড় শামকল কেমন ঘাড়ের রৌঁ ফুলিয়ে—ফুলিয়ে কথা কইছে শোন—মাল্যবানের দিকে তাকিয়ে ভাবছিল উৎপলা। কিন্তু চিঠি সম্পর্কে কথা বাড়াতে গেল না সে আর।

‘আঁতুড়ের মেয়েটাকে বাস্ক ক’রে শ্মশানে নেওয়া হয়েছিল?’

‘হ্যাঁ।’

‘কী রকম বাস্ক?’

‘প্যাকিং বাস্ক—পাইন কাঠের—’

‘ভেতরে আটকে নিলে? পেরেক ঠুকে?’

‘তবে কি বাস্কের বাইরে লেপটে নেবে গাঁদের আঠা দিয়ে লেবেল মেরে?’

‘কী করলে তারপর?’

‘শ্মশানে নিয়ে গেল—’

‘দাহ তো হয় না ছোটদের?’

‘না।’

‘না।’

‘পুঁতে ফেললে তবে?’

‘হ্যাঁ।’

‘তারপর কী হবে?’

‘কীসের পরে?’

‘আমি বলছি, মাটির নিচে কী হবে ওর?’

মাল্যবান এবার চুরুট জ্বালিয়ে নিয়ে বললে, ‘ও-সব কথা কেউ ভাবে না। হবেই একটা কিছু। শেয়ালে মাটি খুঁড়ে না খেলে প’চে গলে যাবে—কুমি হবে।’

‘কলকাতায় শেয়াল কোথায়? প’চে মাটি হয়ে যাবে—’

শুনতে-শুনতে সামনের চেয়ারটায় না ব’সে মেঝের ওপরই ঝুপ ক’রে বসল উৎপলা, দেয়ালে ঠেস দিয়ে, পা ছড়িয়ে, ব’সে রইল।

মাল্যবান চুরুট টানতে-টানতে ভাবছিল কী বোকা। কী বোকার মতো কথা জিজ্ঞেস করে। কতো রাজ্যি নষ্ট হয়ে যাচ্ছে, উৎপলা ফ্যাকড়া নিয়ে ব’সে আছে তারপর কী হবে? মাটির নিচে কী হবে ওর? হুশ! কিন্তু, তবুও, বোকা নয় ও, বোকা একেবারেই নয়; একটি সন্তানের মা হয়ে—ও যেমন ভাবে মা হতে চেয়েছিল বহু সন্তানের, তা হতে পারেনি; সেই সব নিহিত তেজ উৎপলার আপাতমুর্খতার অতৃপ্তিতে ঝ’রে পড়ছে।

‘আচ্ছা, ম’রে যাওয়ার পর বড়-বড় মেয়েদের মাটিতে পুঁতলে তারপর কী হয়?’

‘মাটিতে পুঁতবে কেন? দাহ হয়।’

‘না, আমি বলছি, যাদের ভেতর দাহ-টাহ করার চল নেই, তাদের কথা—’

‘ওঃ’, মাল্যবান একটু পুরুষ চিল-তীক্ষ্ণ ভাবে উৎপলার দিকে তাকাল।

‘আমি শুনছি, একজন খুব রূপসী কুড়ি-একুশ বছর বয়সেই সুস্থ শরীরে হঠাৎ কেন যেন মারা গেল। বিকেলবেলাতে তাকে মাটি দেওয়া হল। তারপর সবাই চলে গেল যে যার গাঁয়ে। সেখানে আট-দশ মাইলের মধ্যে জনমানব কেউ ছিল না। সন্ধ্যের পরেই একটা লোক এসে মাটি সরিয়ে সেই মড়াতে চুরি ক’রে নিয়ে গেল। কেন নিল, বলো তো?’

‘কুড়ি-একুশ বছরের মেয়ে মানুষ?’

‘হ্যাঁ, বেশ সুন্দরী ছিল, বেশ সোমস্ত; শবটাকে মাটি খুঁড়ে বার করবার পরও গা ফুটে রূপ বেরুচ্ছে; আর গতরের সেকীপুণ্ডতা।’

‘এই জন্যেই চুরি করা হয়েছিল—’ মাল্যবান বললে।

মাল্যবানকে খুব বেশি জাগিয়ে দিয়েছে উৎপলা, কথায়-কথায় নিজেও খুব বেশি জেগে পড়েছে আজ।

নিচের ঘরে আর যেতে দেওয়া হল না মাল্যবানকে আজ রাতে।

এ-রাতটা মাল্যবান ও উৎপলার বেশ নিবিড় ভাবেই কাটল।—সমস্ত রাত—সমস্তটা শীতের রাত।

মাল্যবান যা-ই মনে করুক না কেন, স্ত্রী সন্তানের পাট চুকিয়ে দিয়ে একা-একা আইবুড়ো থেকে জীবন কাটানো খুব শক্ত হত তার পক্ষে! গোল-দীঘিতে ঘুরে-ঘুরে বারো-চৌদ্দ বছর সে অনেক হাওয়াই ফসল ফলিয়ে গেছে; সমাজসেবা, দেশস্বাধীনতার জন্যে চেষ্টা, বিপ্লবের তাড়না-তেজ, নিবৈপ্লবিক মনের চারণা, উনিশ শতকের নিশায়মান সমুদ্রতীর : সাহিত্যের ধর্মের মননের : বিশ শতকের উপচীর্য়মান আবহমান রক্ত রৌদ্র ছায়া জ্বালা সমুদ্রসঙ্গীত—নানা রকম অপর রকম জীবনের অর্থ ও উদ্দেশ্যকে ঈর্ষ্যা করেছে—নিজের জীবনটাকে অনেক সময়েই অসার ও নিষ্ফল মনে হয়েছে তার। কিন্তু, তবুও, এই পাকা চাকরিটুকু, স্ত্রী ও মেয়ে, কলেজ স্ট্রীটের ঘর তিনখানা এর চেয়ে অন্য কোনো সাফল্যের উত্তমর্গনাত তার জীবনে কোনো দিন ঘটে উঠত কি?

সে নিজে যখন খুব স্থির হয়ে ভাবে, বোঝে—জীবনের কাছ থেকে যথাযথ প্রাপ্য সে পেয়েছে। সে জানে, জীবনটা তার এর চেয়ে ঢের খারাপ হতে পারত। যদিও মৃগনাভির গন্ধে মাঝে-মাঝে অধীর হয়ে উঠে গোলদীঘিতেই এবং নিজের একতলার ঘরের রাতের বিছানায়ই সে পাক খেয়েছে সব-চেয়ে বেশি, কিন্তু তবুও সে বুঝেছে যে, তার নিজের সাংসারিক জীবনটা কল্পরীমৃগ নয়, বে-সংসারীও নয়; সাংসারিক সফলতার চূড়ান্তে উঠেছে-সব লোক টাকাকড়ি যশ মদ মেয়েদের নিয়ে সন্তপ্ত হয়ে আছে দিনরাত, তারা কি জানে তারা কী—কে—চলেছে কোথায়! তারা জানে না! তাদের অন্তঃশীলা আত্মা ঠিক নয়—তাদের নিঃস্নানভির গন্ধ এ-দিকে সে-দিকে ফেলে দিচ্ছে তাদের; মাঝে-মাঝে মাল্যবানের মতন পথের পাশের একজন লোককেও সচকিত—আলোড়িত করে তুলছে। কিন্তু মাল্যবান জানে, এ-নাভি তার নিজের নয়—এ-সব ওদের।

এক দিন মা বেঁচেছিলেন। মা খুব স্নেহ সরসতার মানুষ ছিলেন; কিন্তু তখনই কলকাতায় প্রথম চাকরি শুরু করে মার সঙ্গে শ্যামবাজারের একটা একতলা বাড়িতে এক কোঠায় যে-দিনগুলো কাটিয়েছে সে—প্রত্যেকটা দিনের কথা মনে আছে তার: সহজ কঠিন মৃদু নিরস, কেমন নির্জনলা জলীয় দিনগুলো জীবনের। ভাবত, মা'কে মানুষ সৃতিকাঘরের থেকেই পায় কি-না—রোজই পায়—অনেক পায়—জননীগ্রস্থি কেটে যায় তাই শীগগিরই—নতুনত্ব হারিয়ে যায়। ভাবত, মানুষের জীবনে এমন একটা সময় আসে, যখন মায়ের মমতা সজলতা এত স্বাভাবিক বলেই অলোজল-বাতাসের মতো সুলভ মনে হয়; একজন অপরিচিত মেয়েকে মনে ধরলে তার সহজ ভেবে নিতে সময় লাগে; কাছে থাকলেও দূর—তার স্বচ্ছ সরল প্রকাশ ভানুমতীর খেলার মতোই আপতিত হচ্ছে কী সহজে—কিন্তু তবুও কী রকম আঁধার, কঠিন, নিবিড়!

এই সব ভেবে-ভেবে কেমন কুণ্ঠিত হয়ে পড়ত মাল্যবানের মন; মা'র কাছে ঘাট হয়েছে বলে তার প্রতি শ্রদ্ধায়, পথে-ঘাটে-মনে-ধরে-গেছে নারীটির প্রতি উদাসীনতায় এবং নিজের প্রতি খিক্বারে নিজেকে সে সজাগ করে রাখত।

মাল্যবান যখন বিয়ে করেনি, নিজের অফিসের বিবাহিত কেরানীদের হুগাকাবারী অভিযান দেখে এমন গুমড়ে উঠত তার! উৎপলাকে নিজের ঘরে আনার থেকে আজ পর্যন্ত যখনই কোনো মানুষের স্ত্রীবিয়োগের কথা শুনেছে, মাল্যবান, সে-মানুষটিকে জাদু-ঘরের কুলকিণারায় দেখা অতীব মৃত জিনিসের মতো অতীতের আনন্দের কুয়াশা-ঘরে লীন হয়ে থাকতে দেখেছে সে—অনুভব করেছে, ও-মানুষের কোনো ভবিষ্যৎ নেই; সে-জীবনের শূন্যতা কল্পনা করে অস্বস্তি বেদনার অভিজ্ঞতায় কেমন যেন অন্য আর এক রকম ধার শানিয়ে উঠেছে তার। নিজের স্ত্রী যে বেঁচে আছে, এ-সাম্বন্ধে ভেতরে-ভেতরে গুছিয়ে নিয়ে সারাদিন অফিসের ডেস্কে, সারারাত নিচের ঘরের বিছানায় কম্বলের নিচে নিশ্চুপ শান্তির ভেতর একটার-পর একটা বিদায় দিয়েছে—গ্রহণ করেছে।

এই সব হচ্ছে মাল্যবানের জীবনের ভিতের কথা, ভিত্তিচিত্রের কথাও। সে একা থাকতে পারে না, মা'র সঙ্গে থাকে তাই; কিন্তু তবুও মায়ের ভালোবাসা সাম্নিধ্য তার কাছে কালক্রমে একা থাকার সামিল বলে মনে হয়; বিয়ে না করলে তার চলে না; স্ত্রীকে ঘুচিয়ে দিয়ে একা পথ চলবার কোনো শক্তিই তার নেই।

কিন্তু জীবনের খুঁটিনাটি ব্যাপারে এই দাম্পত্যজীবনেরও নানা রকম খাঁকতি দেখছে সে। বাড়তি-পড়তি নষ্ট ফসল পচা হাড়মাংসের গন্ধে ভরে উঠছে সব। উৎপলার উদাসীনতা ঠিক নয়, খুব সম্ভব অপ্রেম—দিনের-পর-দিন স্বচ্ছ হয়ে আসছে যেন,

অতল স্বচ্ছতায় যে-রূপ দেখা যাচ্ছে তার তাতে মনে হচ্ছে, কোনো দিনই প্রেম-প্রীতি ছিল না মাল্যবানের জন্যে উৎপলার। না থাকলে না থাকবে। অন্যদের জন্যে প্রীতি? অন্য কারু জন্যে প্রেম? তাই হোক। কিন্তু তবুও উৎপলাকে বহন করে বেড়াতে হবে মৃত্যু পর্যন্ত? উৎপলাও তাকে তাই করবে বুঝি? চোখের সামনে অন্যদের প্রতি উৎপলাকে স্পষ্ট অনুরক্ত হয়ে পড়তে দেখে—সে-জায়গা থেকে একটু গা বাঁচিয়ে সঁরে যেতে হবে বুঝি মাল্যবানকে? আলখাল্লাপরা একজন চীন, একজন গ্রীক দার্শনিকের মতো আকাশের তরার পাতালের বালি মানুষের জীবনের মিছে সমারোহকে যে নিমেষেই গ্রাস করে চলেছে, সেই উপলদ্ধিতে স্থির হয়ে নিতে আবার—তারপরে বেশি রাত হলে টেবিলে খেতে বঁসে খোশগল্প করতে হবে স্ত্রীর সঙ্গে আর মেয়ের সঙ্গে?

বিয়ের আগের দিনগুলোকে তার শীতের আগে হেমস্তের, হেমস্তের আগে শরতের ক্ষেতে মাঠে রোদে মানুষের মুখে পাখির কথায় যে অবিনেশ্বর সম্ভাবনা থাকে হেমস্তের, যে মহাপ্রাণ কুহক থাকে আসন্ন শীতের রাতের, সেই রকম মনে হয়েছে—

চ'লে যেতে পারে সে কি আবার বিয়ের আগের সেই পৃথিবীর দেশে? প্রস্তুত পাড়া-মাঠই তার উত্তর মেলে: মানুষ তো মৃত্যুর দিকে এগোচ্ছে, পিছে ফিরে যেতে পারে না তো সে আর। তবে উৎপলা মনুকে বাদ দিয়ে মৃত্যুর দিকে এগোতে পারা যায় বটে—একা। মা'র আমলে পারেনি, কিন্তু বৌ পায়ে দাঁড় করিয়ে দিয়েছে তাকে; সজ্জানে হেঁটে চ'লে যেতে পারে সে অন্ধকারে ভেতর দিয়ে—অজ্ঞান মৃত্যুর দিকে। পারে।

কিন্তু সাময়িক এই সব ইচ্ছা চিন্তা। মাল্যবানের মনের ভেতর কোনো পৃথিবী ঘুরে বিদ্রোহী বা ভাবুক নেই যে তা নয়; শয়তান জোচ্চোর অমানুষও রয়েছে, কিন্তু সবের ওপরে মানুষ সত্য হয়ে রয়েছে একজন সাধারণ ধর্মভীরু ও ভীরু মানুষ। একটি সাধারণ স্নেহশীল ধর্মভীরু ভীরু বৌ যদি সে পেত, তাহলে এ-দুটি সাদাসিধে জীবন পৃথিবীকে বিশেষ কোনো সফলতা বা নিষ্ফলতার দান না রেখে শান্ত ভাবে শেষ হয়ে যেতে পারত এক দিন। কিন্তু তা তো হল না, নশ্ব বশ্য ঘরজোড়া স্নিগ্ধতা হল না, খড়খড়ে আগুন খড়ের চমৎকার অগ্নি-ডাইনীর মতো হল মাল্যবানের বিয়ে আর বৌ আর বিবাহিত জীবন।

উৎপলা দেখতে বেশ; শুধু বেশ বললে হয় না—এমনিই বেশ। সুস্থ। রুচি ও বুদ্ধির ধার মাঝে-মাঝে বেশ স্পষ্ট হয়ে ওঠে; হৃদয়ের বিমুখতা ও কঠিনতাও তার এক-এক জায়গায় এক-এক জন মানুষের তাপ বা জ্ঞান-পাপের ছোঁয়ায় মোমের মতো গলে দাম্পত্য আবহে ফিরে এসে মোমের মতো শক্ত ঠাণ্ডা হয়ে ওঠে আবার। কুমারী

হিসেবে এই মেয়েটির বেশ দাম ছিল—নারী হিসেবেও। কিন্তু মাল্যবানের মতো এ-রকম একজন লোকের বৌ হয়ে ঠিক হল না তার। উৎপলার বন্ধুবান্ধবের অভাব নেই। বাপের বাড়ির দেশের ঢের লোক তাকে চেনে—ভালোবাসে—কাছে আসে তার; কলকাতায় এসে এদেরই মারফৎ আরো অনেকের সঙ্গে পরিচয় হয়েছে তার; দশ-পাঁচিশ মিনিট উৎপলা, উৎ, পলা, ইত্যাদির সঙ্গে এক শো রকম মানুষ এক শো রকম ভাবের কথা ব'লে যাবার প্রয়োজন প্রায়ই বোধ করে; এই সব বিমিশ্র ভিড় এক সময় খুব বেশি আসত; আনাগোনা এখন খানিকটা কমেছে ব'লে মনে হচ্ছে; শীগগিরই বাড়বে আবার তাও মনে হচ্ছে। যারা যাওয়া-আসা করে এ বাড়িতে—কেউ থাকে পনেরো মিনিট, কেউ দু' তিন ঘণ্টা। সটান দোতলায় উৎপলার কাছে চ'লে যায় প্রায় সকলেই তারা; মাল্যবান নিচের ঘরে ব'সে খবরের কাগজ পড়ছে, চুরুট টানছে, দেখে বা না দেখে তারা সবটুকু দেখে নিয়েছে, অনুভব ক'রে কৌতুক বা ক্লান্তি বা কঠিনতা বোধ করে। কিন্তু মাল্যবানের সঙ্গে বিশদ আলোচনার আবশ্যিকতা কেউই বড় একটা বোধ করে না। কেউ কেউ এও জানে যে, এ-মানুষটাকে এর স্ত্রী একেবারেই গ্রাহ্য করে না। এ-রকম উপলব্ধির পর সময়ের—পৃথিবীর স্তন্যগ্রচূড়ায় অনতিদূর শঙ্খিনীকে চের বেশি সরস ব'লে মনে হয়—ভীরা দুরূ-দুরূ বুকুর সাহস ও কাম নিয়ে তার দিকে এগিয়ে যেতে-যেতে। মাল্যবান দেখেছে, জেনেছে, উপলব্ধি ক'রে দেখেছে সব। দেখেছে, তার চেনা-আধোচেনা মানুষেরা কী রকম অনিমেঘ বিদ্যায় ওপরে চ'লে যাচ্ছে—তাদের কী রকম তাগিদ—কতো তাড়া! সে যে নিজে একজন প্রাণী নিচের ঘরে রয়েছে—এ বাড়িটাও সে তার সেটা কোনো কথা নয়—কথাটা সত্যিই খুব ঠিক।

যারা ওপরে যায়, তারা কেউ লজ্জিত হয়েও ফিরে আসে না তো। কেউ কেউ অনেকক্ষণ তো বৈঠক জমায়; হাসি তামাশা রগড় গুণা ছিটে ফোঁটায় ফেনায় ছিটকে আসে নিচের ঘরে। মাল্যবান মাঝে-মাঝে অবাক হয়ে ভাবে—কথা ভাবে। কথা ভাবা কালো ধুমসো পাখিদের নীড় তার মাথাটা। আচমকা একটা সিগারেট জ্বালিয়ে বা দড়াম ক'রে জানালার কপটিটা খুলে ফেলে পাখিগুলোকে উড়িয়ে দেয় সে। যারা ওপরে যায়, তাদের পেছনে পেছনে সে ওপরে যায় না কোনো দিন; কাউকেই কিছু বলতে যায় না। যখন দোতলার ঘরে আসর খুব জ'মে উঠেছে, তখনও ওপরে যেতে কেমন দ্বিধা বোধ হয় তার; যখন রাত বেশি, উৎপলার ঘরে লোক কম—দু'টি কি একটি—খুব সম্ভব একটি—তখন সে কিছুতেই ওপরে যায় না : মন দিয়ে করেছে, চোখ দিয়ে সকলের জীবনের সব তলানি আবিষ্কার করতে চায় না।

চৌবাচ্চায় স্নান ক'রে—ঠাকুরের কাছ থেকে ভাত নিয়ে খেয়ে সে অফিসে চ'লে

যায়। কিংবা সন্ধ্যাবেলা যখন ওপরের আড্ডা জমে, তখন আন্তে-আন্তে স্টিক হাতে গোলদীঘির দিকে চ'লে যায়। হাঁটতে-হাঁটতে ভাবে : ক'টা দিন আর? এই স্কোয়ারে পাক খাচ্ছি—চোখের পলকেই কুড়িটা বছর শাঁ ক'রে মাথার ওপর দিয়ে উড়ে যাবে আমার, উৎপলার; দেখতে-দেখতে চুল পেকে যাবে ওর, দাঁত প'ড়ে যাবে, তারপরে সব ভৌঁ-ভাঁ। ভাবতে-ভাবতে কুড়ি বছরের পাল্লা সতিই, দ্যাখ, পেরিয়ে গেছে, সে—জীবনটা এখন বেশ নিরাল্লা, নিঃশব্দ; একটা অতিরিক্ত কাক, একটা ওপরপড়া বেড়াল নেই কোথাও; রোদে বাতাসে নির্ভাবনা ছড়িয়ে আছে চারদিকে; যতো চাও, ততো! কতো নেবে? ভাবতে-ভাবতে ক্ষমার ক্ষমতায় বোশেখ-জ্যেষ্ঠের মাটির শিরায়-শিরায় শ্রাবণের রস এসে পড়ে যেন। চুরুট জ্বালিয়ে নেয় মাল্যবান।

কুড়ি বছর তো পেরিয়ে গেছে সে আর উৎপলা। গত কুড়ি বছর যে-সব আতিশয্যচক্র হয়ে গেছে উৎপলার জীবনে, তা নিয়ে মাথা ঘামাবার সময় নেই এখন আর। গোলদীঘির রাতে শীতে মাল্যবানের চুরুট তার মনের ভেতরে সেই ছেলেবেলার শীত রাতে শাস্ত্র'র মা'র আঙনের খাপড়ার মতো কেমন একটা নিঃশব্দতা নিশ্চয়তা শান্তির অবতারণা করছিল। বাড়ির দিকে হাঁটতে-হাঁটতে বাড়ির খুব কাছাকাছি এসে প'ড়ে মাল্যবান বলছিল, কাকে যেন বলছিল, কাকে যেন বলছিল 'কি গো, গোলামরা সব চ'লে গেছে—রঙের গোলামও—বলো! বিশটা বছর হস্কে গেছে চোখ না পাঁজলাতেই। মনু শ্বশুরবাড়ি, আর আমাদের বাড়ি সায়েব বিবি ওপরের ঘরে—বলো! বিছানাটা বেশ দু'জনের মতন উম্-উম্, কুসুম-কুসুম, শীত রাত আর শেষ নেই বলো।' দুপুর-রাতে ঠাণ্ডা নদীর পারে শামকলের মাথাটা যেন টেকির পাড়ের মতো উঠছিল পড়ছিল যখন “বলো-বলো!” বলছিল মাল্যবান। কথা বলতে-বলতে মাল্যবান হি-হি ক'রে নিজের ঘরে ঢুকে লেপ টেনে নেয়; খুব বেশি অন্ধকারে খুব বেশি ঘুমের ভেতরে মানুষের শরীর ব'লে কোনো জিনিস থাকে না, মনটাও কাঠ হয়ে যায়, হঠাৎ জেগে উঠলে কাঠে আঙুন লেগে যায়; আচমকা জেগে-জেগে উঠে সারারাত, পুড়তে-পুড়তে সকালবেলা মাল্যবান জাগ্রত চেতনার অন্য আরেক রকম আঙনের ভেতর জেগে উঠল। এখানে “বলো-বলো!”-র চালাকি চলবে না শামকল শালায়; প্রতিটি সেকেন্ড-মিনিট গুণে-গুণে, অস্থিককলাসকে রূপকের মিথ্যে ব'লে বিদায় নিয়ে, আঙুনকে সতিই আঙুন ব'লে গ্রাহ্য ক'রে পদে-পদে এগিয়ে যেতে হবে। এছাড়া কোনো উপায় নেই, কোনো পথ নেই আর।

একদিন মাল্যবান অফিসে গিয়ে শুনল যে, অফিসের কেরানী মনোমোহনবাবুর স্ত্রীর ভয়ঙ্কর অসুখ—মেডিক্যাল কলেজের হাসপাতালে তাকে আনা হয়েছে।

‘ঘাবড়াবেন না মনোমোহনদা, সেরে যাবে—’ বললে মাল্যবান।

কিন্তু সেদিন সমস্তটা দিন অফিসে মনটা তার উৎপলার জন্যে কেমন অসুবিধে অস্বস্তি বোধ করতে লাগল।

সন্ধ্যার সময়ে বাসায় গিয়ে পোশাক না ছেড়েই সে ওপরের ঘরে চলে গেল। গিয়ে দেখল, উৎপলা আর মনু ছাদে বসে আছে—কার অসুখ, কোথায়?

‘তুমি ভালো আছ তো, উৎপলা? আমাদের অফিসের মনোমোহন বাবুর স্ত্রীর বড্ড অসুখ—’

‘কী অসুখ, বাবা?’ মনু জিজ্ঞেস করল।

‘সে কী এক রকম অসুখ, স্টোন হয়েছে—’

‘সে আবার কী?’

‘কী জানি।’

মাল্যবান খানিক-ক্ষণ আলো-আবছা চোখে বাইরের দিকে তাকিয়ে ভারি ভাবুক হয়ে পড়ল; একটা নিঃশ্বাস ফেলে বললে, ‘মনু’, যা আমরা খাই, তার ভেতরে নানারকম জিনিস থাকে, হজম হয় না, ভেতরে-ভেতরে স্টোন হয়—’

‘পেটে হয় স্টোন?’

‘না, পেটে না, কিডনিতে হতে পারে—গল-ব্লাডারে হতে পারে—’

‘কিডনি কী, গল-ব্লাডার কী?—জিজ্ঞেস করাতে মাল্যবান হাত দিয়ে নিষেধ জানিয়ে বললে, ‘ও-সব তোমার জনাবার দরকার নেই—’

‘ভাতের ভেতরে যে-কাঁকর থাকে, সেগুলো জন্মে গিয়ে বুঝি কিডনিতে?’ মনু বললে।

‘না, তা নয়, তা ঠিক নয়—’

‘ও তো আমার পেটেও হতে পারে—’ উৎপলা বললে।

‘না, তা কী করে হবে, উৎপলা—’ মাল্যবান শিশুর মুখে ভূতের গল্প শুনে একটু হেসে উড়িয়ে দিয়ে বললে।

‘হবে না?’ তোমার ঠাকুর খুব দেখে-শুনে চুল ধোয় আর ভাত রাঁধে,’ উৎপলা বললে, ‘এক-এক দিন খেতে বসে দেখি কাঁকর পাথরের কাঁড়ি। গেরাসে-গেরাসে পেটে হড়কাচ্ছে, স্টোন হবে না তো কী হবে—’

‘ওতে স্টোন হয় না—ওটা—’ যা-হোক, মাল্যবান ঠাকুরকে ডাক দিল।

‘ভাতে কাঁকর থাকে কেন?’

ঠাকুর আপত্তি করতে যাচ্ছিল, মাল্যবান বললে, ‘ফের যদি কাঁকর পাথর নুড়ি কুচি কিছু দেখি, তাহলে তোমার মাইনে কেটে তোমাকে তাড়িয়ে দেব আমি। খবরদার!’

ঠাকুর চ'লে গেলে উৎপলা বললে, 'ওকে ব'কে কী লাভ। যারা চাল নিয়ে বজ্জাতি করে সে-সব ওপরওয়ালাদের পেটের ভাত চাল ক'রে ছাঁকব আমাদের চালুনিতে; নাও, সে-সব পেটোয়া চাল কয়েক বস্তা নি'য়েসো দিকি। পারবে? মাঝখান থেকে ঠাকুরটাকে ঝাড়লে। কী রকম বেকুব তুমি।'

'এবারে আমি চালওয়ালাকে কড়কে দেব।' অফিসের ধরাচূড়া-পরমা মাল্যবান একটা হাই তুলে বললে।

যে-আগ্রহ ও উদ্বেগ নিয়ে উৎপলাকে সে দেখতে এসেছিল, তা তার ধীরে-ধীরে ধোঁয়ার ভেতর মিলিয়ে যেতে লাগল যেন। মনোমোহনের স্ত্রী অসুস্থ হয়ে পড়েছে ব'লে সমস্তটা দিন অফিসের কাজকর্মের ভেতর উৎপলার জন্যেও যে-দুশ্চিন্তা হয়েছিল, বৌয়ের সঙ্গে কিছুক্ষণ খিটিমিটি ক'রে সে বিষন্ন, ভালো জিনিসটা নষ্ট হয়ে গেল একেবারে। খারাপ হল—খুব খারাপ হয়ে গেল'সব। অফিসের থেকে এ-রকম হাঁচকা ছুটি নিয়ে বাড়িতে না এলেই ভালো হত।

'স্টোন হয়েছে—তারপর কী হল—ম'রে গেল?'

'না, মরবে কেন? তাহলে বেচারির চলবে কী ক'রে?'

'কোন বেচারির?'

'মনোমোহনদা'র।'

'মনোমোহনবাবু তোমাদের অফিসের কেরানী?'

'হ্যাঁ, নিচের দিকের; মাইনে পঞ্চগন্ন টাকা; বড্ড মুশ্কিল মনোমোহনদা'র।'

'মনোমোহনবাবুর বৌয়ের জোর কপাল বলো—'

'কেন?'

'পারানির দিকে চলেছে—বৈকুণ্ঠে যাবে—কেরানীর টাকায় টিকছে না আর—'

উৎপলা হাঁসফাঁস ক'রে বললে, 'পেটে আমার কী যেন হয়েছে, মনে হয়—'

'কী হল?'

'টিউমার হয়েছে, মনে হয়—'

'কে বললে?'

'বলবে আবার কে? টের পাচ্ছি। এর অসুখ কী? অপারেশন করতে হবে?'

মাল্যবান সঙ্কীর্ণ চোখে তার স্ত্রীর দিকে তাকাল সত্য কথা বলছে? কি ক'রে বুঝবে, কথাটা অসত্য? সুবিধের লাগছিল না তার। কোনো কিছু স্থির ক'রে নয়, এমনিই কথা একটা-কিছু বলতে হ'বে বলেই মাল্যবান বললে, 'ও টিউমার নয়। ও কিছু নয়। ও তোমার মনের ধোঁকা।'

উৎপলা কথা খরচ করতে গেল না আর। মেঝের ওপর ব'সে ছিল—ব'সে-ব'সে হাঁসফাঁস করতে লাগল; উঠে দাঁড়িয়ে হাঁসফাঁস করতে লাগল।

চার-পাঁচ দিন কেটে গেছে। মাল্যবানের কেমন যেন—কেন যেন কিছুই ভালো লাগছিল না।

‘চলো, আজ একটু বেড়িয়ে আসি—’

‘কোথায়?’

‘চলো আজ একটু গড়ের মাঠের দিকে যাই—’ মাল্যবান বললে।

‘থাক।’

‘চলো, ভরসাঁঝে এ-রকম একা-একা বসে থাকলে মন খারাপ লাগবে—’

উৎপলা হঠাৎ উঠে দাঁড়িয়ে বড় কাতাসে ফুল ধরা বাবলার মতো ছড়মুড় করে কেঁপে পাক খেয়ে হেসে উঠে বললে, ‘এই যে ছিরঙ্গ-ঠাকুরপো একটা বেহালা এনেছ দেখছি—’

শ্রীরঙ্গ এসে বললে, ‘হ্যাঁ, কিছুদিন থেকে শিখছি—আচ্ছা, দ্যাখ, কেমন বাজাই।’

‘আমি এক-আধটা কেস্তন গাইতে পারি—বেহালার কী বুঝি।’

‘আচ্ছা, কেস্তনের সুবই ধরছি।’

‘কোচে বোসো ঠাকুরপো। বাঃ, দাঁড়িয়ে কেন?’

‘আমি দাঁড়িয়েই সুবিধে পাই; দাঁড়িয়ে-দাঁড়িয়ে নবনী মল্লিক বেহালা বাজায়। আমায় শিখিয়েছে সে।’

‘নবনী? পুরুষ, না, মেয়ে?’ মাল্যবান জিজ্ঞেস করল।

‘অবনী যদি পুরুষ হয়, তাহলে নবনী কী হবে?’ আড় চোখে মাল্যবানের দিকে একবার তাকিয়ে বিদ্যুতের ভরা ব্যাটারির মতো সম্পন্ন সফল দৃষ্টিতে উৎপলার দিকে তাকাল শ্রীরঙ্গ।

‘অবনী নবনী দু’ ভাই? নবনীবাবু আপনার দাদা?’ মাল্যবান বললে।

‘আমি তো মল্লিক নই।’

‘তবে?’

‘পলা-বৌদি জানে আমার কুলের খবর—’

‘ওরা রামবাগানের দত্ত।’ উৎপলা বললে।

উৎপলা শ্রীরঙ্গকে জিজ্ঞেস করলে, ‘নবনী কি মল্লিকবাড়ির মেয়ে, রাজেন মল্লিকের—’

‘হবে এক মল্লিকের; ব্যাটা ছেলে নয় নবনী, মেয়ে বটে। পলা-বৌদি, বেহালাটা বাজাই তাহলে?’ ঘাড় কাত্ ক’রে গোলাপজাম কামরাঙা লটকান বনের কেমন এক অমায়িক হলুদ পাখির মতো জিজ্ঞেস করল শ্রীরঙ্গ।

‘বাজাও বাজাও।’

‘কেস্তনের সুর?’

‘বাজাও।’

‘না, কেস্তনের সুর নয়—’ উৎপলা নিজেকে তাড়াতাড়ি শুধরে নিয়ে বললে।

‘কেন?’

‘বেহলায় তা বাজবে না। তুমি একটা অন্য সুর বাজাও শ্রীরঙ্গ-ঠাকুরপো। যাকে বলে বেহালার সুর—’

শ্রীরঙ্গ বেহলা কাঁধে গুণীর মতো দাঁড়িয়েছিল। এবারে এক পায়ে ভর দিয়ে দাঁড়াল—বাঁ পা পিছনের দেয়ালে ঠেকিয়ে। ‘বায়লার সুর মানে?’

‘মনোমোহন বায়লাদারকে চিনতে তুমি?’ উৎপলা বললে।

‘না তো। কোথাকার?’

‘চব্বিশ পরগণার। আমি তাকে একটা চমৎকার সুর ভাঁজতে বলতাম। কোনো গানের সুর সেটা নয়। সেটা বায়লার সুর। মনোমোহন মন্ত্রী লোকটার নাম।’

‘ঐ একই সুর বাজাত?’

‘একই সুর।’

‘বরাবর?’

‘বারো মাস। আমাদের দেশের বাড়িতে শীত পুড়লে আসত। কার্তিক মাসটা কাটিয়ে যেত। লোকটার নাম যা বললাম, মনে আছে তোমার?’

একটা শামুক, না, কী যাচ্ছে, দেখবার জন্যে হাঁসের মতো ঘাড় কাত্ ক’রে শ্রীরঙ্গ ঘাড়টাকে আবার সোজা ক’রে নিয়ে বললে, ‘মনে আছে : মনোমোহন মন্ত্রী। এইবার বাজাই?’

‘বাজাও। বাজাও। আয় মনু, আয়। নবনী মল্লিক রাজেন মল্লিকের বাড়ির, না?’

‘না।’

‘তবে?’

‘ওদের বাড়ি জলপাইগুড়ি না, কোথায় যেন ছিল; এখন কলকাতায়ই থাকে। ও হল কেপ্ত মল্লিকের মেয়ে, টালিগঞ্জের।’

‘বড়-সড় মেয়ে?’

‘মনুর চেয়ে বড়, তোমার চেয়ে ছোট, বেশ সোমথ মেয়ে। ভারি সুন্দর। টলমলে মাকালের মতো যেন তেল চুঁয়ে পড়ছে চামড়ার থেকে; হাত বুলিয়ে নিলে ঘাসের শিশির উঠে আসে যেন ভোরবেলায়। ভালো বাজিয়ে। মোক্ষম গাইয়ে, মাইরি। আমি ওকে আমার গাইয়ে-বৌ বলি—’

‘ওকে বিয়ে করেছ তুমি?’

‘না। এন্নিই মস্করা ক’রে বলি।’

শ্রীরঙ্গ বললে, ‘বেয়ালার আর্টিস্ট কাউকে বিয়ে করে না। অবিশ্যি তোমার মতন কাউকে পেলে বিয়ে করে, কি, না করে—বছরে কত দিন শনি-মঙ্গলবার নিয়ে টের পাইয়ে দিত আমাকে—কিন্তু কাউকে কোথাও পেলুম না—দেখলুম না তো তোমার মত।’

এ-রকম কথা শুনে নাক-মুখ লাল হবার বয়েস না থাকলেও সেই বয়েসের যে রক্ত এখন আছে উৎপলার; চলকে উঠছিল।

‘সেই মাঠকোঠা নেবুতলা শোভাবাজার পাথুরেঘাটা কুমারটুলি আহিরিটোলা বৌবাজার চিৎপুর হাতিবাগান রাজাবাজার ধর্মতলা—সমস্ত কলকাতা আমার পায়ের নিচে পলা বৌদি—কিন্তু তোমার মতন এমন হাতি খেতে কাউকে তো দেখলুম না।

উৎপলা এক হাত পেছিয়ে চমকে উঠে বললে, ‘হাতি খেতে?’

‘হ্যাঁ, সেই অনেক দূরের সমুদ্রে শ্রীমন্ত সদাগর যেমন দেখেছিলেন—’

উৎপলা খানিকটা বিলোড়িত হয়ে উঠে বললে, ‘তুমি বুঝি শ্রীমন্ত সদাগর?’

বেহালায় একবার ছড়ি টেনে উৎপলার দিকে চোখ তুলে শ্রীরঙ্গ বললে, ‘আর তুমি দাঁড়িয়ে আছ পথের ওপরে, কিন্তু হাতি খাচ্ছ কেন, বলো তো কামিনী—’

‘কমলে কামিনী বলো’, উৎপলা ফোঁড়ন দিয়ে বললে। ‘কামিনী নয়। কামিনী নয়। দেখছ না ওঁরা সব দাঁড়িয়ে আছেন—’

একটু এগিয়ে চাপা গলায় বললে শ্রীরঙ্গকে।

শ্রীরঙ্গ বেহালায় এবার একটা সুরই ভাঁজতে লাগল—খুব মন দিয়ে, কিন্তু তার চেয়েও নিবিদ নিবেশে মননের অপর বস্তুতে লেগে থাকতে চেয়ে; বুঝছিল উৎপলা; অনুভব করছিল অপর বস্তুতে লেগে থাকতে চেয়ে; বুঝছিল উৎপলা; অনুভব করছিল একটু দূরে দাঁড়িয়ে থেকে মাল্যবান। কিন্তু বাজাতে-বাজাতে হঠাৎ মাঝখানে থেমে গেল শ্রীরঙ্গ।

‘অনেক দূরের এক সাগর; দেখা যাচ্ছে নিরীলা জল, রোদ। সেখানে পদ্মের ওপর দাঁড়িয়ে আছে : শ্রীমন্ত সদাগর দেখলেন।’ শ্রীরঙ্গ চোখ বুজতে-বুজতে চোখ মেলে ভালো করে তাকিয়ে একটু উত্তেজিত হয়ে বলল, ‘কিন্তু তুমি হাতি খাচ্ছ কেন, পলা?’

‘কী খাব তাহলে?’ শ্রীরঙ্গের দিকে তাকিয়ে, মাল্যবান যে দাঁড়িয়ে আছে, সেটা জানতে না চেয়ে নিজেকে একটু বেশি ছেড়ে দিয়ে বললে যেন উৎপলা।

শ্রীরঙ্গ হঠাৎ চারিদিকে চোখ ফিরিয়ে বললে, ‘ওঃ, এই যে মাল্যবানবাবুর; এখানে দাঁড়িয়ে আছেন দেখছি; আমার চোখেই পড়েনি। আচ্ছা, আমি বাজাই বেশ দুর্দান্ত একটা গৎ। শোন্-মনু, শোনো মনুর-মা, শুনুন মাল্যবানবাবু।’

রাত দুটোর সময় খুবই কাছাকাছি কোন্ একটা বাড়ির ভেতর বড় কান্নাকাটি প’ড়ে গেল; মাল্যবানের ঘুম গেল ভেঙে। তাড়াতাড়ি বিছানার থেকে উঠে কক্ষল গায়ে দিয়ে সে দরজা খুলে রাস্তায় নামল। তাকিয়ে দেখল ধীরেনবাবুদের সদর দরজার কাছে ভিড় জ’মে গেছে। চুকে দেখল, একটি মেয়েমানুষের শব নিচে নামানো হয়েছে—মেয়েটির বয়েস পঁচিশ-ছাব্বিশ হবে হয়তো, এমন সুন্দর শাস্ত নিরিবিলি মুখ—কপাল চুল সিন্দুরে মাখা-মাখা—দেখে তার প্রাণের ভেতর কেমন যেন করতে লাগল! অন্ধকার শীতের ভেতরে সে চুপে-চুপে নিজের ঘরে ফিরে এল আবার; খানিকটা সময় অবসন্ন হয়ে নিজের বিছানার ওপর বসে রইল;—তারপর আস্তে আস্তে সিঁড়ি ভাঙতে-ভাঙতে ওপরে গিয়ে দাঁড়াল।

মাল্যবান দেখল, উৎপলা আর মনু বিছানায় উঠে ব’সে আছে। একটা চেয়ারে ব’সে মাল্যবান বললে, ‘আমিও ভেবেছিলাম, তোমাদের ঘুম ভেঙে যাবে—’

‘কারা কাঁদছে?’

‘ঐ ধীরেনবাবুদের বাড়ি—’

‘কী হল?’

‘সত্যেনের স্ত্রী মারা গেছে।’

‘আহা, সেই রমা!’

‘হ্যাঁ।’

‘কীসে মরল?’

‘জানি না তো।’

‘বাঃ, আমরা জানতে পারলাম না।’

‘হঠাৎ হয়তো মারা গেছে—কোনো রোগ হয়েছে ব’লে শুনি নি তো।’

‘হাট-ফেল করল। কিন্তু ওর স্বামী তো পুরুষমানুষ যাকে বলে। গলায় গামছা দিয়ে মেয়েমানুষকে ও-রকম জামাই টেনে আনতে দেখিনি তো কোথাও—অনেক জামাইঘণ্টী তো দেখলুম—’ উৎপলা বললে।

‘এবারকার জামাইঘণ্টী হয়ে গেছে, মা? কী মাসে জামাইঘণ্টী হয়, মা?’

মনুকে কনুই দিয়ে ঠেলে ফেলে উৎপলা বললে, ‘সুখের পায়রার ঘাড়ে সোহাগের পায়রা ক’রে রেখেছিল তো বৌকে। মেয়েটা এ-রকম ভিরমি খেল কেন গা!’

‘কীসে কী হয়েছে, কে জানে।’ চানের সময় সমস্ত মুখে সাবান মাখতে-মাখতে যেন সংক্ষেপে কথা সারে, তেন্নি ভাবে বললে মাল্যবান।

‘আহা, দু’টো কচিকাঁচা মেয়েও তো রয়েছে, ওদের কী হবে।’

‘সকলে মিলে দেখবে। অমন বাবা আছে। ঠাকুমা, পিসিমা’রা রয়েছে।’ যেন চোখে সাবান না যায় সে-দিকে দৃষ্টি রেখে কটাকট-কটাকট কথা বলছে মাল্যবান—চানের সময় যেন—মনে হচ্ছিল।

‘তা পাড়াপড়শী মরেছে, যেতে নেই?’

‘আমি গিয়েছিলাম।’

‘গেলে তো চোরের মতো, চ’লে এলে আবার?’

‘তোমাদের একা ফেলে এ-রকম অবস্থায় বেশি-ক্ষণ তো সেখানে থাকা যায় না!’

‘আহা-হা, শিমুলের তুলো উড়তে উড়তে মাদারকাঁটার গিয়ে ঠেকেছি আমরা। ধনেশপাখি এসে ঠোঁট নেড়ে খসিয়ে দেবেন—’ উৎপলা এক গা জ্বালাতন ঝেড়ে দাঁতে দাঁত ঘ’ষে বললে।

‘আহা-হা!—আহা-হা!—’ বলতে লাগল উৎপলা।

বিছানার থেকে নেমে আলনার থেকে একটা ধোসা পেড়ে গায়ে বেশ আঁটসাটো জড়িয়ে নিয়ে উৎপলা বললে, ‘আয় তো, মনু, কোটটা গায়ে দিয়ে।’

মনুকে নিয়ে ধীরেনবাবুর বাড়ির দিকে রওনা দিল সে।

লৌকিকতা রক্ষা করছে, ভালোই; ভাবছিল মাল্যবান; কিন্তু মনুকে সঙ্গে নিচ্ছে? কেন? সামাজিকতা রক্ষার জন্যই শুধু যাচ্ছে না উৎপলা—যাচ্ছে দশ-পাঁচ রকম দেখবে ব’লে; হৃদয় আধার উৎপলার, বাইরের পৃথিবীটাও খুব সক্রিয় (আজ দুপুর-রাতের), কয়েক ঘণ্টার খোরাক জুটল উৎপলার। মাল্যবান অন্ধকারের ভেতর একটা বিড়ি জ্বালাল। কিন্তু তৎক্ষণাৎ সেটা ফেলে দিয়ে নিচে নেমে সদর দরজায় তালা মেরে ধীরেনবাবুদের বাড়িতে যাবার মাঝরাস্তায় উৎপলাকে পেয়ে বললে, ‘এই নাও চাবি।’

‘চাবি আমি কী করব?’

‘নাও। আমি শ্মশানে যাচ্ছি।’

উৎপলা ঠোট বসিয়ে বললে, ‘পাড়ায় আর বামুন নেই, কাশীঠাকুর চিড়ে খাবে—’

‘নাও, চাবিটা নাও, ধরো—’ মাল্যবান চাবিটা গছিয়ে দিয়ে বললে।

‘শ্মশানে যাবে মশানে যাবে, সেই একদিন যাবে, যাবে তো। নাও, পথ ছাড়া—পথ ছাড়া দিকিন, চৌখুম্বী কম্বল জড়িয়ে রমাদের বাসায় রঁ-অলা রাঘব বোয়ালের মতো হেঁৎ ক’রে উজিয়ে উঠবার কোনো দরকার নেই তোমার—’

‘কতা শোনো! কতা!’ মনটা একটু রঙে চ’ড়ে ছিল ব’লে মাল্যবান ‘থ’কে ‘ত’ বানিয়ে দিয়ে বললে, ‘রাঘববোয়াল আবার রঁ-অলা হয় না-কি। কতা শোনো! কতা!’ হি-হি ক’রে কাঁপতে-কাঁপতে এগিয়ে গেল সে যেন বীরজননীর ছেলে—দেশের শত্রুদের সঙ্গে যুদ্ধ করতে যাচ্ছে; এঁ না হলে উৎপলাকে চমৎকৃত ক’রে দেওয়া যাবে না।

কেমন যেন একটা প্রবল ছেলেমানুষি বীরপুরুষি ঝাপটা পেয়ে বসল তাকে; চমৎকৃত ক’রে দেবার কী দরকার, ভাবতে গেল না সে; তার চেয়ে শীতরাতে নিচের ঘরের বিছানা-কম্বল যে সতিাই ঢের পরিচ্ছন্ন সত্য শাস্ত—মূল্য, মীমাংসার পৃথিবীতে সেটা ভুলে গেল।

মড়া পুড়িয়ে বেলা দুটোর সময়ে বাড়িতে ফিরে এলে উৎপলা বললে, ‘আজকে অফিসটা বাদ দিলে তাহলে?’

‘কী করব, পাড়াপড়শী যদি ম’রে যায়।’

‘কী করলে শ্মশানে গিয়ে।’

‘যাই, চৌবাচ্চায় চান ক’রে আসি—’ ব’লে, মাল্যবান দাঁড়িয়ে-দাঁড়িয়ে পিঠে গামছা ঘষতে লাগল।

‘সত্যেনবাবু গিয়েছিলেন শ্মশানে?’

‘ও মা, তিনি যাবেন না।’

‘ও মা, চোখ পাল্টালে যে। শুদোছি। কতো-ক্ষণ ছিলেন তিনি?’

‘কোন এক সময়ে কেটে পড়লেন, টের পেলাম না।’

‘কেটে পড়লেন। কথার রকম দ্যাখ। ওকে তো সবাই ধরাধরি ক’রে শ্মশান থেকে নিয়ে এসেছে। খেদার হাতির মতো কেমন অবোলা উতলা হয়ে পড়েছিলেন শুনলাম। খুব কেঁদেছেন?’

‘হ্যাঁ, কেঁদেছেন বটে। দু’চার বাটি।’

‘খুব লেগেছে ভদ্রলোকের,’ উৎপলা বললে, ‘তবু পুরুষমানুষ তো। লেজ দিয়ে ডাঁশ উড়িয়ে আবার কলাগাছ খেতে শুরু করবে; এই তো হয়ে এলে ব’লে। বনের হাতি পোষা হাতি হবে এবার দোজবরে সত্যেনের বৌয়ের বিয়ের নেমস্তম্ভে কলার পাং পড়ল ব’লে।’

‘এ, বৌ তোমার বাপের বাড়ি দেশের বুঝি? নিত্ কনে হয়ে আসর জাঁকিয়ে বসবার শখ?’ মাল্যবান শরীরটাকে, মুখটাকে (যেন তা ফোকলা হয়ে গেছে) একটু নাচিয়ে হাসিয়ে বললে। ‘সত্যেনের বিয়েতে কলার পাং দিয়ে করবে কী তুমি। হাতি হয়ে সত্যেন কলাগাছ খাবে, বলছিলে তো তুমি; কামিনী হয়ে সেই হাতিকেই খাবে তো তুমি। বাঃ, কেমন কামিনীর মতো পদ্মের ওপর দাঁড়িয়ে আছে উৎপলা।’

উৎপলা উঠে দাঁড়িয়েছিল। আড়মোড়া ভাঙতে-ভাঙতে বললে, ‘বেশ তিরিখ-তিরিখ জবাব দিচ্ছ তো তুমি, যে যাই বলুক, এই ভর-সন্ধ্যাবেলা। নাও, চান ক’রে এসো, চা খাবে এসো।’

একটি মূতা—খুব অল্প বয়সেই—দন্ধ হয়েষছ শ্মশানে। একটি স্বামীর শোক খুবই জায়াকেন্দ্রিক, এখনও গভীর। কিন্তু এখনই তরল হয়ে যাচ্ছে সব; সচ্ছল সফল সময় ব্যথা, বাচালতা, সরসতা, নষ্টামি, ভয়, রক্ত, বিরংসা, অনাথ অন্ধকার ও গভীরতার ভেতর মৃত্যু নয়, শূন্য নয়, ব্যক্তি জীবন নয়, অফুরন্ত অনির্বচনীয় সময়,—সময় শুধু।

রমা মারা যাওয়ার পর থেকেই মাল্যবান মাঝে-মাঝে কেমন সব মৃত্যু ও দাহের স্বপ্ন দেখত রাতের বেলা। একদিন সে দেখল, নিজে ম'রে গেছে, তাকে শ্মশানে নিয়ে যাওয়া হল: সেখানে সে খুব অমায়িক ভাবে সকলের সঙ্গে কথাবার্তা বলছে, সকলকে নমস্কার জানাচ্ছে, বিদায় নিচ্ছে, বলছে; আপনাদের সঙ্গে আর তো দেখা হবে না, কোথায় যাই, কে জানে।

জেগে উঠে তার মনে হল; এ কী অদ্ভুতঃ! হলই বা স্বপ্ন, কিন্তু স্বপ্নের ভেতরেও ম'রে তো গিয়েছিল সে; ম'রে গিয়ে মানুষ আবার ব'সে-ব'সে জীবিত মানুষদের সঙ্গে কথা বলে কী করে! বাস্তবিক, স্বপ্ন এমন হিজিবিজি—মানুষের বুদ্ধি বিচার চেতনার দু'কান কেটে ছেড়ে দেয়। অনেকে বলে স্বপ্ন সত্য হয়। বাস্তবিক, ম'রে যাবে কি সে? শীতের গভীর রাতে অন্ধকারকে মিশ-কালো ক'রে দিয়ে বেশি অন্ধকারের প্রবাহের ভেতর —ভাবতে-ভাবতে-ভাবতে গিয়ে কেমন যেন ন্যাটা জোবড়ার মতো হয়ে পড়ল সে। নিজের জন্যে ততটা নয়—কিন্তু সে ম'রে গেলে উৎপলার উপায় হবে কী? মনু আর উৎপলার জন্যে মনটা তার নিজের চেয়ে ঢের বড়ো মানুষের মতো গুঁইগাঁই ক'রে উঠল। বিছানায় উঠে বসল; চটি পায়ে দিয়ে কম্বল জড়িয়ে আস্তে-আস্তে ওপরের ঘরে গেল সে। গিয়ে দেখল, উৎপলা ঘুমিয়ে আছে—পাশে মনু—সেও ঘুমিয়ে। বেশ শান্ত নিরাময় নিঃশ্বাস তাদের। ওরা অস্তুত কোনো দুষ্ট স্বপ্ন দেখেনি। বেশ। এদের দিকে তাকালে আশ্বাস পাওয়া যায়। কিন্তু তবুও এর স্বামী আর ওর বাবা যদি ম'রে যায়, তাহলে এ-রকম ক'রে এরা দু'জনে ঘুমোতে পারবে কি আর? জেগেও উঠতে পারবে না আর জাগরীতে ঘুরে-ফিরে বেড়াতে পারবে না আর সহজ সফল ভাবে।

কিন্তু, তবুও শেষ পর্যন্ত সত্যিই ম'রে সে তো যায়নি, বেশ সুস্থ হয়ে বেঁচে আছে। আছে। আমাদের জীবনের নদীর নাম অনুত্তরণ, মাল্যবান ভাবছিল, কোথাও কেউ

উত্তীর্ণ হতে পারে না, কোনোদিন এ-নদীর পথে; কিন্তু, তবুও, কতো লোক ব্যথা বিপদ বিফলতা মৃত্যুর বলে প্রতিদিন ওৎড়াচ্ছে; উৎপলা, মনু পারবে না কেন? মানুষ হয়ে জন্মালে নানারকম দুর্নিবার শাস্তি ভোগ করতে হয়—করতেই হয়; মনু উৎপলা বাদ যাবে না; মাল্যবান ম'রে গেলে মানুষের সে-পাওনা বুঝে নিতে হবে স্ত্রী-সন্তানকে; কিন্তু বেশি দিনের জন্যে নয়; চূপ হয়ে যায় সব, শান্ত নিশ্চুপতা রয়েছে। প্রথমে মাল্যবানের মৃত্যু—তারপরে অনেকদিন পরে হয়তো তার স্ত্রী আর সন্তানের মৃত্যু; এই ত্রিমৃত্যুতে নিস্তক হয়ে যাবে সব। সময়ের কাছে মাল্যবানের দায়িত্ব ফুরিয়ে যাবে। ভাবতে-ভাবতে এখনই যেন ফুরিয়ে যাচ্ছিল সব—এই রকম একটা অনুভাব ঘিরে রাখছিল মাল্যবানকে।

কিন্তু, আরেক দিনের স্বপ্ন সব-চেয়ে ব্যথা দিল তাকে। দেখল, উৎপলা ম'রে গেছে। স্বপ্নের ভেতর মনে হল, উৎপলা সত্যেনবাবুর স্ত্রী—সমস্ত পৃথিবীই তা জানে—মাল্যবান নিজেও খুব ভালো ক'রেই জানে যে, দশ-বারো বছর ধ'রে এরা পরস্পরের বৈধ স্ত্রী স্বামী; এদের এ-রকম সম্পর্ক নিয়ে কোনো খটকার বাষ্প নেই মাল্যবানের মনে। কিন্তু, তবুও, সেই সঙ্গে সেই স্বপ্নেই উৎপলা মাল্যবানের স্ত্রী-ই—আর কারু কিছু নয়; এ-রকম সব খাপছাড়া জিনিস স্বপ্নের ভেতরে খুব সত্য ও স্বাভাবিক বোধ হচ্ছিল। দেখল গেল, উৎপলা ম'রে কাঠ হয়ে প'ড়ে রয়েছে—সমস্ত চুল এলোমেলো, কপালে মাথায় সিঁদুর ধ্যাবড়া, পরনে—আশ্চর্য!—বিধবার থান। মড়ার খাটিরার ওপর শুয়ে মড়া নারী মনের, মাংসপেশীর নানা রকম নম, উদ্দাম আক্ষেপে নিজের মৃত্যুর বেদনা সত্যেনকে জানাচ্ছে, কিন্তু শূন্যতা ও হাহাকার বিঁধছে মাল্যবানকে, মরমস্নায়ুতে।

ঘুম ভেঙে গেল তার।

তখন শেষ রাত।

কম্বলের নিচে সমস্ত শরীর ঘেমে গেছে মাল্যবানের। সে তাড়াতাড়ি উঠে প'ড়ে খালি পায়ে ওপরে ঘরে চ'লে গেল। গিয়ে দেখল, মনু বিছানায় উঠে ব'সে আছে—উৎপলা নেই। নেই, থাকবে না ব'লে দিয়েছে তো স্বপ্ন। তার সঙ্গে গাঁথা এই নাস্তিত্বটা বুঝি। নেই।

‘তোর মা কোথায়, মনু?’

‘বাথরুমে গেছে।’

আছে তাহলে; কিংবা হয়তো নেই; কী মানে আছে এত বেশি শীতে শূন্যতায় প্রপন্ন রাতে দূর বাথরুমের অন্ধকারে মানুষের অস্তিত্বের মনুর মুখের ‘বাথরুমে গেছে’ নির্দেশের।

‘কখন গেল?’

‘এই তো, এখুনি।’

‘এত-ক্ষণ বিছানায় শুয়ে ঘুমোচ্ছিল?’

‘হ্যাঁ।’

‘কোনো অসুখ-টসুখ করেনি তো?’

‘কার? মা’র?’ মনু মাথা নেড়ে বললে, ‘না তো।’

‘কোনো অসুবিধে হয়েছিল? কাঁদাকাটি করেছিল?’

চোখের ওপর থেকে চুলের গোছা সরিয়ে নিয়ে মনু বললে, ‘না তো। আমি দেখছি, কাঁদেনি। কে বললে মা’কে—তুমি বলেছ কাঁদতে?’

‘না রে।’ মাল্যবান দাঁড়িয়ে-দাঁড়িয়ে কথা বলছিল, চেয়ারে বসল এবার।

মাল্যবান সদ্য স্বপ্নছুট বির্তকাসক্ত মনকে বলছিল, সত্যেনবাবুর কাছে খিঁচে-দুমড়ে দীনতায় দাবনা কাঁপিয়ে সে কী আক্ষেপ, কান্না;—নিজে ম’রে গেছে ব’লে। বাস্তবিক, স্বপ্ন বড্ড ফিটেল—নিরেট জিনিস; খ্যাঁট মেরে বদহজম হলে ও-সব বিলকি ছিলকি স্বপ্ন দেখা যায়, এই যারা ভাবে, তারা কি কিছু জানে? স্বপ্ন হচ্ছে অস্তিম জিনিস—এরপর আর কিছু নেই; ছোট অন্ধকার আর বড় অন্ধকারের টানা পোড়েনে রাতের আলোয় অস্তিম ঘনিয়ে উঠলে স্বপ্ন দেখা যায়—দুঃস্বপ্ন; ভালো স্বপ্নও, আশ্চর্য রকমের স্নিগ্ধ স্বপ্ন সব—

‘এখন, ক’টা, বাবা? ভোর হয়ে গেছে? না?’

‘না। ঘুমবে না-কি? ঘুমোও, ঘুমোও।’

‘ময়লার গাড়িগুলো ঘিন-ঘিন করছে; ওগুলো ময়লার গাড়ি, না? কাক ডাকছে তো। এখন ক’টা রাত, বাবা?’

‘ক’টা রাত? বলছি তোমাকে।’ মাল্যবান বললে। কিন্তু ধারাপাত প্রথম ভাগ নিয়ে মন তুর ব’সে পড়তে যাচ্ছিল না। অমেয় অব্যয় স্বপ্নকুট—ও জ্ঞাননির্জ্ঞানগ্রস্থি নিয়ে খুব চিন্তিত হয়ে ছিল তার মন—বৃহত্তর উৎপলা গ্রস্থির পরিধির ভেতর। সব রকম গ্রস্থিকে অতিক্রম করে একটা স্বাভাবিক তার মহত্বে পৌঁছুবার জন্যে।

উৎপলা বাথরুম থেকে ফিরে এসে বললে, ‘তুমি এখানে ব’সে যে—’

‘তুমি এখন ঘুমবে?’

‘মতলবটা কী তোমার?’

‘না, কিছু না। মনে হলে, কোনো অসুখ-টসুখ করল না-কি?’

‘কার? আমার?’

‘সারারাত বেশ ঘুম হল?’

মাল্যবানের পা থেকে মাথা পর্যন্ত একবার তাকিয়ে নিয়ে উৎপলা বললে, ‘এখানে এখন কীসের জন্যে?’

‘এন্নিই এসেছিলাম। রাতে অনেক-ক্ষণ বই-টাই পড় বুঝি?’

‘অনেক কাজ করি—’

‘তুমি মনে কর, আমি বুঝি তোমার কাজের ফর্দ চাইতে এসেছি। না, তা নয়, এন্নি কথাবার্তা বলতে এলুম।’

‘এখন আমার সময় নেই,’ উৎপলা বললে, ‘ভালো মানুষের মতো নিচে গিয়ে ঘুমোও তো।’

‘তুমি এখন আর-এক দমক ঘুমিয়ে নেবে বুঝি?’

‘আমার আজ উঠতে দেরি হবে। নিজে চা ক’রে নিয়ো।’

‘নেব। দোকানেও খেয়ে আসতে পারি। আজ রাতে তোমার ঘুম হয়েছিল ভালো? আমি কেমন বিদকুটে স্বপ্ন দেখেছিলুম সারাটা রাত।’

উৎপলা লেপের ভেতর চ’লে গিয়েছিল; শেষ রাতে আর-একটা ঘুম জড়িমার আশ্চর্য টেউ এসে পড়েছিল ঠিক বাথরুমে যাবার আগে; এখনও আবেশটা কেটে যায়নি; কিন্তু নিচের থেকে মানুষটা ঠিক এই সময়েই উঠে এল বাদ সাধবার জন্যে।

‘তুমি যাও।’

‘আজকে রাতে স্বপ্ন দেখেছিলুম, তুমি ম’রে গেছ।’

‘তুমি নিচে যাবে?’

‘নিচে আমি যাব বটে,’ মাল্যবান কস্মলটা আঁট ক’রে জড়িয়ে নিয়ে বললে, ‘নিচে যেতে হবে। কিন্তু বিচ্ছিরি সব স্বপ্ন দেখেছিলুম সারারাত। পোষ মাসের রাত; পোষলা ব’লে পাড়াগাঁয়—ধুম প’ড়ে গেছে সব। পোষলার গাঁজলা বলেন স্বপ্নকে ফ্রয়েড। কিন্তু কী জানেন স্বপ্নের ফ্রয়েড? হুয়েনার যত মৃগী রুগী আসত তো তঁার কাছে; তাদের কফিসেদ্ধর গরম-গরম সুরুয়া বানিয়ে তো আর মানবজীবনের তত্ত্ব বেরোয় না।’

মনু বললে, ‘মা ম’রে গেছে, এই স্বপ্ন দেখেছিলে রাত্রে?’

‘আমি স্বপ্ন দেখেছিলাম, তোর বাবা উল্টোগাধায় চ’ড়ে সিধে নিয়ে চলেছে—বাজেশিবপুরের ব্রহ্মমোহনবাবুকে দেবে। চলেছে—চলেছে—চলার আর শেষ নেই—উল্টোগাধায় চ’ড়ে চলেছে কোথায়? বাজেশিবপুরের ন’কড়ি খোসাল বটব্যালের কাছে—’

মনু ফিক-ফিক ক’রে হেসে উঠল, বললে, ‘ভোম্বা! বাজেশিবপুর—বা-জে-শি-ব-ন-ক-ড়ি-খো-সা-ল—’

অন্ধকারের ভেতর একটা বিড়ি জ্বালিয়ে নিয়ে মাল্যবান ঠোঁট ভেঙে হাসছিল। বেশ ভালো লাগছিল তার; চারদিক অন্ধকার—হয়তো একটু পাতলা হয়ে এসেছে; তবুও বেশ ভালো, নিশ্চুপ, উচ্ছ্রিষ্ট অন্ধকারে ভ'রে আছে ঘরটা; খুব শীত; গায়ে গরম পট্টুর ওপর বেশ চৌখুলী কম্বল জড়িয়ে বসেছে সে শীতের ভেতর। ডিমপাড়া নীচের দু'টো কোলঘেঁষা পাখির মতন উষ্ণ হয়ে রয়েছে যেন তার একামানুষের শরীর। বাইরে জীবনের সাড়া চললচল আরম্ভ হয়ে গেছে—তবুও মুখের নিস্তব্ধ অমরতাও অনেকখানি। ঘরের ভেতর লেপমুড়ি দিয়ে ভারি আরামেই শুয়ে আছে উৎপলা আর মনু; মরেনি পলা, মনু বেশ ভালোই আছে; উল্টোগাধার পিঠে চ'ড়ে বাজে-শিবপুরে যাওয়ার কথাটা পলা যা বলেছে, তাতে বোঝা যাচ্ছে—এই-ই তো বোঝা যাচ্ছে যে, স্থির ঠাণ্ডা তার মাথা। যাক, ভালো আছে ওরা। রাত পোহাতে বাকি আছে খানিকটা সময়। ঘুমোক। মাল্যবান উঠবে, ভাবছিল, বিড়িটাও ফুরিয়ে এল। নিচে গিয়ে চুরুট জ্বালিয়ে বসবে এবার।

পরদিন সন্ধ্যার সময় আফিস থেকে ফিরে চা-জলখাবার খেয়ে মাল্যবান ওপরে এল।

‘সে-দিন সেই পরোটাগুলো কাকে দিয়েছিলে?’

‘কোন দিন?’

‘ঐ যে-দিন বৌঠানের জন্যে বেনারসী কিনতে গেলাম?’

‘ওঃ, লোনার মা’কে।’

‘লোনার মা এসেছিল আর?’

‘না।’

‘তার ছেলের কী হয়েছে যেন?’

‘কুষ্ঠ’।

উৎপলা বললে, ‘কেন জিজ্ঞেস করছ?’

‘কুষ্ঠরুগী—তাই ভাবছি—’

‘লোনার মা’কে আমি বলেছিলাম রোজ এসে ভাত ডাল মাছ নিয়ে যেতে।’

‘তা বলেছ, ভালোই করেছ, উনুনের আঁশে নিজেকে জ্বালিয়ে তবে এ-সব মানুষকে হাঁড়ির ভাত সেদ্ধ করতে হয়। বড় সন্তাপ এদের—’

‘কৈ, এল না তো আর।’

‘কুষ্ঠরুগী কি-না, কী হয়েছে—’

‘না, বুড়ির কোনো রোগ হয়নি,’ উৎপলা বললে।

‘আমি বলেছি, ছেলের কথা—’

‘তা অবিশ্যি, হয়তো কোনো আশ্রমে গেছে।’

‘তা হতে পারে!’

বেশি নয়—একটু—আলোড়িত হয়ে উঠেছে ব’লে মনে হচ্ছিল মাল্যবান।

ঘন-ঘন কয়েকবার চোখের পলক ফেলে বললে, ‘আমাকে সে-দিন উপোসী রেখে লোনার মা’কে পরোটা তো দিয়েছ—’

‘চেয়েছিল, কেন দেব না?’

‘দিয়েছ, ঠিক করেছ। ভালোই করেছ। ভালোই করেছ—’

মাল্যবান আর কথা বাড়াবে না, ভাবছিল। সে-দিনকার সেই পরোটার কথা বলবার জন্যেও প্রধানত আসেনি সে; অন্য সব বিশেষ অন্তরঙ্গ কথা বলার তাগিদ, কিন্তু তবুও বললে, ‘ওকে দিয়েছ, ভালোই করেছ, কিন্তু আমাকেও কিছু দিলে পারতে, সমস্ত দিন অফিস খেটে আসি—’

কবেকার পরোটার কথা কপচাতে এসেছে মাল্যবান, উৎপলার গলায় বাঁঝ এল, বললে, ‘তুমি বাইরে থেকে খাবার আনিয়ে নিলেই পারতে—’

‘ভবিষ্যতে আনাতেই হবে। নাহলে আমি ঠকব। কিন্তু তোমাকে বলছিলাম—’

‘আমার শুনে দরকার নেই।’

মাল্যবান একটু কঠিন হয়ে বললে, ‘কেন, তোমার মাথার দু’দিকে দুটো তো কান।’

কঠিনতর হয়ে মাল্যবানের স্ত্রী বললে, ‘আমার কান সকলের যা-তা কথা শোনবার জন্যে নয়।’

মাল্যবানের মনে হল, স্ত্রীর সঙ্গে কথা বলতে-বলতে সে ভুল পথে চলেছে। সে হেসে উড়িয়ে দেবার ভঙ্গি ক’রে বললে, ‘যা বলতে চাই, তা বলা হয় না। অন্য পাঁচ রকম ব’লে ফেলি। নিজেকে ঠিকভাবে প্রকাশের শক্তি আমার নেই। তুমি কিছু মনে কোরো না।’

উৎপলা একটা চিরুণী তুলে নিয়ে চুল আঁচড়াচ্ছিল—চুল বাঁধবে ব’লে নয়—এন্নিই। চুল আঁচড়াতে-আঁচড়াতে সে চুপ ক’রে রইল।

সে-দিনের মতো ঘরোয়া আলাপ শেষ হয়ে গেল। নিচে চ’লে গেল মাল্যবান। কিন্তু সে-দিনকার বিকেলের পরোটা-জলখাবারের কথা নিয়ে টেকিতে পাড় দিতে সে চায়নি তো; অভিপ্রায় ছিল তার সূক্ষ্ম গভীরতর অনেক-কিছুর কিনার ঘেঁষে কথা বলার।

কথা শেষ হলে স্বাদ। অন্য সফলতা।

কিন্তু হল না কিছুই।

মাল্যবান প্রাণধারণের ব্যাপারে কেমন যেন খারিজ হয়ে নিচে নেমে গেল। কিছুই ভালো লাগছিল না তার।

স্ত্রীর গরজের কথা হচ্ছিল এত-ক্ষণ—মাল্যবান নিজের ঘরের চারদিকে তাকিয়ে দেখল, বাস্তবিক, বাড়ির গিন্নির স্পৃহার সম্পূর্ণ অভাবের জন্যেই এই ঘরটা একেবারে হতচ্ছাড়া হয়ে রয়েছে—ওপরের ঘরের পরিপাটির পাশে এ-ঘরটা কেমন খুবড়ি খেয়ে প'ড়ে আছে।

মনটা তার সেকেন্দ্রখানেকের জন্যে একটা মোচড় দিয়ে উঠল, কেন সে এমন ঘরে প'ড়ে থাকবে? সমস্ত ঘরগুলোর ভাড়াই কি সে দেয় না? সমস্ত সংসারটাই তো তার টাকায় চলছে। কিন্তু তবুও—

সে ঘর গোছাতে মন দিল।

কেরোসিন-কাঠের টেবিলগুলো বাইরে বার ক'রে দিল, আলমারিটা ঝেড়ে-মুছে পরিষ্কার করল, বাঁহু মেরে চারদিকের বুল ঝেড়ে নিল, মাকড়সার জলা সাফ করল, অনেক আরশোলা ঝুঁটিয়ে বার করলে, (ফ্লিট, ডিডিটি হাতের কাছে ছিল না কিছুই), পায়ে পিষে মেরে ফেলল, ধোপার জন্যে অপেক্ষা না ক'রে কাপড়ের ডাঁই সে নিজে কাচবে ঠিক ক'রে ফেলল, জরুলকাঠের ছোট্ট টেবিলটার ওপর পরিষ্কার খবরের কাগজ পাতল, ভাব বিকেলে একটা কালো জমকালো টেবিলক্লথ কিনে আনবে, একটা ফুলদানী আনবে, কতকগুলো ফুল, দেয়ালে টাঙানোর জন্যে একটি কি-দু'টি ছিমছাম ছবি।

তাড়াতাড়ি চান ক'রে খেয়ে অফিসে গেল পরদিন সকালবেলা। অফিস থেকে ফিরে আসবার সময়ে দরকারী জিনিসগুলো কিনে আনল টেবিলের কাপড়, ফুলদানী—

ঘরটাকে ঘণ্টা-দুই ধ'রে সাজাল সে। বাইরে তাকিয়ে দেখল, রাত বেশ অন্ধকার।

এই শীতের ভেতর চান করার চৌবাচ্চাটা এখন কেউ ব্যবহার করতে আসে না। ওখানে গা ঢাকা দিয়ে যদি সে কাপড় কাচতে বসে, তাহলে বড় একটা কেউ টের পাবে না। রাত দশটা পর্যন্ত প্রায় কাপড় কাচা হল।

উৎপলার ঘরে হিমাংশু, শ্রীরঙ্গ ইত্যাদি কয়েকজন এসেছিল; বেহালার গৎ বাজছিল; উৎপলা নিজে গান শোনাচ্ছে—আরো শোনাবে—বেহালা আরো বাজবে—ওরা (কোরাসে) গাইবে;—মাল্যবানের কাছে এ একটা নিস্তারের মতো মনে হল; গান-বাজনা যত রাত অন্ধি চলে, ততই তার লাভ—কাপড়গুলো কেচে খাবার আগে সে একটু জিরিয়ে নিতে পারবে।

কেচে, নিংড়ে কাপড়গুলো সে গোটা দুই বালতি ঠেসে রেখে দিয়ে, চান সেরে, টেরি কেটে, বিছানায় এসে শুল। একটা চুরুট দাঁতে আটকে নিয়ে সুশৃঙ্খল সংযমী জীবনের শাস্তি ধীরে-ধীরে উপভোগ করছিল। কিন্তু একটা চুরুট—দুটো চুরুট ফুরোল—অনেকক্ষণ অপেক্ষা করল সে, তবুও খাবারের ডাক পড়ল না। আরো অনেক-ক্ষণ চুপচাপ বিছানায় শুয়ে থাকতে হল। তারপর ঘুমিয়ে পড়ল। মাল্যবান ধড়মড় ক'রে উঠে পড়ল তারপর, বিছানায় কাৎ হয়ে শুয়ে বসে রইল খানিক-ক্ষণ, উঠে বসল তারপর, ঠাকুরকে ঘরে ঢুকতে দেখে বললে, 'কৈ, এখনও গান চলছে যে—'

'গান আমাদের বাড়িতে নয়।'

'তবে?'

'পাশের বাড়িতে কোথায়—'

মাল্যবান একটু কান পেতে শুনে বললে, 'ও, তাই তো, এ যে কলের গান।'

ওপরের ঘর নিখারপাথরের মতো চুপ হয়ে আছে বটে। মাল্যবান সিঁড়ি ভেঙে ওপরে যাচ্ছিল।

ঠাকুর বললে, 'দিদিমণি আর মা ঘুমিয়েছেন।'

'তাই নাকি? তুমি তো আজ অনেক রাত অন্ধি আছ, ঠাকুর। ব্যাপার কী? ওরা খেল না?'

'খেয়েছেন?'

'কখন?'

'দুটো বাবুর সঙ্গে খেয়ে নিয়েছেন—'

মাল্যবান একটু চুপ থেকে বললে, 'আমার ভাত আছে তো?'

'তা আছে। আপনাকে এখানে এনে দিই?'

'বেশি কিছু দিয়ো না। কেমন গা-বমি-বমি করছে—'

অল্প কয়েক গ্রাস খেয়ে সে উঠল। বি এঁটো নিকিয়ে থাকা বের ক'রে চ'লে গেল।
বি, ঠাকুর বাড়ি চ'লে গেল।

মাল্যবানের কেমন উল্টে বমি আসছিল। সে দরজা বন্ধ ক'রে কতকগুলো কাগজ পেতে অনেক-ক্ষণ ধরে হড়-হড় ক'রে বমি করল, অনেক বমি।

মা'কে মনে পড়ছিল শুধু তার। অবাক হয়ে ভাবছিল এই ঘরেই আছেন তিনি—এই অন্ধকারের ভেতরেই দাঁড়িয়ে আছেন বোধ করি; হয়তো আমার বিছানার পাশে এসে বসেছেন; গায়ে বুকে পিঠে হাত বুলিয়ে দিচ্ছেন; দিচ্ছেন হয়তো—

মাল্যবানের মনে হল : উৎপলাও তো মনুর মা—মা তো সে; মাল্যবানের মায়ের মতন বড়ও হয়ে উঠবে এক দিন। নিজের মায়ের সঙ্গে এই মা'কে মিলিয়ে ফেলে বৃষ্টির ছিপছিপে ছটফটে জল যেমন পুকুরের সমাহিত সঞ্চিত জলের শান্ত স্বরূপের ভেতর মিশে যায়, তেমনি একটা অব্যাহত মাতৃত্বের সদাঙ্গকে চাচ্ছিল যেন সে। তার নিজের মা—যে নেই আজ, দশ-বারো বছর আগে নিমতলা ঘাটে যাকে ছাই হয়ে যেতে দেখেছিল মাল্যবান—মাল্যবানের মায়ের অব্যক্ত ইঙ্গিতের মৃত্যু হয়নি তো তবু—ধারণ বহন করবার জন্যে অপর নারী এসেছে এই ঘরে; মা হয়েছে; মনুর মা। মাল্যবান আজ মনুর মা'র স্বামী ঠিক নয়; মাল্যবানের সেই মৃত মা ও জীবিত উৎপলা—এই দু'টি নারীকে একজনের মতন—মায়ের মতন—তার ঘরের ভেতর খুঁজে পাবার জন্যে কেমন অদ্ভুত বিশালাক্ষ অস্বস্তিতে সে চারিদিকে তাকাতে লাগল;—আসুক নিজের মায়ের মূর্তিতে, কিংবা আসুক উৎপলার বেশে—দু'জনের ভেতরেই দু'জনকে খুঁজে পাবে সে—পাবে এক জন মা'কে—মাতৃত্ব : যা একক মাল্যবান পাবে তার কামস্পর্শহীন জায়াঘাণহীন আনন্দ্যকে। মাল্যবান কয়েকবার ডাক ছেড়ে অস্পষ্ট ভাবে ডাকলও—মা'কে, ঠাকুরকে, বিকে—মনুর মা'কে, না, উৎপলাকে, ঠিক বোঝা গেল না।

আস্তে—আস্তে ক'মে গেল—থেমে গেল বমির চাড় মাল্যবানের।

মাল্যবান একটু ভড়কে গিয়ে তাকিয়ে দেখল, উৎপলা এসে দাঁড়িয়েছে।

'ঠাকুর বাড়ি চ'লে যাবার সময়ে আমাকে বলল, তুমি বমি করছ। বমি হল কেন?'

'কী জানি।'

'কী খেয়ছিলে?'

'কিছু না, শুধু ভাত।'

'বাজারের খাবার-টাবার?'

'না তো।'

উৎপলা বললে, 'আর বমি হবে ব'লে মনে হচ্ছে?'

‘না বোধ হয়।’

‘পেটে ব্যথা আছে?’

‘না, সে-সব কিছু নেই।’

‘আচ্ছা, শোও, শুয়ে পড়। আমি বাতাস করছি।’

মাল্যবান খানিক-ক্ষণ বালিশে মাথা রেখে বাতাস খেয়ে বলল, ‘ভালো লাগছে এখন।’

‘যে মা হয়েছে’, মাল্যবান বললে, ‘সে মানুষের শিয়রে না এসে পারে না। তুমি মনুর মা বটে, আমার স্ত্রী। কিন্তু সময়ের কোনো শেষ নেই তো, সেই সময়ের ভেতর আমাদের বাস; সময়ের হাত এসে এখানে এ-জিনিসটা মুছে দ্যায়—সেখানে সে জিনিসটা জাগিয়ে দ্যায়;—মানুষের স্ত্রী তুমি; নিজেও তো মানুষের মা, মানুষ; সময়ের নিরবচ্ছিন্ন বহতার ভেতর তোমার মা-রূপ ফুটে উঠল তো; দেখছি। সময়ের দু’-একটা ঘূর্ণিকে কেমন অভিরাম গ্রস্থির বলয়ে নিয়ে এসে গড়ে তুললে, দেখছি তো। এই তো নিচের নেমে এসে হাড়-এলিয়ে শীতের রাতে, সিঁড়ি বেয়ে না এলেও তো পারতে। আমি অনেক-ক্ষণ পর্যন্ত আশাও করিনি যে, তুমি আসবে। কিন্তু তবুও তো এলে—’

উৎপলার বাঁ-হাতের দু’চারটে আঙুলের দিকে বৌক গেল মাল্যবানের। কিন্তু সে-আঙুল ক’টি বিশেষ কোনো সাড়া দিল না। নিজের ভাবুকতা আন্তরিকতার আত্মনমন্যতা নিয়ে মাল্যবান এত বেশি তলিয়ে গিয়েছিল যে, স্ত্রীর আঙুল ক’টির রহস্য ছাঁকবার জন্যে কোনো তাড়া ছিল না তার। রহস্যকে কঠিন আলোর মতো পরিষ্কার করে বুঝে দেখবার শক্তিও সময়পুরুষ তাকে দেয়নি; অনেক বিষয়েই বেচারী অন্ধ অবোধ বলে পোড়ো ঘরের চামচিকের মতো হর্ষকম্পাঙ্কিত। কিন্তু মাল্যবানের অবকল্পনা আছে, অবপ্রতিভাও; সে-জিনিসটা খুব নিয়ন্ত্রিত নয় যদিও। কাজেই চেতনার একটি সূর্যের বদলে অবচেতনার অন্তহীন নক্ষত্র পেয়েছে সে। পাঁচ ইন্ড্রিয়ের ওপর আরো একটি ইন্ড্রিয় আছে খুব সম্ভব মাল্যবানের। বিজ্ঞানে থাকে বলে চতুর্থ-বিস্তার, সেই চাতুর্যের দেশেও বাস করে। কাজেই মা ও মাতৃত্বের ঐ দিব্য কেন্দ্র তার নজরে পড়ে গিয়েছিল। কিন্তু ও-সব শিখরে বেশি-ক্ষণ থাকতে পারে না সে, শীগগিরই ধ্বংসে ভেঙে পড়ে গেল সে তার ছোট সংস্কারের ছোট সংসারে—স্বামী স্ত্রী কামনা লিপ্সা হতাশার ঘূর্ণিফেনার ভেতর।

উৎপলার হাতপাখা আবেগে নড়েনি কখনো; সবগে নড়ছিল কিছুক্ষণ আগে। এখন ক্রমে-ক্রমেই টিলে হয়ে আসছিল।

‘মাঝে মাঝে আমার মনে হয়, একা থাকলে বেশ হত। কেউ-কেউ একা থাকে বটে, যেমন আমাদের হেডমাস্টার-মশাই চিরটা কাল কাটিয়ে গেলেন, কিন্তু শেষ

বয়েসে তাঁকে বেগ পেতে হয়েছিল। মেয়েদের দর্শন দিতেন বটে, কিন্তু সাধুপুরুষ, স্ত্রীলোকের দর্শন পাবার জন্যেই ব্যাকুল হয়ে উঠতেন। লালসা জন্মাল। মেয়েরা ভালো মনে ক'রে সেবা করবার জন্যে হেডমাস্টার মশাইর হাত-পা টিপে দিত রোজ, উনিও ক্রমে-ক্রমে গোপনে সুবিধে পেয়ে তাদের গলা টিপতে আরম্ভ ক'রে দিলেন। গড়াল কেলেঙ্কারি অনেক দূর। বিয়ে হল না তবু ছেলে হ'ল, মেয়ে হ'ল। তবুও সিদ্ধপুরুষ রইলেন। হেডমাস্টারমশাইর চিতের ওপর ও অঞ্চলের সব চেয়ে বড় মঠ। নৌকোর ছইয়ের ওপর ব'সে কতো মাইল দূরের থেকে সে-মঠ দেখা যায়....'

মাল্যবান কথা ব'লে যাচ্ছিল গভীর বৃষ্টির রাত কিছুক্ষণের জন্যে বাতবর্ষণ হলে পাড়াগাঁর নালায় পুকুরে খালে কল-কল শব্দে চ'লে যেতে যেতে নিজের সাথে নিজে যেমন কথা ব'লে চলে জল।

বাতাস করতে-করতে উৎপলার হাত ব্যথা হয়ে উঠল, কিন্তু মাল্যবানের দিক থেকে কোনো নিষেধ নেই। বেশি কথা ব'লে মাল্যবান বেশি ফেনিয়ে ওঠে, মাঝে-মাঝে গ্যাঁজায়, নিজেকে নিয়ে নিজেকে উপভোগ করবার দুর্ভোগ ভোগাবার বেশ ক্ষমতা আছে; ধ্বংস, ভালো লাগে না আমার, এক-এক সময় অবিশ্যি আমাকেও অবশ ক'রে ফ্যালে—যেমন মনু হবার আগে। কিন্তু ভালো লাগে না আর আজ-কাল ধ্বংস!

পাখাটা বিছানার পাশে রেখে দিয়ে উৎপলা বললে, 'বমি তো করলে, কিন্তু এখন ওষুধের ব্যবস্থা কী করা হবে?'

'সে-জন্যে তোমার কোনো ভাবনা নেই, পলা।'

'ওষুধ আছে?'

'না।'

'তবে?'

'ওষুধ আমার লাগবে না। কেমন পেটে মোচড় খেল, বমি হয়ে গেল, ব্যস। সে-রকম বেশি কিছু হলে শরীরের আক্ষেপটা এত তাড়াতাড়ি প'ড়ে যেত না।'

'বলা যায় না কিছু। ওষুধ নেই। ডাক্তারের ব্যবস্থাই বা কে করবে।'

'না, না, অসুখ নয় তো, একটু হায়রাণি হয়েছিল,' মাল্যবান একটু আলোড়িত হয়ে উঠে বসবার চেষ্টা ক'রে শেষমেশ শুয়ে থাকতে-থাকতেই বললে, 'সেরে গেছে। তোমার সঙ্গে কথা বলতে-বলতেই ঠিক হয়ে যাবে সব।'

'এ-বাড়িতে কোনো পুরুষমানুষ নেই,' টক বিরস মুখে উৎপলা বললে, 'অসুখ-বিসুখের সময়ে নানা রকম অসুবিধে। ডাক্তার ডাকে কে—রাত জাগে কে।'

মাল্যবান স্ত্রীর মুখে খিঁচুনিটাকে ইঙ্গিত ক'রে পালিশ ক'রে দেবার জন্যে খুব স্নিগ্ধ

ভাবে বললে, 'এবার একজন সরকারের মতন রাখব ভাবছি; মনুকেও পড়াবে; প্রাইভেট-মাস্টার বাজার সরকার ঘরের বাইরের দশ রকম ফাইফরমাস—সবই চলবে।'

'কিন্তু, আজকের রাতে কে জাগে—'

'বোসো, তুমি খানিকটা সময় ব'সে যাও; নিজের থেকেই ঘুমিয়ে পড়ব।' উৎপলা হাত গুটিয়ে গুম হয়ে ব'সে রইল।

কেটে গেল খানিকটা সময়। কেউ কোনো কথা বলছে না। কারু কোনো কাজ করতে হবে মনে হচ্ছে। ভালো লাগছে না কারুরই। কেমন অস্বস্তিবোধ হচ্ছে। সময় কেটে গেল আরো।

'চুপচাপ যে?'

'কী করতে হবে?'

'বাতাস করছিলে তো—'

উৎপলা উঠে দাঁড়াল। বাতি জ্বালিয়ে ঘরের চারিদিকে তাকিয়ে বললে, 'এ বালতি দুটো ভিজে কাপড়ে ঠেসে রেখেছে কে?'

একটা বালতি তুলে সমস্ত কাপড় মেঝের ওপর ঢেলে ফেলে দিয়ে চৌবাচ্চার দিকে চ'লে গেল।

'ওগুলো কাচা কাপড় ছিল, মাটিতে ফেলে দিলে—' মাল্যবান তাকিয়ে দেখল নোংরা কাদায় মাটিতে গড়াচ্ছে, কাপড়গুলো পায়ের মাড়িয়ে-মাড়িয়ে উৎপলা চ'লে গেছে। চৌবাচ্চার থেকে এক বালতি জল এনে হিস্‌সো ক'রে ছড়িয়ে ছিল উৎপলা; আরো এক বালতি ঢেলে ছড়িয়ে মরিয়া হয়ে তাকিয়ে দেখল, বমি সাফ করতে আরো অস্তত দু বালতি জলের দরকার। উৎপলার লোকায়ত মন, আর যা লোকায়ত নয়, অথচ গভীরতর যা—লোকায়তকে চালাচ্ছে—এই শীতের দুপুর-রাতে হাত-পায়ের চেয়েও ঢের বেশি টনটন ক'রে উঠল সে-সব জিনিস।

শেষ বালতি জল এনে ঘরের ভেতর ঢেলে দিল উৎপলা; তারপরে মাল্যবানের একটা সাবানে-কাচা ভিজে ধুতি নিয়ে জায়গাটা নিকোতে লাগল।

'কেন তুমি নিকোচ্ছ তোমার নিজের হাতে, আহা, থাক না!' মাল্যবান বললে। আনাড়ি ছেলের হাতে কলাপাতার বাঁশীর মতো কেমন কাহিল ভাবে কেঁপে-কেঁপে চিরে গিয়ে বেজে উঠে মাল্যবান আবার বললে, 'ঠিক হল না, ঠিক হল না, আমার ধুতিটা তুমি রেখে দাও—আমি নোংরা মুছবার জন্যে তোমাকে জিনিস দিচ্ছি।'

কলাপাতার বাঁশী কেঁপে ফেঁড়ে গিয়ে বললে, 'বাঃ, উৎপলা, আমার ধুতিটা লোপাট করলে—এই তো আজ সন্ধ্যাবেলা খিদিরপুরের সাবান দিয়ে কেটেছি।'

উৎপলা ঘাড় গুঁজে মেঝে পরিষ্কার করতে-করতে ঘরের কোণের একটা ড্রেনের দিকে সমস্ত বের ক'রে দিচ্ছিল,—হাত দিয়ে নয়, মাল্যবানের ধুতিটা পায়ে খানিকটা জড়িয়ে নিয়ে পা চালিয়ে কাজ করছিল সে; কাজ করে যেতে লাগল কোনো জবাব দিল না। এ-রকম সব কাজ তার করবার কথা নয়, শীতের রাতে তো নয়ই, কিছুতেই করত না সে এ-কাজ। কিন্তু কেমন যেন ভূতে তাড়িয়ে এনেছে তাকে। তাই নিচে নেমে এসেছে সে, এমন একটা বিশ্রী ছোঁয়াছানার কাজ করেছে—হোক না পা দিয়ে—স্বাভাবিক অবস্থায় যা মেরে পিটিয়েও কেউ করাতে পারত না তাকে দিয়ে। ভূতেই পেয়েছে তাকে, চিমড়ে ভূতে পেয়েছে: স্তম্ভিত হয়ে পা ডলছিল আর ভাবছিল উৎপলা।

উৎপলার (মস্থনদণ্ডের মতো) পায়ে জড়ানো ধুতিটার কাদা বমি লোকসানির দিকে তাকিয়ে মাল্যবান কী যেন কেমন যেন হয়ে গিয়ে বলতে লাগল, ‘করিম ভাই মিলের সুন্দর ধুতিটা—এই দিন পনেরো আগে কিনেছি—তার তুমি এই অবস্থা করলে—এ তো পরাও যাবে না আর।’

কিন্তু ধুতি আরো একটা লাগল উৎপলার—সেটা ক্যালিকো মিলের। মাল্যবানের ভেতরের শাঁসটাই মোচড় দিয়ে উঠল। এক মাসের মাইনের চেয়ে যে-সব লোকের একটা ধুতি বা চাদরকে এক-এক সময়ে ঢের বেশি দামী, দরকারী মনে হয়, মাল্যবান সেই ধরণের মানুষ। কাজেই, অনেক কুঠা, আক্ষেপ, কাতরতার পরিচয় দিল সে, অনেক ছোট ছোটো কথা বললে; কিন্তু সব সময়েই গলা তার হেমন্তের দুপুরে একটা নিঃসঙ্গ উড়চুঙের মতো মিন-মিন ফির-ফির ঝিন-ঝিন করছিল, কাতর করণ, ঝাঁঝ নেই, উদ্ভা নেই।

উৎপলার হাসি পাচ্ছিল—মাঝে-মাঝে দয়া হচ্ছিল তার লোকটার জন্যে, মানুষটাকে খানিকটা নিষ্পেষিত করবার জন্যেই তার ভালো-ভালো দু'টো ধুতি দিয়ে নোংরা জায়গাটা সে নিকিয়েছে—এ-কথা মনে ক'রে নির্যাতন করবার শখ এখন তার খানিকটা ক'মে গেল যেন—কাপড় দু'টো লাথিয়ে লাগিয়ে ঘর থেকে বার ক'রে দিল উৎপলা।

‘যা হবার হয়ে গেছে’, মাল্যবান মনে খুব বল, খুব সৎ সাহস সঞ্চয় ক'রে নিয়ে বললে, ‘এ নিয়ে তুমি মন খারাপ করতে যে'য়ো না।’ যেন কঠিন যত্নে নিয়ন্ত্রিত জীবনের দীনতা ও আত্মশুদ্ধির গহ্বর থেকে (মনে হচ্ছিল উৎপলার) মাল্যবান কথা বলছে।

কুলুঙ্গির থেকে সাবান নিয়ে উৎপলা হাত কচলাচ্ছিল—হাত পা ঘাড় মুখ ধুয়ে আসবে সে।

‘কোথায় সরালে কাপড় দু’টো? চুরি যাবে না তো?’

‘এ-দিককার দরজা তো বন্ধ; তবে পাশের বাড়ির বি-চাকর ছাদের সিঁড়ি দিয়ে উঠা-নামা করে সারা-রাত। দেখতে পেলো ওরা নিয়ে যাবে হয়তো।’

‘নিয়ে যাবে?—ঘরের ভেতর রেখে দেবে না তুমি ধুতিগুলো?’

কোনো কথা না বলে চৌবাচ্চার থেকে হাত পা ঘাড় মুখ খুব ভালো করে ধুয়ে এল উৎপলা। মাল্যবানের বাস্কের থেকে একটা ধোপাবাড়ির ফেরৎ তোয়ালে বের করে উৎপলা বেশ তোয়াজ করে রগড়ে-রগড়ে হাত পা মুখ পিঠ মুছে ফেলতে লাগল। তারপর স্লিপার পায়ে গলিয়ে ওপরে যাবার উদ্যোগ করতে লাগল।

‘আমর বিছানার পাশে এসে বোসো-না।’

‘না, আমি আর বসব না। এ কি, এ যে স্লিপার পায়ে দিয়েছি। আমার জুতো কোথায় গেল? ইশ, মশা কামড়াচ্ছে। যাক, চলি—’ উৎপলা বললে।

‘আচ্ছা, এসো—ঘুমোও গিয়ে।’

শেষ রাতের একটা বসন্তবউরি পাখির মতো এক রাশ নক্ষত্র ও অন্ধকারের দিকে তাকিয়ে আবার ঘুমিয়ে পড়বার আগে একটু চলকে উঠে হেসে জেগে উঠবার বেঁচে থাকবার ইচ্ছা অনিচ্ছা অতিক্রম করে (মাল্যবানের মনে হল) কে যেন উৎক্রান্ত হয়ে গেল। সে কি উৎপলা? একটা চুরুট জ্বালিয়ে মাল্যবান নিজেকে বললে, না, সে উৎপলা নয়; উৎপলাতে মাল্যবান যে-জিনিস আরোপ করেছে, সেই অশরীরী আত্মাটা—নেই; ছিল না; এই মুহূর্তেই স’রে গেল তবু; ওপরের দিকে ওপরের ঘরে যাবার অছিলায় আরো ওপরে—বড় বাতাসে শীত রাতের ঘুরুনো সিঁড়ির শীর্ষে নক্ষত্রে মিশে গেল কোথায়।

পর-দিন রাতে ওপরের ঘরে মাল্যবান বলছিল উৎপলাকে, ‘তোমার এই খাটটা ঢের বড়।’

‘হ্যাঁ, বাবা দিয়েছিলেন আমাদের বিয়ের সময়ে। বরপক্ষকে ঠকাবার মতলব ছিল না তো তাঁর।’

‘আমি তা বলছি না।’

উৎপলা ধোপদুরন্ত বিছানার পাট-পাট করে পাতছিল—কোনো কথা না বলে হাতের কাজ করে যেতে লাগল।

‘আমি ভাবছিলাম, দু’জন বাড়ন্ত লোক এ-খাটে বেশ এঁটে যায়।’

‘তা যায়, তাতে কী।’

‘আজ রাতে এ-খাটে আমি শুলেও তো পারি; পারি না?’

‘তাহলে আমাকে নিচের ঘরের খাটে যেতে হয়।’

‘কেন যাবে?’ মাল্যবান উৎপলাকে ভেদ ক’রে কোনো শ্রেয়োতর আত্মার দিকে তাকিয়ে যেন বললে, ‘আমার পাশে শুয়ে থাকবে।’

‘যা নয়, তাই।’ শাস্ত দৃঢ়তায় বললে উৎপলা; কৃতী অভিভাবিকার মতো ঠোঁট চেপে, দাঁত চেপে।

‘তোমার মেজদা আর বৌঠান তো এ-খাটেই শোবে। দু’-জন।’

‘তা তারা শুয়ে শাস্তি পায়।’

মাল্যবান একটা সিগারেট জ্বালিয়ে বললে, ‘আমরা পাব না?’

‘চাইলেই ভোগে লাগে না।’ উৎপলা মনুকে নয়, মাল্যবানকেই বললে।

তা বটে। মাল্যবান হাতের পানটা মুখে তুলবার ভরসা পেল না আর। সিগারেটটাও না খেয়ে জানালার ভেতর দিয়ে ছুঁড়ে ফেলে দিল—জ্বলন্ত সিগারেটটা—

বললে, ‘এ-রকমই যদি হল, তাহলে ফুটপাথে গিয়ে শুয়ে প’ড়ে থাকলেই পারি।’

পরিপাটি বিছানাপাতা শেষ ক’রে উৎপলা বললে, ‘ফুটপাথে তুমি কোনো দিন শোবে না। তবে একদিন শুয়ে দেখলে পার। যাও-না, আজই যাও।’

‘আমি ফুটপাথে শুলে খুব উজ্জ্বল হয়ে উঠবে তোমার মুখ?’

‘তুমি তো নিজেই বলছ, ফুটপাথে আর ভদ্রলোকের বিছানায় ‘কোনো তফাৎ নেই—’

‘দেখছি তো নেই। কেন নেই? কেন নেই সেটা তুমি আমাকে নিজের বুকের ওপর হাত রেখে বলবে?’

‘বলবার যখন, তখন বলা হবে,’ উৎপলা বললে, ‘কিন্তু ফুটপাথে শোয়ার কী হল?’

‘যা হয়ে দাঁড়িয়েছে, তাতে শুতে আমরা খুব আপত্তি নেই।’

উৎপলা মশারী টাঙিয়ে বাতি নিভিয়ে বিছানায় শুয়ে প’ড়ে বললে, ‘আপত্তি নেই, তাহলে বাধাটা কীসের?’

মাল্যবান চকমকি ঠুকে আবার একটা সিগারেট জ্বেলে নিয়ে বলে, ‘যাচ্ছি আমি শুতে—’

‘কোথায়? তোমার নিজের ঘরে?’

‘না—’

‘ফুটপাথে? যাও—’ বললে উৎপলা ঘুমের লতায়-পাতায়-তন্তুতে জড়িয়ে যেতে-যেতে কাছের থেকে দূরে চ’লে যেতে-যেতে যেন।

‘এসো, দেখে যাও। দেখবে না?’

‘সে আমার দেখা আছে,’ ব’লে পাশ ফিরল; ফিরে শুয়ে লেপটা ভালো ক’রে জড়িয়ে নিতে-না-নিতেই ঘুমিয়ে পড়ল উৎপলা।

নিঃশ্বাস পড়ার শব্দ শুনে মাল্যবান টের পেল একটা নিবিড় বেড়ালের চেয়েও গভীর আরামে ঘুমিয়ে পড়েছে মেয়েমানুষটি—তুলোর গরম আর শীতের ঠাণ্ডা খুব প্রবল ভাবে মিশ খেলেই হল—কেনো পুরুষমানুষের স্পর্শের দরকার নেই, উৎপলার—

মাল্যবান নিচে চ’লে গেল।

এক ঘুমের পর মাঝরাতের শীতে—গরমে—নিজের বিছানাটা মন্দ লাগছিল না তার। মাল্যবানের মনে হল, মানুষের মন সারাটা দিনরাতের প্রথম দিকটায়ও—বোকা হ্যাংলার মতো চায়—অপেক্ষা করে, সাধনা করে, যেন নিজের কিছু নেই তার, অন্যে এসে দেবে তাকে, তবে হবে। কিন্তু গভীর রাতে বিছানায় শরীরই তো স্বাদ। শরীরটাই তো সব দেয়। মন কী? মন কে? মন কিছু নয়। বেশ নিবিড় শীতের রাতে চমৎকার শরীরের স্বাদ পাচ্ছিল মাল্যবান।

পুরুষের সঙ্গে সংস্পর্শ ঘুচিয়েছে বটে উৎপলা, কিন্তু তাই ব’লে শরীরের স্বাদের সঙ্গে নয়। দোতলায় গভীর রাতে তার নিজের বিছানায় আশ্চর্য স্বাদ উপলব্ধি করছিল সে।

মাল্যবানের ঘরের জিনিসপত্র ব্যবস্থা আবার আগের মতন দাঁত খিঁচিয়ে উঠল; নোংরা হলদে কাগজের স্তূপ চার দিকে, জানালার ভেতর দিয়ে ক্রমাগত রাস্তার ধুলো ধোঁয়, অঝোর গোলাপায়রার বাসা, মেঝের চার দিকে চুরুটের টুকরো থ্যাঁতলানো চুরুট তামাকপাতা ছাই দেশলাইয়ের কাঠি, পাখির পালক বিষ্ঠা, পুরোনো বাতিল লঠনের টুকরো-টাকরা, ভাঙা চিমনির কাচের রাশ; তেল, অ্যাসিড, ওষুধের নোংরা শিশি-বোতলের জাঙ্গাল, হাঁড়িকুড়ি কলসি, বস্তা ও বুড়ি একগাদা, আট-দশ জোড়া ছোঁড়া থ্যাবড়া প্যানেলা আর ক্যান্সিসের জুতো, ময়লা জামা মশারীর নুড়ি—আশ্চর্য দৈববলে কোনো শব্দ হচ্ছে না, কোনো-কিছুকে নড়তেও দেখা যাচ্ছে না বাটে, কিন্তু সমস্ত ঘরের ভেতর সূটকি বুড়ি ডাইনি বুড়ি থুপী বুড়িদের কান্নাকাটি হামলা বলাৎকার চলছে যেন দিনরাত,—মাল্যবান টের পাচ্ছিল, উপলব্ধি করছিল।

ফুলদানীটা সে ঘরের এক কোণে ফেলে রেখেছিল। উৎপলা যখন এ-জিনিসটাকে পছন্দ করল না, তখন থেকেই এটার ভেতর কেমন একটা শ্রীছাঁদের বাপাস্ত গরমিল বেরিয়ে পড়েছে যেন—এক রাশ হাঁড়িকুড়ির ভেতর ফুলদানীটাও কানা ভেঙে গড়িয়ে পড়ে রইল।

এই ঘরের ভেতরেই একদিন একটা বেড়ালের ছানা আশ্রয় নিল। রাত্রে ঘুমিয়েছিল, ঘরের ভেতর মড়াকান্না শুনে উঠতে হল, উঠে বসল। বুঝতে পারল, নিশ্চয়ই এই খোলা জানালার ভেতর দিয়ে বাচ্চাটাকে ছেড়ে দিয়ে গিয়েছে কেউ। মানুষ যে-জিনিস নিজে সহ্য করতে পারে না, পরের ঘাড়ে তা চাপাতে তার এত লোভ—এমন কৌশল; ভাবছিল মাল্যবান; কিন্তু বাচ্চাটাকে নিয়ে করা যায় কী? যে-রকম ভাবে বেনো হাওয়ার মুখে হাঁ করে কাঁদছিল বাচ্চাটা, তাতে ওপরের ঘরের মানুষেরও ঘুম ভেঙে যেতে পারে।

রাস্তার দিকের জানালা দিয়েই এটাকে আবার ছুঁড়ে ফেলে দিতে পারা

যায়—তারপর জানালা দিয়ে পারা যায় বন্ধ ক’রে। বেড়ালের ছানাটার তারপরে কী হবে, সে-কথা ভেবে মাথা ঘামিয়ে কী দরকার। পৃথিবীতে বেড়াল-কুকুরের বাচ্চারা পথ কেটে নেয়—কিংবা যায় ম’রে। মৃত যে, তার তো রফা হয়ে গেল; গোলকর্ষাখাটা সামনের থেকে সরে গেছে; নির্দেশ চাই না, সহানুভূতি সমাশ্রয়ের দরকার নেই আর; সব-চেয়ে শাস্তি বেঁচে থাকার ব্যথা, বৈভব নেই। কিন্তু তবুও সে-রকম শাস্তি বেড়াল-ছানাটাকে পাইয়ে দিতে ভরসায় কুলিয়ে উঠল না মাল্যবানের।

রাত দুপুর : কোথাও কোনো দুধ নেই, খাবার নেই; বাচ্চাটাকে কিছুই দেওয়ার উপায় নেই এখন; বিছানায় ব’সে-ব’সে অনেকক্ষণ এর কান্না সহ্য করতে লাগল মাল্যবান। মাল্যবান-পর্বত যেন সহ্যাদ্রি হয়ে গেলে তবুও কান্না থামবে না—এমনই আনন্দ্য এর। একে-একে অনেক কথা ভেবে যাচ্ছিল মাল্যবান; ভাবছিল, এই বাচ্চাটার বাপ-মা’র কথা, কেমন হাত-পা ঝেড়ে জীবনকে ঝাড়েছে তারা; এই বাচ্চাটা কে জন্ম দেবার আগে কালোকিস্তি রাতে আর জ্যোৎস্না-রাতে পরীতে পেয়ছিল সে ধাড়ি বেড়াল দুটোকে; কী না করেছিল তারা; কিন্তু আগামী ঋতুর ছানাগুলোকে জন্ম দেওয়ার আগে আবার তারা দুর্নিবার ভাবে জোড় মেলাবে এসে, কিন্তু এখন তারা গত ঋতুর সমস্ত বিগত ঋতুর কৃতকর্মের দায়িত্বের থেকে খালাস। জীবনকে তারা এ-রকম ক’রে ফাঁকি দেয়, তবুও প্রশয় পায় জীবনের কাছ থেকে নব-নব ঋতুসমাগম হলেই—বার-বার—বার-বার! মানুষকে তো এ-রকম আচার-ব্যবহারের জন্যে ঢের গভীর শাস্তি দিত জীবন। থাক, তবুও এর বাপ-মা’কে কোনো শাস্তি দিতে চায় না সে।

মাল্যবানের ভাবনার মোড় ঘুরে গেল, পরীতে-পাওয়া মিথুনের কথা ভুলে গেল সে; মনে-মনে বললে, কথায়ই বলে কুকুর-বেড়ালের জীবন—বাস্তবিক, সে-সব জীবের এন্নিই ঢের কষ্ট। হয়তো দু’চার মাস বয়েস এই ছানাটির, মা নেই, ভাই-বোন কিছু নেই জবালার ছেলের পিতৃপরিচয় নেই ব’লে কোনো উদ্বেগও নেই বটে, মাল্যবান, একটা চুরুট জ্বালিয়ে নিয়ে ভাবছিল—

কিন্তু, মড়াকান্নায় তোলপাড় হয়ে উঠছিল; চুরুটে কয়েকটা টান দিয়ে ভাবছিল : এমন শীতের দুর্বার রাতে কোথাকার একটা মিকড়ে হারামজাদা জানালার ভেতর দিয়ে অন্ধকার খুপরি’র ভেতর এটাকে সটকাল!

সে এক সময় ছিল বটে, মাল্যবান উপলব্ধি করল, যখন মানুষের শিশুর এ-রকম ব্যাপার হলে এত-ক্ষণে কত দিক দিয়ে হৈ-চৈ প’ড়ে যেত, কিন্তু মানুষের পৃথিবী তো আজ-কাল পাগলাগারদ—সেখানে মানুষের শিশু আর বেড়ালের ছানার একই অবস্থা।

মশা নেই ঘরে; হাঁদুরে কামড়াতে পারে সেই ভয়ে মশারী টানিয়ে শুয়েছিল মাল্যবান; মশারীটা তুলে বালিশে ঠেস দিয়ে চুরুট মুখে ব’সে রইল সে।

একটু পরে উঠে গিয়ে বাতি জ্বালাল।

মানুষের নড়াচড়ার শব্দে, আলো দেখে, ভয় পেয়ে বাচ্চাটা একটু থামল। কিন্তু মাল্যবান বিছানায় এসে বসতেই আবার সেই কান্না। সমস্ত ট্রাম-বাস-লরির নটখটি ঘড়ঘড়ির চেয়ে এ-কান্না ঢের আলাদা জিনিস; এ-জিনিস সহ্য করতে হলে সৃষ্টিটাকেই বুঝে দেখতে হবে, উপনিষদের ও আইনস্টাইন হোয়াইটহেডের ঈশ্বরের হিসেবের মিল-গরমিলটাকে; অনেক সহানুভূতি সহিষ্ণুতার দরকার।

মাল্যবান কেমন অসময়ে তা হারিয়ে ফেলল।

বিছানার থেকে লাফিয়ে উঠে তেরিয়া হয়ে সে বাচ্চাটাকে তাড়া করল। এত জঞ্জাল এই ঘরের ভেতর—এমন সব অসম্ভব জায়গায় লুকোয়—এমন ঘাপটি মেরে পড়ে থাকে—বিছানায় ফিরে আসতে না-আসতেই আবার ভরসা পেয়ে এমন প্যানপ্যানানি শুরু করে যে, মাল্যবানের ঘেন্না ধরে গেল একেবারে।

এবার সে বাচ্চাটাকে ধরলই।

ধরে এমনি জোরে তাকে দেয়ালে আছড়ে মারল যে, দুই মুহূর্তের ভেতরেই সেটা কাৎরাতে-কাৎরাতে মরে গেল।

এর পর পাঁচ-ছ' দিন মাল্যবান কারুর সঙ্গে কথাও বলতে পারল না আর। স্ত্রীর কাছে, অফিসে চোর;—সংসারের সমাজের পৃথিবীর ডাঙার ওপর দিয়ে নৌকো চালিয়ে নেয় যে মনপবনের আশ্চর্য দেবতা, তার কাছে তামাকের হুকোর জলের ভেতর জোঁকের মতো যেন নিঃসাড় হয়ে পড়ে রইল মাল্যবানের মন।

উৎপলা যে তাকে এত উপেক্ষা করে, এটা তার ভালো লাগে,—বাঘের মাসি বেড়ালকে মেরে ফেলেছে মাল্যবান, ঘরের ভেতর নারী-সোনালিব্যাগের হিংস্রতায় হৃদয়হীনতায় কেমন একটা নিপট নিগূঢ় তৃপ্তি পায় সে। নিচের ঘরের সমস্ত বিশৃঙ্খলা ও দুর্গতির ভেতর স্ত্রী-পরিত্যক্ত নছার মানুষ বলে নিজেকে সে বার-বার প্রতিপাদন করে দেখতে চায়, এ তার ভালো লাগে; নিজেকে অবিচারিত—অভালোবাসিত—বিড়ম্বিত মানুষ বলে খতিয়ে নিতে-নিতে মনটা লঘু হয়ে ওঠে তার; জীবনের থেকে কুবাতাস দুর্ভাগ্য অবিচার অভালোবাসা যদি শুকিয়ে যায়, তাহলে পথ থাকে না আর।

‘তুমি ক’দিন থেকে মাছ খাচ্ছ না যে?’

‘কেমন আঁশটে গন্ধ।’ মাল্যবান বললে।

‘কেন, পেঁয়াজ-মশলা দিয়ে বেশ তো রাঁধে ঠাকুর।’

‘ভালো করে ভাজে না—’ বলে দিল একটা কথা মাল্যবান।

‘তুমি কি পুড়িয়ে খেতে চাও?’

‘না, না—’ মাল্যবান আঙ্গুল ছড়িয়ে, হাত মুঠো ক’রে, আঙ্গুল ছড়িয়ে, হাত মুঠো ক’রে বললে, ‘বরফ-দেওয়া মাছ কি-না, কেমন কাঠের মতন। খেতে ইচ্ছে করে না।’

‘বরফ-দেওয়া মাছ এ মোটেই নয়। বেশ তো জিনিস! টাটকা। পুকুরের। নিজে কিনে আন, অথচ নিজে বুঝতে পার না?’

মাল্যবান কোনো কথা বললে না।

‘কই-মাছ খেতে পার। বেশ তো লাগে খেতে।’

কিন্তু মাল্যবান বিনে মাছেই চালাতে লাগল। কোনো দিন দই খায়; কোনো দিন খায় না; ফেলাছড়া ক’রে খায়। বৌয়ের ন্যাওটা নয় আর। খুব কম কথা বলে। কোনো নালািশ নেই, আপত্তি নেই, মাথার চুলে তেল নেই, দেরি নেই। অন্য অনেকে হলে মাল্যবানকে চেপেই ধরত, ‘খুলে বলো তো’, ‘হচ্ছে কী সব’, ‘টেসে গেলে কোথায়’, ‘সাপটে না থাকে তো জাপটে ধরব’ ব’লে তোলপাড় ক’রে তুলত তাকে; কিন্তু উৎপলার চোখে কিছু প’ড়ল না যেন; ভালোই হল; মাল্যবানের রক্তের মনের শাস্ত সান্ত্বিকতা নষ্ট করবার জন্যে কেউ হাত কচলাল না; সে যা চাচ্ছিল, সেই পটনিশ্চয়তা বিনিঃশেষে দেওয়া হল তাকে; বিষদাঁত উপড়ে ফেলতে চায়? সাপুড়ের চুবড়িতে থাকতে চায়? থাকুক। কেউ বাধা দিতে গেল না। কোনো গোলমাল নেই।

কিন্তু একটা বেড়ালছানা খুন—মাল্যবানের মতন মানুষের জীবনেও এ-ব্যাপারটার অখাদ্য অপরাধের তীক্ষ্ণতা দিনরাতের ঘষা খেতে খেতে নষ্ট হয়ে ক্ষয় পেয়ে গেল। সে তার আগের জীবন ফিরে পেল। বেড়ালছানাটার কথা মাঝে-মাঝে মনে হয় বটে, কিন্তু তার নিজের জীবনের আবেদন ঢের বেশি। মাছ মাংস ডিম অফিস খবরের কাগজ টাকাকড়ির চিন্তা বৌয়ের এটা-ওটা-সেটা উনপঞ্চাশটা বাতাস গোলদীঘি চুরুট—নানা রকম শ্রোতের ভেতর হারিয়ে গেল সে। সাধারণ সাংসারিক মানুষ হয়ে উঠল আবার। এক-একদিন খুব বেশি রাত বিছানায় জেগে থেকে-থেকে মাল্যবানের মনে হয়, কাদাপাঁকের ভেতরে একটু শূয়োরের মতো সমস্ত দিন জীবনটা যেন তার ঘোঁৎ-ঘোঁৎ ক’রে বেড়ায়; বেড়ালের ছানার মৃত্যু তাকে বেশ একটা চমৎকার মুক্তি দিয়েছিল : স্ত্রীর মমতা বিমুখতার ঢের ওপরে চ’লে গিয়েছিল সে, অফিসের কাজে যে-কোনো মুহূর্তে ইস্তফা দিয়ে চ’লে যাবার মতো একটা সহজ স্বাধীনতা এসেছিল মনের ভেতর, রক্তমাংসের শরীরে পাখির মতো লঘুতা এসেছিল যেন তার, যেন সে অনেক ওপরে উড়ে চ’লে যেতে পারে, জীবনের উপেক্ষা আকাঙ্ক্ষা লোভ কিছুই যেন নাগাল পায় না তাকে আর; চোত-বোশেখে পাড়াগাঁর দুপুরে বিকেলের অর্নিবচনীয়াতর ভেতর প্যাট প্যাট ক’রে ফাঁড়া ওড়া শিমুলের তুলোর মতন আশ্চর্য ধীমুক্তির স্বাদ পেয়েছিল সে নীলিমায়-নীলিমায় সূর্যে রৌদ্রে আকাশ-পথের পাখির পালকে—

মউমাছির পাখনায়—তারপরে কোন্ নীলিম নিঃখুম পরলোকের দেশে। কিন্তু দিনের বেলা এ-সব কথা মনে থাকে না বড় একটা তার; মনে পড়লেও দাগ বসাতে পারে না তেমন।

এই-ই হওয়া উচিত। মাল্যবানের মতন মানুষের পক্ষে সমস্তটা দিন অফিস বা সংসারের অন্য যে-কোনো মানুষের মতন জীবন কাটানোই স্বাভাবিক। রাতের বেলাটাও তার তাদের মতোই কেটে যেত, যদি উৎপলার মতো এক জন ‘সন্তমা’ স্ত্রী এসে বাদ না সাধত। উৎপলার সম্পর্কে এসে জীবন ধাক্কা আঘাত উপলব্ধির ভেতর দিয়ে চলেছে। এ না হলে সে তার অফিসের মাইতি-দে-গড়গড়ি-গুঁইবাবুদের মতো এড়িগেড়ি বাচ্চায় ঘর ভ’রে ফেলে সিঁদুর-ধ্যাবড়ানো ফোকলাদেঁতো শাকচুরীদের নিয়ে ঘর করত। কিন্তু উৎপলাকে নিয়ে তার জীবন সে-রকম নয় তো। উৎপলা ওদের মতন নয়—আর-এক রকম।

রোববার সকালবেলা মাল্যবান ঝিকে বললে, ‘মাকে একটু ডেকে আনো তো।’ তিন-চার বার ঝিকে ওপরে পাঠাতে হল।

উৎপলা নিচে নেমে এল; বললে, ‘তোমার লজ্জা করে না?’

‘কেন?’

‘ঝিকে দিয়ে আমাকে ডেকে পাঠাচ্ছিলে?’

‘তোমার কাছে লোকজন ছিল, আমি তো নিজে গিয়ে ডাকতে পারি না।’

‘লোকজন চ’লে যাওয়া পর্যন্ত তর সইল না? আমি ওপরের ঘরে কী করি-না করি, নিচের ঘরে বসে তুমি সে-সব গণেশ ওল্টাবে! আচ্ছা পেটোয়া গণেশ তো বাবা—’

‘যাক, ওরা তো চ’লে গেছে—’

‘তুমিই তো তাড়ালে—’

‘যে জন্যে তোমাকে ডেকেছিলাম—আমার এই ঘরটার কথা তোমাকে ক’দিন থেকেই বলব-বলব ভাবছি। ঘরটা কেমন খুবড়ি খেয়ে প’ড়ে আছে দেখছ তো।’

ঘরের দিকে না তাকিয়েই উৎপলা বললে, ‘তার আমি কী করব।’

‘তোমাকে একটু গুছিয়ে দিতে বলছি—’

মাল্যবানের আতলস্পষ্ট বেকুবির দিকে তাকিয়ে উৎপলা কোনো কথা বললে না আর।

‘ওপরে যারা ছিল, তারা চ’লে গেছে?’

এ-কথার জবাব না দিয়ে উৎপলা ওপরে চ’লে যাঁবার উপক্রম করছিল; পা বাড়াতেই কী যেন একটা জিনিস টপ ক’রে টস ক’রে উৎপলার পায়ের ওপর প’ড়ে

ভেঙে ঝোল ছড়িয়ে দিল শ্লিপার বাঁচিয়ে উৎপলার পায়ের মাংসে চামড়ায়। দু'হাত পেছিয়ে গিয়ে আলসের দিকে তাকাতেই পাখিটাকে চোখে পড়ল; মাল্যবানের জুড়ির মতোই বোকা বোকা বেকুব পাখিটার দিকে কেমন যেন থাকতে চায় চোখ; কেমন অদ্ভুত জায়গায় ডিম পেড়েছে, ডিমটাকে ফেলে দিয়েছে হয়তো নিজের অজান্তেই বেশি নড়াচড়া ঘোরাফেরা ডানা ঝাপটাতে গিয়ে পা নাড়া দিয়ে; কী যে হয়ে গেছে, ডিম যে প'ড়ে গেছে, ভেঙে গেছে, সে-দিকে খেয়াল নেই পাখিটার, হারানো নষ্ট ডিম সম্বন্ধে কোনো চেতনা নেই। কেবলই ঘুরপাক খাচ্ছে আলসের ওপর, গলা ফুলিয়ে বক-ব্রকম-ব্রকম-ব্রকম-ব্রক ইন্-ররম্-রিরম-ররম্-রক্ক করছে পাখিটা। উৎপলা জোরে-জোরে হাততালি দিতেই আরো একটা পাখি বেরিয়ে এল বীমের আড়াল থেকে; উড়ে চ'লে গেল পাখি দু'টো।

মেঝের ওপর পাখির বিষ্ঠা পালক ভাঙা ডিমের লালা নিজের আঁশটে এঁটো পায়ের দিকে তাকিয়ে উৎপলা বললে, 'খুব আশুনদার সোনার দরে গুদোম ভাড়া দিচ্ছে বুঝি জংলি পায়রার বাড়—'

'তা দিচ্ছে', উৎপলার কথা ফুরোবার আগে মাল্যবান বললে; বেশ সমাহিত শাস্তভাবে বললে, 'পাখিরা আর কদ্দুর কী করবে; মানুষরা পাখিদের চেয়ে শয়তান; নাহলে পৃথিবীটা এ-রকম পৃথিবী হয়! নাঃ, ও-পাখিগুলোকে আমি কিছু বলি না।'

'আমি জাল পেতে রাখব। এক-একটা ক'রে ধ'রে ঠাকুরকে দেব। এ-সব কেঁদো পায়রার মাংস খেতে বেশ—'

'একটা বেড়ালের ছানা মেরে ফেলেছিলাম এক দিন,' মাল্যবান বললে, উৎপলার কথা সে শুনছে-কি-না-শুনছে, বোঝা গেল না; 'সেই থেকেই এ-সব বিষয়ে খুব সাবধানে চলতে আরম্ভ করেছি। এ-সব প্রাণীদের কিছু বলি না আমি।'

'বেড়ালের ছানা কে মেরেছিল?'

'আমি।' মাল্যবানের চোখ খানিকটা বুজে এল।

'কবে?'

'এই দিন পঁচিশেক আগে।'

'কোথায়?'

'এই ঘরেই।'

'কৈ আমি দেখিনি তো।'

'সে রাত-দুপুরে হয়েছিল; কে এক জন কাঁচা ক'রে ছেড়ে দিয়ে গেল। বাচ্চার কান্নায় আমার ঘুম ভেঙে গেল। তারপর—' ব'লে সে থামল।

'সেটাকে চাড় দিয়ে খেঁৎলে দিলে তুমি?'

মাল্যবান উৎপলার মুখের দিকে তাকাল একবার; পকেট থেকে একটা চুরট বার ক'রে নিয়ে চোখ বুজে ভেতরের দিকে তাকাল মাল্যবান; ভিজে পর্দার ওপর কামলগঠনের ছবির মতো এসে পড়ল সব : সেই রাত্রি, সেই বেড়ালের ছানা, ছানাটাকে (ছবি চলতে আরম্ভ করল) কেমন বিস্মী ও নিকষ অপকৌশলে ধ'রে ফেলেছিল সে—কেমন অন্ধ হয়ে দেয়ালে আছড়ে মেরেছিল, কেমন কাৎরাতে-কাৎরাতে ম'রে গেল বাচ্চাটা—সেই সবেের দিকে আপ্রাণ করুণায় দাঁত-মুখ খিঁচিয়ে খানিকক্ষণ তাকিয়ে থেকে মাল্যবান বললে, 'মানুষ হওয়া হবে কবে, তাই ভাবছি; কোনো দিক দিয়েই হতে পারিনি তো আজো। চেষ্টা করছি; করছি? মুক্ষিদের কিছু বলি না আমি; ময়লার লপসি করছে ঘরদোর; খুব ভোগান্তি বটে, কিন্তু তাতে আর কী, আমি নিজের মনে থাকি; ওদের চাল-চিঁড়ে দিই, যব খেতে ভালোবাসে, মেঝের ওপর ছড়িয়ে রাখি, খায় আর হাগে, হাগে আর খায়; মানুষের ভেতর দু'-চার জনকে ছেড়ে দিলে প্রায়-মানুষই এদের চেয়ে ঢের খারাপ কাজ করে।' বলতে-বলতে মাল্যবান লজিকের সিঁড়ি ভেঙে-ভেঙে অবশেষে উৎপলার পায়ের দিকেও না তাকিয়ে পারল না, পাখির ডিমের লালায় ঝোলে নষ্ট হয়ে গেছে পাটা—

'কিন্তু এই পাখিগুলো,' উৎপলার আগাপাস্তলায় চোখ দুটোকে বেশ খানিকক্ষণ পাক খাইয়ে নিয়ে মাল্যবান বললে, 'একেবারে বেহেড হয়ে ডিম পাড়ে। যেন পাৎবাদামের গাছ থেকে বাদাম টপাটপ ক'রে ঝরে। দিন-দিন মাল লোকসান ক'রে—,

মাল্যবান কিছু-ক্ষণ চুপ মেরে থেকে হাতের চুরটটা জ্বালিয়ে নিয়ে আকাশ-পাতালের অনেক বিশৃঙ্খল ঢেউ গুনে দেখল, তাদের সাজিয়ে নিয়ে কোনো নির্দেশের মতো মুক্তোপ্রবাল দেখল যেন জ্ব'লে উঠে জলের শিখর-চূড়ো হয়ে যেতে, এবং বেশ খানিক-ক্ষণ পরে সেই অলোটিকেই ব্যাখ্যা ক'রে বললে, 'কিন্তু, তাই ব'লে গুলতি ছুঁড়ে ওদের মারা উচিত কি? উচিত নয়।'

তারপরে স্পষ্ট হয়ে বললে, 'তোমার নীলাম্বরীটা ঠিক আছে তো—ভিজিয়ে দেয়নি তো?'

'আহা, কী মানিয়েছে তোমাকে এই ময়ূরকণ্ঠী নীলে—' মাল্যবান ভাবছিল, 'যেন উত্তরাকে নেত্য শেখাচ্ছেন বৃহন্নলা। নাচের ঘোরে মিলে-মিশে গেছে উত্তরা-বৃহন্নলা—কে উৎপলা কে বৃহন্নলা—' অনির্বচনীয় দেখাচ্ছে উৎপলাকে; —অথচ দাঁড়িয়ে আছে, সতিতাই তো আর নাচছে না, নড়ছেও না; অথচ দেখাচ্ছে উৎপলাকে যেন ক্ষুরধারের ওপর দাঁড়িয়ে আছে—পুরুষের যে-তিলোত্তম পেলে মেয়েমানুষকে মহানারীর মতো দেখায়, সেই রকম।

‘আমাকে কয়েকটা বালিশের ওয়াড় তৈরি ক’রে দেবে? বলো তো কয়েকগজ মার্কিন নিয়ে আসি।’

উৎপলা যাবার জন্যে তৈরি হল, ‘থাক, দর্জির বাড়িই দেওয়া যাবে।’

স্ত্রীর সঙ্গে সেও ওপরে চলল।

গিয়ে চললে, ‘আমাকে একটা পান দিতে পার? ভেবেছিলাম, ছেড়ে দেব। কিন্তু লোভ সামলাতে পারি না।’

কিন্তু, উৎপলা নড়ছিল-চড়ছিল না; ছাদের ওপর রোদে বাতাসে একটা ডেক চেয়ারে ব’সে ঘাড় কাৎ ক’রে বেনী খসাতে লাগল! খুব আমেজ এসেছে উৎপলার শরীরের রসে উপলব্ধি ক’রে নিজেরও গ্রস্থিতে-মাংসে একটা মন্থর, সুখ্যাত মদির সুখানুভব ছড়িয়ে পড়ছিল মাল্যবানের। কিন্তু, ওপরে থেকে লাভ নেই কোনো, মাল্যবানের মনে হল; এখন নিচে চ’লে যাওয়া উচিত।

নিচে গিয়ে মাল্যবান ঠিক করল, ঘরদোর সে নিজেই গোছাবে। তারপর মনে হল, ঝিকে দিয়ে গুছিয়ে নেবে। ঝি রান্নাঘরের কাজে ব্যস্ত ছিল। মাল্যবান একটা বিড়ি জ্বালিয়ে ভাবল, গুছিয়ে কী লাভ!

কিন্তু পর-স্ফণে সে নিজেই গোছাতে লাগল। বিশৃঙ্খলা ও নোংরামির ভেতর মনটা কেমন রিচখিচ ক’রে ওঠে; কিন্তু সে-দিনকার মতন পর্বত ঝেড়ে নিখুঁত ভাবে গোছাতে গেল না; ঘরটা ঝাঁট দিয়ে, জিনিসপত্র ঠিকঠাক রেখে দিয়ে, বিছানার চাদর বদলে, নোংরা কাপড়গুলো কাছেই একটা লম্বিত্রে ফেলে দিয়ে এসে কাজ সাজ হল তার।

রাতের বেলা বড্ড শীত; মোজাগুলো সব ছেঁড়া, একটা পুলওভার কিছুতেই কেনা হয় না, গায়ের আলোয়ান তেলে জলে রোদে বাতাসে ছাই হয়ে ছিঁড়ে-ছিঁড়ে পড়ছে, কয়েকটা তালিও মেরেছে সে, বড় বিশ্রী লাগে, একটা নতুন আলোয়ান কিনতে ইচ্ছে করে, ডোরাকাটা কালো মশারীটার ছাঁদার অন্ত নেই, নোংরা পচা ছারপোকা গুঁইগুঁই করছে, একটা মস্ত বড় ছিবড়ের জঙ্গল হয়েছে মশারীটা।

রাতের খাওয়া-দাওয়ায় পর নিচের ঘরে একটা ঠাণ্ডা টিনের চেয়ারের ব’সে মাল্যবানের মনে হচ্ছিল, দূর, এ-রকম জোড়াতালি দিয়ে জীবন কাটিয়ে কী লাভ, কসর লাভ!

বিছানায় এসে ব’সে মনে হল, জীবনটা এই রকমই হাঁচকা ব্যাপার। বিছানায় শুয়ে প’ড়ে ‘কেই বা এখন শুতে যেত’ ভাবছিল মাল্যবান; ব’সে-ব’সে কথাবার্তা গল্প—তারপর শীতের রাতে—তারপর সারাটা শীতের রাত এমন স্ত্রী কি আমি

পেতে পারতাম না। হড়পা বানের ঠাণ্ডা স্রোতে যেন মুর্গি আমি হাঁসের মতো সাঁতার কাটতে চাচ্ছি, বাজপাখির মতো উড়ে যেতে চাচ্ছি। আমার জীবনের বানচালের ব্যাপারটা এই রকম। কিন্তু বড় বেশি আত্মপ্রেম হয়ে পড়েছে তো আমার : যেন একটি ব্যক্তি ছাড়া পৃথিবীতে আর কেউ নেই, যেন ব্যক্তিসমুদ্র নিয়ে যে মানুষের ও সময়ের ইতিহাস তৈরি হচ্ছে সেটা কিছু নয়। লেপ মুড়ি দিয়ে শীতের খুব গভীর রাতে— আজকের আবহমানের ও ব্যক্তিসমুদ্রের রোল—যা নির্ব্যক্তিত্বে বিশোধিত হয়ে ফেণার কণার মতো তাকে টেনে নিয়ে চলেছে অন্ধকারের থেকে খুব সম্ভব আরো ব্যাপক অন্ধকারের ভেতর—সেই সুর শুনতে পেল সে; অতএব আলোকিত হয়ে উঠল যেন তার মন; আন্তে-আন্তে সময়ের আশ্চর্য সমগ্রতার কাছে আত্মসমর্পণ করে স্থির হয়ে উঠতে থাকল তার মন।...

এত বেশি স্থির হল যে সে ঘুমিয়ে পড়ল।

পৌষ মাসের শেষাশেষি মেজদার পরিবার এল।

মাল্যবান একটা মেসে গিয়ে উঠল। মেস ঠিক নয়—মাঝারি-গোছের একটা বোর্ডিং। একটা আলাদা কামরা বেশ গুছিয়ে নিল সে। মেজদা আর বৌঠান কিছুতেই ছাড়তে চায়নি মাল্যাবনকে, কিন্তু তবুও সব দিক ভেবে সুবিবেচনা করে মেসেই যেতে হ'ল তাকে।

মেসের লোকজনের সঙ্গে আলাপ করবার বিশেষ আগ্রহ ছিল না তার। অফিস থেকে এসে নিজের জীবনের বিপর্যয়ের কথাই সে ভাবত—যে পর্যন্ত না ব্যক্তি-অতিক্রমণের দূর সমুদ্রসুর শুনতে পেত সে : সে-শব্দ শুনতে গিয়ে রাত বেশি হয়ে যেত—ঘুম আসত তার আগে; সে-সুর প্রায়ই আজকাল শোনা যেত না, আসত না, স্পষ্ট করে ধরা দিতে চাইত না। গোলদীঘি কাছে ছিল—বেড়াতে যেত। এক-এক দিন নিজের বাড়িতে গিয়ে তত্ত্বতলব নিয়ে আসে—চার দিকে ঘুরে-ফিরে দ্যাখে মেজদা ও বৌঠানের অমায়িক নিয়ে আসে—চার দিকে ঘুরে-ফিরে দ্যাখে মেজদা ও বৌঠানের অমায়িক মুষ্টিমিষ্টত্ব উপভোগ করে। তাঁরা এমন চমৎকার মানুষ—হয়তো খুঁটিনাটি নিয়ে দু'জনে বচসা করছেন, কিন্তু তার ভেতরেও পরস্পরের জন্যে এক নাড়িরই টান যেন, এক জোড়া বসন্ত বউরির মতো নীড়ের বাইরে, মুহূর্তেই নীড়ের ভেতরে যেন মানুষের মতো শরীর ও বোধ নিয়ে—প্রত্যেক কথার ভেতর দিয়েই যৌনসম্বন্ধের মিছরি মাখানো ভালোবাসার মর্ম ফুটে উঠছে। দেখে মাল্যবানের লাগছে মন্দ না, মানে খারাপ লাগে, কেমন বিস্ত্রী লাগে যেন : ব্যক্তিজলরাশি ভুলে গিয়ে ব্যক্তিকে, নিজের কী হল না হল, সেটাকেই সব চেয়ে বেশি প্রাধান্য দেয় ব'লে।

এ-জিনিসটা উপলব্ধি করে ব্যক্তিজলরাশির নিশ্চিহ্ন জলরৌদ্ররাশির ভেতর মিলিয়ে যেতে চেয়ে ঈষৎ ভাঙ খেয়ে কেমন ভালো লাগছে যেন তার, এমনই একটা

আস্বাদে মিষ্টি গলায় মাল্যবান বলে, ‘মেজদা, আপনাদের শুতে তো কোন কষ্ট হয় না?’

‘না। এই তো বেশ বড় ছাপ্পর খাট হয়েছে।’

‘ওখানে একাই শোন বুঝি আপনি?’

‘না।’

‘ছেলেপুলেরা শোয় বুঝি আপনার সঙ্গে?’

‘ওরা নিচে শোয়—পিসির কাছে।’

মেজদা বললেন, ‘উনি আর আমি শুই এখানে। একা-বিছানায় ঘুম হয় না—পাশে যা হোক অন্তত একটা শাড়ির খসখসানি উশখুশানি না থাকলে চলে না। বুঝলে কি না...’

মাল্যবান নিজের কপাল থেকে একটা ডাঁশ উড়িয়ে দিল।

মেজদা গলা থাকরে বললেন, ‘বিছানার চারদিকটা বেশ উম হয়ে থাকা চাই তো...হা হা...’

মেজ বৌঠান হামানদিস্তেয় পান ছেঁচতে-ছেঁচতে ঘরের ভেতরে ঢুকে ছেঁচা পানের বড়ি পাকিয়ে বিরাজবাবুকে দিয়ে গেলেন। তার পর হাত ধুয়ে বিরাজবাবুর দাবনা ঘেঁষেই যেন বসলেন—কোনো সঙ্কোচ নেই। মাপলারটা বিরাজের গলায় ভালো ক’রে জড়িয়ে দিলেন, বললেন, ‘বড্ড শীত’; বালিশের নিচের থেকে এক জোড়া চকোলেট রঙের মোজা বের ক’রে বিরাজ মিস্তিরের বাঁ পায়ের গোদে, সরু ডান ঠ্যাঙে পরিয়ে দিলেন মাঝবয়েসী আঙুলের সুকুশল সক্রিয়তায়—মোমের ঝরানির থেকে বেশি মধুর ঝরানির থেকে উঠে এসে যেন।

মেসে এসে মাল্যবান যেন ফাঁপরে প’ড়ে গেল, কেউ নেই তার, কিছু নেই। এখানে ছোকরারা থাকে, আর থাকে এমন সব লোক—বিশেষ এক রকম শারীরিক সুখের জন্যে যাদের সব সময়েই লালা ঝরছে; রাতের বেলা বেরিয়ে যায় তারা কোথায় থাকে—কী করে? কোনো দিন শেষ-রাতে ফিরে আসে, কোনো দিন আসে না। মেসের যাদের এ-রকম রাত করা বাতিক নেই, তাদেরও লালা ঝরছে বিশেষ এক রকম শরীর গ্রস্থির সুখের জন্যে মেসের রাতের বিছানায় শুয়ে থেকে। বছরের-পর-বছর সারাটা জীবন এরা মেসেই কাটিয়ে দেয়। এছাড়া এদের গতি নেই—কিছু নেই—সংসার করবার শক্তি নেই—

বিছানায় শুয়ে পড়ল সে; কিন্তু সেই মুহূর্তেই ওঠে বসল। বারান্দায় পায়চারি করতে লাগল। গোলদীঘিতে গেল। ফিরে এল সেখান থেকে। খবরের কাগজ নিল; রেখে দিল; চুরুট জ্বালাল; নিভে গেল; ঠাকুর ভাত দিয়ে গেল!

পর-দিন সকালবেলা মাল্যবানের মেসের ঘরের কাছে রেলিং-এর ওপর কতকগুলো কাক এসে ডাকছিল। মাল্যবান তার স্ত্রীর মুষ্টি-ওড়ানোর মতো ঝটপট হাততালি দিয়ে হা-হা করতে-করতে উড়িয়ে দিল সেগুলোকে। পাশের ঘরের একজন ভদ্রলোক বেরিয়ে এসে বললেন, ‘দেখলেন মশাই, কী-রকম বিরক্ত করে! কাল আট আনার কচুরি-হালুয়া এনে টেবিলে রেখে একটু মুখ ধুতে গেছি, এরই মধ্যে ঘরের ভেতর ঢুকে খাবারের ঠোঙা লোপাট—’

‘এই কাকগুলো?’

‘হ্যাঁ, স্যার।’

‘বড্ড বেয়াদব তো—’

কিন্তু মাল্যবানের ইচ্ছে হচ্ছিল, এই কাকগুলোকে ডেকে সে কিছু খেতে দেয়—এগুলোকে উড়িয়ে দিয়েছে বলে কেমন একটু খালি-খালি লাগছিল তার। রোজ সকালে সে ঘুমের থেকে উঠবার চের আগেই পূবের দিকের এই রেলিং-এর ওপর বসে কাকগুলো ডাকতে থাকে। বিছানায় শুয়ে শুয়ে তার পাড়াগাঁ’র কথা মনে পড়ে—মা’র কথা; সেই খড়ের ঘর—এন্নি শীতের ভোর—এন্নি কাকের ডাক। কোথায় গেল সে-সব!

মাল্যবান ঘরের ভেতর ঢুকে টেবিলের কাছে বসে এই সব কথা ভাবছিল। এন্নি সময়ে কুয়াশার ভেতর দিয়ে একটা একা-কাক উড়ে এসে মাল্যবানের ঘরের পাশে ট্রামরাস্তার দিকের রোয়াকের রেলিং-এর ওপর বসল আবার। মাল্যবান অনেক-ক্ষণ একঠাই বসে কাকটাকে দেখতে লাগল—তার ডাক শুনছিল। পাড়াগাঁয় দাঁড়কাক থাকে, পাতিকাক থাকে;—কলকাতায় পাতিকাক;—দাঁড়কাক দেখছে না তো। অনেক দিন দাঁড়কাক দ্যাখেনি; একটা দাঁড়কাক দেখেছিল বড় রাস্তার একটা মস্ত বড় বিজ্ঞাপনের ছবিতে; একটা মদের বোতলের টাইট-ছিপি ঠুকরে খুলতে চাচ্ছে—ফ্রান্সের বিখ্যাত মদের গন্ধে এন্নি তোলপাড় হয়ে গিয়েছে প্রাণীটি। মদের বোতলের বিজ্ঞাপনের দাঁড়কাক, কিন্তু তবুও চোখ তুলে দেখবার মতো : এক বলকে জীবনের অনেক ক’টা বছরের আকাশ বাতাস পাখি প্রাণী সমাজ উপলব্ধি উজিয়ে দিয়ে গেছে।

কাকটা উড়ে গেল কুয়াশার ভেতর দিয়ে—গোলদীঘির দিকে—একটা নিম্ন গাছের ভেতর। এন্নি উড়ে যেতে ভালো লাগে।

পাড়াগাঁ’র বাড়িতে প্রকাণ্ড বড় উঠোন ছিল তাদের, ঘাসে ঢাকা, কোথাও বা শক্ত শাদা মাটি বেরিয়ে পড়ছে, তারই ওপর সারাদিন খেলা করত রোদ ছায়া মেঘের ছায়া আকাশের চিলের ডানার ছায়া—রোদে দ্রুততায় চলিষু হীরেকষের মতো তার হটকানো। শালিখ উড়ে আসত উঠোনে; খড়ের চালের ওপর ঝাঁপিয়ে পড়ত

বক—এই সরোবর থেকে সেই সরোবরে যাবার পথে, ডানায় তাদের জলের গন্ধ, ঠোঁটে রঙের আভা চকিত চোখ দূরের দিকে, নীলিমার দিকে। কত উঁচু-উঁচু গাছ ছিল উঠোন ঘিরে; সারাটা শীতকাল ঘুঘুর ডাকে জারুল ঝাউ পাংবাদাম আমের বন নিম্ন হিজলের জঙ্গল কেমন ফুকরে ফুকরে উঠত—রোদের দিকে পিঠ রেখে নিজের শরীরটাকে একটু এলিয়ে দিলে সমস্ত শরীর ঘুমে ভ'রে উঠত সেই পাখির ডাকে। মাঝে-মাঝে উঠোনে এসে পড়ত ঘুঘু, কেমন কলের মতো, পাখিদের দেশের ক্ষুদে টেকির পাড়ের মতো ঘুঘুদের লেজগুলো উঠত পড়ত উঠত পড়ত—ঘুর ঘুর ঘুর ঘুর ক'রে ছুটে যেত তারা মাঠে ঘাসে—কী খুঁজত—কী চাইত? সেই পঁচিশ-তেরিশ বছর আগের শীতের ভোরের কুয়াশার ভেতর সেই সব পাখি যেন পৃথিবীর মনে কোনো দিন ছিল না; আজকের পৃথিবীটা কলকাতার বাণিজ্যশক্তির গোলকধাঁধা নিয়ে এম্মি অদ্ভুত অপৃথিবী। ফিকে কফির কোকোর মতো রঙের গলা ফুলিয়ে কত পাভিকাক উড়ে আসত খড়ের চালে, উঠোনে; শন-শন ক'রে উড়ে যেত ঠাণ্ডা জলের ওপর দিয়ে ছুই-ছুই ক'রে কোনো নদীকে কোনো দীঘিকেই না ছুঁয়ে, জলের ভেতর ঝাপসা প্রতিফলিত হয়ে, শাঁ-শাঁ ক'রে কোথার থেকে উড়ে যেত তারা কোথায়; সকালের কুয়াশার দিক থেকে দূর বিদিকের পানে উড়ে যেত সেই কাকগুলো পৃথিবীটাকেই টেনে বার করবার জন্যে, উজ্জ্বল সূর্যটাকে সবাইকে পাইষয় দেবার জন্যে—যারা কাক নয়, পাখি নয়, তাদের জন্যেও—ক্ক-ক্ক-ক্ক-ক্ক—কেমন শতচেতনার হাঁকডাক, সালিশি, নির্জনতা।

সরস্বতী পূজোর দিন মাল্যবানের ঘরের পাশেই বোর্ডিং-এর কয়েকজন জনে মিলে খুব মদ খেল। বোর্ডিং-এর একটা হলের মতো ঘরে বাঈনাচ হয়। বোর্ডিং-এর ঝি বাবুদের সঙ্গে পাশা-পাশি চেয়ারে বসে নাচগান দেখল-শুনল; মাল্যবান অবাক হয়ে দেখছিল, ঝি একটুও সঙ্কোচ বোধ করছে না—এ যেন তার পাকাপাকি অভ্যাস; বাবুদের মায়ের মতন কখনো তার ঠাঁট, কখনো কারু-কারু বিশেষ গিম্মি যেন সে, তেমনি ভাবগতিক; কখনো-কখনো সকলের অন্তরঙ্গ বন্ধু যেন—নশ্ব অমায়িক, সকলকে হাতের ভেতর গুছিয়ে নেবার জন্যে ব্যস্ত, নানা রকম সহজ সুলভ ছেনালিতে সরস। কাল সকালেই গিয়ে তো আবার বাসন মাজতে বসবে। তখন এর ন্যালাভালা মুখের দিকে মাল্যবান অন্তত তাকিয়েও দেখতে যাবে না। এই বাবুরাও কোনো তক্কা রাখবে কি? কিন্তু আজ রাতে একে দিয়েই আসর জমানো। আসর জমাচ্ছেও মন্দ না। পান চিবোয়—সিগারেট টানে—গালগল্পের পাট নিয়ে এর কাছে তার কাছে ফেরে—একে না পেলে কয়েকটি বাবুর অন্তত আজ রাতের অনেকখানি ফুর্তি মাটি হয়ে যেত।

মাল্যবান সাত-পাঁচ ভাবতে ভাবতে ভাবার-মাথায় ভাবছিল : সরস্বতী পূজোর সঙ্গে এ-সবের কী সম্পর্ক! মদ বাঈনাচ ঝি—এ-সবের কী দরকার! কিন্তু এ-আসরের মধ্যে এমন কথা সে হয়তো একাই ভাবছিল। একাই সে কেমন এক! নিস্তব্ব—কেমন যেন ঝক মেরে গেছে অন্য সবাইয়ের হুন্না জৌলুশের তুলনায়। কিন্তু এ-কথা ঠিক, এদের কারুর ওপরই কোনো বিমুখ ভাব ছিল না তার।

মদ খেল না অবিশ্যি, আজ কেন যেন সিগারেটও টানতে গেল না, দু'একটা পান চিবুল মাত্র, কিন্তু আসর থেকে উঠে গেল না তো ব'সে-ব'সে নাচগান দেখছিল-শুনছিল। গয়মতী (মানে কী এ-নামের?) ঝিকে নিয়ে সবাই ফুর্তি করছিল, কিন্তু এই মাকরের ঠ্যাং ফিঙের ঠ্যাং, কাতলের মুখ ভেটকির মুখের মতো মেয়েমানুষটির দিকে তাকিয়ে মাঝে-মাঝে ভারি দুঃখ হচ্ছিল মাল্যবানের। ইলেকট্রিক

লাইটের আলো মাঝে-মাঝে মেয়েটির টিমটিমে চোখে এসে পড়ে, বাতির কড়া
 রুড়কড়ে বাঁঝে সে কষ্ট পায়, এমন দুঃখ হয় মাল্যবানের; মাথার থেকে ঘোমটা খসে
 পড়ে মেয়েটির, ছোট্ট খুকিদের মতো এতটুকু একটা খোঁপা বেরিয়ে পড়ে—বড় কষ্ট
 লাগে মাল্যবানের; একটা ভাঙা চেয়ারের খোঁচা খেয়ে মেয়েটির শাড়ির অনেকখানি
 ছিঁড়ে যায়, নিজে সে তা বুঝতেও পারে না, কিন্তু মাল্যবানের সংবেদনায় গিয়ে লাগে
 খুব,—খুব; মেয়েটি সিগারেট টানতে-টানতে প্রায়ই বুকে হাত দিয়ে কাশে—সুবিধের
 লাগে না মাল্যবানের; কাশে যখন মেয়েটি, তখন তার চোখ দুটো মাছের মতো গোল
 হয়ে ওঠে—বড় বিশ্রী দেখায়—মাল্যবানের খারাপ লাগে, কেমন দুঃখ করে এই
 অদ্ভুত হাড়িডসারের জন্যে, এই ব্যক্তিটির জন্যেই। মাল্যবান খুব ভালো বোধ করছিল
 না, অবাক হয়ে ভাবছিল, এত সিগারেট টানছে, এতে কি সুখ পাচ্ছে গয়মতী, টানছে
 আর ক’রে, এত কাশছে তবুও এ’রকম খিঁচে সিগারেট টানছে, খুবই অদ্ভুত ভারি
 মজার বোধ হত জিনিসটাকে, কিন্তু দুঃখ হতে লাগল মাল্যবানের।

চার-পাঁচ জন বাবু মিলে ঝিকে আলাদা একটা কামরায় নিয়ে গেল। মাল্যবান
 নিজের ঘরে চ’লে যাচ্ছিল, তাকিয়ে দেখল ঝিকে সবাই মিলে মদ খাওয়াচ্ছে।

মাল্যবান হাঁটতে-হাঁটতে ভাবল : এ কী-রকম ফুর্তি! কিন্তু তবুও প্রতিবাদ করতে
 গেল না; প্রতিবাদ করবার মতো চোপা নেই তার, সে-শক্তি ও ঐশ্বর্য নেই; সে
 তাগিদও নেই; সে জানে, পৃথিবীর অনেক দিকেই এ-রকম অনাচার অজাচার চলেছে,
 কেউ রোধ করতে পারে না, কারুর রোধ মানে না।

তেতলায় উঠে অন্ধকারের মধ্যে বারান্দায় খানিক-ক্ষণ সে পায়চারি করল। তারপর
 রেলিং-এর কাছে এসে নিচের দিকে তাকাল একবার; দেখল, সেই ঝি কলতলার
 পাশে ব’সে মুখ খুবড়ে বসি করছে; তার আশে-পাশে দু’জন সঙ্গী শুধু। মেসের ঠাকুর
 বামদেব—লম্বা হিরগিরে মানুষ—মুখটা অনেকটা স্যর ত্রৈলোক্যের মতো—ঠ্যাঙের
 ওপর ঠ্যাং চড়িয়ে খানিকটা দূরে দেয়ালে ঠেস দিয়ে নিরাসক্ত ভাবে খইনি
 টিপছে—মাঝে-মাঝে মাকড়সার জালের মতো জড়িত চোখের দৃষ্টি তুলে ঝির দিকে
 তাকিয়ে; ঝি ব’সে পিঠে হাত বুলিয়ে দিচ্ছে ছাপরা জেলার পূর্ণ কুমি।
 লোকটা বেঁটে, কালো, মুখে রসস্তের দাগ, উঁচু-উঁচু শাদা—খুব বেশি শাদা দাঁত
 থেকে তবুও বিশ্রী গন্ধ বেরোয়; কিন্তু হাসি-হাসি মানুষ; এই মেসে সব চেয়ে এই
 ঝিকেই ভালোবাসে সে। ঝি কাকে ভালোবাসে? পূর্ণকে নয়—ঠাকুরকে নয়, কাকে
 জানে না মাল্যবান। উঠে-প’ড়ে ভালোবাসার ব্যাপারে লেগে গেছে পূর্ণ আজ; ট্যাকে
 আজ কিছু টাকা আছে তার; ঝির সঙ্গে আজ রাতে কাজ হবে তার।

ওপর থেকে হঠাৎ এক সঙ্গে কয়েকটা গলার রোশনচৌকি বেজে উঠল যেন
'পূর্ণ! পূর্ণ! পূর্ণ!'

ওপরে মাল খাস্ত পড়েছে হয়তো—মদের কিংবা মাংসের অথবা সোডা
ওয়াটারের; এখুনি দোকানে ছুটতে হবে পূর্ণকে।

গয়মতী বললে, 'তুই যা পূর্ণ, বামদেব আছে, হুই ব'সে আছে—ওই ওতেই
হবে—দেড়টা নাগাদ আসিস তুই।'

পূর্ণ আড়ামোড়া ভাঙতে-ভাঙতে ব'সে বাঁকিয়ে নতুন মাটির কেঁচোর মতো
শরীরটাকে পাক খাওয়াল কিছু-ক্ষণ। তার পরে ঠা করে হাওয়া দিল।

বামদেব বললে, 'পরকাল বারবারে ক'রে রাঁড়ি তো হয়েছিস। কিন্তু আমি চক্কোন্ডি
বামুন, মনে রাখিস, পয়সা-টয়সা পূর্ণর মতো আমি দিতে পারব না।'

'তুমি বামুন আছ, আমিও হাড়ির মেয়ে নই, আমার বাপের নাম
সীধু—সরকার—'

'গোস্তার সেই সীধু না-কি রে? ওই যে আসত, আর তুই পাৎ পেড়ে দিতি।'

'সরকার সীধু সরকার, তুমি দ্যাখোনি তাকে।'

'সরকারও এক রকম কায়েত বটে,' বামদেব একটা ঢেকুর তুলে বললে, 'যাক গে,
শোন বলি কায়েতের মেয়ে, বমি করলি যে!'

'ও-সব খাওয়ার অভ্যেস নেই আমার।'

'একটু বেসামাল হয়ে গেছিস, গয়া; আর বমি করবি?'

'না।'

'বমি-বমি করে যদি বল আমাদের, আমি তো তোর পিঠে হাত দিলেই বেরিয়ে
যাবে সব হড়-হড় ক'রে—'

'নাঃ। শাস্তি হয়েছে।' গয়মতী বললে, 'হাড় নড়ে ঠাণ্ডা হচ্ছে শরীরের ভেতর।'

'তবে চ'—'

'কোথা?'

'আর কোথা, বাবুদের খাওয়াদাওয়া হয়ে গেছে সব। তুই তো খেয়ে আঁশবটি হাতে
ক'রে উগড়ে ফেললি সব ভ্যাক-ভ্যাক ক'রে দেখে-দেখে আমার হয়ে গেছে, আর
খেয়েছি আমি!'

'নাও, নাও, খেয়ে নাও গে।' গয়া বললে খুব আন্তি দেখিয়ে, 'খইনি টিপছ তো
টিপছই নাও ওঠো।'

'পিবিস্তি নেই,' মুখটা কেমন যেন ভেঙে-চুরে ফেলে বামদেব বললে, 'সারাদিন

কড়া আগুনে রাঁধতে-রাঁধতে, তোর বমি দেখতে-দেখতে খাবার হাঁড়ি পেটের ভেতর শুকিয়ে আমার শালকাট হয়ে গেছে, গয়া!’

কলতলায় বসে ছিল এত-ক্ষণ, মাথায় একটা আলতো ঝাকুনি দিয়ে উঠে দাঁড়িয়ে গয়া বললে, ‘এও বলি বাপু, ভালো ঠেকছে না আমার; কেমন যেন ঠ্যাকার তোমার, বাপু, ভারি ঠ্যাকারে হয়েছ! তোমার নাম ধ’রেই ডাকছি তোমাকে, বামদেব—খাবে না? সত্যিই কিছুই খাবে না!’

‘নাঃ, অন্ন খাব না আজ আর, মেষ্টান্ন খাব!’

‘আচ্ছা! আচ্ছা!’ একটা মরুক্ষেপে শ্যাওড়াগাছের মতো বাতাসের ঝাপটায় হুমড়ি খেয়ে পড়ল যেন হাসতে-হাসতে গয়া। রোয়াকের ওপরে বামদেবের কাছেই এসে বসল সে।

‘পূর্ণ কি দেড়টার সময়ে আসবে বলেছে?’

‘কে জানে কী বলেছে,’ ভারি বিপদে গণে বামদেবকে সালিশ মেনে ক্লান্ত মলিন চোখ দু’টো বামদেবের চেনা চাওয়া-রসে খানিকটা স্পষ্ট ক’রে তুলে গয়া বললে, ‘বড্ড হুজ্জাৎ করে পূর্ণ। ও-সব দেইজিপণা হবে না আজ!’

‘বাঃ, কী ক’রে হবে, তোমার তো একটা মেয়েমানুষের গতর, গয়া। ও চায় সেটাকে পাঁচখানা ক’রে নিতে।’

বামদেব শিবিরাজার আশ্রিত পাখিকে ভরসা দিয়ে বললে, ‘ও-সব কাল-কেউটের জন্যে বেউলার রাত জাগতে হবে না, গয়া। আমি তোমাকে এমন জায়গায় নিয়ে যাব, ও বিষদাঁত সঁখোতেই পারবে না।’

শুনতে-শুনতে মাল্যবান নিজের ঘরে গিয়ে ঢুকল।

বোর্ডিং-এর খাওয়াদাওয়া মাল্যবানের ভালো লাগছিল না। কী কতকগুলো ডাঁটা খোসা চোকলা-চাকলা দিয়ে একটা ঘাঁট বানায়—রাঁধতে পারে না—তেল-মসলা খরচ করে না—বাজারের থেকে ভালো মাছ-তরকারি আনতে পারে না; ‘এ-রকম হলে এ-বোর্ডিং ছেড়ে যাব আমি।’

একদিন বোর্ডিং-এর ম্যানেজার গোটা তিনেক পাঁঠা এনে নিচের ঘরের একটা গুদামে বেঁধে রাখল। সারাদিন পাঁঠাগুলো চ্যাঁচায়, মাল্যবান কেমন একটু অস্পষ্ট অমানবসাধারণ্য ভাবে চিন্তা ক’রে ভাবে এই যবক্ষার শীতে বোচারিদের কী কষ্ট! হয়তো এরা টের পেয়েছে, মরতে হবে শীগগিরই; আমিষ গন্ধ যেন পেয়েছে, নিজেদের মৃত্যুর; মানুষের হাতে তৈরি যে সেটা, তাও বুঝেছে। সৃষ্টি, মাল্যবান ভেবে যেতে লাগল, প্রকৃতি এদের এত মোক্ষম কাম প্রবৃত্তি দিল কেবলি সন্তান বানিয়ে

কেবলি সেগুলোকে ধ্বংস করবার জন্যে। এদের লালসার বাড়াবাড়ির সুবিধে নিয়ে এদের দিয়ে কেবলি এদের ঝাড়বংশ বাড়াচ্ছে কাটছে—খাচ্ছে মানুষ। মানুষের চেয়ে বড় শয়তান কে আছে এই সৃষ্টির ভেতর! শয়তান। শয়তান।

মাল্যবানের মন বেঁকে দুমড়ে গেল কেমন যেন, ইচ্ছে হচ্ছিল ম্যানেজারকে গিয়ে বলে, ‘এগুলোকে আপনি ছেড়ে দিন, আচাযিয়মশাই, টাকাটা আপনাকে দিয়ে দেব আমি।’ কিন্তু, ছেড়ে দিলে কী হবে, অন্য-কেউ ধরে খাবে। নিজেদের সুমাংস নিয়ে এরা মানুষ-সমাজ থেকে অক্ষত হয়ে এড়িয়ে যাবে? কোথায়? কোন অজব্রন্মাণ্ডে? তা তো নেই।

ম্যানেজার মনোহর আচাযিয় তিনটি বেশ পুরুষু তেলচুকচুকে পাঁঠা এনেছে। বোর্ডিং-এর সকলেই পাঁঠার মাংস খাবার জন্যে খুব ব্যস্ত, কবে পাঁঠা কাটা হবে এ নিয়ে চারদিকে এমন একটা প্রবল তাগিদ, সব্বায়েরই জিভে এত জল যে মাল্যবান এদেরি মধ্যে এক জন মানুষ, ভাবতে গিয়ে মনে হল, সহজ বিবেকেই মাংস খায় মানুষ, যেমন ফল-ফসল খায় সহজ বিবেকে; কেবলমাত্র তার মতন এক-আধ জন মানুষের বিবেকে এসে খোঁচা লাগে; মানুষ হিসেবে সেটা হয়তো অস্বাভাবিক; নিজেকে খানিকটা অস্বাভাবিক মনে হল তার—মানুষ হিসেবে। মাল্যবান ঠিক করল; এ-পাঁঠার মাংস সে খাবে না।

কিন্তু চার পাঁচ দিন পরে ম্যানেজার পাঁঠা তিনটি বিক্রি করে ফেলল; ঠাকুর পলতার তরকারি ট্যাংরা মাছের বোল আর কলাইয়ের ডাল দিয়ে সাজিয়ে ভাত নিয়ে এল। মাল্যবানের মনটা কেমন একটু বিরস হয়ে উঠল, বললে, ‘ঠাকুর, মাংস আর আমাদের কপালে জুটল না।’ কিন্তু, খেতে-খেতে মাল্যবান নিজেকে ধিক্কার দিতে-দিতে বলল : ‘ছি, তিনটে প্রাণীর জীবনের চেয়ে আমার মাংস খাওয়া হল বেশি।’

পর-দিনই গুদামঘরে দু’টো পাঁঠা দেখা গেল আবার; মাল্যবান একটু ধাক্কা খেল; ভাবল : এ আবার কী। ভাত খেতে-খেতে ভাবল : ও মাংস আমাদের খাবার জন্যে নয়, হয়তো পাঁঠার ব্যবসা ধরেছে ম্যানেজার। ভেবে—খানিকটা টেসে গেল তার সান্ত্বিক উপলব্ধির সমস্ত তোড়জোড়।

সন্ধ্যের সময় ম্যানেজার নিকুঞ্জ পাকড়াশিকে বলছিল, ‘না, না, এ-পাঁঠা আমি কালই কাটব।’

শুনে কেমন একটু ভরসা পেল যেন মাল্যবান। গোলদীঘিতে ঘুরতে ঘুরতে ভাবল; জীবন এমনি নোংরা হয়ে পড়েছে আজ—কয়েক টুকরো তো মাংস, সে-জন্যে দু’টো প্রাণীর মৃত্যু আমার কাছে এমন আশা-ভরসার জিনিস হয়ে দাঁড়াল! কিন্তু, এ তো স্বাভাবিকতা, শেয়াল বেড়াল চিতে-বাঘ কেঁদো-বাঘের মতো মানুষ হিংসাত্মক তো।

মানুষ হয়ে স্বাভাবিক ভাবে অহিংসা ক'রে বেড়াবার পথ নেই তো তার। কিন্তু, তবুও মাল্যবান সংকল্প করল, এ-মাংস সে খাবে না।

এবং খেল না বটে, কিন্তু মাংসের বাটি ফিরিয়ে দিতে ভারি বেগ পেতে হল তার, রাবড়ির তিন চামচে বোল মোটেই সরস লাগল না, খুব সক্রিয় আক্রোশে ম্যানেজার ঠাকুরের ওপর মারমুখো হয়ে উঠল তার মন। মানুষের জীবন সহজ সুন্দর মোটেই নয়, মাল্যবানের নিজের জীবনটাও সরল নয়, সত্য নয়, অনুভব করছিল সে।

মেসের বিছানায় শুয়ে সমস্ত লম্বা শীতের রাত এক-এক দিন বেশ ঘুম হয় তার। এক এক দিন ঘুম তেমন হয় না—বারান্দায় পায়চারি করতে থাকে। ইচ্ছে হয়, পরের দিনই বাড়িতে চ'লে যাবে সে; সকালবেলাও সেই ইচ্ছে থাকে। কিন্তু বেলা যত বাড়তে থাকে, ততই সেই ইচ্ছের অস্বাভাবিকতা বুঝতে পারে সে, মেসের জীবনের থোড়-বড়ির সঙ্গে নিজেকে মানিয়ে নেয়।

এক-এক দিন শেষ-রাতে গভীর অন্ধকার ও শীতের ভেতর ঘুমের বিছানা এত ভালো লাগে, জীবনের হৈ-হুটপাট রলরোল এত নিরর্থক মনে হয় যে, ভোরের আলোর কথা মনে ক'রে ভয় করে তার।

মাঝে-মাঝে সে খুব সুন্দর স্বপ্ন দ্যাখে।

বোর্ডিং-এর অনেকগুলো রাত তার বেশ চমৎকার কেটে গেল। একটা জিনিস খুব ভালো লাগে এক জন ছিপছিপে লম্বা সুন্দর যুবক রোজ শেষ-রাতে নানারকম ইংরিজি বাংলা কবিতা আওড়াতে-আওড়াতে রাস্তা দিয়ে হেঁটে যায়; মাল্যবান আলোড়িত হয়ে ভাবে; এর জীবনে সমারোহ আছে বটে, কিন্তু সেটা ফিচেল জিনিস নয়, সত্যিই গভীর; ওর মতন জীবন পেলে হত।

সকালবেলা কুয়াশার ভেতর দিয়ে এক-একটা কাক মাল্যবানের বারান্দার রেলিং-এর ওপর উড়ে আসে, কুয়াশার এলোমেলো ছেঁড়া-ছেঁড়ার ভেতর দিয়ে ডানা মেলে গোলদীঘির দেবদারু নিমগাছের দিকে মিলিয়ে যায়; প্রকৃতির দিগ্‌নির্গমী মন ন'ড়ে ওঠে যেন। কুহক অনুভব করে মাল্যবান। কিন্তু তবুও অতিপ্রাকৃত নয়—কী স্বাভাবিক ভাবে নিবিদ এই আলো পাখি আকাশের ভাষা।

একদিন সকালে একটা কাক মাল্যবানের রেলিং-এর ওপর এসে বসল। কাকটা ঘুরে ব'সে মাল্যবানের দিকে তাকিয়ে অনেক বার ডাকবার চেষ্টা করল, কিন্তু কিছুতেই গলার ভেতর দিয়ে আওয়াজ বেরোল না পাখিটার। গলায় হিম লেগে স্বর ব'সে

গেছে। আবার যে আওয়াজ ফিরে পাবে পাখিটা হয়তো তা বোঝে না। নিজের গলার আওয়াজ হারিয়ে না জানি কী সে ভাবছে। মাল্যবান তাকে একটা বিস্কুটের টুকরো ছুঁড়ে দিল। কাকটা ঘরের ভেতর ঢুকে বিস্কুটের টুকরো-টাকরা খাচ্ছে, কাগজপত্রের ভেতর খচ-খচ করে লাফাচ্ছে। মাল্যবানের ঘরে অনেক-ক্ষণ রইল কাকটা—কয়েক টুকরো বিস্কুট খেল।

হপ্তা-খানেক পরে বোর্ডিং-এর বারান্দায় পায়চারি করতে-করতে মাল্যবান দেখল, গাঁটারি-বৌঁচকা নিয়ে একজন ভদ্রলোক বোর্ডিং-এর একটা বড় অন্ধকার দুর্গন্ধ কামরায় চুপচাপ বসে আছে। যেমন কামরা, তেমন তার মানুষ—এ-দু'জনের দিকে তাকালে জীবনের প্রত্যাশা ভরসা ভুইপটকা হয়ে ফুরিয়ে যায়। মাল্যবান কয়েকদিন দেখল, ভদ্রলোক চুপচাপ বসেই থাকেন শুধু, কারুর সঙ্গে কথা বলেন না, কিছুর না। মাঝে-মাঝে চশমা এঁটে এক-আধটা বই তুলে নেন, কিন্তু পড়া যে বেশি দূর এগোয়, তা মনে হয় না।

একদিন ভদ্রলোকটির ঘরের ভেতর ঢুকে মাল্যবান বললে, 'কেমন আছেন?'

নাকের ডগা থেকে চশমাটা কেমন একটা এলোমেলো টুনটুনির ঠ্যাঙের মতো খসিয়ে নিয়ে বাঁ হাতের আঙুল দিয়ে দু'টো চোখ কচলাতে-কচলাতে বললেন ভদ্রলোক, 'আমার শরীর বিশেষ ভালো নেই।'

'কী হয়েছে?'

'এই ক'দিন থেকেই জ্বর—'

'তা, এ-ঘরে থাকেন কেন—'

'কোথায় থাকব আর?'

পকেট থেকে জড়িবড়ি একটা ন্যাকড়ার নুড়ি বার করে চোখের পিঁচুটি পরিষ্কার করতে করতে ভদ্রলোকটি বললেন, 'স্ত্রী মারা যাবার পর থেকেই বাসা ছেড়ে দিয়েছি—'

'ওঃ!'

'এই মাস-পাঁচেক হল মারা গেছেন। পঁচিশ-তিরিশ বছর এক নাগাড়ে ঘর-সংসার করেছি। ছেলেপুলে নেই। এখন আর পোড়ো বাড়িতে মন টেকে না। পয়মস্তদের মুখ দেখতে চ'লে এলুম তাই—আপনাদের পাঁচ-জনের।'

মাল্যবানকে শুধোলেন, 'আপনার স্ত্রী বেঁচে আছেন তো?'

'আছেন—আছেন—' মাল্যবান কেঁপে-কেঁপে মস্তপড়ার মতো করে বললে।

'বাপের বাড়ি গেছেন বুঝি?'

মাল্যবান একটু খতমত খেয়ে বারান্দার রেলিং-এর দিকে, যেখানে কাকগুলো এসে

বসত সে-দিকে; কুয়াশার যে শুঁড়িপথের ভেতর দিয়ে গোলদীঘির নিমগাছে উড়ে যেত তারা সে-দিক পানে, তাকিয়ে রইল।

‘বাস্তবিক, আমাদের অবস্থা আপনি বুঝবেন না,’ ভদ্রলোক কাঁচাপাকা দাড়ির ওপর হাত রেখে বললেন, ‘কেউ বোঝে না। আমার স্ত্রী একটা শাদা উলের গোলা হাতে ক’রে হাসতে-হাসতে চ’লে গেলেন—’

‘উলের পেটি?’

‘হ্যাঁ, ভেস্ট বুনছিলেন আমার জন্যে—’

‘ওঃ!’

‘বুনছিলেন আশ্বিন মাসে—দেশে শীত পড়বার আগে! গ্যালো শীতে গরম জামার অভাবে খুব কঁদেছিলুম; না, তত বেশি কুঁদিনি বটে, আমি তো ছেলেমানুষ নই; তবে কোঁ-কোঁ করতুম খুব, সত্যিই ভারি শীতকোঁৎকা হয়ে গেছিলুম, টের পেয়েছিলেন উনি। কাজেই এবারে উলের জামা বানিয়ে দিচ্ছিলেন—’

ভদ্রলোক কিছু-ক্ষণ চুপ ক’রে থেকে বললেন, ‘আমাকে বলেছিলেন যে তোমাকে দু’দিনেই ভেস্ট বুনে দোব; ব’লে দিনরাত ‘কুরুচ’ কাঁটা চালিয়ে যেতে লাগলেন। একুনে চারটে হাত, বুঝলেন মশাই, দু’হাতে ভেস্ট বোনো, দু’হাতে সংসারের ব্যাগার ঠ্যালা; বাটনা কুটনো রান্না, আমার চানের জন্যে গরম জল, আমার বাতকোমরে তেল মালিশ,—ধনেশ পাখির তেল, —আমার নাম বিপিন ঘোষ—’

বিপিনবাবু বললেন, ‘সে আর এক হিন্দি, আপনাকে পরে বলব কী ক’রে ধনেশপাখির তেল জোগাড় হল; রাস্তায় যে ফিরি ক’রে, বেড়ায়, সে-জিনিস নয়, খাঁটি মাল, এতেও আমার গিন্নির হাত ছিল—’

‘গিন্নি বটে,’ বিপিন ঘোষের দিকে তাকাতে-তাকাতেই মাল্যবান তার চোখ দু’টোকে হোঁৎ ক’রে কড়িকাঠ ঘুরিয়ে এনে খুব একটা সার্থকতা বোধ ক’রে বললে, ‘এখনে-সেখনে পাঁচি খেঁদি, এর বউ ওর বউ—সব ডাঁটো তোতাপুরি তো। আপনি হাড়েমাসে কিষণভোগটা পেয়েছিলেন, দাদা, আহা-হা, চ’লে গেলেন!’

‘আপনাদের পাঁচ-জনের আশীর্বাদে পেয়েছিলুম,’ বিপিনবাবুর কাঁচা ঘায়ে খোঁচা লাগলেও নিজেকে সামলে নিয়ে তিনি বললেন, ‘চ’লে গেছেন আপনাদের আশীর্বাদ মাথায় ক’রে—’

মাল্যবান অবাধ হয়ে তাকিয়ে দেখল, এ-কথা বলতে গিয়ে বিপিনবাবু একটুও টসকালেন না, কারখানার থেকে শিরা, গ্রন্থি, জ্বৎপিণ্ড তৈরি ক’রে এনেছে যেন লোকটা।

‘উলের জামা দু’ দিনেই শেষ ক’রে এনেছিলেন প্রায়—এই এত বড় প্রমাণ-সাইজের ভেস্ট, দেখছেন তো আমার কেমন দশাসই চেহারা—’

বিপিন ঘোষ পকেট থেকে এক বাস্ক কঁাচি-সিগারেট বার ক’রে মাল্যবানের দিকে এগিয়ে দিয়ে বললেন, ‘নিন, স্যার,—’

নিজে একটা জ্বালিয়ে নিয়ে বললে, ‘ভেস্ট বোনা শেষ হয়ে এসেছে, এমন সময় আমি তাঁকে সাত-পাঁচ একটু বিশেষ ঘরোয়া আলাপ—মানে, আমিই তাঁকে সেদিনকার রাস্তিরটার জন্যে আগের থেকে বায়না দিয়ে রাখছিলাম; কথায়-কথায় ওঁর কেমন বুননের ঘর ভুল হয়ে গেল—সমস্ত জামাটাকে খুলে ফেলতে হল আবার—’

‘আহা!’

‘আবার মরিয়া হয়ে আরম্ভ করলেন। তার ওপর রাতে কিছুটা অত্যাচার হলে সেই বায়নার কাজে; কাজটা একটু বাড়াবাড়িই হয়ে গেল—প্রায় শেষ-রাত অন্ধি। রক্তের চাপ বেড়ে গেল খুব। সকালবেলা একটু দেরিতে উঠে রোদে গিয়ে দাঁড়ালেন সেই উল আর ‘কুরুচ’ কঁাচা নিয়ে। আমি একটা জলচকিতে ব’সেছিলুম মুখোমুখি। আমার সঙ্গে হেসে-হেসে কথা বলতে-বলতে, ব্যাস, ভিরমি খেয়ে প’ড়ে গেলেন। তখুনি হয়ে গেল—’

বিপিন ঘোষ আর কোনো কথা বললেন না। একটা সিগারেট—দু’টো সিগারেট—তিনটে সিগারেট শেষ করলেন তিনি। তারপরে মাল্যবানের দিকে তাকিয়ে নিজের গলার কণ্ঠটার ওপর হাত রাখলেন বিপিন ঘোষ। চোখ দু’টো অনবরত নাচতে লাগল তাঁর। একটা জহরকোট গায়ে এঁটে তাড়াতাড়ি নিচে নেমে গেলেন তারপর।

মাল্যবান অবিশ্যি লেই দিনই অফিস থেকে ফিরে উৎপলার কাছে গেল।

গিয়ে বললে, ‘না, মেসে আর না।’

‘কেন?’

‘আমি আজই চ’লে আসছি।’

‘কোথায় থাকবে, শুনি।’

‘যে জায়গায় ছিলাম—নিচের তলা—’

‘সেখানে জায়গা নেই।’

মাল্যবান বললে, ‘এ-বাড়ির কোনো ঘাপটিতে প’ড়ে থাকব, সে-জন্যে ভাবতে হবে না।’

‘ক্ষেপেছ?’ উৎপলা একটু মেজাজে-মেজাজে বললে, ‘আড়ি পাতবার জায়গা নেই বাড়িতে; তুমি বেশ রঙে আছ খুব যা হোক। সঙ্কুলান হবে না, তোমার মেসেই থাকতে হবে; ওদের তো আমি তাড়িয়ে দিতে পারি না।’

‘কিন্তু, এটা তো আমার বাড়ি।’

‘তা যদি বলো, তাহলে মেজদা’কে নিয়ে আমরা অন্য ফ্ল্যাট ভাড়া করি—’

‘না, না, সে-কথা আমি বলছি না—’ একটু বলার বাড়াবাড়িই হয়ে গেছে অনুভব ক’রে মাল্যবান বললে, ‘তুমি চ’লে গেলে এ-বাড়িতে এসে কী হবে আর। সে তো মেসের মতনই হয়!’

একটা কথা বলতে হবে ব’লে মাল্যবান বললে, ‘মেসের বিছানায় শুয়ে থেকে এক-এক দিন রাতে বড় ভরসা হারিয়ে ফেলি। আমার মনে হয়, যদি ম’রে যাই, তাহলে তোমার সঙ্গে আর কোনো দিন দেখা—’

উৎপলার মুখের দিকে তাকিয়ে মাল্যবানের জুং লাগল না তেমন; যে-কথাটা পেড়েছিল, সেটা শেষ করতে গেল না আর বললে, ‘ঐ যা, আমার লাইফ-ইনসিয়োরেন্সের প্রিমিয়ামগুলো দিয়ে দিয়েছ তো। টাকাকড়ি তো তোমার কাছে রেখে গিয়েছিলাম—’

‘খরচ হয়ে গেছে।’

‘খরচ হ’ল! তা হবেই তো, আজকাল তো রাবণের চিতে জ্বলছে কিনা এই বাড়িতে।’

‘মেজদা বলেছেন তোমাকে আর-একটা পলিসি নিতে।’

‘তা আর হয় না।’

‘কেন, ব্যেস তো তোমার আছে।’

‘না, ব্যেসের জন্যে নয়।’

‘মেজদা বলেছেন, মেডিকেল টেস্টে ঠেকবে না, তিনি পাশ করিয়ে দিতে পারবেন।’

‘তিনি এজেন্ট, তাঁর গরজ ঢের’, মাল্যবান এঁচড়ে পাকা ছেলের মতো একটু ঠাট্টা অমান্যের হাসি (মনে হচ্ছিল উৎপলার) ছড়িয়ে বললে। কেমন সেয়ানার মতো মুখ ক’রে ব’সে রইল, আসল জায়গায় মাল্যবানকে ধরা যতো সহজ মনে করেছিল উৎপলা, তা নয় যেন।

‘মেজদার কম্প্যানিতেই তোমার করা দরকার।’

‘তা জানি জানি। করবার সাখি থাকলে করতাম বৈকি। যে—দু’টো আছে, তা ল্যাপ্‌স্ না করলেই আমাদের কুলিয়ে যাবে—’

‘না, না, ক’রে ফ্যালো।’

‘টাকা নেই।’

‘সে আমি বুঝব।’

‘তা দেখো। কিন্তু আমি যা বলছিলাম, মেসে থেকে কেমন চল শুকিয়ে যায়—এক-এক দিন রাতে; বিয়ে করবার আগে তো মেসে থাকতাম, কিন্তু এখন পারছি না, কিছুতেই পারছি না। মেসের বাবুরা বলে, বেশ বনে-জঙ্গলে তো চরছেন দাদা হাতির মতো, আবার খেদার হাতি হবার সাধ।’

‘বলে নাকি?’

‘আমি তো বাড়ির হাতি,’ মাল্যবান বললে, ‘বন দিয়ে আমি কী করব?’

‘বল নাকি তুমি? রাজবাড়ির হাতি বল নাকি নিজেকে?’

‘বলি শিববাড়ির হাতি—’

‘কেন, শিব বাড়ির কেন?’

‘ঐ যা মুখে আসে, তাই বলি। আমি কাল মেস থেকে উঠে আসব।’

‘মেসে গিয়ে তোমার শরীর সেরেছে,’ উৎপলা বললে, ‘হুট ক’রে কিছু ক’রে বোসো না। থাকো মেসে কিছুদিন। মেসেই তো বরাবর ছিলে, মেস-মেস খাত হয়ে গেছে তোমার, ঘর-সংসার মানাচ্ছে না ঠিক। সে-দিন আমার ভাইপো-ভাইবীদের

জন্যে নিচের ঘরটা গোছাচ্ছিলাম, মেজবৌঠান বললে, ঘরটাকে শালগ্রামটি মেসের কামরার মতোই ক'রে রেখেছে দেখছি—'

'তাই নাকি? তুমি কী বললে?'

'বলব কী আর। বুদ্ধি খরচ ক'রে কথা বলতে হলে চুপ ক'রে থাকতে হয়।'

মাল্যবান চারদিকে চোখ পাকিয়ে তাকালে, একটা টেকুর তুলল, গোঁফের কোণায় একটা মোচড় দিয়ে বলল, 'মেজ বৌঠান যা খুশি তা বলুন। আমার স্ত্রী-সন্তান নিয়ে নিজের মনের ভাবে থাকবার অধিকার আমার রয়েছে। আমার যা খাসদখল, তা ফেলে মেসে গিয়ে আমি থাকব?'

মাল্যবান একটা চুরুট জ্বালিয়ে নিয়ে বললে, 'স্বামীকে কি মেজ বৌঠান মেসে পাঠিয়ে সুখ করেছেন?'

উৎপলা টিলে খোঁপা খসিয়ে ফেলে চুলের গোছা হাতে তুলে আঁট ক'রে খোঁপা বাঁধতে বাঁধতে বললে, 'ওদের তো আর আমাদের মতো নয়—'

'হয়েছে, হয়েছে', মাল্যবান শিংশপা রান্ধসীকে কাছে না পেয়ে দাঁত দিয়ে কামড়ে চুরুটটাকে সেপাট করতে-করতে বললে, 'পাঁচ রকম দশ রকম, সব রকম জানা আছে আমার। ল্যা-ল্যা করতে-করতে আমি পরের বাড়ি চড়াও করতে যাই না তোমার ভাজের ভাতারের মতো। আমার নিজের রকম নিয়ে আমি নিজের বাড়ি থাকব—শালগ্রাম হব, শিবলিঙ্গ হব—যা খুশি হব—ওদের কী—'

উৎপলা মেজাজ না চড়িয়ে ঠাণ্ডা ভাবেই বললে, 'ঠিক কথাই তো। তবে কালকে হবে না। আট-দশটা দিন পরে এসো, নিচের ঘরটা তোমাকে ছেড়ে দেবার ব্যবস্থা হচ্ছে—'

শুনে মাল্যবানের মনের গরমটা স্নিগ্ধ হয়ে এলো 'আট-দশ দিন পরে?'

'হ্যাঁ।'

'নিচের ঘরটা খালি ক'রে দেবার ব্যবস্থা হচ্ছে?'

'তা হচ্ছে।'

'কে করছে ব্যবস্থা?'

'আমরাই।'

ব্যবস্থা তো হচ্ছেই তার জন্যে, উৎপলাই ব্যবস্থা করছে, মিছেই চুরুটকে কামড়ে ছিঁড়ে ফেলেছে সে। লোকসানি চুরুটটাকে ফেলে দিয়ে পকেট থেকে একটা টাটকা চুরুট বের ক'রে মাল্যবান বললে, 'আমি ও-সব তেমন মানি-টানি না, তবে তথ্য হিসেবে জিনিসটা মন্দ নয়—'

'কোন জিনিসটা?'

'ঐ যে—আমাদের রাজঘোটকে বিয়ে হয়েছিল—তোমার মেজদা ঠোট ওল্টালেও তোমার বড়দা সেজদা খুশি হয়েছিলেন—তোমার বাবা তো খুবই—'

মাল্যবান খুব গনগনে, আশুনে বেশ বানিয়ে ফেলল চুরটটাকে কথা বলার ফাঁকে—ফাঁকে চুরটটাকে বেশ প্যাঁচ মেরে টেনে-টেনে। কড়া গলায় একটু চাপা হাসি হেসে উৎপলা বললে, ‘কে, বলেছিল তো পরেশ ঘটক।’

‘হাঁ, তিন রাত্তির মাথা ঘামিয়ে তিনি স্থির করেছিলেন।’

‘রাজযোটক,’ উৎপলা ফিক ক’রে হেসে উঠল শঙ্খিনীর মতো চনমনে গলায়; ‘রাজযোটক—বিয়ের ফলাফল ফ্যাকড়া টেংড়ি বোলো গিয়ে পরেশ ঘটককে তার নির্বন্ধের বাইরে।’

‘তুমি পশুতকে উড়িয়ে দিতে চাও।’

‘পাণ্ডিত্য দিয়ে আমার কোনো দরকার নেই, আমি যা অনুভব করি, তাই বলি।’

‘কী কর তুমি—অনুভব?’

‘কথা বাড়াতে পারি না।’ উৎপলা তুষের আশুনে যেন বাতাস লাগিয়ে একটু ঝিক-ঝিক ক’রে উঠে বললে, ‘এখন তোমাকে মেসে থাকতে হবে। আট-দশ দিনে নিচের ঘরটা খালাস ক’রে দেয়া যাবে হয়তো, বলেছিলাম; কিন্তু তা হবে ব’লে মনে হয় না, মাস দেড়েক তো লাগবেই।’

উৎপলা এক পাটি সুন্দর দাঁত বের ক’রে হাসবার মতো মুখ ক’রে তবুও না হেসে গম্ভীর ভাবেই বললে। দেখতে-দেখতে দাঁতের পাটি অদৃশ্য হয়ে গেল তার। ঠোঁটের ওপর ঠোঁট মিশ খেয়ে কঠিন হয়ে রইল খুব আঁট সিঁদুরের কৌটোর মতো।

‘মেসে ক’দিন থাকব?’

‘যদি দরকার।’

‘মেজদারা কবে যাবেন?’

‘তা আমি কী ক’রে জিজ্ঞেস করব তাঁদের?’

‘তাঁদের নিজেদেরও তো একটা বিবেচনা থাকা দরকার।’

উৎপলা মাল্যবানের থেকে কয়েক ধাপ ওপরে দাঁড়িয়ে থেকে যেন বললে, ‘সেটা কি তুমি তাঁদের শিখিয়ে দেবে?’

হাতের চুরটটার দিকে চোখ পড়ল মাল্যবানের। চুরটটা দাঁতে আটকে নিয়ে টানতে লাগল। টেনে-টেনে বেশ ছাই জমেছে যখন চুরটের মুখে—তখনও সে কী করবে আর—চুরটটা টানতে লাগল। কয়েক মুহূর্ত কেটে গেলে মনে পড়ল মাল্যবানের। বিপিন ঘোষের গল্পটা উৎপলাকে বলতে শুরু করল! মুখবন্ধ শুনেই উৎপলা বললে, ‘দুধপোড়া গন্ধ বেরুচ্ছে না?’

‘কৈ, না তো।’

‘না, না, গল্পটা শোনো : ও, পাশের বাড়িতে দুধ উথলে পড়েছে হয়তো—’

পাশের বাড়িতে যে, তার টের পেল উৎপলা; নাক আছে তার, কান আছে, আরো

নানা রকম সূক্ষ্ম পক্ষী সংস্কার পশু অনুভূতি রয়ে গেছে তার, পাশের বাড়ির ঠাকুরটা যে হেঁসেল থেকে সঁরে গিয়ে পানের দোকানে গল্প করছে, তাত চোখ কান খাড়া ক'রে টের পেয়ে নিচ্ছিল সে, তবুও একটা খিচ রয়ে গিয়েছিল উৎপলার মনে 'আমাদের দুধ পুড়লে সর্ব্বনাশ—মেজদার—'

'তোমার উনুনে দুধ নেই। আমি জানি। এই তো হেঁসেল থেকে ঘুরে এলাম রাণ্ডী ছাঁচড়া রাঁধছে—' মাল্যবান চুরুট নামিয়ে বললে।

উৎপলা তার ঘন কালো চুলের (বেণীর ভেতরে কোনো ট্যাসেল জড়ানো নেই) মস্ত বড়ো আবদ্ধ খোঁপার ওপর হাত রেখে চাপ দিতে দিতে বললে, 'না রে বাপু, তোমার বিপিন ঘোষের কেচ্ছা শোনবার সময় নেই আমার। তুমি নিড়বিড়ে ব'লেই ও-সব বিশ্বেস করো। খুব ভোগা দিয়েছে বিপিন ঘোষ; কিছু টাকা খসিয়েছে নিশ্চয়।'

মাল্যবান বিস্কুর হয়ে কিছুক্ষণ চূপ ক'রে থেকে বললে, 'টাকা যদি কিছু চাইত আমার কাছে, আমি দিতাম বৈকি। কিন্তু টাকা চাইবার লোক বিপিন ঘোষ! তা নয়। তুমি তার সঙ্গে কথা বললে বুঝতে পারতে। লোকটার বাস্তবিকই সব গেছে। দশ মিনিট ব'সে পর-পর তিনটে সিগারেট খেল—আমার সঙ্গে একটা কথাও বললে না—তারপর একটু গলার কণ্ঠায় হাত দিতেই চেখ মুখ একেবারে পাঁশগাদার কুকরোটাকে কোথাও দেখতে না পেয়ে মোচলমানের ধেড়ে মোরগের মতো ভেঙে পড়ল যেন বিপিন ঘোষের। কোনো কথা না ব'লে একটা জহরকোট গায়ে দিয়ে বেরিয়ে গেল।'

মাল্যবান বিপিন ঘোষের সঙ্গে একশোয়াসে হয়ে গেছে; যেন তারই স্ত্রী মরেছে, ঘর ভেঙে গেছে, কিন্তু তবু ত অন্তর থেকে সহ্য করবার শক্তি শানিয়ে নিতে হচ্ছে তার, এমনই একটা ভাঙা কাসি জোড়া দেবার মতো ভরাট, সাহসিক মুখে উৎপলার দিকে তাকাল তার স্বামী।

'এমন উল্লুকও থাকে তোমার ঐ বিপিন ঘোষের মতো।'

'উল্লুক বললে, উৎপলা?'

'তোমার ট্যাক থেকে খসায়নি তো কিছু?'

'কেন খসাবে? তুমি ভেবেছ কী বলো তো দিকি—'

'ভোগা দিয়ে খসায়নি তো কিছু তোমার মতন ঢ্যাপচেপে মানুষের কাছে থেকে?'' উৎপলা চেখে-মুখে চিনি মিছরির দানা ছড়িয়ে মাল্যবানের কোমরে একবার নিজের হাতটা জড়িয়ে নিয়ে বললে; 'ভালোই করেছে তাহ'লে। কিছু লাগবে আমার কাজ। কত আছে সঙ্গে!' মাল্যবানের গলায় একবার হাতটা জড়িয়ে নিয়ে মিষ্টিমুখে একটা হ্যাঁচকা টান দিয়ে বললে, 'যা আছে, তাই দাও।'

মাল্যবান গড়িমসি করতে-করতে বললে, 'দিচ্ছি। কিন্তু আজ আর মেসে ফিরে যেতে হচ্ছে করছে না। এখানে একটা রাতের ব্যবস্থা হতে পারে।'

টাকা হাতে নিয়ে উৎপলা বললে, 'খেতে তো পারো এখানে এ-বেলা।'
'না, না, খাওয়ার কথা নয়; একটু ঘুমোবার ব্যবস্থা হতে পারে। কোথায় শোও
তুমি?'

'আমার পঞ্চাশটা টাকার দরকার।'

'আচ্ছা, ধার ক'রে দেব।—'

'কবে!'

'কালই। আজ পঁচিশ টাকা দিচ্ছি। কোথায় ঘুমোয় মনু?—আর তুমি—'

পরদিন মাল্যবান এসে বললে, 'ভেবেছিলাম, শীগগির এ-দিকে আসব না আর।'

উৎপলা কোনো কথা বলছিল না।

'কৈ, না এসে পারলাম না তো তবু।' মাল্যবান একটা চেয়ার টেনে বসল।

'ওখানে বসলে যে?'

'কেন কী হয়েছে?'

'দেখলে, আমি নিরিবিলা একটু কাজ করছি।'

শুনে মাল্যবান একটু তাড়া দিয়ে বললে, 'তা কাজ করো—কাজ করো—আমি
তো বাধা দিতে আসিনি। কার জন্যে ব্লাউজ সেলাই করছ?'

সেলাই-এর কলের হাতলটা আগলা মুঠোয় ধ'রে ঘোরাবে কিনা ভাবছিল উৎপলা।
জামাটাকে কলের সূঁচে ঠিক ক'রে গুছিয়ে নিয়ে উৎপলা কল চালাতে লাগল।

'সেলাইএর কল তোমার লক্ষ্মী। কেমন বন বন ক'রে ঘুরছে তোমার হাতে বিষ্ণুর
চাকার মতো একেবারে সতীদেহ কেটে ফেলে বাঃ! বাঃ!' বললে মাল্যবান; সতীদেহ
কেটে ফেলার কথা ব'লে সুভাষিতই বলেছে মনে হ'ল মাল্যবানের; নিজের মনের
বিজ্ঞান নির্জ্ঞানে যে অপর—উৎপলাকে কাঁধে নিয়ে ফিরছে সে টুকরো-টুকরো ক'রে
কেটে দিচ্ছে এ-উৎপলাকে।

উৎপলা বেশ কল নিয়ে থাকতে পারে, এষাজ সেতার নিয়েও। 'বড্ড একঘেয়ে
লাগে রাতের বেলা মেসে; এষাজ শিখে নিলে হত।'

'তুমি বাজারে এষাজ?'

'কেন, হবে না আমার?'

'বলে হরিকাকা কাছা দাও; হরিকাকা বলে, কাছা আমার খসল কোথায় যে
দেব—' উৎপলা কল ঘোরাতে-ঘোরাতে ঘুরিয়েই চলল, পট ক'রে সুতো কেটে
যাওয়ায় একটু থেকে নেড়ে-চেড়ে বললে, 'না, কাটেনি, ঠিকই আছে।'

'ববিনে সুতো আছে?'

'আছে, ঠিক আছে, হাওড়া ব্রিজ হয়ে আছে; নাও, সরো—দিক কোরো না।'

মাল্যবান উৎপলার হাতের চাকা-ঘুরনিব দিকে তাকিয়েছিল বটে, কিন্তু মনটা চোত মাসের ফলকাটা তুলোর মতো কত শত বাতাসে—শতধা নীলিমায় যে উড়ছিল।

‘ছেলেরা রাস্তায় সাইকেল হাঁকিয়ে যায় বেনেটোলা, নবীন পালের লেন, পটলডাঙা, কলেজ স্ট্রিট, কলাবাগান, হাতিবাগান, গোয়াবাগান—চৌরঙ্গীর চৌমাথা। ভারি রগড়, কিন্তু এক-একটা জিনিস কিছুতেই শিখতে পারলাম না—বাইক করা, উর্দু বলা, পায়জামা চপ্পল শেরওয়ানী কিংবা সায়েবী স্যুটে পাড়ায়-পাড়ায় ল’-ল’ ক’রে বেড়ানো—’

উৎপলা চুপচাপ কল ঘোরাতে-ঘোরাতে আরো বেশি নিঃশব্দ নিঃসম্পর্ক হয়ে পড়ল।

‘কেরানীর চাকরি আমাকে জুতিয়ে মারল। ইচ্ছে ক’রে এই সব ছুঁড়ে ফেলে দিয়ে একটু নিজের ভাবে থাকি, তুমি সেতার বাজাও, আমি শুনি—সারাটা দিন এইরকম।’

উৎপলা কলের দাঁতের ভেতর থেকে ব্লাউজটাকে বের ক’রে এনে একবার চোখের সামনে ছড়িয়ে দেখছিল; সেলাইএর এখনো ঢের বাকি। মাল্যবান যে অনর্গল পাঁচালী পেড়ে চলেছে, সে-দিকে কান না দিলেও অবচেতনার পথ দিয়ে মনের কানে কিছু-কিছু শুনেছিল।

‘ধরো, আর কুড়ি-পঁচিশটা বছর তো সামনে রয়েছে। জীবনের একটা রকমারি হবে নাকি এর মধ্যে? কী বলো তুমি রকমারি হবে তো বটে? ভালো হবে—সুভালাভালি কেটে যাবে? কী বলো গো?’

‘আরো কুড়ি বছর বাঁচবে ব’লে আশা কর?’

‘বঁচেও তো যেতে পারি।’

‘অত বেশি বঁচে কী লাভ?’ উৎপলা ব্লাউজের দিকে মন রেখে তবুও নিজের কথার দিকে মন দিয়ে শাস্তভাবে; ‘আমার নিজের কথাও বলছি—জীবনে আমাদের কী সম্ভব অসম্ভব বুঝলাম তো অনেক দিন ব’সে; এখন শান্তিতে স’রে পড়লেই তো বেশ—’

উৎপলার কথা শুনে মাল্যবান খানিকটা বিরক্ত বিচলিত হ’ল, পকেট থেকে মনের ভুলে বিড়ি বের ক’রে জ্বালিয়ে ফেলছিল, প্রায়, কিন্তু স্ত্রীর সুমুখে বিড়ি সে আজকাল খায় না, সিগারেটও বার করলে না, বললে, ‘বিদায় নিলে আমিই নেব, বঁচে থাকে তোমার ঢের লাভ আছে। আমি এক-এক দিন রাতে মেসের বিছানায় শুয়ে ভাবি; ভাবি তোমার কথা। বাস্তবিক বেশ পড়তা নেই বটে কি তোমার জীবনে? কত লোকজনের সোরগোল তোমার ঘরে দিনরাত। তুমি নরকে বসলেও আশে-পাশে একশোটা নষ্ট চন্দ্র। তোমার মেজদা আর বৌঠান—এঁরা তোমার কাছে থেকে যত সুখী, তুমি নিজে তার চেয়ে ঢের বেশি সুখী এঁদের পেয়ে। কি বলো?’

মাল্যবান চোখ বুজে কথা বলছিল। চোখ মেলে উৎপলার দিকে তাকাল। কাজ করছিল, কথা বলবার কিংবা মুখ তুলে তাকাবার সময় ছিল না উৎপলার।

‘সত্যিই, তোমার জিনিস ছিল ঢের, সম্ভবহারও ছিল—’ বলতে-বলতে মাল্যবানের মনে হ’ল নিজের বলিয়ে মুখটাকে দেখতে পেয়েছে সে; নিজের মুখটার মুখোমুখি এসে পড়েছে, মুখটা মুখ নেড়ে চলেছে শুধু উৎপলার হৃদয়ে প্রতিফলিত হতে গিয়ে প্রতিহত হয়ে ফিরে এসে কী ভীষণ মুখ নেড়ে চলেছে সে চিড়িয়াখানার একটা বানরের আকচার ছোলাভাজা চিবোবার মতো। এই হ’ল তার কথা বলা? ভাব প্রকাশ করা?

উৎপলা এক মনে কল চালাচ্ছিল। এর যে টনক না নড়ে, তা নয়, কিন্তু অন্য-কোনো যৌন পরিস্থিতিতে অন্য কোনো মানুষের সঙ্গে? আচ্ছন্ন সারস বকের মতো নিজের বকের পালকে মুখ গুঁজে সমাধান খুঁজছিল মাল্যবান, কিন্তু কিছু বের করতে পারল না সে।

বুকের পালক মাংসের ভেতর থেকে মুখটা খসিয়ে এনে যেন মাল্যবান বললে, ‘থাক, মৃত্যুর কথা আমরা কেউই না বলি যেন আর। বেঁচে : থাকা যাক যতদিন সময় বাঁচিয়ে রাখে। দেখা যায় কী হয়। ভরসা রাখাই ভালো। আমাকে একটা বাজনা শিখিয়ে দাও-না—এই এসাজ—’

‘হিমাংশুবাবু বেশ ভালো এসাজ বাজাতে পারেন, তাকে ধরো।’

‘তাকে ধরব? আমি কি হিমাংশুবাবুর ঘাড়ে এসাজ শিখতে চেয়েছি?’

‘কেন, খুব তো সহজ, তিনি তো প্রায়ই আসেন।’

মাল্যবান উৎপলার হাত, পেট্রোলিয়ামের গন্ধ, সেলাইএর কলের ঢাকা, ব্লাউজ তৈরির দিকে কিছুক্ষণ চুপ করে তাকিয়ে থেকে শেষে বললে, ‘নাঃ, বাজাতে কি সবাই পা’রে। মিছিমিছি বলছিলাম।’

এসাজের কথা সে আর তুলতে গেল না। ‘মনুর শরীর কেমন দড়ি পাকিয়ে যাচ্ছে দেখলাম! কী হচ্ছে?’

‘দড়ি পাকিয়ে যাচ্ছে।’ উৎপলা বললে।

‘কী খায়?’

‘কী জানি।’

‘পেটে সয় না হয়তো যা খায়, পেটের রোগ হয়েছে, শুকিয়ে যাচ্ছে তাই। না কি কিছু খেতেই পারে না, ভালো কিছু খেতে পায় না?’

উৎপলা একটা সেলাই-এর বই খুলে কতকগুলো নক্সার দিকে মন নিবিষ্ট ক’রে ছিল, মাল্যবান কী বলেছে না বলেছে তা সে শুনেছে কী না বোঝা যাচ্ছিল না, কোন উত্তর দিল না উৎপলা।

‘মনুর শরীর খাবাপ হয়ে যাচ্ছে।’

‘হচ্ছে না কি।’

‘আদ্যক হয়ে গেছে টের পাচ্ছ না তুমি?’

‘রোগে ধরেছে হয়তো,’ উৎপলা বললে, ‘হয়তো ওর বাপের মনের রোগে ধরেছে ওকে—’

মাল্যবান তাকিয়ে দেখল সেলাইএর বইটা ইংরেজি; বই নয়—একটা জর্নাল হয়তো; জর্নালের পাতা নেড়ে-চেড়ে দেখছে উৎপলা। একেবারে ঝুঁকে পড়েছে পত্রিকাটার ওপর। উৎপলা সেলাইএ এম.এ. পাশ করবে, ডক্টরেটও পাবে হয়তো, কিন্তু মনু তো সুতো শাঁখ সাপ হয়ে যাচ্ছে—কেমন সরু—কী ভীষণ সিটে—মরুক্ষেত্র। এই হালে চললে মাল্যবান মেসে থাকতে থাকতেই—এ বাড়ির হালচালের ভেতর মনুকে টিকিয়ে রাখা কঠিন হবে। কঠিন হবে।

‘মনুর লিভার খারাপ—সেই পিলগুলো দাও লিভারের?’

‘না।’

‘কেন।’

‘কোথায় হারিয়ে গেছে ওষুধটা।’

‘হারিয়ে গেল। তাহলে তো আজই কিনে নিতে হয়।’

‘তা দিয়ো।’

মাল্যবান কথাবার্তায় রকম-সকমে একটু নষ্টামির আঁচ ধরতে পেরে বললে, ‘মিছিমিছি কিনে দিয়ে কী লাভ—যদি না খাওয়ানো হয়।’

‘তাও তো বটে।’

এ-পথ নয়, ও-পথ নয়, ঠিক পথটা ধরা দরকার অনুভব করে মাল্যবান বললে, ‘তুমি তো বলছ এ-বাড়িতে কোনো জায়গা নেই।’

‘তাই তো জানি।’

ছাদে একটা ক্যাম্পখাট ফেলে শুয়ে থাকলে কেমন হয়?’

‘তা তুমি নিজে বুঝে দ্যাখো।’

‘তোমার কী মত?’

‘আমরা বাড়ি দেখছি।’

‘কেন?’

‘কিছুকাল বাপের বাড়ি থাকব গিয়ে। বড়দা আসছেন কলকাতায়—’

‘সেজদা আসছেন।’

বাড়িও দেখা হচ্ছে না, কেউই আসছেন না জানে মাল্যবান। বিচিত্র জ্ঞানপাপের বোঝাটা পিঠে-ফেলে সে উঠে দাঁড়াল। উৎপলা ব্যস্ত হয়ে কল চালচ্ছিল।

মাল্যবান চলে গেল।

মাল্যবান গোলদীঘিতে গেল। গোলদীঘিতে অনেকক্ষণ ঘুরল। তারপরে মেসে এসে দেখল। খাওয়াদাওয়ার পর বিছানায় শুতে গিয়ে মাল্যবানের মনে হ'ল মনুর জন্যে পিল কিনে দেওয়া হয়নি তো।

রাত কম নয়। তখনো দু'-একটা ফার্মাসী খোলা ছিল। এক ফাইল লিভারের পিল কিনে নিয়ে উৎপলাকে দেবার জন্যে একেবারে ওপরের ঘরে গিয়ে উঠল। গিয়ে দেখল মেজদা মেজবৌঠান আর উৎপলা তিনজনেই খাওয়াদাওয়ার পর ছাপরখাটের ওপর পা ছড়িয়ে হাসি তামাশ দোস্তা পানের মজলিশ বসিয়ে দিয়েছে। ওষুধের ফাইলটা উৎপলাকে দিয়ে মাল্যবান নিচে নেমে যাচ্ছিল। মেজদা বললেন, 'ও জামাই, পালালে যে—ও জামাই!'

মাল্যবান একেবারে নিচের ঘরে নেমে এল। দেখল ছেলেমেয়েরা সব ঘুমুচ্ছে। মনুর খাটের কাছে এসে দাঁড়াল; ছোট্টো মেয়েটার ধষের কাঠির মতো শরীরটা প'ড়ে আছে—ফুঁ দিলে উড়ে যাবে যেন—এ-শরীরে মাংস লাগবে এসে কোনো প্রক্রিয়ায়—কোনো রকম প্রক্রিয়ারই—সেটা সম্ভব ব'লে মনে হয় না; ওষুধে ভালো জায়গায় চেঞ্জ গেলে যে—কাঠামোর শরীর সারতে পারে আশা করা যায়, মেরে শণীরে সে-কাঠামোটুকুই নেই। হাড়ের মতন নয়—শুকনো সেলাহীকাঠির মতো কয়েকখানা হাড় আছে শুধু।

মশায় খাচ্ছে; বাতাস ক'রে মশারীটা ফেলে দিল মাল্যবান। মনুর বুকের ওপর কবলটা টেনে দিল।

মাল্যবানের মন শুকিয়ে যেতে-যেতে ভ'রে উঠল—কী জিনিসে? তা কামনা নয়—স্ত্রীলোকের জন্যে পুরুষের ভালোবাসাও নয়; মনুর জন্যেও—তার এই একমাত্র সম্ভানটির জন্যেই একটা নির্বিশেষ পিতৃস্নেহ শুধু নয়, কেমন একটা সর্বাঙ্গক করুণা এসেছে—মনুর জন্যে, যে-সব ছেলেমেয়েরা এখানে ঘুমিয়ে আছে, বিপিন ঘোষের স্ত্রী, বিপিন ঘোষ, মেজদা, বৌঠান, এমন-কি নিজের স্ত্রীর জন্যেও। এ-মুহূর্তে কোনো তিক্ততা বিরসতা বোধ করল না সে, কোনো যৌন আকর্ষণ বা যৌনাতীত গভীর ভালোবাসা—নারীকে ভালোবাসা—এ-সব স্তর ও ফাঁদ উৎরে গিয়ে একটা নির্জন

অন্তর্ভেদী সমভিব্যাপী দয়ার উজ্জ্বলতায় কয়েক মুহূর্তের জন্যে যেন অতিমানুষের মতো হয়ে উঠল মাল্যবান।

রাস্তায় নেমে মাল্যবানের মহাপুরুষদের মতো মনে হ'ল ভালোবাসা বা কামনা নয়, করুণাই মনুষ্যকে সমস্ত সৃষ্টির অগ্নিকারুকার্যের ভেতরে আপতিত শিশিরফোঁটার মতো খচিত ক'রে রাখে।

শ্রেম খুব বড়ো জিনিস বটে, নটীর প্রেমের চেয়ে নারীর প্রেম বড়ো, নারীর প্রেমের চেয়ে বড়ো সব্বায়ের জন্যে ভালোবাসা, পুরাণপুরুষের জন্যে নিবিড় আকর্ষণ। কিন্তু করুণা? একটা কীট, সেই মড়া বেড়াল-ছানাটা, মনু, বিপিন ঘোষের স্ত্রী, বিপিনবাবু নিজে, এমন-কি মাল্যবানের নিজের স্ত্রী—সকলেই তো মাল্যবানের হৃদয়ের করুণায় অভিষিক্ত হয়ে পুরাণ-পুরুষের প্রিয়পাত্র হয়ে উঠবে।

মাল্যবান মেসের দিকে হাঁটতে-হাঁটতে থমকে দাঁড়িয়ে বললে, 'ছি-ছি, এ-জন্যে অভিমান জেগেছে নাকি আমার হৃদয়ে? আমার প্রাণে সৃষ্টির বড়ো করুণা এসেছে ব'লে অহঙ্কার বোধ করছি? না, না,—করুণার সঙ্গে অভিমানের কোনো সম্পর্কই নেই; এ প্রেম নয় তো,—এ সবচেয়ে দীনতম জিনিস—তুচ্ছতম। আমি সবচেয়ে নিকৃষ্টতম—সব চেয়ে নিকৃষ্টতম—আমি সবাইর কৃপার পাত্র, সকলেই পরমপুরুষের করুণাভাজন, অতএব সকলেই সেই পুরুষের প্রিয়পাত্র—এই যে অনুভাব, এটা করুণা।

কিন্তু মেসের বিছানায় শুয়ে করুণা শীতের রাতের তুলোওঠা গরম লেপের ভেতর স্থলিত হতে-হতে যখন নারীপ্রেম নাগরীপ্রেম এমন-কি গ্রস্থি-মাংসে গিয়ে আঘাত করতে লাগল, তখন মাল্যবান পাড়াগাঁর ছেলেবেলার কত ছোলার ক্ষেত, বড়ো দীঘি, চাঁচের বেড়ার ঘর, শীতের রাতে পোয়ালের গরম খড়ের গাদি ফোড়নের মতো চারিদিকে শিশির ভেজা মাঠ, পেঁচার পাখার খসখসানি, দূরে সুভাবনীয়তম কালো পাখির ডাক—সময়ের ভাঁড়ার ভেঙে-ভেঙে মাল্যবান বার করতে লাগল এই সব। মিনিট দশ-পনেরো পরে মনে হ'ল মাল্যবানের অনেক মুখের হামলা, অনেক ঝামেলা, কী ভীষণ ওতপ্রোত ভাব—কী হট্টগোল!

আরো কয়েক মিনিট পরে : যদিও আর কয়েকটি মুখের দাবিও কম নয়, তবুও আজকের নিতান্তই সাময়িক প্রয়োজনের জন্যে নেহাতই আকস্মিক ঘটনার মতো একটি মুখ রয়ে গেল তার বুকের ভেতর; সে-মুখ তার স্ত্রীর নয়।

রাত তিনটের সময় মেসের টোবাচার থেকে ফিরে এসে হি-হি করে কাঁপতে-কাঁপতে মাল্যবান ভাবছিল : তার জীবনের সারাৎসার মুহূর্তে তার স্ত্রী কোনো কাজে লাগে না।

মেজদারা যতদিন রইলেন শরীর ও মনের নানা রকম অরুচি ও অস্বস্তি নিয়ে মাল্যবানকে মেসে থাকতেই হ'ল।

এই রকম ক'রে সাত মাস কেটে গেল। তারপর মেজদারা চ'লে গেলেন। কিন্তু বাড়িতে ফিরে এসেও মাল্যবান বিশেষ সুবিধে পেল না এবার আর। কোনো ওষুধপথ্য কিছুই গায়ে লাগে না, মনুর শরীর দিনের-পর-দিন কেমন যে হয়ে যাচ্ছে—এ-কথা ভেবে মাঝে-মাঝে দাম্পত্যজীবনের অমৃত যে বিষফল কিংবা বিষফল নয় বইটির ফল; বইটির ফল—তা যে বিষফল নয় কিংবা বিষফল, এ-ধৌকাটা ভুলে যেতে হয়;—প্রণয় আশঙ্কার চেয়ে দয়া জিনিসটাকে ঢের বড়ো ব'লে মনে হয় আবার।

অমরেশ ব'লে একটি মানুষ—মধ্যবিত্ত বা হয়তো আর-একটু ওপরের সমাজের—প্রায়ই আসছিল উৎপলার কাছে আজকাল। অমরেশের রং ফর্সা বলতে পারা যায় না—লস্বা চেহারা ঠাট আছে বেশ, মনের উৎকর্ষ তার শরীরের প্রতিভার মতো অতটা চোখে না পড়লেও সাংসারিক বুদ্ধিতে সে কৃতীকুশল—প্রায় সিদ্ধির স্তরে পৌঁছেছে। বয়স পঁয়ত্রিশ ছত্রিশ বছর হবে। বিয়ে করেছে আট-দশ বছর হ'ল—তিনটি ছেলেপুলে আছে। উৎপলার সঙ্গে কবে কোথায় তার পরিচয় হয়েছিল—হয়তো এখানেই এখনই প্রথম পরিচয়, জানা নেই মাল্যবানের কিছু। অমরেশ ও উৎপলা দু'-জনে মিলে অনেকটা সময় গান-বাজনা নিয়ে থাকে—দু'-জনের মেলামেশা শালীন স্বাভাবিক কিনা এই বিতর্কে অফিসে বাসায় অনেকটা সময় মাল্যবানের মন অভিভূত হয়ে থাকে—মনুর কথা ভুলে যায় সে—দয়া জিনিসটাকে ঢের অকিঞ্চিৎকর ব'লে মনে হয়।

এই রকম ভাবে দিন কাটছিল। মনু আজকাল নিচের ঘরে মাল্যবানের সঙ্গেই শোয়। অমরেশ সাইকেলে চ'ড়ে আসে। সাইকেলটা নিচের রেখে ওপরে চ'লে যায়; রাত নটা সাড়ে-নটা দশটার সময় বেরিয়ে যায়। তারপর মাল্যবান ওপরে খেতে যায়।

গিয়ে দ্যাখে উৎপলা এমনই নিজের ভাবে বিভোর হয়ে আছে যে কথা ব'লে তাকে বাধা দিতে ভয় করে। খেতে-খেতে মাল্যবান ভাবে উৎপলার অন্য-সমস্ত চেনা-পরিচিত লোকের চেয়ে এই অমরেশ ঢের আলাদা জীব : অন্য সবাই যেখানে হাৎড়েছে, ঘাঁৎঘাঁৎ খুঁজে ফিরেছে, অমরেশ সেখানে ঠিক 'শাদা-ওয়াল পিলাগের' ওপর হাত রেখেছে পাকা মিস্ত্রির মতো।

ভাবতে-ভাবতে খালার ভাতগুলো নোংরা কড়কড়ে শুকনো চিঁড়ের মতো মনে হয় যেন মাল্যবানের; ইঁচের কুচির মতো চিঁড়ে খেতে হবে ডাল দিয়ে মাছের-ঝোল দিয়ে; সব মিলে-মিশে সুরকি হয়ে যাচ্ছে, কিন্তু তবুও কী যেন কীসের একটা ভয়ে—কাকে ভয়, কেন ভয় ঠিক উপলব্ধি করতে পারে না সে—আস্তে আস্তে চিবুতে-চিবুতে নিঃশব্দে গলার ভেতর দিয়ে চালিয়ে নেয় সব। কিন্তু তবুও অমরেশ সম্বন্ধে একটা কথাও স্ত্রীর কাছে জিজ্ঞেস করতে ভরসা পায় না মাল্যবান।

বুঝতে পারল, নিজের মনটা তার স্বাতীর শিশির হ'লেও শরীরটা তার শুষ্ক নয়, কিন্তু শামুক-গুগলীর মতো ক্লেদাক্ত জিনিস। শরীরটার খাঁজে-খাঁজে যে রয়েছে মাংস—মাংসপিণ্ড, সেগুলোকে অনুভব করে মাল্যবান। একটা অদ্ভুত গলগণ্ডের মতন যেন শরীর—তার মন এক চিমটে সময়ের কিণার থেকে দু'-দিনের জন্যে ঝুলে আছে এই সৃষ্টির ভেতরে।

মনু খাচ্ছে; কিন্তু খেতে-খেতেই টেবিলে মাথা রেখে ঘুমিয়ে পড়েছে। মনুকে জাগিয়ে দেবে কিনা ভাবছিল মাল্যবান, না উৎপলা মনুকে কানে ধ'রে ঘুমের মিথ্যের থেকে ঘরের সংসারের গুমোট মিথ্যের ভেতর জাগিয়ে দেবে?

মনু ঘুমিয়ে আছে, কেউ তার দিকে নজর দিচ্ছে না।

অপরূপ চিত্রিনী যেন আজ শঙ্খিনী হয়ে উঠেছে—টেবিলের এক কিণারে ব'সে—খাচ্ছে না কিছু উৎপলা; চিনে মাটির ডিশ একটা সমানে রয়েছে তার, কিন্তু তাতে ভাত নেই, চোখ তার ছাদের ওপারে অনেকখানি খোলা পৃথিবীর দিকে ফেরাতে পারত সে, কিন্তু ছাদের দিকে পিঠ রেখে দেয়ালের পানে তাকিয়ে আছে সে—কিন্তু তবুও দৃষ্টি তার অনেক দূরে চ'লে গেছে—মাঝখানে দেয়ালটা কোনো বাধা নয়—চোখে তার ব্যথা নেই—উদ্দীপ্তিও নেই কিছু—আছে কেমন আলোর প্রতিফলনের থেকে টের পাওয়া যায় যে—আলোর উৎসকে সে-সবের আসা-যাওয়ার মতো একটা ঠাণ্ডা নিঃশব্দ ভাবনাময়তা; মনের এ-রকম আশ্চর্য পরিণতির ভেতর নিশ্চূপ হয়ে থাকতে উৎপলাকে তো দ্যাখেনি কোনো দিন মাল্যবান। এ কি ভালো, না মন্দ?

এর মানে কী?

'তুমি খাবে না, উৎপলা? 'মাল্যবান গলা পরিষ্কার ক'রে নিয়ে বললে। 'তুমি খাবে না?' এবার একটু জোরে বলতে হ'ল তাকে।

ঈষৎ ন'ড়ে উঠে উৎপলা বসবার ভঙ্গি একটু ঠিক ক'রে নিতে গেল। সে কী ভাবে বসেছিল? ধরণটা তো ঠিক মুহূর্তের উপযুক্ত নয়। ঘণ্টা-খানেক আগে এ-রকম ভাবে বসলেও চলত; কিন্তু এখন তো এরকম ভঙ্গি চলে না। তা ছাড়া শাড়িটা কোমরে কেমন ঢিলে হয়ে আছে—খুবই ঢিলে—একেবারেই খুলে গেছে তো—উৎপলা দাঁড়াতে গেলেই সমস্ত শাড়িটাই খ'সে মাটিতে লুটিয়ে পড়বে।

‘এখন ক'টা রাত?’

‘বেশ রাত হয়েছে, দশটার কম তো নয়।’ মাল্যবান বললে।

‘আজ খেতে দেরি হয়ে গেল।’

‘না, এমন কিছু নয়, আমার ক্ষিদে ছিল না।’

‘শীতের রাত—দশটা কম নয় তো।’

‘তুমি কার সঙ্গে কথা বলছিলে? এতক্ষণ? কে?’ আস্তে-আস্তে একটার-পর একটা প্রশ্ন পেড়ে উত্তরের জন্যে থেমে রইল মাল্যবান।

‘ও এক জন লোক।’ উৎপলা কোমরে হাত দিয়ে শাড়ি ঠিক ক'রে নিচ্ছিল।

মাল্যবান না দেখল যে তা নয়, খানিকটা রাতের ঠাণ্ডা টেনে নিতে নিতে দেখল আর-এক বার; উৎপলা দেখল যে মাল্যবান দেখল; মাল্যবানের টনটনে জ্ঞান নেই; বৌ তা জানে; কিন্তু তবু মাজার কাপড় আঁট-সাঁট ক'রে নিতে-নিতে উৎপলার মনে হ'ল : মানুষটা তো ঘোরেল কম নয়, আমার দিকে নজর পড়েছে তার; কিন্তু আমি কী করেছি! আমি তো কিছু করিনি।

‘ও একজন লোক যে, তা তো আমিও দেখেছি—’

‘তবে আর কী—দেখেই তো ফেলেছ।’

‘হ্যাঁ, যখন ওপরে উঠছিল, দেখেছিলাম মানুষটিকে। নিচে সাইকেল রেখে গেল।’

‘তারপর?’

‘আমি ওকে চিনি না তো। এ-বাড়িতে দেখিনি কোনো দিন এর আগে।’

উৎপলা নিজের ডিশের ওপর খানিকটা জল ছিটিয়ে হাত বুলিয়ে নিয়ে দু'চামচে ভাত রেখে বললে, ‘আমার কাছে যারা আসে, সকলকেই কি তুমি চেন?’

‘অল্পবিস্তর মুখচেনা হয়ে গেছে।’

‘কারা আসে বলো তো?’

‘তাদের নাম বলতে পারব না, তবে রাস্তায় দেখা হলে ভুল হবে না।’

‘চেনা আছে বুঝি সকলের—’

‘তা আছে।’ মাল্যবান আসল কথার দিকে ঝুঁকে প'ড়ে বললে, ‘কিন্তু, এ কে?’

ভাতের সঙ্গে অল্প মাখন মেখে নিয়ে একটু নুন আর কাঁচা লঙ্কা ঘষতে-ঘষতে উৎপলা বললে, ‘স্বী উদ্দেশ্য নিয়ে আসে তারা?’

‘তা আমি কী ক’রে বলব। সেটা তোমার নিজের নির্বন্ধের কথা। সেখানে তো আমি হাত দিতে যাইনি কোনো দিন।’

উৎপলা কাঁচা লঙ্কার বিচিগুলো বেছে-বেছে ফেলে দিচ্ছিল, বললে, ‘ভালোই করেছ, কিন্তু আজ হাত বাড়াচ্ছ কেন?’

‘মনু ষুমিয়ে পড়েছে।’

‘তা তো দেখছি।’

‘জাগিয়ে দেব?’

‘এখন না।’

‘ভাতগুলো তো চিঁড়ের মতো।’

‘ঠাণ্ডা হয়ে গেছে, কড়কড়ে লাগছে তাই।’

‘ঠাকুর এ-রকম বেলাবেলিই রেঁধে চ’লে যায় কেন?’

‘শীতের রাত, কতক্ষণ ব’সে থাকবে; হাতের আরো দু’-পাঁচটে কাজ সেরে বাড়ি যেতে চায়—সেই চেৎলায়—’ বলতে-বলতে খেতে আরম্ভ করল উৎপলা এবার; কাঁচা লঙ্কার কিছু-কিছু বিচি আছে এখনও ভাতের ভেতর; অনেকগুলোই সে বেছে ফেলে দিয়েছে।

‘আমি অবিশ্যি বসিয়ে রাখিনি তাকে।’

‘আমি তোমাকে বলিনি তো যে তুমি দায়ী—’

মাল্যবানের মনে হ’ল উৎপলার কথাবার্তায় আগের সেই খড়খড়ে ভাবটা কেটে গেছে যেন, কথা স্বাভাবিক, গলা নরম, আলাপচারি তাৎপর্যে মমতা না থাকলেও ভাবগ্রহণ আছে, আছে ষড়-ণত্বের চেতনা—মাল্যবানের সৌকর্যের জন্য।

পরদিনও সন্ধ্যের সময় অমরেশ এলো। অমরেশ তার সাইকেলটা মাল্যবানের ঘরের এক কোণায় তালা মেরে আটকে রেখে গেল। মাল্যবান অফিস থেকে ফিরে বিছানায় শুয়ে ছিল। তার দিকে একবার ফিরে তাকিয়ে অমরেশ বললে, ‘কী করছেন আপনি।’

‘শুয়ে আছি।’

‘অফিস থেকে এলেন?’

‘এই এলুম।’

‘আপনার স্ত্রী আছেন?’

‘হ্যাঁ, ওপরে আছে উৎপলা।’

অমরেশ ওপরে চ’লে গেল। মাল্যবান ঘরের বাতি নিভিয়ে দিল।

কিন্তু বাইরের একটা আলো ঘরের ভেতর ঠিকরে পড়ছে, অমরেশের সাইকেলটা ঝিক-ঝিক ক’রে উঠছে তাই। যখনই সাত-পাঁচ ভাবে মাল্যবান—অন্ধকারের ভেতর

চ'লে যায়; সুফলা ফলার মতো। অঙ্ককারটা কেটে সাইকেলটা বলসে ওঠে আবার; মাল্যবানের মনে হ'ল এ হচ্ছে উপচেতনার সঙ্গে চেতনার ঝগড়া; অবচেতনা ঘূমের দিকে টানে—মৃত্যুর দিকে; চেতনা অবহিত হতে বলে, টেলে সাজাতে বলে; আচ্ছা, টেলেই সাজাবে সে।

চা খাওয়া হয়নি তো। চা খাবে কি? ঠাকুর এসে জিজ্ঞেস ক'রে গিয়েছিল বাবু চা-জলখাবার খাবেন কিনা—তাকে না ক'রে দিয়েছে মাল্যবান।

গোলদীঘিতে যাবে কি? না, কৈ যাওয়া হচ্ছে কোথায়? মাল্যবান শুয়েই ছিল। ওপরে এক-আধটা গান হয়ে গেছে। এতাজও বেজে গেছে কিছুটা সময়। গান সহজে আসে—শীতের শেষে পাতা যেমন আসে শিমুলের জারুল পিয়ালের ডালে—ছেলেটির গলায়; খুব স্বাভাবিক ভাবে খুব ভালো গাইতে পারে সে; কোনো এক জায়গায় গিয়ে তারপর ব্যক্তিত্বের দিব্য স্পষ্টতা আছে ছেলেটির (ছেলেটি কেন বলছে অমরেশকে সে? চেহারায় সকালবেলায় সরসতা এখনও খানিকটা লেগে আছে ব'লে?);—সে কি স্বরকৌশলের সিদ্ধি শুধু? আন্তরিকতা? আত্মা? বুঝতে পারছিল না মাল্যবান। অমরেশের চেয়ে ভালো গান শুনেছে সে অবিশ্যি, কিন্তু এটাও আঘাত করে এসে—দু'রকম ভাবে যদিও—শিল্প শেফালীর আঘাতটাই তবুও নিবিড়তর যেন। এতাজ বাজাল কি উৎপলা? তারপর একঘণ্টা দেড় ঘণ্টা চুপ মেরে আছে সব—ওপরে কোনো লোকজন আছে ব'লেই তো মনে হয় না।

সাইকেলটা খুব বেশি ঝিকঝিক চিকঝিক করছে; এবং মালিকও আঁশটে দুধরাজের মতো ঝিকিয়ে উঠছে দোতলার ঘরে? সাইকেলের তাল খসিয়ে রাস্তায় নামিয়ে প্যাডেল ঘুরিয়ে ছুটে যেতে ইচ্ছে করে মাল্যবানের—এর মালিক যেমন সন্ধ্য না হতেই দিকবিদিক জ্ঞান হরিয়ে বত্রিশ নম্বর বাড়িতেই উপস্থিত হয় তবু—ছায়া যেমন সারাদিন দেহের আগে-পিছে ছুটে নাগাল পায় না, রাতের অঙ্ককারে শরীরের সঙ্গে বিনিঃশেষে মিশে যায় তবু, তেন্নি ভাবে এসে পড়ে অমরেশ; তেন্নি ভাবে কোনো বত্রিশ বত্রিশ-শো বত্রিশ-শো-অনন্তের দিগন্তে চ'লে যাবে নাকি মাল্যবান।

বত্রিশ-শো-অনন্তের দিগন্তে না গিয়ে শেষ পর্যন্ত গোলদীঘিতে বেড়াতে গেল; বেড়িয়ে যখন ফিরছে তখন প্রায় সাড়ে-নটা—এসে দ্যাখে অমরেশের সাইকেল তখনো দেয়ালে কাৎ হয়ে রয়েছে।

‘বাবু, আপনাকে ভাত এনে দিই?’

‘কেন?’

‘মা দিতে বলেছেন।’

‘দাও।’ মাল্যবান ঠাকুরকে বললে।

ভাত খেয়ে নিজের ঘরের ভেতর অনেকক্ষণ পায়চারি করল সে, কিন্তু সাইকেল গেল না।

মনু বিছানীর এক পাশে ঘুমিয়ে আছে। মাল্যবান ঘড়িতে দেখল প্রায় এগোরোটা বেজেছে; ওপরে গানবাজনা এক-আধবার দু'-চার মিনিটের জন্যে তড়পে উঠে অতলে শুরু হয়ে যাচ্ছে যেন।

মাল্যবান একটা চুরুট জ্বালিয়ে বিছানায় এসে বসল। চং ক'রে একটা শব্দ হ'ল, পাশের বাড়ির ঘড়িতে সাড়ে-এগোরোটা। এই বারে হয়তো ছেলেটি নেমে চ'লে যাবে।—কিন্তু, কৈ, নামল না তো সে। মাল্যবান ভাবল, গানবাজনা আবার শুরু হবে হয়তো কিন্তু, তাও তো হ'ল না। যতক্ষণ গান সরোদ হাসি তামাশা চলছিল অন্ধকারে টিল মেরে নিজেকে তবুও খানিকটা ব্যস্ত রাখা চলে। কিন্তু সব থেকে গেছে তো এখন—বেশি রাত বেশি অন্ধকার বেশি শীত : এখন কী? কী হচ্ছে এখন। যা হচ্ছে, তা হচ্ছে : মনের হেঁয়ালির কাছে মার খেয়ে কোনো লাভ নেই। মনটাকে সে খুব হাঙ্কা ক'রে নিল; যেন খুব মজাই হয়েছে ওপরের ঘষর, মনে ক'রে হাসতে লাগল সে; সাইকেলটাকে মনে হ'ল অমরেশের নেপালী বয়ের মতো, সাইকেলের ঝিকমিকানিটাকে ভোজালির বলসানির মতো; কোমরে ভোজালি গুঁজে অমরেশের নেপালী চাকরটা যেন বেশি রাতের নিরেট শীতে থুপী বুড়ির মতো ব'সে আছে, মনিব ওপরের থেকে না নামলে রক্ষা নেই তার, কিছু নেই; কিন্তু তবুও একটা আশ্চর্য প্রতীকের মতো যেন এই নেপালী, এই বোকা নেপালী ভোজালি—আজকের পৃথিবীর। স্ত্রী-পুরুষের সম্পর্ক, মানুষ-মানুষে সম্পর্ক, মানুষ ও প্রকৃতির সম্বন্ধে সূক্ষ্মতা হারিয়ে ফেলেছে—সফলতাও সরলতাও; হারিয়ে ফেলেছে সরসতা; আজকের বিমুঢ় পৃথিবীতে সমস্ত পরিচ্ছন্ন সম্পর্ক-গ্রন্থিকে ছেদ ক'রে অপরিমিত গন্ডমুখের অপরিমেয় মনোবল পথ কেটে চলেছে একটা বোকা নেপালী ভোজালির মতো। সময়কে প্রকৃতিকে পুরাণপুরুষকে (যদি থেকে থেকে কেউ) তবে কী হিসেবে ধ্যান করা যাবে আজ? প্রভু হিসেবে? সখা হিসেবে? পত্নী হিসেবে? না, তা নয়। স্বামী স্ত্রী বা সখা ভাবে নয়, সাধা হবে নেপালী ভোজালিভাবে; ঘুম আসছে না মাল্যবানের।

মাল্যবানের নিজের দোষ নয়; ঘুমেরও দোষ নয়; এই পৃথিবীরই দোষ, শতাব্দীর দোষ; —কিন্তু তবুও রাত তিনটের সময় জেগে উঠল যখন সে, তাহ'লে ঘুমিয়ে পড়েছিল কোনো এক সময়।

সাইকেলটা নেই।

রাস্তার দিকের খোলা দরজা দিয়ে হু-হু ক'রে শীত আসছে। উঠে গিয়ে দরজাটা বন্ধ ক'রে দিল মাল্যবান।

পরের দিন সন্ধ্যেরাত্রেই বেড়িয়ে ফিলে মাল্যবান ঠাকুরের কাছে শুনল যে অমরেশবাবু ওপরে বৌঠাকরুণের ঘরে ঢুকেছেন।

মাল্যবান খেল-দেল, খবরের কাগজ পড়ল, চুরুট টানল; তারপর কথা ভাবল সে; ভাবতে-ভাবতে কথাই ভাবল দু'-তিন ঘণ্টা।

রাত বারোটোর সময় অমরেশ নিচে নেমে এল।

‘আপনি এখনও জেগে আছেন চাঁদমোহনবাবু—’ মাল্যবানকে একটা হ্যাঁচকা ডাক দিয়ে লেপের নিচের আড়ষ্ট অবস্থার থেকে জাগিয়ে তুলে বললে অমরেশ। মাল্যবানের নাম চাঁদমোহন নয় তো। অমরেশ একটু জিভ নেড়ে লাট মারতে চাইছে নামটা নিয়ে, সেই নামে মাল্যবানকে ডেকে। তা হোক।

মাল্যবান মুখের থেকে লেপ সরিয়ে নিয়ে বললে, ‘ঘুমিয়ে পড়ছিলুম।’

‘তারপর?’ সাইকেলের তালা খুলতে-খুলতে অমরেশ বললে।

‘কোথায় যাচ্ছেন?’

‘আহিরিটোলা।’

‘এত রাতে?’

‘আহিরিটোলার গঙ্গায় নামতে হবে।’

‘এত রাতে?’

‘সাঁতার কাটব।’

মাল্যবান এবার আর কিছু বললে না। বালিশে শিরদাঁড়াটা ঠেস দিয়ে একটু উঁচু হয়ে বসল।

‘সে আমাদের একটা দঙ্গল আছে। চার হাত পায়ে নিমকের বস্তুর মতো ভূশ করে পড়ে এক-একটা সাঁতারু মুনিষ আহিরিটোলার গঙ্গায়।’

‘মুনিষ’ কেন বললে অমরেশ ‘মানুষ’ না বলে ভাবতে-ভাবতে মাল্যবান বললে,
‘এত রাতে গঙ্গায় নাওয়া হবে?’

‘নাওয়া না, মশাই। গঙ্গামুক্তিকার তেলক কাটবার জন্যে আমাদের জন্ম হয়নি, দাদা।
সাঁতার কাটব—দেখি কে কত দূর যেতে পারে, কার আগে যেতে পারে—’

‘ওঃ’, মাল্যবান বললে।

ছেলেটি সাইকেলটি খুলে রেখে মাল্যবানের টেবিলের এক কিনারে বসল।

‘চেয়ারে বসুন।’

‘এই বেশ বসেছি। আমাদের সাঁতার দেখতে যাবেন, চাঁদমোহনবাবু?’

‘এখন? এত রাতে?’

‘আচ্ছা, বেশ, বুড়োমানুষ আপনি, তাহলে বারুণী স্নানের সময় যাবেন। তখন গরম
প’ড়ে যাবে।’

মাল্যবান বললে, ‘কিন্তু, সত্যিই কি আর্হিরিটোলার ঘাটে সাঁতার কাটা হবে আজ।’

‘কী বলছি তবে আপনাকে। মেয়েরা অন্ধি দেখতে যাবে—’ নিজের ডান পায়ের
কড়া পালিশের নিউকাট উঁচিয়ে নিয়ে অমরেশ বললে, ‘এই ভগবতীর চামড়া ছুঁয়ে
বলছি ভদ্রলোকের মেয়েরা যাবে সব গুল বেঁধে আমাদের খেলা দেখতে, বেশ্যেরা
যাবে, ওদিককার পাড়ায়—পাড়ায় যেখানে যত বেশ্যে আছে—’

মাল্যবান চুরুট জ্বালাল।

‘রাঁড়ীদের সঙ্গে ভদ্রঘরের মেয়েদের কোনো মামলা হবে না, সার, কেউ কাউকে
দূর-দূর বলে তাড়িয়ে দেবে না। এরাও যে মানুষ, ওরাও তা অকপটে স্বীকার করবে,
সার।’

মাল্যবান অবাক হয়ে ভাবছিল, এই সেই সমাবেশ? একে নিয়ে উৎপলার রাত
বারোটো বাজে? থুতু না ছিটোলেও—কথা বলতে-বলতে জিভে-দাঁতে থুতু জ’মে যায়
যাদের—সত্যি-সত্যি না অবিশিষ্ট, রূপক হিসেবে—সেই রকমই অসার, অবুদ্ধিমান,
উচ্ছ্বাস-সর্বস্ব তো এই ছেলেটি; চেহারা লম্বা; গড়ন-পেটন ভালো; মুখ সুন্দর পুরুষ
মানুষের মতো; এসব বলে ভুশি হীরে হয়ে গেল উৎপলার কাছে। তাই তো হয়।
সৃষ্টিটা সংখ্যানবিশ বটে কিন্তু হিসেবতন্ত্রী নয়, কী রকম মারাত্মক ভুল বিষের মতন
মিশে রয়েছে নিখিলের রক্তের ভেতর, তার নিরবচ্ছিন্ন মন্ত্রণার প্রবাহের মধ্যে!

‘কিন্তু, স্বীকার করলেই তো শুধু হবে না,’ মাল্যবান বললে, ‘ওদের মানুষ করবার
পথ ঋতলে দিতে হবে তো।’

‘সে একটা মস্ত সামাজিক সমস্যার কথা হল—’

মাল্যবান চুরুট টানতে-টানতে বললে, ‘সবই সব হল। তা বটে, সাঁতার কাটা

দেখতে গিয়ে কি আর সামাজিক হেঁয়ালি মেটে। তবে হ্যাঁ, আপনি যা বলেছেন বেশ একটু ভ্রাতৃপ্রেম—ভগ্নাপ্রেম—ভাইব্রাদারি—কিন্তু ওদের তো ঢের খারাপ রোগ আছে।’

‘আছে বটে, কিন্তু মেয়েরা তো মেয়েদের রোগ দিতে পারে না। খুব হৃদয়তার সঙ্গে মেলামেশা, কিন্তু মেয়েরা তো পুরুষ নয়—’

মাল্যবান মুখের থেকে চুরুটটা নামিয়ে কিছুক্ষণ চর্মাচক্ষু এবং মনশচক্ষু—চার চোখ মিলিয়ে নিয়ে অমরেশের দিকে তাকিয়ে থেকে তারপর বললে, ‘ওখানে ছোকরাদের দলও তো বেশ ভারি।’

‘তাদের ভেতর দু’শকানকাটা খুব কম।’

শুনে মাল্যবান ঘাড় বাঁকাল; ঘাড় সোজা ক’রে চুরুট টেনে-টেনে ঘাড় বাঁকিয়ে অমরেশের দিকে তাকাল একবার। কিন্তু যে-কথাটি বলবে ভেবেছিলে তা বললে না, বাজে কথা পেড়ে মাল্যবান বললে, ‘এত ঠাণ্ডায় সাঁতার কেটে নিমোনিয়া হবে না তো।’

‘হবে—সেরে যাবে। না হয় ম’রে যাব।’

‘আরে কী বলে! ম’রে যাবার কী আছে। তা, আমার স্ত্রীকে কী ক’রে চিনলেন?’ মাল্যবান বেড়ালের থেকে চিতে বাঘ, চিতে বাঘ থেকে বেড়াল সন্তায় আসা-যাওয়া করতে করতে বললে।

‘এখন চলি, মাল্যবানবাবু, রাত হয়ে গেছে।’

মাল্যবান চুরুটটা নিভে গিয়েছে টের পেল। দেশলাই জ্বালিয়ে চুরুট ধরিয়ে মাল্যবান একটা বড়ো হুড়াডের ছানার মতো হঠাৎ উজিয়ে উঠে বললে, ‘সাইকেল এনে সটান যে ওপরে চ’লে গেলেন, আমার স্ত্রীর সঙ্গে কবে কোথায় পরিচয় ছিল আপনার, বলবেন না?’

খুব সোজা কথা জিজ্ঞেস করেছে মাল্যবান, সহজ উত্তর, এফুনি স্বাভাবিকভাবেই উত্তর না দিতে পারে যে অমরেশ তা নয়, কিন্তু তবুও সে বললে, ‘আমি আরও তো আসব আপনাদের এখানে। আর একদিন না হয় বলব।’ অমরেশ ওভারকোটের পকেট থেকে সিগারেটের টিন বার করল। একটা সিগারেট জ্বালিয়ে নিয়ে বললে, ‘সেই যে সামাজিক সমস্যার কথা বলছিলেন, সেটার বিশেষ কিছুই করা যাবে না আমাদের সকলের আর্থিক জীবনের সুবিধে না এলে। এদিক দিয়েই প্রথমে চেষ্টা করা দরকার। অবিশ্যি সমাজ-ভাবনা সম্বন্ধেও অন্ধ থাকলে চলবে না।’

মাল্যবান নিজের অনুভূতি ও উপলব্ধির নিচে অমরেশের কথাগুলো পুরোনো

নোংরা খবরের কাগজের মতো চেপে রেখে দিয়ে বললে, ‘আপনি নিজে তো খুব সচ্ছল—’

‘আপনার স্ত্রীও তো খুব। দেখছি তো।’ ব’লে অমরেশ যেন কোনো ইঙ্গিত করেনি, কোনো খারাপ ইঙ্গিত করেই নি এমনই স্নিগ্ধ নির্দোষভাবে হাসল। কিন্তু হাসিটা কেটে গেল, অমরেশের মুখের চেহারা হল আরেক রকম যেন; অনুধাবন ক’রে অস্পষ্টতার ভেতর থেকে তবুও কোনো স্পষ্টতা খুঁজে পেল না মাল্যবান, হাতের চুরুটের আগুন অঙ্গারের দিকে তাকিয়ে রইল। ঘরটা নিস্তব্ধ হয়েছিল। দু’জনের চুরুট সিগারেটের ধোঁয়া পরস্পরকে কাটাকাটি ক’রে কথা বলছিল শুধু।

‘আমার স্ত্রীটি তৃতীয়পক্ষের, আমার চেহারা দেখে তা মনে হয়, মাল্যবানবাবু?’ অমরেশ বললে, ‘প্রথম পক্ষের স্ত্রীটি এখনো আছে, বাপের বাড়িতে থাকে, আমি তাকে নিয়ে ঘর করব না। দু’নম্বরের কাত্যায়নী ম’রে গেছে। এই তিন নম্বর। এ স্ত্রীর ছেলেপুলে তিনটি। আর একটি এই মাঘে হচ্ছে।’

মাল্যবানের মনে হল অমরেশের গলার সুর, শরীরের বাঁধ, সমস্ত, অন্তরাস্তর থেকেই কেমন—একটা সুদৃঢ় (কিন্তু) সুলভ আত্মতুষ্টি চুঁইয়ে পড়ছে। আজকালকার এই শিশ্নোদরতন্ত্রী এবং যা শিশ্নোদর নয় কিন্তু তবুও উচ্ছ্বল—এই সব মূল্যবিশৃঙ্খলার পৃথিবীতে অমরেশের এই কথাগুলো বেশ স্বাভাবিক; স্বাভাবিক অতএব ভালো? ভালো না মন্দ? সে নিজে কী রকম? মাল্যবান নিজের চুরুটের ছাইচাপা আগুনের এক-আধটা কণিকার দিকে তাকিয়ে ভাবছিল। মূল্যবিশৃঙ্খলা? বিশৃঙ্খলরা একেই শৃঙ্খলা মনে করে। মূল্যশৃঙ্খলা কী? কী জিনিস মাল্যবানের মতে? সে নিজে যদি মূল্যশৃঙ্খলা চায়, তাহলে তার নিজের বাড়িতেই সে জিনিস এ-রকম সুসদৃশ ভাবে অনুপস্থিত?

‘রাত তো কম হয়নি।’

‘বারোটা বেজে গেছে।’ অমরেশ বললে।

‘শীতের রাত বারোটা....আমার স্ত্রীর কাছে কী দরকার ছিল আপনার?’

‘কথা বলতে বলতে রাত তো হবেই—’

‘দেখছি তো হচ্ছে। এতদিন তো আপনাকে দেখিনি এখানে।’

সিগারেটের ধোঁয়া ছাড়ার ধোঁয়া ঘোরার সঙ্গে সঙ্গে মাথাটা নেড়ে চেড়ে নিয়ে অমরেশ বললে, ‘আপনারা যে এখানে আছেন তা তো জানতুম না আমি।’

‘কী ক’রে জানতে পারলেন তবে?’

‘চাঁদমোহনদা, চিনি তো পিঁপড়ের গন্ধ পায় না। পিঁপড়েকেই খুঁজে পেতে বার করতে হয়,’ অমরেশ খুব উল্লাস বোধ ক’রে বললে, ‘আপনারা বেশ ঝাড়ঝাপটা

থাকতে চান, ছোঁয়াছানা বাঁচিয়ে খুব যা হোক; কিন্তু তা নয় না; পিঁপড়েতে চিনিতে ধূল পরিমাণ হয়ে যায়, চিনি পিঁপড়েকে বেছে খায়, দেখেছেন?’

মাল্যবানের মনে হচ্ছিল, অমরেশের কথার কোনো বাঁজ নেই, যেন দু’টো ঠ্যাঙের বদলে আটটা ঠ্যাং অমরেশের, মাকড়সার মতো, কেমন ল্যাং-ল্যাং ল্যাং-ল্যাং করছে সব সময়েই কখনো গাঢ় সবুজ, কখনো গাঢ় লাল মাকড়সানীদের দেখছে ব’লে—সমস্ত জীবন ভ’রে। চেহারার চেকনাই আছে, টাকা আছে ব’লে বিগড়ে গেছে সে—অনেক মেয়ের হাতেই।

উৎপলাও ইন্ধন দিচ্ছে?’

মাল্যবান মুখের থেকে চুরুটটা নামিয়ে আন্দাজ করছিল ইন্ধনটা কত দূর—কী ধরনের—

ভাবতে ভাবতে কেমন যেন সমাধিভূত হচ্ছিল; মুখে সে বলছিল, ‘বসুন, বসুন, অমরেশবাবু, বসুন।’ কিছু অনেকক্ষণ হল ঠোঁট জিভ নাড়া স্তব্ব ক’রে দিয়েছিল তার মন; নিমেষনিহত হয়ে ছিল; চুরুট নিভে গেছে—

‘চলি, মাল্যবানবাবু।’

‘আচ্ছা—’

‘কাল আসব।’

‘আসবেন। আসবেন।’

দিন সাতেক পরে রাত দশটার কিছু আগেই অমরেশ বেরিয়ে গেলে পরে মাল্যবান খাবার জন্যে ওপরে চ’লে গেল।

ওপরে উঠে সে দেখল উৎপলা খাবার টেবিলের এক কিনারে নিঃসাড় হয়ে ব’সে আছে; টেবিলের ওপর মাথা রেখে মনু ঘুমোচ্ছে।

‘আজকাল খেতে বড্ড দেরি হয়ে যায়।’ মাল্যবান বললে।

‘কটা বেজেছে?’

‘দশটা।’

‘দশটা কি বেশি রাত?’

‘সকলের কাছে বেশি নয়,’ মাল্যবান বললে, ‘মনু তো না খেয়ে ঘুমিয়ে পড়েছে। বেশি রাত হয়েছে ব’লে ঘুমোয়নি, খুব শীতে কাণ্ডেরে ঘুমিয়েছে হয়তো।’

উৎপলা বললে, ‘তুমি তো আগে খেলেই পার। রান্নাঘর তো তোমার নিচের ঘরের লাগাও। খাবার সময় মনুকে নিয়েও তো বসতে পার—’

‘হ্যাঁ, কাল থেকে একটা অবস্থা ক’রে নিতে হবে। যে লোকটি তোমার কাছে

আজকাল খুব ঘন ঘন আসছেন তাঁর জন্যেই খানিকটা বিশৃঙ্খলা এসে পেড়েছে পরিবারের ভেতর। ও কে?’

‘চিনি না।’

‘মানে যে—’ উৎপলার কথা কপচাবার ইচ্ছে ছিল না, বললে, ‘চিনি না। এই মানে। মানে—কোচড় ভ’রে নিয়ে যাও, চিবিয়ে খাও মানে। এই মনু! মনু!’ ব’লে ডাক পেড়ে উঠল উৎপলা।

‘ওকে তুমি জাগিয়ে না, থাক্—তুমি জাগিয়ে না ওকে।’

‘খাবে না?’

‘না।’

‘রোজই তো না খেয়ে ঘুমুচ্ছে।’

‘ওকে এখন জাগিয়ে খাওয়াতে গেলে খাবে না কিছু, আমাদেরও খেতে দেবে না।’ মাল্যবান মনুকে কোলে তুলে নিয়ে বিছানায় রেখে এল।

উৎপলা একটা তোয়ালে দিয়ে টেবিলটা মুছে নিয়ে দু’টো চিনেমাটির ডিশ, কাচের গেলাস, একটা বড়ো পিরিচে নুন লেবু কাঁচালক্ষা সাজিয়ে নিচ্ছিল। একটা পারুল ফুলের মতো প্রকৃতির থেকেই যেন উৎপল জমিনের তাঁতের শাড়ি সে পরেছিল—চওড়া লাল পাড়ের। আশাতিরিক্ত ভাবে পরিতৃপ্ত কেমন একজন সীতা সরমা দ্রৌপদী চিত্রসেনীর মতন অপরূপ দেখাচ্ছিল তাকে।

‘এসো—খেতে এসো—’ উৎপলা বললে।

মাল্যবান চেয়ারে ব’সে বললে, ‘অমরেশ কখন এসেছিল?’

‘সন্ধ্যের সময়।’

‘আমি অফিস থেকে ফেরবার আগেই?’

‘তুমি কখন ফিরেছ, তাতো আমি জানি না।’

হ্যাঁ, অফিস ফিরেই ওর সাইকেলটা আমার ঘরে দেখলাম।’

‘সাইকেলে আসে না কি?’ উৎপলা বললে, ‘জানি না তো।’

‘আজ রাত দশটার আগেই চ’লে গেল! একদিন তো দেখলাম এগারোটা বারোটা না বাজলে নড়ে-চড়ে না। কে লোকটা?’

‘আমি চিনি না ওকে।’

উৎপলা খান-সাতেক লুচি মাল্যবানের পাতে দিল, খান-তিনেক নিজে নিল। দু’তিনটে বাটিতে বেগুনভাজা, ছোলার ডাল আর আলুর তরকারী ছিল। একটি সস্প্যানে দুধ ছিল—ঠাণ্ডা হয়ে গেছে। সবই মিইয়ে গেছে, লুচি কড়কড় করছে; কারুরই পেটে ক্ষিদে ছিল না যেন, কিন্তু তবুও এ জিনিসের কিনার ভেঙে,

ও-জিনিসটা খুঁটে, সে-জিনিসটা টিপে খুব গাফিলতি গড়িমসি ক'রে খেতে হচ্ছিল—খেতে খেতে দু'-একটা কথা বলবার জন্যে থেমে পড়েছিল।

'চেন না—তাহলে কি ক'রে ও তোমার ঘরের ভেতর ঢোকে?'

'এটা কি আমার বাড়ি?'

মাল্যবান বললে, 'এতদিন তাই তো জেনে এসেছি। আজ অমরেশ এখানে আসছে যাচ্ছে ব'লে আমার ঘাড়ে মালিকানার বোঝা ঠেলে তুমি ওর গতিবিধির কৈফিয়ৎ আমার কাছ থেকেই নেবে ঠিক করেছ?'

উৎপলা তিনখানা লুচির আধখানা খেয়েছিল এতক্ষণে, বাকি আড়াইটে দিয়ে কী করবে ঠিক করতে না পেরে আপাতত হাত গুটিয়ে মাল্যবানের দিকে তাকিয়ে বললে, 'আমার বাড়ি হোক, তোমার বাড়ি হোক, তোমার নাকের ওপর দিয়েই তো আমার ঘরে পান্ডা পাচ্ছে রোজ অমরেশ। কী করতে পেরেছ তুমি তার। কী করতে পারবে।'

মাল্যবান দু'খানা লুচি শেষ করেছিল, কিছু ছোলার ডাল, একখানা বেগুন-ভাজা। জলের গেলাসে চুমুক মেরে ঠোঁট জিভ ভিজিয়ে দাঁত ঠাণ্ডা ক'রে নিয়ে বললে, 'আমি তো জানতাম না যে ওকে তুমি চেন না।'

'কী মনে করেছিলে তুমি?'

'ওকে তুমি চেন না?'

'চিনি না বলেছি তো।'

'তোমার বাপের বাড়ির কেউ না?'

'না।'

'কলেজে তোমার সঙ্গে পড়েছিল?'

'আমি তো মেয়েদের কলেজে পড়েছি—সেকেন্ড ইয়ার অব্দি। তুমি দিশে হারিয়ে ফেলছ।'

'কেউই না—কোনোদিনই দেখনি ওকে এর আগে আর?' স্তম্ভিত হয়ে মাল্যবান বললে, 'তবে?'

'তবে মানে?' স্ক্রুটি ক'রে উৎপলা মাল্যবানের দিকে তাকাল।

'তবে তোমার দিনের পর দিনই খুব খুলছে মনে হচ্ছে,' মাল্যবান কোমলকঠিন চোখে উৎপলার দিকে তাকাল; কী একটা দাবি জানিয়ে অথচ তা প্রত্যাহার ক'রে তাকিয়ে রইল অনড়, অক্লান্ত চোখে কিছুক্ষণ। বললে, 'ও আসার পর থেকেই তোমার চেহারার ভেতর এমন একটা সরম সরসতা—যা আগে আমি দেখিনি বড়ো-একটা। তোমার কথাবার্তা ব্যবহার বিয়ের জল পেয়েছিল কি একদিন? মেঘের জল পাচ্ছে কি আজ? এখনকারটাই তো ভালো মনে হচ্ছে।'

গড়িমসি করছিল এতক্ষণ, উৎপলা এবার খেতে শুরু করল। ঠোঁট একটু নড়ল কি নড়ল না, হাসি ফুটে উঠতেই মিলিয়ে গেল মুখে, সে হাসিটা আমোদের—
ব্যথার—হয়তো গ্রস্থিমাংসপেশীর কেমন একটা অচেতন আক্ষেপের—

আধখানা লুচি খাওয়া হয়েছিল উৎপলার, বাকি আধখানা খাচ্ছিল।

‘অমরেশ তো দিন পনেরো হল আমার কাছে আসছে। চার পাঁচ ছ’ ঘণ্টা রাত কাটিয়ে যায়; বাতি জ্বলে ঘরে; বাতি নিভেও থাকে অনেকক্ষণ; আমরা মাঝে-মাঝে ভাবি তুমি হয়তো ওপরে আসছ; ওপরে এলে একটা কাণ্ডই বাধাতে তুমি—’ লুচির বাকি টুকরোটুকু খেয়ে ফেলে উৎপলা বললে, ‘তুমি বাধাতে কি না জানি না, তবে মানুষ তো মানুষ, ঝামেলা না হয়ে যায় না; বেখে যেতো এত দিনে; অমরেশও চুপ ক’রে থাকত না।’

‘কেন কী হয় ওপরে?’

‘আমি কেন তা বলব?’

‘তাহলে পরের ছেলেকে জিজ্ঞেস করতে যাব আমি?’

‘কেন তুমি নিজে ওপরে এসে নিজের চোখে দেখে যেতে পারবে না? পনেরো দিন তো হল। নিচের থেকে তরতর ক’রে লোকটাকে ওপরে উঠে যেতে দেখছ তো রোজই। নিচের ঘরে ব’সে মাঝে-মাঝে কথাও বলেছে তোমার সঙ্গে। কথাবার্তা শুনে কেমন মনে হয়েছে অমরেশকে তোমার?’

মাল্যবান কিছু খেতে গেল না আর। ঐঁটো হাতে একটা সিগারেট জ্বালিয়ে বললে,
‘লুচি খেলে না যে—’

‘ক্ষিদে নেই।’

‘অমরেশ কাল আসবে?’

‘আসবে বৈ-কি’, উৎপলা আর একখানা লুচির কিনার ভেঙে ক্ষিদে জাগিয়ে তুলবার সাহসিক চেষ্টায় নিজেকে আলোড়িত ক’রে তুলে বললে।

‘ওকে এ-বাড়িতে আসতে নিষেধ ক’রে দিতে পারবে তুমি?’

উৎপলা উঠে দাঁড়াল।

‘কী হল?’

‘ঘুম পেয়েছে।’

‘বোস, বোস, কথা আছে—’

‘না, না, বসতে পারছি না, দু’টো পায়ের গিঁটে গিঁটে ব্যথা করছে।’

‘কী বলবে বল, আমি দাঁড়িয়ে দাঁড়িয়ে শুনছি—’

মাল্যবান সিগারেটটা টানতে গেল না আর। জলের গেলাসের ভেতর সেটা ফেলে দিয়ে বললে, ‘অমরেশের সম্বন্ধে কী ব্যবস্থা করবে বল।’

উৎপলা নিজের জলের গেলাসটা মুখে নিয়ে খানিকটা জল খেল, বাকি কুলকুচো ক’রে ছাদের দিকে ফেলে দিল। টেবিলে ছোটো পিরিচে কয়েকটা পান ছিল। দু’টো পান মুখে দিয়ে মাল্যবানের দিকে বিলোড়িত—ক্রমে-ক্রমে শাস্তি মণ্ডিত কেমন একটা স্থির মমতায় তাকিয়ে হেসে বললে, ‘কোনো কিছু ব্যবস্থা করবার নেই?’

‘কী বলছ তুমি!’ উৎপলার দৃষ্টিশক্তির ওপর একটা পাখশাট মেরে যেন মাল্যবান বললে, ‘খ্যাল আছে, কী বলছ তুমি!’

‘যা বলছি, তাই বলছি,’ তেমনই দৃষ্টিতৃপ্তিতে মাল্যবানের দিকে তাকিয়ে একটুও ঝক না মেরে উৎপলা বললে, ‘তুমি না হয় কাল ওপরে এসে একটা বিহিত ক’রে যোগো—’

মাল্যবান উৎপলার মুখের ওপর থেকে চোখ নামিয়ে মনের ঢের বেশি চোখের আলোকপাতের কড়া ঝাঁক দিয়ে সমস্ত ঘরটা ভ’রে ফেলতে লাগল; ধীরে-ধীরে মনে আলো এল তার; দেখল, আলোটা ঠাণ্ডা হয়ে গেছে; মাল্যবান ভাবছিল, সে নিজে বিহিত কিছু করতে পারবে না; অন্ধকার রাতে পাঁচিল ডিঙিয়ে নিজের গাছেরও ফল চুরি করা বা যে চুরি করেছে তাকে ঠ্যাঙানো তার ধাতে নেই; ভালো হোক মন্দ হোক, কেমন একটা ধাত যেন তার; বন্ধুবান্ধব ডেকে হামলা করবার রুচি নেই; র’টে যাবে সব, যেটুকু বা সাংসারিক শাস্তি আছে তাও ছটকে ছত্রিশখান হবে। কিন্তু উৎপলা কি তাকে সাহায্য করবে না?

মাল্যবান গেলাসটার জল ছুঁড়ে ফেলে দিয়ে লোটার থেকে খানিকটা জল গড়িয়ে নিয়ে ঢক ঢক ক’রে গিলে খেল—হাত মুখ ধুয়ে ফেলল। ভালো লাগল, খানিকটা ঈশার শাস্তি সংস্থাপিত হল পৃথিবীতে যেন, কিন্তু তবুও বিজ্ঞানের ঘোড়া ডিঙিয়ে সাস্ত্রনার ঘাস খাবার প্রবৃত্তি মাল্যবানের ছিল না, সে ভেবে দেখল, উৎপলা আর অমরেশের সম্পর্ক সম্বন্ধে যা সন্দেহ করেছে স্বামীর চল্লিশ বছর পেরিয়ে গেলে—আজকালকার পৃথিবী যা তাতে আটাশ বছরের রুপসী শঙ্খিনী স্ত্রী সম্পর্কে সে রকম সন্দেহ সে না করতে পারে যে তা নয়। কিন্তু উৎপলা মোটেই সে জাতের মেয়ে নয়, তাকে অবিশ্বাস করা ঠিক নয়। অমরেশ আসে রোজই বটে, কয়েক ঘণ্টা কাটিয়ে যায়, কিন্তু ওরা বোন-ভাইয়ের মতো; বড়ো জোর জামাই-শালীর মতো সম্বন্ধ ওদের, এর চেয়ে বেশি কিছু নয়—জীবনের সং ও অসৎকে নিয়ে মাল্যবানের নিরবচ্ছিন্ন বিশ্লেষণ ঘিরে মাক্রোপোলো সিগারেটের নীল ধূসর ধোঁয়ার নীলাঞ্জন

মাল্যবানকে কেমন একটা আশ্চর্য নিশ্চিত্তার ভেতর সমাধিপ্ৰীত ক'রে রেখে দিল, কোনো কথা ভাববার দরকার বোধ করল না সে আর।

‘অমরেশের খুব টাকা আছে?’

‘না। বিশেষ কিছু নেই।’

‘তবে,—আমাদের চেয়ে বড়োলোক?’

উৎপলা অত্যন্ত ছাড়া গাছাড়া ভাবে বললে, ‘বলতে পারছি না। তা হতে পারে।’

‘দেখে তো মনে হয় বনেদি ঘরের ছেলে।’

উৎপলা টেবিলের ও-কিনারে দাঁড়িয়েছিল, এ-কিনারে এসেছিল, কখন ও-দিককার কিনারে চ'লে গিয়েছে আবার, দাঁড়িয়ে দাঁড়িয়েই ছিল, বসছিল না, বললে, ‘ও, তুমি কেবল টাকা আর বংশের কথাই ভাবছ। আমি ওসব নিয়ে মাথা ঘামাতে যাই না। ওদের খুব বড়ো জমিদারি ছিল অনেক শরিক হয়ে পড়েছে। জমিদারিতে ভাঙন ধরেছে—এখন বিশেষ-কিছু নেই—’

‘বয়স কত অমরেশের?’

‘এই ছত্রিশ-সাঁইত্রিশ হবে—’

‘স্ত্রী কেমন?’

‘সেকেলে জমিদারদের যে রকম হয়—’ যেন বার্তা বহন করছে, আর-কিছু নয়, শান্ত ঠাণ্ডা ভাবলেশহীনতায় উৎপলা বললে, এক আধ ফোঁটা রক্ত কণিকায় তবু নিজেকে নিজের কথাকে চারদিককার শীত রাতের আবহকে কেমন একটা বার্তাভীততা দান ক'রে।

‘ও তো সেকেলে নয়—ও তো এখনকার—’

‘হ্যাঁ, ও নিজে মনে ভাবে যে ও আগামী যুগের’, উৎপলা ঢিলে হাসি হেসে খানিকটা গ্রন্থিমাংসপেশীর আক্ষেপে কেঁপে উঠে অবিশ্বাসে অথচ শিশুকে প্রশয় দেবার মতো একটা হতবল অকপট হাসিতে কাতর হয়ে উঠে বললে, ‘ওর মাথায় অনেক বিদ্যে। কিন্তু ওর পরিবারটা ওকে পিছে টানছে, ওর ছেলেপিলে তিনটে, এই মাঘে আর একটি হবে।’

‘এত কথা তুমি জানতে পেরেছ,’ অন্ধকারের ভেতর কেউটের মতো নড়ছে একটা মহিষের লেজ, তার মুখোমুখি যেন এসে প'ড়ে বললে মাল্যবান।

উৎপলা পানের পিরিচের থেকে একটা পান তুলে নিয়ে অন্যমনস্কভাবে রেখে দিল আবার। পিরিচে মশলা ছিল, আঙুল দিয়ে সেগুলো ঘুরিয়ে ঘুরিয়ে যেঁটে একটা লবঙ্গ তুলে নিল। লবঙ্গটা দাঁত দিয়ে কাটতে কাটতে বললে, ‘অমরেশ তো আমার এখানে

রোজ আসে। আমার এখানে অনেক রাত অন্ধি থেকে। সব কথাই বলে আমাকে। কেন জানতে পারব না সব?’

মাল্যবান চিতাবাঘের মতো মুখ খিঁচোতে গিয়ে গৃহবলিভূকের মতো ক্লাস্ত ক্লিষ্ট চোখে বললে, ‘ও কি নিজেই সব বলে—সব করে? তুমিই তো ওকে দিয়ে বলাচ্ছ। রাত বারোটা-একটা অন্ধি ও এখানে থাকে—তুমি আছ, তাই, তুমি ওকে থাকতে দিচ্ছ ব’লে। এর কোনো বিহিত করবে না?’

‘এর কোনো বিহিত নেই।’

‘নেই?’

‘নেই। কোনো নালিশ কোরো না তুমি।’

উৎপলা অন্তর্ভেদী অনিমেষ দৃষ্টিতে মাল্যবানের দিকে তাকাল, এমন মমতার সঙ্গে তাকাল সে—ভালোবাসার এমন গভীর আবেশে!—মাল্যবান উৎপলার চোখের দিকে তাকিয়েছিল—তাকাতে-তাকাতে তাকাতে পারল না সে আর।

‘শোনো।’

মাল্যবান উৎপলার চোখের দিকে ফিরে তাকাল আবার। কিন্তু তাকিয়েই রইল সে। উৎপলাও মাল্যবানের চোখে চোখে রেখে দাঁড়িয়ে রইল। দু’জনেরই খুব ভালো লাগল। কিন্তু এ তো পরলোকের ঐয়োতি নিবিড়তা—জীবন নদীর ওপারে—হয়তো হবে কোনো দিন—হয় তো হবে না।

‘বলো।’

‘বলেছিই তো।’ বললে উৎপলা।

‘অমরেশের মতন একটা অচ্ছৎ—’

‘অচ্ছৎ মানে? ও তো বামুনের ছেলে—’

‘বেশ্যাটা এখনও আসবে তোমার কাছে?’

‘তুমি বড়ো বিশী কথা বল’, কোথাও আগুন নেই যেন ছাই-এর ভেতর, তবুও সর্বব্যাপ্ত আঁচ রয়েছে সেই নিশ্চল উনুনের মতো তাপ ছড়িয়ে উৎপলা বললে। শীতের রাতে তাপটা খারাপ লাগছিল না মাল্যবানের। উৎপলা দাঁড়িয়ে দাঁড়িয়ে তাপ বিকীরণ ক’রে কোনো-একটা অপরিচিত অন্যতর কুহর থেকে তাপ সঞ্চয় ক’রে নিয়ে বললে, ‘ওতো দশটা-এগারোটা অন্ধি থাকে। এখন দু’টো। শীতের রাতটা পেকেছে এখন—’

‘পেকেছে?’ উৎপলার ইচ্ছুক অনুগত শরীরের দিকে তাকিয়ে মাল্যবান নিজেকে একটু সামলে নিয়ে বললে, ‘কাকে বলে পাকা শীত রাত?’

‘এই তো এই সময়টা—’

‘কিন্তু, এই সময়টা তো সব সময় থাকবে না, ভেঙে যাবে তো সব কালকে ভোর বেলা।’

‘ভোর হবে না আর।’

‘কী ক’রে বলছ তুমি?’

মাল্যবান উঠে দাঁড়াল। স্নিপারের ভেতর পান গলিয়ে গায়ের চাদর আঁট ক’রে নিয়ে ঘরের চারদিকের অন্ধকারের দিকে চোখ বুলিয়ে নিতেই দেখল উৎপলা তার আরো অনেক কাছে এসে দাঁড়িয়েছে।

দু’জনে বিছানায় শুল গিয়ে। উৎপলা মাল্যবানকে বললে, ‘ভোর হবে না আর, জানতে হবে না। দেখো শীতের রাত কী রকম শীত, খড়ের বিছানায় হাঁস-হাঁসিনের মতো কী রকম উম আমাদের দু’জনের। আবার দেখবে কী রকম লম্বা এ-সব রাত, শীতের রাত সত্যিই কী যে চমৎকার, লম্বা ব’লে আরো ভালো। সত্যি, কোনোদিন শেষ হবে না আর।’

মাল্যবানের আশ্চর্য লাগছিল। কোনোদিনও যে জেগে উঠতে হবে না আর, শীত যা সবচেয়ে ভালো, এই বিশৃঙ্খল অধঃপতিত সময়ে সমাজে রাতের বিছানা যা সবচেয়ে শ্রেষ্ঠ, সেই শীত রাতের কোনোদিন শেষ হবে না আর, উৎপলা সব সময়ই মাল্যবানের সময় ঘেসে থেকে যাবে অনিশ্চেষ্ট শীত ঋতুর ভেতর। এইসব অপরূপ লাগল তার। কিন্তু জ্বুও কী ক’রে তা হয়? ইতিহাস নেই? বিভেদ ক’রে চলে যেতে দিয়েছে মাল্যবানকে নিয়ে উৎপলাকে? সময় তো আছে? সময় নেই? ছেদ ক’রে চলে গেছে তাকে নিয়ে সকল সময়কে উৎপলা? গভীর গভীর এই শীতের রাত। অনির্বচনীয়—যখন নদীর থেকে নয়, শুকনো শক্ত চুনী পান্নার ভেতর থেকে জল বরছে; সেই জলদেবীকে নিয়ে এ-রকম শীতের রাতে শুয়ে থাকা।

‘কোনোদিন শেষ হবে না রাতের?’

‘না।’

‘কোনোদিন শেষ হবে না আমাদের রাতের, উৎপলা?’

‘হবে না। হবে না।’

‘শীতের রাত ফুরাবে না কোনোদিন?’

‘না।’

‘কোনোদিন ফুরাবে না শীত, রাত, আমাদের ঘুম?’

‘না, না, ফুরাবে না।’

‘কোনোদিন ফুরাবে না শীত, রাত আমাদের ঘুম?’

‘ফুরবে না। ফুরবে না।’

‘কোনোদিন ফুরবে না শীত, রাত, আমাদের ঘুম?’

‘না, না, ফুরবে না।’

‘কোনদিন ফুরবে না শীত, রাত, আমাদের ঘুম?’

‘ফুরবে না। ফুরবে না। কোনোদিন—’

আলোড়িত হয়ে কথা বলতে-বলতে কেমন আলো-অন্ধকার, সূর্য, শিকরে রাজ, বড়ো বাতাস, মাতৃগণ, গণিকাগণ, উৎপলার অট্টহাসি, সমুদ্রশব্দ, রক্তশব্দ, মৃত্যুশব্দ, অফুরন্তশীত রাতের প্রবাহের রোল শুনতে শুনতে মাল্যবানের ঘুম ভেঙে গেল। টেবিলের ওপর মাথা রেখে ঘুমুচ্ছিল সে। তাকিয়ে দেখল ঘর অন্ধকার; টেবিলের থালা বাসন সমস্ত সরিয়ে এঁটো পরিষ্কার করা হয়েছে কখন যে সে তা টেরও পায়নি; টেবিল ফিটফাট পরিচ্ছন্ন—কালো সরীসৃপের পিঠের মতো চকচক করছে। মাল্যবান বুঝতে পারছিল না কখন সে ঘুমিয়ে পড়ল। এই যে এইমাত্র উৎপলাকে দেখছিল, বিছানায় শুয়েছিল, কথা শুনছিল—এ সব তাহলে ঘুমের ভেতর দেখা, নিজ্জর্ন পরলোকের কণ্ঠে শোনা? জেগে থেকে তাহলে সে কোন অন্ধি শুনেছিল। মাল্যবান ঘাড় হেঁট ক’রে অন্ধকারে বুঝে নিতে চেষ্টা করছিল।...

মনে পড়ল তার। মনটা তার বড়ো খারাপ হয়ে গেল। কিছু হবে না, কিছু সে করতে পারবে না বলে উৎপলা তারপর মাল্যবানকে এঁটো টেবিলে ঘুমিয়ে পড়তে দেখল; এঁটো পরিষ্কার করল; মশারী ফেলল; বিছানায় শুয়ে ঘুমিয়েও পড়ল;—কিন্তু মাল্যবানকে জাগিয়ে দেওয়াও উচিত মনে করল না?